


UNIVERSITY OF TORONTO



3 1761 00004218 4



~~1/27/11~~ 1/1/11

79
20 | 11

3
/ A

13 rA

L 5/57-

T. LIVII PATAVINI
HISTORIARUM LIBRI


QUI SUPERSUNT OMNES
CUM INTEGRIS JO. FREINSHEMII SUPPLEMENTIS

PRÆMITTITUR VITA
A JACOBO PHILIPPO TOMASINO CONSCRIPTA

CUM NOTITIA LITERARIA

ACCEDIT INDEX

STUDIIS SOCIETATIS BIPONTINÆ



EDITIO ACCURATA

BIPONTI
EX TYPOGRAPHIA SOCIETATIS

CICCCCCLXXXIV
bel

PREAU

PA
6452
A2
1784
v.1



887646

TITUS LIVIUS.

TITI LIVII PATAVINI V I T A

A. JACOBO PHILIPPO TOMASINO CONSCRIPTA. *

TITI LIVII PATAVINI civis, & Historici præstantissimi, qui res gestas Romanorum eloquentia mira digessit, *effigiem* veneramur hoc loco; quæque de illo monumenta passim exarata leguntur, colligimus, ut amantes Historiæ, & Antiquitatis studiosi, quique uno intuitu salutare eandem, tantique viri virtutes, & gloriam æmulari possint. Vitam ejus & decora plurimi tetigere. Unusquisque in eo celebrando secum & cum aliis certat. Latini Germanique scriptores omnes singularem illius præstantiam admirantur. Nullus est, quem dictionis illius candor ac lepor non in sui commendationem & amorem rapiat vel invitum. Ego sane, etsi me hæ quoque deliciæ tangant, amore patriæ ductus, cui natus historicus talis ac tantus, felicibus hisce temporibus, quibus, Te duce & auspice, illustrissi-

* Jac. Philippi Tomasini Episcopi Æmoniensis Titus Livius Patavinus. Editio novissima, aucta, emendata &

figuris æneis adornata. Amst. Sumptibus Andr. Frisii. 1670. 16.

me & excellentissime *Moline*, literarum omnium studia reviviscunt, & antiqua quæque monumenta lucem hauriunt, non tam *T. Livii vultum*, quam *vitam* ejus, *natales* scilicet, *parentes*, *mores*, *studia*, *honores*, *facinora*, *monumenta*, *mortem* ob oculos tum nostris, tum posteris mihi proponenda duxi, claris ab ejus *natalibus* sic exorsus.

CAPUT I.

LIVII natales, patria, parentes, educatio, studia.

TITUM LIVIUM Patavii, bonarum artium emporii, clarissimis e parentibus natum, nemo ambigit. Exstant gravissimorum virorum testimonia multa, quæ nos *genus* ejus & *patriam* ignorare non sinunt. *Afinius* ipse *Pollio* Patavinum illum agnovit, dum Patavinitatem ejus animadvertit. *Symmachus* epistola XVIII non alibi ortum voluit: non alibi *Sydonius* in Panegyrico *Anthemii*: non alibi denique *Martialis*, cum ad *Licinianum* scripsit Libro I Epigrammatum:

*Censetur Apona Livio suo tellus,
Stellaque, nec Flacco minus.*

Livium quoque Patavii natum *Statius Papinius* duxit, cum illum *alumnus Timavi* dixit. Id ipsum *Albertinus Mussatus* innuit in prologo *Historiæ suæ*

de gestis Henrici VII Augusti, *archigraphum Patavinum* vocans *T. Livii* stilum, quod illi contigisset sub Patavino cœlo lucis hujus communis usura frui. Unde in Carminibus suis Musflatus idem, semet ibi loci explicans, cecinit:

Plaudat archigraphi si non mihi tibia Livi.

Subscribunt his Merulæ duo, Gaudentius scilicet; lib. II Antiq. Galliæ Cisalpinæ cap. XI, Patavinam urbem *T. Livio* Historico & Oratore facundissimo maxime nobilitatam tradens, & Paulus Libro III Cosmographiæ Par. II his versibus, qui sunt Adriani Romani in Theatro Urbis:

*Salve Urbs, doctiloquis sedes aptissima Musis,
Magna loco, spatiosa foris, placidissima cœli
Temperie, muroque triplex, latissima fossis,
Et magnis celebrata viris. Hac Livius, ille
Historiæ pater, est genitus: servantur eodem
Illius ossa loco, statuis, tituloque superbo,
Hic, ubi juncta foro nullis fulcita columnis
Plumbea marmorei pulchre stant tecta Palati.*

Inde Sabellicus, scriptor insignis, in Oratione; quam habuit in *Livium*, sic ejus in laudem exorditur: *Cum totam Livii vitam inspicio, omnia illi affuisse videntur, quæ ad felicitatem consequendam pertinere creduntur, celebris patria, populare nomen, temporum felicitas, maturitas studiorum, sublimis ad*

scribendum materia, summi Principis favor, & in studiosos beneficentia, ut benignior natura larga manu tot & tanta in unum contulerit, quot & quanta in alium eorum, qui Historiam scripserunt, quod sciam, neminem. In quibus perscribendis, ornandis, disponendis non solum ille non sibi defuit: sed (quod est omnium iudicium, ipseque studiorum exitus demonstrat) longe etiam superfuit. Nunc quod ad patriam attinet. Quid secundum Romam fuit olim tota Italia Patavio clarius? cujus urbis si originem quæras, ab Ilio est: si auctorem originis, Antenor condidit, Trojanorum post Priamum, celeberrimus: si opes, centum & amplius hominum millia olim misit ad bellum, CCC equestris ordinis ex suo corpore censuit: si eruditionem, omnium bonarum artium est hodie domicilium: & quod omnium maximum est, maximeque conspicuum, cum per hæc satis esset nobilis, clarissimo partu multo facta est nobilior.

Fuere nihilominus, qui non Patavii, sed Aponi, natum illum traderent, Martialis auctoritate freti, & in his Sigonius, cujus ista sunt in Opusculo de Historicis Romanis: *T. Livius Patavinus e vico Aponi, calidis aquis celebri, ab Urbe condita ad Neronis Drusi obitum, qui fuit anno Urbis MDCCXII, libros Historiarum conscripsit. Sed in epigrammatario Vate Apona tellus, urbem Patavinam sonat, ab Apono, nobili haud procul ab illa fonte, celebrato*

multis ; sed inprimis Claudiani Poemate singulari. Quidam etiam *Titulo* , Vico non ignobili inter Euganeos colles , *T. Livii* natales adscribunt , indeque *Titi* prænomen illius trahunt. Atqui *Titus* prænomen Romanum erat : ob idque credendum potius , *Tituli* vicum a *Livio* nostro dictum , quam illi prænomen de suo nomine peperisse. Verum enimvero abutentis est otio hujusmodi somnia literis consignare.

Quid quod *Liviam* Familiam inter nobiles & illustres Patavinas locant inscriptiones multæ : nec ulla earum *Livium Titulensis* villici filium fuisse prodit ? quin & illum editum præstantissimo patre (licet nobis illius nomen vetustas inviderit) liberalis ejus educatio , studia , & accessus Romam , ut *Augustæ* aulæ inferviret , facere palam possunt.

Natus ille porro Patavii , an. m. MMMMMCXLIH , Olympiade CLXXX , anno II , quo & natus M. Valerius Messala , teste D. Hieronymo in *Chronicis* , quem laudat etiam *Vossius* Lib. I de *Historicis Latinis* , & *Cremutius Cordo* apud *Tacitum* Lib. IV *Annalium*.

Primo ætatis vere singulare statim illius ingenii acumen emicuit , cujus in fronte , vultu , & oculis habitare humanitas , fides in pectore , gravitas demum & comitas unanimes videbantur.

Nihil eo venustius , nihil amabilius fingi poterat.

Factus erat omnino ad studia, laboreſque ferendos; quos ſecum illa perpetuo trahunt, excellenti quadam animi magnitudine præditus, & ad ſummas res agendas ſemper intenta. Quamobrem a parentibus in literariam palæſtram miſſus, egregia ſua indole, ingenio perſpicaci, vaſta memoria, primis in artibus mire profecit. Mox Philoſophiæ opera præſtita, naturæ totius arcana exhaustit. Inde Jurisprudentiæ & Politicæ ſe totum addixit, ut ornatum verborum & copiam, naturæ donum, ſententiarum ponderibus auget. Ad hæc eximias animi ſui doctes, præclariffimis e natalibus uberrime derivatas, ſummo ſtudio jugique labore cœpit excolere, quo poſſet ubique terrarum & gentium ceteris elucere. Varietate quidem ſententiarum & idiomatum, inſignique ſermonis & orationis ſupelleſtile ſatis jam inſtructus domi, ſecretum larem pertæſus & patriam, alio vocatus eſt: & inprimis Romam, ut eo in theatro univerſi orbis præſtantiæ ſuæ radios undequaque diffunderet, explicaret.

C A P U T I I.

ACCESſUS ejuſdem Romam & res ibi loci geſtæ.

ROMAM igitur acceſſit, Patavio relicto, Livius, aureo vigente ſeculo Auguſti Cæſaris, qui totius terrarum orbis habenas moderabatur unus, pacatis

ubique rebus, sedatis bellis, Jani templo ter clauso, ex Suetonii fide in illius vita, Cap. XII, Orosii, lib. VI, Cap. XXII, Dionis, lib. LI, & Æde Musarum aperta, verus literarum & literatorum Patronus ac Pater, qui Tibi, Senator amplissime, tituli nunc debentur. Augusto nempe sub principe, pulchriores literæ, ac splendidiore artes, quasi vepris exutæ, florido late germine pullularunt: Romanque, tunc rerum dominam, viri quique docti ex omni terrarum orbis angulo convolabant. Hic Livius tantæ urbis majestatem mentis & corporis acie contemplatus, Augustum sibi primo in limine, nec absque munere, venerandum duxit. Quamobrem *Dialogos*, quos in urbe patria de *Philosophia* conscripserat, Augusto detulit, dicavitque lubens ac libens. Excepit illos Imperator acerrimus ingeniorum æstimator & cultor, hilari, qua fronte talia consuerat, & in iis auctoris præstantiam admiratus, Livium statim in sui tutelam recepit, amplissimis ante muneribus exornatum. Patuit illi tandem ad Herois tanti familiaritatem aditus: ideoque scriptum reliquit Cremutius: *T. Livius eloquentiæ ac fidei præclarus in primis, cum Pompejum tantis laudibus tulit, ut Pompejanum eum Augustus appellaret, neque id amicitia eorum offecit.* Pertinet illud etiam ad Livii nostri nomen & famam, quod a Suetonio literis proditum accepimus in Claudii vita,

unum illum e cunctis præstantissimis Rhetoribus ævi sui Claudio Cæsari adolescenti præceptorem datum, ut illum eloquentiæ studiis & dignis imperio moribus informaret. Facit huc etiam, quod ipsemet Livius testatus est lib. IV, ubi loci Augustum templorum conditorem aut restitutorem appellat.

Historiam Romanarum rerum sub Augusto Cæsare collegit, & juvenem Claudium, eandem ut scriberet, adhortatus est, ingenii illius præstantia probe cognita & perspecta. Arripuit Livii consilium Claudius, & justam historiam instituit, qua de re Suetonius testis, in illius vita, cap. XLI: *Historiam in adolescentia, hortante T. Livio, Sulpitio vero Flavo etiam adjuvante, scribere aggressus est. Et paulo post: In principatu quoque & scripsit plurimum, & assidue recitavit per lectorem. Initium autem sumpsit historiæ post cædem Cæsaris Dictatoris. Sed & transiit ad inferiora tempora, cæpitque a pace civili; cum sentiret, neque libere, neque vere sibi de superioribus tradendi potestatem relictam, correptus sæpe & a matre, & ab avia. Prioris materiæ duo volumina, posterioris unum & quadraginta reliquit. Composuit & de vita sua octo volumina, magis inepte, quam ineleganter, &c.* Priscianus etiam lib. VI, fragmentum ex Historiarum Claudii libro quarto citat; & ex octavo Diomedes lib. I. Quæ inter fragmenta Q. Claudii Quadrigarii relata notat a viris doctis Vossius lib. I. de Historicis La-

tinis, cap. XXV. Hujus occasione facile credere est, multa collegisse Livium, nec non & ex Augusti Cæsaris opera, qui pariter Romanam Historiam conscripsit, alia quamplurima annotasse, quibus demum ex omnibus, ut Cæsarum istorum, aliorumque desideriiis satisfaceret, Historiam amplissimam sibi conscribendam statuerit, &, quod privatis commentariis seposuerat, latius explicarit, diffuderitque in Historiæ campum. Quam exorsus ab U. C. eandem perduxisse fertur usque ad bellum Germanicum Drusi, Augusti Cæsaris privigni. Eam vero partim Romæ contexit, partim Neapoli, ubi, animi recreandi gratia, morabatur interdum, & otio inibi dulci perfruens, Romanorum gesta immortali facundia immortalitati dicabat, Stephano Vinando Pighio teste in Hercule suo Prodicio, ubi loci commendans clementiam Neapolitani cœli, ita differit de viris doctis, & nobilibus ingeniis, a quibus studiorum causa ea civitas fuerit frequentata: *Constat, T. Livium Patavinum historicum, Q. Horatium Flaccum, Statium Papinium, Claudium Claudianum, poetas celebres, Annæum Senecam philosophum, aliosque infinitos, qui ingenio scriptisque suis præclaris nomen sibi pepererunt immortale, sæpius eo studiorum causa secessisse.*

CAPUT III.

ELOQUENTIA clarissimorum virorum elogiis jure ac merito celebrata.

QUANTA sit eloquentia Livii, quanta in dicendo suavitas, nemo non sentit, (ut Oſii verbis utar in notis illius philologicis, historicis, aureis in Augustam historiam Albertini Muſſati) nisi, cui nullus sit ejus jucunditatis sensus, quam secum afferre consuevit lactea dicendi vis, nullis uspiam salebris impedita fluens. Affluit enimvero in illo sententiarum ubertas, copiaque verborum talis ac tanta, jure ut lacteus, & uberrimus eloquentiæ fons, Musarum lac, mare tranquillum, Historiæ anima, scriptorum reliquorum norma, idea, majestas fuerit appellatus. Audiamus viros alios longe clarissimos, sese in illius eloquentiæ laudem effundentes, & imprimis Quintilianum, ita de illo scribentem lib. X, cap. I: *At non Historia ceſſerit Græcis, nec Thucydidi opponere Sallustium verear: nec indignetur Herodotus æquari sibi T. Livium, cum in narrando miræ jucunditatis, clarissimique candoris, tum in concionibus supra quam enarrari potest eloquentem: ita dicuntur omnia cum rebus, tum personis accommodata. Sed affectus quidem, præcipue eos, qui sunt dulciores, (ut parcissime dicam) nemo Historicorum commendavit magis; ideoque immortalem illam Sallustii*

velocitatem diversis virtutibus consecutus est. Nam mihi egregie dixisse videtur Servilius Nonianus, pares eos magis, quam similes.

Audisti Quinctiliani de Livio melos: aures nunc accomoda lepori Philippi Beroaldi, qui Bononiæ natus, anno CIOCCCL, Friderici & Maximiliani temporibus literis hisce nostris inclaruit: *Cum omnes haud dubie suspiciendos & lectitandos esse censeam, T. Livius imprimis narratione dignissimus mihi visus est, & jucunditatis utilitatisque inter alios referatissimus, cujus lectio omnium Scholasticorum moribus animisque satisfactura sit. Est enim dulcis, candidus, & eo nullus Historicorum melius commendavit mitiores affectus: apud quem omnia cum rebus, tum personis sunt accommodatissima: cujus divinæ facundiæ nihil addi potest: cujus orationi, si quid demas, ex elegantia detraxeris, quemadmodum de Platonis oratione Phavorinus dicere solebat. Idem grandiloquus est, & sententiarum gravitate, & majestate verborum. Idem copiosissimus, nec tamen longus. Nam, ut inquit egregie Martialis:*

Non sunt longa, quibus nihil est, quod demere possis.

Audisti & Stephanum Nigrum, virum eloquentem & gravem. *O fortunatissime Popule Romane, qui rerum a te gestarum præconem Historicorum præstantissimum T. Livium habueris, cujus miram in narrando jucunditatem, clarissimumque candorem, &, su-*

pra quam dici potest, in concionibus eloquentiam cum rebus, tum personis accommodatam, quis unquam satis dignis prosequi laudibus posset? Nam ad ejus in dicendo multiplices virtutes pro meritis & dignitate laudandas divina procul dubio opus esset oratione.

Differit & eloquentissime de eloquentia Livii Georgius Trapezuntius in Rhetoricis hac verborum pompa: *T. Livius grandis circumductione supra quam dici possit, in qua summa est claritas: fusus aequalisque adeo, ut lacteo par flumini sit ipsius oratio.*

Et alii, quorum e numero mihi minime praetercundi Bernatius Lib. I de utilitate legendae historiae: *Princeps Latinae historiae audit Livius, si magnitudinem operis ac nitorem phrasum spectes.* Gaudentius Merula Lib. II de antiquitate Galliae Cisalpinae cap. XI, ubi de Patavina urbe ei scriptori sermo: *Nobilitata est maxime T. Livio & historico & oratore facundissimo, quem vel acerrimi vir ille ingenii Fab. Quintilianus historicis omnibus & Graecis & Latinis praepone videtur.*

Nec defuere, qui libere testati sunt, certare posse *Livium* cum eloquentiae parente *Tullio*; quin hunc illo inferiorem omnino futurum fuisse, si quando scribendae historiae animum adjecisset. Adde his *Vopiscum*, *Livium* inter viros *disertissimos* recensentem in *Probo*, quod & factum a *Seneca de Ira*, & *Gerardo Jo. Vossio* lib. I de Historicis Latinis Cap.

XIX, qui & elogiorum reliquorum summam ita confecit : *Nihil hoc scriptore est grandius , atque uberius.* Dignus ob id Livius semper est habitus , qui ad Romanæ historiæ cognitionem , prudentiamque civilem cum eloquentia comparandam , studiosis adolescentibus omnibus proponeretur , unusque præ ceteris in manibus haberetur. Hinc illa Quintiliani lib. II , Cap. V : *Livius a pueris magis legendus , quam Sallustius , & hic historiæ majoris est auctor.* Legit Barthius in Adversariis : *Sit hic historiæ majoris auctor.* Et Statii lib. IV , Silv. VIII.

*Sed tuus artes puer ante discat ,
Omne quæ mundi senium remersus
Ora Sallusti brevis , & Timavi
Reddis alumnum.*

C A P U T I V.

FAMA nominis & existimatio.

VEL ex hoc uno T. Livii existimatio ac gloria spectetur , quod non solum studiosi , quique eum venerabantur ; Augustus ipse summo amore ac singulari benevolentia prosequeretur , admirante universo Senatu , Populoque Romano ; sed orbi toti notissimum multi ex ultimis Hispaniæ Galliarumque finibus viri illustres Romam adibant , ut unum illum , lacteo eloquentiæ fonte manantem , contue-

rentur. Tale Livii viventis adhuc & florentis nomen existisse, diferte prodidit Plinius, in hæc verba scribens, lib. II Epist. III ad Nepotem: *Nunquamne legisi Gaditanum quendam, T. Livii nomine gloriaque commotum, ad visendum eum ab ultimo terrarum orbe venisse, statimque, ut viderat, abiisse.* Quo spectans D. quoque Hieronymus, sic ad Paulinum scripsit: *Ad T. Livium lacteo eloquentiæ fonte manantem, de ultimis Hispaniæ Galliarumque finibus quosdam venisse nobiles legimus, & quos ad contemplationem sui Roma non traxerat, unius hominis fama perduxit.* Et statim: *Habuit illa ætas inauditum omnibus sæculis, celebrandumque miraculum: ut tantam urbem ingressi, aliud extra urbem quærent.*

Arguit ad hæc Livii nostri gloriam, existimationem, ac famam L. Magii generi ejus nomen, quod inter primos Rhetores ob existimationem foceri fortitus est. Unde Seneca: *Pertinere ad rem non puto, quomodo L. Magius, gener T. Livii, declamaverit, quamvis aliquo tempore suum populum habuerit, cum illum homines non in ipsius honorem laudarent, sed in foceri ferrent.*

C A P U T V.

M O N U M E N T A ingenii.

FAMAM vero Livio tantam, quantam sibi mortaliū quisquis optare posset, peperere divini illius

ingenii monumenta. Scripsit enim in patria *Dialogos de Philosophia*, quibus res morales ac politicas complexus est. Notos illos habuit Seneca, suumque de illis iudicium ferens epistola centesima, *Nomina*, inquit, *adhuc T. Livium. Scripsit enim & Dialogos, quos non magis philosophiæ annumerare possis, quam historiæ: & ex professo philosophiam continentes libros.* Scripsit & de arte Rhetorica cultissimam, & numeris omnibus absolutissimam epistolam ad filium, cujus meminit Quintilianus Institutionum Oratoriarum lib. X, cap. I, his verbis: *Fuerit igitur brevitatis illa tutissima, quæ est apud Livium in epistola ad filium scripta, legendos Demosthenem, atque Ciceronem.* Sed horum, heu! nihil operum exstat. periire scilicet, nec fat scio temporum injuria, an hominum invidia pessimorum? Historiam post hæc aggressus est scribere Romanarum rerum, quam centum & quadraginta libris absolverat, licet pars tantæ molis exigua nunc superfit. Tringinta nempe libri tantum & quinque ejus ad nos Historiæ pervenere, deperdita, aut latitante secunda decade, eaque parte, quæ sequebatur librum quadragesimum quintum, præter argumenta, quæ Liviana epitome nominantur, & sub Flori nomine celebrantur. Ceterum, cum Livii nostri tres solas decades haberemus: proxime superioribus annis lucem acceperunt quinque alii li-

bri nuper in Germania, in urbe WORMATIÆ trans Rhenum, a Simone Grynæo in Bibliotheca monasterii Lauriffeni reperti.

Corrigendus enim isthic est Scardeonius, qui hosce libros in provincia WORMATIÆ repertos tradidit. Wormbs enim civitas est Vangiorum, qua de videatur P. Bertius lib. III rerum Germanicarum Com.

Anno demum CIOCCCCXVI Romæ a Gasparo Lufignano editum est fragmentum lib. XLIII Livianæ Historiæ, depromptum ex Codice vetusto Bibliothecæ venerabilis Capituli Ecclesiæ Bambergensis, indeque Romam a Francisco Bartholino Urbinate J. C. delatum, quod uti genuinum, virtutum omnium, Principum, Cardinalium & Pontificum multorum gratia vir longe clarissimus *Antonius Quærengus*, Patavinus, seculi nostri Maro, & utriusque Signaturæ Referendarius, alique viri ex Germania præstantissimi probavere. Etsi aliter verbis istis fenserit Vossius lib. I, cap. XIX de Historicis Latinis: *At qui nuper, tanquam Livii genuinam, libri XLIII partem majorem, e veteri, ut ait, bibliotheca, primus juris publici fecit, næ ille sucum fecit auritis Midis, non illis, quibus corniculis esse datum est, & qui norunt, quid æra lupinis distent.*

De partibus quidem legitimis Livii perhonorifice sensit & scripsit Franciscus Petrarcha: *Miraculo proximum, ut ad T. Livii opus, ne dicam imitandum, sed nec ad scribendum quidem, vix unius hominis vita sufficiat.*

Ubi illud quoque operæ pretium fuerit annotasse, superstites adhuc Livii libros nequaquam ab illo fuisse in Decades distributos. Qua de re Petri Criniti testimonium omnium aliorum instar, mihi quoque necessario producendum, adversus ab his alia sentientes, ex capite XII, lib. VII de honesta disciplina. *Falso receptum est (inquit Crinitus) ac doctioribus etiam persuasum, fuisse in Decades divisum T. Livio suum opus de Romanorum gestis, quæ singulæ decem voluminibus explicantur, quod ipsum de auctore Livio nequaquam apud veteres comperias. Nam & Priscianus, vir diligens, aliique Grammatici, sicubi Livium citant, librorum numerum adscribunt, neque Decades nominant. Itaque & XVI librum & XXXIII & CXVI videmus advocari ab antiquis auctoribus. Cui sententiæ & Franciscus Petrarcha adspulatur, ut qui asserat in epistola ad Joannem Boccaccium, ignavia legentium contigisse, ut Liviana Historia sit in Decades distributa. In partes, inquit, quas Decades vocant, non ipse, qui scripsit, sed fastidiosa legentium desidia divisit. Sed & L. Florus libros CXL ejusdem auctoris recenset, sublato penitus nomine Decadum, cum uni-*

versam historiam in Epitomen, vel, ut latine loquar, in Breviarium contraxit. Id & Politianus olim ita libere nobis concedebat, ut nostram quoque diligentiam magnopere commendaret in perquirendis atque examinandis veterum monumentis.

Causa porro amissi tanti operis haud alia fuit, quam magnitudinis ejusdem moles, ob quam non omnes illud describere poterant; egestate pauperes, avaritia divites impediti. Qualis enim, ac quanta ejus magnitudo esset, vel ex Martiale discimus, hæc canente:

*Pellibus exiguis arctatur Livius ingens,
Quem mea vix totum Bibliotheca capit.*

Jacturæ hujus in causa invidia pariter, & improbitas Caligulæ Cæsaris fuit; quippe qui T. Livii Historiam, non secus ac Maronis poemata, cum auctorum imaginibus e medio tolli jussit, ut alienis laudibus obscuratis, propria vitæ scelera caligine premerentur. Quod incestu pari monstrum alterum hominis Domitianus attentavit, ut qui Metium Pomposianum ob id occidi mandarit, (auctore Tranquillo) quod Regum ac Ducum conciones quasdam, depromptas e Livio, circumferret.

Nihil sane Livio grandius, nihil uberius. Caligula tamen laborem tanti legendi operis ægre sustinens, dum in id incumberet, *verbosum* illum iden-

tidem appellabat. Eandem ob causam Afinius Pollio *Patavinitatem* eum sibi sapere affirmabat. Nimirum delicatum Romani hominis palatum, videbatur sibi aliquid sentire, quod non usquequaque saperet genium Romani sermonis. Neque enim nobis hic audiendus est Keckermannus, inde colligens, reprehensum ab Asinio fuisse sublimem Livii stilum: ut & a Seneca lib. I de Ira, cap. ultimo, & de Tranquillitate cap. IX. Nam longe aliud Senecam velle, diffitebitur nemo, qui verba ejus attenderit, ut accuratissime attendit Gerardus Jo. Vossius in alias laudatis libro & capite de Historicis Latinis. Quin immo ex *Patavinitate* Livio objecta, non invidiam & detractionem, sed laudem ac gloriam eidem conciliari posse, cum auctoribus aliis affirmarim. Nam ea de causa Pollio *Patavinitatem* Livio objecisse putandus est, ut eum tacite Patavinum esse proderet, & Pompejanum fuisse liquido demonstraret, Pompejanitatem Patavinitatis nomine comprehendens. Favere scilicet Pompejo & Reipublicæ celfo semper animo Patavini. Quam ob causam *Patavini* (inquit Marcus Tullius, de Cæsarianis seu Antonianis loquens) *alios excluderunt, alios ejecerunt missos ab Antonio, pecunia, militibus, & quod maxime deerat, armis nostros duces adjuverunt.* Quin & Thraseam, Patavinum civem una cum Helvidio genero, natalem diem, tum utriusque Bruti, tum Cassii hac

de causa celebrare consueviffe legimus in Satyris Juvenalis: usque adeo Patavinis Respublica & Reipublicæ fautores in oculis erant; Juvenalis enim ista sunt:

*Quale coronati Thrasea Helvidiusque bibebant
Brutorum & Cassii natalibus.*

Quid plura? Asinius Pollio, ut erat Antonianus (testatur id Paterculus) Patavinis longe infensus erat: itaque (Macrobio teste) acerbe cum iis egit, ut pecuniam & arma conferrent. Quin, cum Patavini id recusarent, ac propterea delitescerent, præmia & libertatem Patavinis servis obtulit, dum tamen dominos, qui delitescerent, propalarent: quod tentatum frustra. Haud igitur mirum, virum istum Cæsarianum, Antonianum, *Patavinitatem* objecisse Livio, &, quod virtutem alioquin redoleret, a Cæsarianis, qui Romano imperio potirentur, Pompejanis ludibrio versum & probro, cum *Pompejanitas* nil aliud omnino sit, quam Patavinorum in Pompejum & Romanam Reipublicam fides, amor ac benevolentia.

Quod autem eidem Historico quædam objecerit Caligula, quis sanæ mentis est uspiam, qui tam impii Cæsaris auctoritatem tueatur? Quis ignorat, quid insanum illud caput de Virgilio senserit? quid de Homero? Hinc Tranquillus: *Cogitavit etiam de Homeri carminibus abolendis. Cur sibi non liceret, di-*

cens, quod Platoni licuit, qui eum e civitate, quam constituebat, ejecerit? Sed & Virgilio & T. Livii scripta & imagines paululum absuit, quin ex omnibus bibliothecis amoveret: quorum alterum, ut nullius ingenii, minimæ doctrinæ; alterum, ut verbosum in Historia, negligentemque carpebat. Cogitavit idem etiam, (eodem Tranquillo teste) de Jurisconsultis abolendis: & de L. Seneca male sentiebat; non minori livore, ac malignantate, quam superbia, sævitiaque pæne adversus omnes ævi homines grassatus.

Ut ut sit, aliud ego de Livio affirmate protulerim: Cui T. Livii dulcissimus stilus, & omnibus ornamentis instructa Historia non blanditur, eidem inspectus placebit: ut olim Isocrates, cujus jucunditas sic hominum mentes allicere consuevit, ut ejus domus cunctæ Græciæ, quasi ludus pateret, ac dicendi officina.

C A P U T V I.

VINDICIÆ tutelares.

SED adhuc mihi a calumniis vindicandus est Livius. Haud enim defunt invidi alii, (nulla nempe hominum uberior esse seges feraci hoc malorum seculo & infelici) qui illum carpant. Videtur autem quibusdam horum prætulisse facem Antonius

Cæsar in Itinerario suo, in quo hæc leguntur : *Fano Volturnæ, cujus claris gestis invidit Livius.*

Inde scilicet Annius Viterbiensis telum arripuit, quod in Livium jaceret; sed inepte, cum dixit: *Est autem negligens is, qui suppressit, quæ referenda sunt: & verbosus, qui absque probatione contradicit afferenti rationes & auctores. Et ex his duobus peccavit Livius in multis, ut patet. Sed ex multis, quoad Fanum Volturnæ, hæc exempla sint: Cælius Thuscus Lartes Fani juvit Romulum implorantem ab eo auxilium contra Ceninenses, Crustuminos, & Latinos, & retulit triumphum. Et id idem fecit contra Sabinos Galeritus Lucumo. Et ob id ipse primus posuit Prætoria Romæ, & divisa Roma in tres tribus, imposuit nomina, & tertiam partem dedit Thuscis, ut clare tradunt Propertius in Elegia ad Vertumnum, & altera paululum præcedente, & Varro in I de Lingua Latina, & Fabius Pictor de origine urbis Romæ, & Dionysius Halicarnasseus in II lib. & Mythici sub fabula Jani ejaculantis aquas sulphureas in Sabinos, ut Macrobius in I Saturnalium, & Ovidius in I de Fastis indicant. At lividus fuit Livius, qui, ut funditus exstingueret Thuscorum fulgorem, & triumphos obnubilaret, ab eis partos, non a Romulis gestos, omnino etiam scribere unum verbum neglexit. Quod profecto invidissimi hominis est officium, & negligentis veritatem in historia. Similiter fuit verbosus, qui absque certo auctore*

& probatione dicit contra Varronem, quod Lucerum nomen incertæ originis. Fabius enim Pictor antiquior eo, ostendit ab Historia esse Etruscæ originis atque certissima. Rursus Livio antiquior & doctior Varro in I de L. L. dicit esse certæ originis a Lucumone Luceres dictos, idque probat vetustissimis auctoribus, Junio & Tolumnio, Thuscarum tragædiarum scriptore &c.

In hanc sententiam canicula ista latrans alios quoque multos perduxit, & hos inter L. Joannem Scoppam Parthenopæum, qui Collectaneorum lib. I cap. XVIII, *Eodem, inquit, tempore & Centuriæ tres equitum conscriptæ sunt, Romenses a Romulo, a Tito Tatio Titienses appellati. Lucerum nominis & originis causa incerta est. Hæc Livius, non quod Lucerum originem ignoraret, sed perinde ac Gallus Cisalpinus, & Hetruscæ Italicæque gloriæ invidens conscripsit, quod Antonius Cæsar in suo Itinerario his verbis arguit: Volturna, cujus claris gestis invidet Livius.*

Verum enimvero innituntur fundamento debili auctores isti, & si qui sunt alii, qui insistant Antonini dicto. Nusquam enim ea verba de Livio legere est in genuino, sive Antonii, sive Antonini Cæsaris, sive Æthici Itinerario, quod primus edidit Josias Simlerus, mox antiquis ex Codicibus correxit & addito Commentario locupletavit Surita Cæsar-Augustinus: sed eo in Itinerario tantum,

quod Annius Viterbiensis commentus fuit, ac viris obefæ naris, uti germanum, obtrufit. Nihil ifto plane Annii Itinerario indoctius, infulfius nihil. Quod & ipfa res clamat, & ubertim offenfuma eft a Philippo Cluverio in Italia fua. Amentis autem effe ex commentitio loco in Livium debacchari, & infana proferre, nemo non videt.

Paulus Benius in Livium quoque noftrum ftilum fuum exacuit, Hiftoriam ejus crebris conviciis laceffens. Siquidem is libro II de confcribenda hiftoria objicit illud inprimis hiftorico noftro principi, *quod nimis poeticus fuerit, nimisque longus, & aliquando dictionem habeat diffimilem, fortuitam, & interdum vafam & inconditam.* Sed fruftra lividum hoc ingenium jugulare nifum eft Livium, imbrem, quod ajunt, in cribro gerens. An non enim Hiftoria, Poefi proxima, & ftilus ejus quodammodo folutum carmen? An non illa fonis fuis ac numeris conflat, ut metro in animis hominum varios affectus excitet, & cum delectatione excitet, quo facilius improvidi quique ex aliorum factis, periculis, & monitis meliores fiant? Audiatur hic unus e multis Voffius, libro I de Hiftoricis Latinis, cap. II: *Qui autem Hiftoriam a fe fignatam exire, atque emanare in vulgus primi juberent, Poetæ fuerunt.* Recenfet autem Benius, exigui capitis, at exilioris cerebri vir, inter poeticas descriptiones narrationem ad-

ventus Hannibalis in Italiam, eamque propterea reprehendit, cum nulla diligentior, venustior, pulchrior toto illo in opere se spectandam prodat, satis ut hinc liqueat manifeste, quanti capitis hujus inepti convicia reliqua facere debeamus. Absolvit itaque latratus suos in Livium Benius hac verborum strue: *Livius in epistola quadam, filium ad eloquentiam adspirantem hortatur, ut Ciceronem diligenter evolvat, & imitetur primum, tum ceteros, prout quisque est Ciceroni simillimus; de suis scriptis, ne verbum quidem: quæ tamen, si ea tanti fecisset, filio item, Ciceronis exemplo, legenda proposuisset.* Ecquis enim sanæ mentis pater, & alienus a fastu, filio suo auctor exstitit, ut relictis aliorum operibus sua tantum evolveret? Vident per se oculati quique arrogantiam hominis, & derident. Cui ista non fatifecerint, cupiatque exactiorem defensionem Livii adversus Benium intueri, legat is epistolam Laurentii Pignorii XLIV Balthassari Bonifacio scriptam. Fuerunt etiam, qui quererentur, rerum aliquarum memoriam in Livio subobscuram: sed nemo unquam impius adeo fuerit, ut non illi ignoscat, fatenti libro VI candide, & scribenti, *se, quæ ab condita urbe Romæ ad captam eandem urbem Romani sub Regibus primum, Consulibus deinde, ac Dictatoribus, Decemvirisque, ac Tribunis Consularibus, gessere, foris bella, domi seditiones, quinque libris exposuisse; res cum vetustate nimia obscuras, veluti quæ*

*magno intervallo loci vix cernuntur: tum, quod per-
raræ per eadem tempora literæ fuere, una custodia fidelis
memoriæ rerum gestarum; & quod etiam, si quæ in
commentariis Pontificum, aliisque publicis privatisque
erant monumentis, incensa urbe pleraque interiere: cla-
riora vero deinceps certioraque ab secunda origine,
velut ab stirpibus lætius feraciusque renatæ urbis, gesta
domi militiaeque, exposita tradidisse.*

Illud sane miror, tum Budæum, tum Henricum
Glareanum, viros utique sapientes, non esse veri-
tos affirmare, *Livium bellicosæ Gallorum gentis res
gestas odiose tractasse.* Quantum enim Livius veri-
tati studuerit, vel ex eo assequi conjectura possu-
mus, quod in descriptione belli civilis, ne Augusto
quidem, a quo unice diligebatur, totque divitiis
locupletatus fuerat, ac honoribus exornatus, in
tantum voluerit gratificari, ut aliter rem narraret,
quam factam sciret. Audiatur hic Cremutius Cor-
dus, ita rem enarrans apud Tacitum Annal. IV,
dum in defensione vitæ publice peroraret: *T. Li-
vius eloquentiæ ac fidei præclarus inprimis, Cn. Pom-
pejum tantis laudibus tulit, ut Pompejanum eum Au-
gustus appellaret, neque id amicitiae eorum offecit. Sci-
pionem, Afranium, hunc ipsum Cassium, hunc Bru-
tum nusquam latrones & parricidas, quæ nunc voca-
bula imponuntur, sæpe ut insignes viros nominat.*

Quod autem Livius Gallorum genti infensus fue-

rit, minime concedendum puto; cum ab omnibus habitus sit perpetuus canæ, nulloque livore suffusæ fidei cultor. At nolo quemquam hic acerbius infectari, dixisse contentus, Livium illorum temporum gesta, gentiumque mores, & id genus alia candide adeo, & ex veritatis præscripto literis tradidisse, ut elogium illud jure sibi promeruerit: *Unus Livius dignus est habitus, cujus divino calamo tantæ urbis, ac populi Romani, totius orbis victoris res gestæ conscriberentur.*

C A P U T V I I.

SENECTUS & obitus.

FLORUERAT inter ceteros T. Livius Romæ Augusti gratia, & ea celebritate nominis, qua nullam majorem fuisse tradidimus suo loco, cum demum honorum fatur, annis & studiis fessus, accensus amore patriæ, Patavium cogitare cœpit. Romam itaque, post Augusti discessum e vita mœstissimam reliquit Livius, plausibus & acclamationibus publicis receptus in patriæ sinum, cum illi Patavini omnes, suis effusi sedibus, obviam prodire gestirent, clamantes, *Ingens illum esse patriæ suæ decus, & ornamentum, mansurum in æternitatem omnem.* Hic ille in oculis civium, patrii cœli aura recreatus, placido in otio, præteritorum laborum fructu fruens, cultus ab omnibus & dilectus, aliquamdiu vixit. At

cum omnes, quotquot vivimus, homines, nati ea lege sumus, ut quotidie moriamur, mortalitatem demum explevit, imperante Tiberio Cæsare, anno ejus imperii IV, redempti vero orbis XX, ætatis denique gloriosissime transactæ LXXVI. Constat id ex Vossio lib. I de Historicis Latinis: *T. Livius quarto Tiberii anno obiit, quo & Ovidius decessit Tomis: ut de utroque Eusebius in Chronicis restatur.* Id ipsum in Scardeonio legere est lib. I Classe III de prisca civibus Patavinis, & Memoria veteri, quam ex Prætorio Patavino nostro adducam infra. Gaspari vero Conrado, asserenti in Prosopographia sua Melica, milliario primo, pag. 98: *L. (id est, Livius) obiit anno Mundi 3993; an. Christi 23; æt. LXXX,* Sicchum Polentonum opponimus, sic loquentem in epistola ad Nicolaum Florentinum, quam edidit eruditissimus Pignorius in Originibus Patavinis cap. XVII: *Prætereo sumam, quæ Livium Patavii & natum & sepultum ferat. Adest Quintilianus, is Oratoriæ Institutionis libro Livium Patavii natum scribit. Adest Eusebius de temporibus, historicus fide dignus: Livius Patavii moritur, inquit. Adest Hieronymus, quem vitæ sanctitas haud minus dignum facit: libro enim de temporibus, Livium Patavii & natum & mortuum profertur. Creditum enim facile, mortuo Augusto (legerim, creditum enim facile, quod mortuo Augusto) repatriaverit, seu gratia uberioris otii; seu, quod Tiberius non tanti faceret divos homines,*

prius Octaviani humanitate congestos. Commune vitium experimur, etiam filios patrum fautoribus æmulari. Constat autem, obiisse Livium Kalendis ipsis Januarii, quibus & Ovidius e vita decessit, qua de re pulcherrima legitur elegia Adeodati Sebæ, quam hic, lectu dignissimam, adscribemus :

T I T O L I V I O
ET P. OVIDIO NASONI
C Æ N O T A P H I U M

Ab Adeodato Seba Veseliensi scriptum.

ECCĒ iterum Jani nobis rediere Kalendæ :
*Hei mihi, quos luctus, funera quanta ferunt !
 Roma TITO quondam celebrata est maxima magno,
 Est quoque Nasonis carmine dicta sui.
 Quæ te, Naso, tulit, quæ te, Tite, sustulit orbi,
 Inter funestos est numeranda dies.
 Non adeo infelix, quæ infames sanguine Cannas,
 Lux vidit, & Latio tristia cuncta foro.
 Nullum igitur munus nunc expectetis, amici:
 Munera temporibus sunt minus apta malis.
 Fas mihi sit Patrum priscos contemnere ritus,
 Fas mihi consuetas mittere jure preces.
 Cernite, nunc tristi ploretur ut undique cælo,
 Mersaque demisso terræ sub imbre natæ.*

Ecce Venus pullo vestita incedit amictu,
Dilaceransque genas, dilaniansque comas:
Et pharetræ oblitus, luctuque immersus acerbo,
Nasonis cantat carminâ mæstus Amor.
Ipsæ suas Janus damnatque oditque Kalendas,
Et sua de Fastis tollere festa parat.
Flet quoque Neptunus, flet raucifona Amphitrite,
Et patrio plorat gurgite mersa Thetys.
Pelignæ lacrimis implent rura omnia Nymphæ,
Et querulus Patavi mœnia Brenta lavat.
Tunc igitur lacrimas retinebis, Roma, cadentes,
Nec poteris cœli questibus esse comes?
Hæi mihi, quid te olim, clemens Auguste, coegit
Tam sacrum vatis sic violare caput?
Talia non docuit te quondam Julius ille,
Qui dedit Italiæ sceptrâ secunda tibi.
Et te jam merito clementem dicere quisquam,
Ingeniumque potest dicere mite tibi?
Quæ nunquam Augusti potuit lenire furorem,
Crudeles potuit flectere Musa Getas.
Namque Tomitanis exsul lugetur in oris,
Nasonique parat barbara turba rogos.
Lugete, o miseri vates, totumque jubete
Parnassum alternos ingeminare sonos.
Flentibus en aderit Phœbus, Pallasque favebit,
Et peraget partes Numen utrumque suas.
Vos quoque, quos cœli dignissima cura fatigat,
Ne, rogo, ne quinta quærite luce lyram.

Illa etenim lumen cælo, terrisque negabit,
 Lætaque cum caro Tartara vate colet.
 At vos, o Manes, quorum nec longa vetustas;
 Nobile nec delet nomen avara dies;
 Vos, inquam, solos Jani gaudere Kalendis,
 Vos dare lætitiæ mutua signa decet:
 Quippe Titum vobis lux addidit ista peremtum;
 Hæc quoque Nasonis lux dedit arte frui.
 Ergo occuristis Manes venientibus illis,
 Totaque in amplexus infera turba ruit.
 Ennius inde pater, medium complexus utrinque;
 Hic, ait, est Latii gloria tota soli.
 Mox Varro & Cicero properant, tersusque Catullus;
 Mox quoque cum Nemesi, culte Tibulle, venis.
 Et tu, qui dubium fecisti nomen Homeri,
 Laudem cui debent rus, pecus, arma, suam.
 Quid reges memorem priscos, fortesque Quirites,
 Quoscumque exoriens Roma, vetusque dedit?
 Scilicet ista Titum venerata est undique turba,
 Hannibal aspecto surgit & ipse Tito.
 Vos, o vos, Manes, æternos ducite lusus:
 At nos perpetuo cura dolorque prement.
 Hanc igitur lucem læctu celebrabo quotannis,
 Et vacuo injiciam thura merumque rogo.
 Hi tumulo versus deinde inscribentur inani:
 Forsan & hos olim postera turba leget.
 QUISQUIS ades, vacuum Nasonis cerne sepulcrum;
 Quisquis ades, magni cerne sepulcra Titi.
 T. Liv. Vol. I.

*Orphei quod precibus Plutonia regna dedere,
Hoc Titus & magnus Naso dedere sibi.*

CAPUT VIII.

LIBERI

Ex monumentis publicis.

Ex duabus uxoribus T. Livius noster filios duos suscepit, *T. Livium Priscum*, & *T. Livium Longum*, ambos paternæ disciplinæ affectas & heredes, quorum memoriam, nec non & *Cassiae*, uxoris primæ, nobis factam, testam, & integram conservavit Inscriptio marmorea vetus, quæ legitur in ædibus Annibalæ Capilistii, Cataphractorum militum ductoris, Serenissimæ Reipublicæ Venetæ nomine, e regione templi Divo Danieli sacri :

T. LIVIUS C. F. SIBI
ET SUIS

T. LIVIO T. F. PRISCO F.
T. LIVIO T. F. LONGO ET
CASSIÆ SEX. PRIMÆ
UXORI.

Filias idem quatuor habuisse dicitur, quarum ultimam, nomine *Liviam*, nupsisse tradidimus alibi *L. Magio*, clarissimo viro. Mos enim antiquorum

fuit, ut feminæ nomen a familia fortirentur. Quam ob causam, *Oclaviam* a familia Oclavia dictam accepimus, *Terentiam* a Terentia; *Liviam* a Livia, hoc ordine, ut, quæ primo loco nata esset, vocaretur *Oclavia prima*; quæ secundo, *secunda*; quæ tertio, *tertia*; quæ quarto, *quarta*: ut hæc Livii nostri filia, quæ hoc ex more *quarta* dicitur in veteri monumento, statuæ patris a concivibus nostris appo- sito, in ipsomet Prætorio publico Patavino:

V. F.

T. LIVIUS

LIVIÆ T. F.

QUARTÆ L.

HALYS

CONCORDIALIS

PATAVI

SIBI ET SUIS

OMNIBUS.

CAPUT IX.

OSSA quo tempore inventa, qua celebritate condita:

OSSA T. Livii in plumbea capsula apud sacras ædes D. Justinæ inventa sunt, anno salutis humanæ CIOCCCCXIII. Dum enim tunc temporis Mari-

nus Ludovici Barbi, Canonici nostri frater, ad illud coenobium reformandum accessisset, sibi que pone Abbatis domicilium ædiculam exstruere cogitasset, & pro fundamentis altius effoderetur, apparuit illico vetustissimum pavementum, ex quadratis lateribus & calce omni parte compositum, quo leviter fracto, inclusa in eo capsula plumbea reperta est, longa pedes sex, alta vero & lata æque ultra pedem. Livii mox clamatur, quod relatu Fratrum sepultus ibi Livius haberetur, & Monaci, qui meminerant ibi veterem effossum lapidem, cum Livii epitaphio, unanimes corpus esse Livii faterentur, quod & Polentonus affirmat in laudata epistola, rei totius oculatus testis.

Inter hæc summa totius civitatis lætitia divulgatur, repertum Titi Livii corpus. Jamque ad illud Nobilitas omnis accurrerat, & ex ossibus fragmenta diripere conabatur. Amplectebantur cuncti capsulam plaudentes. Multitudo vero populi tanta confluerat, ut monachi, eo concursu perterriti, de comburendis Livii ossibus cogitarent, ut a gentili viro venerationem insolitam amoverent. At Rolandus monachus, rogatus a Nobilibus, arcam & ossa Titi Livii patriæ dono dedit. Inde magno omnium civium conventu, ac celebri pompa totius civitatis, Nobilium ipsorum humeris in Forum maximum deportata sunt.

Liceat mihi hoc loco illustres viros recensere, qui vicissim humeros his ossibus submisere. Alterum modo repertæ arcæ lignæ caput Andreas Dandulus, Patricius Venetus, alterum Siccho Polentonus, medium subiere Palamedes, vulgo Palaminus, Vitalianus & Peraghinus Peraga, aureati equites, Alexander de Doctoribus, Jo. Franciscus Capilistius, & Nicolaus Porcellinus, Jurisconsulti. Sequebantur Zacharias Trivisanus Prætor, & Leonardus Mocenicus Præfectus: mox quicumque literarum studio, vel patriæ amore tenebantur, ut ante nos prodidit Polentonus & Jacobus Cavatius lib. V Historiarum cœnobii D. Justinæ Patavinæ, ad quorum scripta lectorem remittimus non inviti. Eam sane famam respiciens Theodorus Zvingerus in Methodo Apodemica lib. III, pag. 273, hæc ad posteros transmisit: *Titi Livii ossa, ad D. Justinæ, anno salutis MDCCCXIII reperta in plumbea capsula, insigni pompa, succollantibus viris nobilissimis, in foro judiciorum ad occidentalem partem reposita fuere, cum inscriptione & effigie ejusdem. Et in additionibus ad Historicos Latinos Vossius: Sepulcrum Livii, ut quidem Blondus, coque ex auctore Leander refert, Patavii fuit, ubi olim Junonis templum, at nunc monasterium B. Justinæ, quod tenent nigri monachi Benedictini. At Blondus Flavius, qui a secretis fuit Pontifici nostro Eugenio IV, in sua*

Italia illustrata non Junonis templum, sed Jovis fuisse D. Justinæ cœnobium hisce verbis affirmat: *Est in hac urbe D. Justinæ virginis templum, amplissimæ cujus ædes mille in circuitu passus amplexæ, aquis circumluuntur: quod in vetustæ ædis vestigio ædificatum fuisse hinc constat, quod effodientes ubique pulcherrima inveniunt lithostrata. Eodem in loco T. Livii sepulcrum ætate nostra repertum fuisse conspeximus, ut credere liceat, vetustum Jovis templum ibi fuisse, in quo ipse Livius in X narrat spolia de Cleomini Lacedæmonis piratæ victoria Patavium reportata fuisse. Ceterum, cum ossa Livii Zacharias Trivisanus Prætor in penetrali suo locari cuperet, Senatus habitus est pro Museo Tito Livio erigendo, in eoque quorundam sententia fuit, apud fanum Sancti Clementis, qua forum respicit, publico ære Cœnotaphium illi e marmore erigendum. At optimates quidam privata pecunia Livio multo nobilius monumentum pollicebantur, si prope suas ædes illius ossa transferrentur. Ad eam rem contendebant Ludovicus Buzacharinus, vir clarissimus, & Henricus Scrovinius, Eques. At tandem Senatui populoque Patavino publicam in Livium pietatem declarare visum est magis, illius ossibus ad occidentalem Prætorii parietem deportatis, & supra portam illius conditis: quod, & illico peractum est, adjecta imagine, & elogio, quod hisce verbis ad*

hanc usque diem Prætorium introeuntibus se spectandum offert:

O S S A
 T. LIVII PATAVINI
 UNIUS OMNIUM
 MORTALIUM JUDICIO
 DIGNI CUIUS
 INVICTO CALAMO
 INVICTI P. R.
 RES GESTÆ
 CONSCRIBERENTUR.

Auctor hujus epitaphii fuit Leonardus Justinianus, qui tunc temporis erat civitatis Prætor, ut refert Guilielmus Ongarellus in sua Chronica.

De sepulcro vero & effigie T. Livii hæc habet Pighius in Hercule Prodicio: *Ascendunt deinde in sublime Prætorium plumbo tectum, Palatium majus appellant, statuis & picturis excellentibus ornatissimum, ubi monstrantur Carolo virorum illustrium Patavinorum effigies, qui suis virtutibus immortalem famam nacti, urbem illam vel nativitate, vel morte sua, decorarunt. Et ne longus sim in enumerandis singulis, quorum imagines Principi tum ostendebantur, ut T. Livii, Romanæ Historiæ Principis, cujus etiam ossa perhonorifice ibidem marmoreo in sepulcro condita esse affirmant, &c.*

CAPUT X.

HONORES obitum consecuti, ejusdemque memorie posita monumenta.

SCIO monumenta, T. Livio posita, collecta a multis, ne tanti viri memoria ullis unquam seculis interiret. Congessit illa Scardeonius in volumen suum; idemque pari genio, feliciori calamo, præstitit Franciscus Swertius in Deliciis orbis. Verum enimvero, ut hic eorum multa præteriit, sic apud illum quæ exstant, confuse adeo in vastam illam memoriarum molem ingesta sunt, ut in quodam chao jacere miserrime videantur. Nostrum igitur fuerit, id præstare, ut eadem, & si quæ sunt alia, lucem habeant meliorem, disjectisque nubibus clarius micent. Præclarum & illustre T. Livii monumentum illud est inprimis, quod in interiori occidentali parte Prætorii nostri sæpe ac sæpius legimus, non sine sensu aliquo voluptatis. Liqueat autem ex eo, sapientissimum Alphonsum, Arragoniæ regem, anno CIOCCCLI. per legatos suos os brachii T. Livii, quod præclara illa Commentaria conscripserit, a Republica Patavina impetrasse, ut Neapolim, honoris gratia, deferretur. Verba denique sic illius habent:

INCLITO ALPHONSO

ARAGONUM REGI STUDIORUM FAUTORI
REIPUBLICÆ VENETÆ FŒDERATO ANTO-
NIO PANORMITA POETA LEGATO SUO
ORANTE ET MATTHÆO VICTURIO HUIUS
URBIS PRÆTORE CONSTANTISSIMO IN-
TERCEDENTE EX HISTORIARUM PAREN-
TIS T. LIVII OSSIBUS QUÆ HOC TUMULO
CONDUNTUR BRACHIUM PATAVINI CIVES
IN MUNUS CONCESSERE ANNO CHRISTI
MCCCCLI. XIV KAL. SEPTEMBRIS.

Excepit os illud, Neapolim apportatum, sum-
mo cum honore Regius literarum pater; at, dum
illi Museum proprium erigere cogitat, vita exces-
sit. Mansit ob id penes Panormitam: inde devenit
in Pontani, Regni illius a secretis, manus, a quo
demum locatum est in urnula, & inscriptione hu-
juscemodi decoratum:

T. L I V I I

HISTORICI BRACHIUM QUOD OLIM
ANTONIUS PANORMITA A PATAVINIS
IMPETRAVERAT JO. JOVIANUS PONTANUS
MULTOS POST ANNOS CONDIDIT.

At ea quoque memoria periit, Pignorio teste suis in Originibus Patavinis, ex epistola, quam Jo. Vincentius a Porta scripsit D. Peireschio, Senatori Regis Galliaë, anno CIOIOCH.

Anno vero CIOIOXLVIII ossa eadem translata fuere in eminentiorem locum ejusdem occidentalis partis Prætorii nostri, ubi nunc spectatur T. Livii Mausoleum, nobilitatum tabellis æneis, inscriptionibus, & vetustissima ipsius imagine marmorea, quam ab Alexandro Bassiano, antiquitatis præclarissimo cultore, inventam civitas dono accepit. Sub illa imagine marmor id aspicitur, quod olim effossum fuerat in D. Justinæ templo, ibique loci, ubi ossa ipsa postmodum reperta sunt; V. F. T. LIVIUS, &c. ¹, nempe a nobis alibi est productum. Dexteram Musei partem obtinet *Æternitatis* statua: lævam *Minervæ*. Sub *Æternitatis* pedibus *Tybris* excurrit, sub *Minervæ Medoacus*, & hos inter amnes, in meditullio Musei, spectatur lupa, Romulum & Remum sic ab lactans.

Legitur demum sub his omnibus in ænea tabula tale hexastichon Lazari Bonamici, præclarissimi vatis:

¹ Delineatum exhibet Tomafinus marmor istud cum inscriptione, quam infra p.

105 cum Sertorii Urfati interpretatione integram legas.

*Ossa, tuumque caput cives tibi, maxime Livi,
Promoto animo hic omnes composuere tui.*

*Tu famam æternam Romæ Patriæque dedisti:
Huic oriens, illi fortia facta canens.*

*At tibi dat Patria hæc, &, si majora liceret,
Hoc totus staret aureus ipse loco.*

Ubi notandum, quartum carmen ab auctore monumentorum Italiæ, & Georgio Merula sic produci:

Hinc mens, illi fortia facta canens.

quam lectionem neque Bonamici Hexastichon admittit, neque sententia, neque carmen ipsum.

Subjicitur ei tandem annus, quo Livius obiit, ab Eusebio petitus, his notis:

T. L I V I U S

Q U A R T O I M P E R I I

T I B E R I I C Æ S A R I S

A N N O V I T A E X C E S S I T

Æ T A T I S V E R O S U Æ L X X V I .

Exstat & altera ejusdem in historici memoria, celebris admodum & illustris, supra aliam portam Prætorii dicti, sub alia magna statua lapidea, habitu tenentis librum apertum, manu ad os adjecta, hac gnome: *Parvus ignis magnum sæpe suscitavit incendium.*

T. LIVIUS PATAVINUS

HISTORICORUM LATINI NOMINIS FACILE PRINCEPS CUJUS LACTEAM ELOQUENTIAM ÆTAS ILLA QUÆ VIRTUTE PARITER AC ERUDITIONE FLOREBAT ADEO ADMIRATA EST UT MULTI ROMAM NON UT URBEM RERUM PULCHERRIMAM AUT URBIS ET ORBIS DOMINUM OCTAVIANUM SED UT HUNC VIRUM INVISERENT AUDIRENTQUE A GADIBUS PROPECTI SINT. HIC RES OMNES QUAS POPULUS ROMANUS PACE BELLOQUE GESSIT QUATUORDECIM DECADIBUS MIRA STILI FELICITATE COMPLEXUS SIBI AC PATRIÆ GLORIAM PEPERIT SEMPITERNAM.

Cernitur & hic vetustissimus lapis in ædibus Alexandri Baffiani :

T. L I V I U S

T. L.

O P T A T U S A N. X V.

Et hæc inscriptio in Zabarellorum aula ad D. Laurentii sub ejusdem effigie picta, auctore Joanne Cavacio Patavino :

T. LIVIUS C. F.

Natus ante bellum civile Cæsaris & Pompeji, Quinciliano teste, in historia nemini secundus. Cornelius Tacitus, eloquentiæ ac fidei primas ei attribuit. Auctore Seneca docuit, Sallustium sumta ex Thucydide depravasse. In ultimis terris quanta hujus viri fama fuerit, D. Hieronymus ex Plinio ostendit. Ipso hortante, Claudius Imperator adolescens scripsit historiam. Amicitia Augusti, licet Pompejanus, non offecit, militia, civiumque concordia insignis, & auctus filia L. Magio Oratori Romano nupta. Epitaphium sibi & suis omnibus Patavii V. F. ubi excessit anno IV imperii Tiberii Cæsaris, ætatis LXXXVI. quod & propria effigies una cum suis reliquiis munere patriæ in magno palatio exstat.

Hæc servat adhuc Patavina civitas civis sui doctissimi monumenta. Ad hæc vulgus, domum Alexandri Bassiani, marmoribus, statuis, & inscriptionibus ubique refertam, domum Livii nuncupat, cujus ergo magnis advenarum concursibus celebratur. Scraderus etiam, Patavii in domo Livia se vidisse prodidit effigiem T. Livii, quam ita descripsit: *Caput T. Livii sine barba, collapsis genis, facie rotunda, lineis auriculis longis, naso acuminato.* Pari errore decepti Tituli accolæ somniarunt, Livium inde or-

tum duxisse suum, domumque illius videndam exhibent, & facti memoriam istam :

T. LIVIUS PATAVINUS

NATUS IN TITULO

ET TITULI SPLENDOR

A LOVISIUS A TURRE

BUCCINELLUS VICARIUS

FIERI FECIT MDLXXXIX.

Imago nostra ex illa Bassiani delineata est, quæ repræsentat illam in nostro Prætorio ad amussim. Ceterum, quod innuit Pignorius, eam, quæ in Prætorio visitur, non T. Livii effigiem esse, sed *Len-
tuli Marcellini*, aut *Claudii Marcelli*, placere nequaquam potest; quippe prorsus illi dissimilis *Marcellini* effigies, spectanda in numismate, quod illius esse testati sunt Gabriel Symeon in *Dialogis*, & Urfinus in *familiis Romanorum*.

Facies imberbes virorum ita similes sunt, ut interdum una pro altera in statuis capiatur. At cum certo certius perspectum & cognitum habeamus, ab Alexandro Bassiano, antiquitatis studiosissimo, monumentum hoc pretiosissimum patriæ dono datum, an non is, si monumentum illud alterius fuisset comperisset, quam Livii, dum eo patriam suam

decorare nititur amantissimus civis, eandem in fraudem induxisset? Neque vero *Caligula, infensus T. Livii nomini Imperator, illius imagines* (Tranquilli verba sunt in ejus Cæsaris vita) *abolavit; sed paulum absuit, quin statuas & scripta T. Livii ab omnibus bibliothecis amoveret.* Quod si illas abolere jussisset, nequaquam probus historicus Tranquillus, qui Trajani & Hadriani PP. Im. ætate vixit, & extra metum omnem Caligulæ historiam scripsit, dixisset, *paulum absuit, quin statuas & scripta T. Livii ab omnibus bibliothecis amoveret; sed: Titi Livii imagines, Caligula Imperatore jubente, una cum scriptis ejus aboleatæ sunt.*

Credendum vero est, T. Livii imagines non fecus; ac illas Cæsaris, in honore ac pretio tum fuisse, ob existimationem summam, quam illi scripta sua conciliarant singularia propemodum, & divina; indeque factum, ut una illarum in manus Bassiani devenerit, qua patriam suam eximii loco muneris exornavit. Hanc nos uti veram T. Livii imaginem absque ullo dubio veneramus. Nolumus enim antiquitatem illius in dubium revocare.

At enim imaginem Patavini Livii conata fuerit antiquitas abolere, ea re quidem certe minus ideo nobis dolendum est, quod redivivum illum intueamur in altero Patavino cive longe clarissimo, *Antonio Quarenego*, cujus scriptis, quamdiu Latinæ

Etruscæque florebut literæ, *semper honos, nomenque suum, laudesque manebunt.*

Hic enim seculi nostri Livius jure omnium ore colitur, salutatur; cum nullus eo propius Livii stylum attingat, sive locutionem ejus gravem & candidam, sive rerum gestarum narrationem, sive locorum descriptiones spectes. Novit id ingeniorum acerrimus æstimator Perronius, S. R. E. Cardinalis, qui, cum Henrico IV Magno præstantiam illius suis ex meritis adumbrasset, in causa fuit, ut ab eo Lutetiam Parisiorum, magnis propositis præmiis, fuerit evocatus, quo sua egregia regiaque facinora literis consignaret.

Novit & Ranutius Farnesius, magni æque animi ac ingenii Princeps, qui unum illum Parmam accersit, ut is sibi pro dignitate scriberet res in Belgio & alibi ab Alexandro patre & Imperatore fortissimo gestas, quod egregie re ipsa præstitit, secutus tanti Principis judicium, immo & feliciter affecutus. Æmulatur ille scilicet ea in uberrima segete pulcherrimarum rerum Livium concivem suum, eundemque nobis graphice repræsentat. Exstat ejus porro divinæ scriptionis, nondum typis editæ in commentario brevissimo, exemplar unum, quod vidi penes virum clarissimum fratris ejus filium, Flavium Quærengum, Cathedralis Ecclesiæ Patavinæ Canonicum, cujus dignitatis personam æque in illa

digne sustinet, ac philosophiæ moralis interpretis in publicis Patavinis scholis : alterum apud Hispaniarum Regem : tertium in bibliotheca Farnesiorum Ducum : quartum in Museo tuo, illustrissime ac excellentissime Moline, qui præ ceteris ingenium viri tanti facis, hoc titulo :

A N T O N I I Q U Æ R E N G I

De rebus gestis Alexandri Farnesii

Parmæ & Plac. Ducis

Historia.

Et initio tali : *Alexandro Farnesio primæ rudimentum militiæ victi maritimo prælio Turcæ ad Naupactum fuisse. Tali que fine : Hic secundus Farnesii in Galliam transitus fuit : sed & tertium, ut regis comitiis interesset, quanquam supremo morbo implicitus, apparabat, cum militaris disciplinæ ac virtutum omnium præclaris laudibus invidiam jam supergresso, inimicorum felicitati Belgiæ fatum manus injecit.*

Auxit itaque scriptor hic nobilis adeo præstanti divini sui ingenii monumento patriæ suæ decus ; ut Livius historia Romanarum rerum : auxit & ornamenta domus, non hoc uno nomine toti terrarum orbi notus, sed & Theologiæ, Philosophiæ ; Jurisprudentiæ, Poesis, & amœniorum quorumque studiorum cultu ; quibus veluti radiis, solis instar, longe lateque conspicuus, cum aulæ Farnesianæ

micuisset fatis, Romam illustrare cœpit, ibique summis continenter Pontificibus illius, ut in Universi centro, novum exemplo suo Tichonis systema confirmavit, sibi semper æqualis undique, vitæque semper integerrimæ, & eruditionis ac doctrinæ sanæ & solidæ jubar undequaque cum amore pariter & admiratione diffundens. Sed hæc alias pluribus in Elogiis nostris. Satis enim hic habeo demonstrasse leviter, in Antonium Quærengum commigrasse Livium, ut eo nunc sospite, magni illius luminis, exstincti dudum, stilum & imaginem habeamus, cujus nos aspectu æternum pasce cœlites patiantur.

CAPUT XI.

ELOGIORUM reliquæ, coronidis loco.

CLAUDENT T. Livii vitam ejus Encomiastæ, hætenus non allati; ducetque Paterculus familiam reliquorum. Ejus enim ista sunt libro II: *Pæne stulta est inhærentium oculis ingeniorum enumeratio: inter quæ maxime nostri eminent, princeps carminum Virgilius, Rabiriusque, & consecutus Sallustium Livius, Tibullusque & Naso perfectissimi in forma operis sui. nam vivorum, ut magna admiratio, ita censura difficilis est.*

Philippus Cominæus putavit, *Livium, Latinorum Polybium, omnibus senatoribus ac gubernatoribus rerum publicarum perlegendum.*

Isaacus Casaubonus ad eundem transtulit illud Senecæ Rhetoris de Oratorum principe encomium: *Populum Romanum hujus unius ingenium par imperio suo habuisse.*

Georgius Corvinus, & Sigismundus Feirabentus, bibliopolæ Francofurtenses, in præfatione operum ejus, a se editorum an. CIOCLXIV, *Livium Historicorum aliorum omnium Principem, & rerum Romanarum divinum explicatorem* vocant.

Iidem in alia Nuncupatoria editionis alterius in 8 ita de illo scribunt: *Nam, quod ad auctorem attinet, talis est, ut vivus lacteo eloquentiæ fonte nobiles, quos Roma ad sui contemplationem trahere non potuit, nominis sui fama (ut Hieronymus ad Paulinum refert) de ultimis Hispaniæ Galliarumque finibus pertraxerit, & moriens ob eorum, quæ describit, magnitudinem, varietatem, præstantiam, utilitatem ac jucunditatem, dignus sit habitus, qui ad Romanæ historiæ cognitionem, prudentiamque civilem cum eloquentia comparandam, præ ceteris in manibus omnium teneretur.*

Philippus Beroaldus in oratione habita in enarratione ejusdem, ac Sili Italici, præter ea, quæ supra produximus ex eodem, hæc alia adducit: *Eo-*

dem animo Livius bella scriptitavit, quo Romani gesserunt; eodem ingenii fulmine stilum exercuit, quo Romanus populus arma tractavit; eadem vigilantia incubuit chartis, qua Romani milites disciplina militari incubuerunt. Et medius fidius videtur populus Romanus vel ob hoc unum tam memoranda facinora gerere voluisse, ut illa tam a luculento scriptore describerentur, qui res haud dubie luculentas verbis luculentis æquavit; quem quotiescunque in manus sumo, non legere videor bella, sed tractare, & ut inquit Hieronymus de Paulo, non audire verba, sed tonitrua. In Livianis voluminibus videre videor Imperatores concionabundos, militesque suos exhortantes ad prælia alacri animo capeßenda, Senaturn de rebus dubiis consultantem, hostes hinc formidolosos trepidare, Romanos hinc furibundos invadere. Denique apud Livium omnis rei militaris disciplina continetur, omnia stratagemata, omnes calliditates imperatoriæ demonstrantur. Leges senatus, populi que decreta, omnes denique artes, quibus domi forisque vivitur, conspiciuntur. Sed, pro dolor! quantam jacturam passi sunt omnes literarum studiosi ex centum decem voluminibus Livianis deperditis? qui omnia, quæ unquam Romani per septingentos annos gesserunt præclara facinora, veluti in unum redacta corpus, noscere potuissent. Quanto dispendio affectus est populus Romanus, cujus tot ac tantarum rerum gestarum memoria, cum libris Livii pariter in-

erit? Quantum veræ famæ detrimentum illustrissimi Imperatores subierunt, quorum nomina fuissent semperna, & gesta memorarentur, si Liviana volumina non intercidiſſent? Quod ſi defunctis ullus eſt ſenſus, profecto Livianos manes ingemiſcere credendum eſt, tot labores incuſſum ſibi fuiſſe ſuſceptos, tot nequidquam vigilatas noctes, tot fruſtra conſcripta volumina, quæ ſi exſtarent omnia, nihil præterea foret nobis deſiderandum. Habermus, in quo otium, in quo tempus bene collocare poſſemus: & tamen nobis, utpote ſomniculoſis, vix ætas ſuppeteret ad legendum, quæ illi, divina quadam benignitate prædita, ſuppeditavit ad ſcribendum; qui etiam Dialogos (ut inquit Seneca) Philoſophorum more conſcripſit.

Pertinent huc etiam illa Franciſci Petrarchæ, de otio & ſolitudine quorundam virorum, cap. III tract. II. Quædam enim ætas illuſtrium apud nos ingeniorum fertilior fuit. Marcum Varronem, Marcum Ciceronem, Salluſtium, & Livium, innumerabileſque alios, uno tempore, ſuis licet vivendi gradibus diſtantes, habuit, qui ſe invicem viderint, vel videre potuerint.

Et cap. VIII, ubi de ſtudio T. Livii ex profeſſo: Atque ut mœnia Urbis egreſſi non ſtatim ex Italia fugiamus: quo ſtudio putandus eſt ariſſe T. Livius Patavinus, qui omnem Romanam hiſtoriam ab Urbe cõn-dita ad Cæſarem Auguſtum, cujus ipſe claruit temporibus, centum quadraginta duobus voluminibus ſcrip-

fit. Opus ipsa mole mirabile, stupendumque, præsertim, quia in eo nihil raptim & tumultuario, ut ajunt, stilo; quod quidam solent, qui omne verbum labiis oblatum scriptis mandant: sed tanta majestate sententiarum, tantaque verborum modestia complevit omnia, ut ab arte eloquentiæ non multum abesse videantur. Sed heu quantam ætatis nostræ maculam! hujus tam ingentis, tamque egregii operis vix portio subest exigua quidem. Cum in decades, vel ab ipso conditore, vel, quod magis reor, a fastidiosis postmodum lectoribus scētum foret, ex quatuordecim nonnisi tres decades supersunt, prima scilicet, tertia, & quarta: secundam quidem ipse ego, hortante quondam sacræ memoriæ Roberto Siciliæ Rege, summa, sed hæcenus inefficaci, diligentia quæsi. Atque utinam falsus vaticinator inveniar. Cito enim, nisi mores hominum mutantur, de hoc eventurum vereor, quod olim proposuerat Cajus Caligula, nequissimus tyrannorum, de quo est apud Suetonium Tranquillum, quod T. Livii Historiam & Virgilii poetæ libros & imagines parum absuit, quin ab omnibus bibliothecis amoveret: utque ingenio viri hujus clarissimo nubem oblivionis, quam non attulit imperiosa crudelitas, auferat sensim injuriosa segnitias.

Gaspar Cunradus Sil. in sua Profopographia Medica, millenario primo, pag. 98. Titulo

T. L I V I U S
H I S T O R I O G R A P H U S.

OPTIMUS historię Romanę *Livius* auctor.

O plene hoc magnum nunc superesset opus!

A N T O N I U S L U S C U S

IN CARMINE AD JOANNEM DE NOGAROLIS.

LIVIUS e manibus nunquam cadat : ille docebit,
Auspiciis quibus orta prius , quo Principe , quantis
Consiliis firmata fuit respublica , Regum
Diversos mores , majestatemque Senatus ,
Et causas bellorum omnes , & cum quibus acta :
Quo fato , quo consilio , quo jure per omnes
Crevit in imperium virtus Romana labores ,
Illa severa vetus quę disciplina Quiritum
In castris , quę norma domi , quo more , quibusve
Legibus Italiam primo , post fortior urbes
Roma peregrinas fracta Carthagine tandem
Strinxerit.

T. L I V I I
E P I T A P H I U M

E Bernardi Georgii Prætoris Patavini carminibus.

LIVIUS exstinctus jacet hic , quę fama superstus

Incolumentum servat , tum superesse facit.

*Quem labor & studium, phrasibus quoque lactea, priscas
Scribentem historias sidera ad usque vehit.
Multum igitur debes Patavis, Roma inclita, nam te
Livius exultat, dum tua gesta refert.
Adriacam donec præterfluet Albula molem,
Tantisper Livii fama superstes erit.*

Balthassar Bonifacius de Scriptoribus Romanæ Historiæ: T. Livius Patavinus lac Musarum, mare tranquillum, anima eloquentiæ, eorum, qui nunc supersunt scriptorum Romanæ historiæ longe princeps, lactea quadam ubertate dictionis divinitus facundus, amans virtutum, osor vitiorum, rectus judicii rerum togæ, rerum sagi, etsi non usu, neque experientia, egregie tamen peritus, ab Urbe condita ad Divi Augusti ævum centum & quadraginta libris divinas illas lucubrationes perduxit, quarum tamen longe maximam partem, ingenti rei literariæ jactura deperditam, nunquam fortasse inventam desideramus, nec tanti operis reliquos habemus, nisi quinque & triginta libros. Et alia e numero VI.

Angelus Portinarius in Felicitate Patavina, Italico idiomate conscripta, vitam Livii tetigit, lib. VII, cap. III.

Joannes Velcurionis in Annotationibus in ipsummet T. Livium hæc scripsit: Ceterum de vita Livii plura hic dicere non attinet, qui præcul dubio omnium historicorum Latinorum princeps judicari debet: quia

res omnes a populo Romano pace belloque amplius septingentis sexaginta ab Urbe condita annis gestas, copioso simul & fluenti invictoque stilo perscripsit. Romæ habitus in maximo pretio & celebritate, sub Octavio Cesare Augusto: apud quem in magna fuit gratia, tamen etsi eum Caesar Pompejanum vocare soleret, quia liberius civilia bella Caesarum descriperat.

Coelius Rhodiginus Lectionum antiquarum lib. XXV. cap. III: *Et amplitudo illa Patavini historici lactea & redundans, itaque legentem sæpe afficiens, ut stupore quodam adobruat pæne, alere longe pinguius ingenia mihi videtur, adeo, ut sicuti in pictores ille ait, qui nescirent manum de tabula, oculos a lectione reveltere nequeas. Ita dicendo non adumbrantur modo omnia, sed & exprimuntur graphice. Ubertas illa prædulcis, & austera tamen, nec decocta, nitida, sine labore, (ut de Theophrasto Seneca scribit) efflorescens quoque, nec affusa modo nectare, sed quodam Circes (quam Deane intelligi voluit literarum princeps Homerus) delibuta veneficio est. Abire cupis: retinet blandis amoribus inenarrabilis facundiæ vastitas, quæ tamen vasta non est, sed comta honestius, culta pretiosius, expolita divinitus, nusquam fucus puerilis, aut pigmenta inania, nusquam vibratior cincinnus. Non ades: provocat prægestata amœnitas, Sirenum cantibus longe potentius, quas surdus demum remex pertransisse narratur! istam odore modo perceptam, ne cæcus quidem neglexisse possit. Jam quid de eruditione dicam? --- Et alia præclara multa.*

Blondus quoque Flavius in sua Italia, loquens de civitate Patavina, Livii mentionem facit, sicut & Cosmographi reliqui, tradentes, hoc unum Patavinæ civitatis monumentum præclarissimum existisse. Sic Zacharias Lilius in suo orbis Breviario in Venetis, de Patavio meminit Livii cum honore. Sic Marcus Guatius in sua Chronica præclare fentit & loquitur de Livio nostro, sicut & historici omnes, qui post illum eorum gesta temporum edidere.

L E C T O R I.

Quæ sequuntur Sertorii Ursati sunt, ex monumentis ipsius Patavinis desumpta: quæ cum maxime faciant ad interpretationem inscriptionis monumenti T. Livii, (cf. supra pag. XLII.) non incongruum nobis visum est, ea hic adjicere, quamvis plurima ex his jam tetigerit Tomafinus.

E P I T A P H I I T. L I V I I,

*IN OCCIDENTALI PRÆTORII PATAVINI
PARTE ERECTI, INTERPRETATIO.*

LIVIUS] Liviam gentem in numero plebejarum

reponit Panvinius : Consules tamen habuit, & quidem clarissimos, Salinatorem, Dentrem, Drusum, Libonem cognominatos, Patavioque summum conciliavit splendorem, quod Livium nostrum ediderit. De cujus patria & natalibus nihil referam; cum & a proposito instituto recedat, & clarissimorum virorum innumera suppeditent testimonia, qui eum Patavinum, genere clarum, historiæque parentem declarant : inter quos de ejus gloria hoc unum Plinii ¹ ad Nepotem plurimorum loco sufficiat : *Nunquamne legisti, Gaditanum quendam, Titi Livii nomine gloriaque commotum, ad visendum eum ab ultimo terrarum orbe venisse, statimque, ut viderat, abiisse?* Vixit Romæ usque ad Augusti decessum, cui summe gratus erat. Post ejus vero mortem honoribus annisque defessus, in patriam reversus, publicis a Patavinis receptus fuit acclamationibus ² : ubi Tiberio Cæsare Augusto III & Germanico Cæsare II Consulibus, an. U. C. DCCLXXI, a partu Virginis XIX, imperii Tiberii quarto, suæque ætatis LXXVI, e vita excessit. Corpus ejus haud procul a Concordiæ templo conditum fuisse, & saxum istud, & ejus ossa ibi eruta abunde confirmant. Id cum Jacobus Cavacius, Congregationis Divæ Justinae Cœnobita ³, ejusque monasterii Historicus,

¹ Lib. II, Ep. 3.

² Panvin. Falt. lib. 2.

³ Hist. Cœnob. D. Just.

lib. 5. fol. 218.

fide & solertia eximius, fufe, ac sine fuce, e tabulario depromat, ipsius verba hic apponere opportunum existimavi: *Sed nos in urbem revocat T. Livius, Romanæ historiæ parens, & Patavinorum decus, cujus sepulcrum in nostro cœnobio repertum est, pone Abbatis ædes, ubi nunc valetudinarium est. Ante annos quinquaginta effossus fuerat antiquus lapis cum epitaphio:*

V. F.

T. LIVIUS

LIVIÆ T. F.

QUARTÆ L.

HALYS

CONCORDIALIS

PATAVI

SIBI ET SUIS

OMNIBUS.

Hunc Patres in vestibulum templi transfulerant, atque Livii imaginem appinxerant, quam situ exoletam Andreas Abbas nuper novaverat. Marinus, Ludovicî frater, cum sæpe ad eum diverteret, & aliquod negotium inferrent disciplinæ Monachorum, statuit pone Abbatis domicilium sibi ædiculam exstruere. Hic dum

pro fundamentis altius effoditur, apparuit vetustissimum pavementum ex quadratis lateribus assabre constructum. Eo diruto reperta est arca plumbea sexpedalis, qua hominis ossa continebantur. Accurrere ex Monachis aliquot, qui mentinerant, vel acceperant a majoribus, effossum ibi veterem lapidem cum Livii epitaphio. Inde constans omnium opinio fuit, id esse Livii corpus. Rolandus Monachus de his actutum admonuit Xiconem Polentonum, egregium & eruditum civem; qui cum universa lustrasset, in Prætorium rediens, celebriorem apud cives de Livii corpore opinionem fecit, mox eo præstantiores aliquot secum traxit. Quidam prævenerant, & ex ossibus fragmenta diripiebant. Id quasi ad æmulationem reliquiarum Sanctorum Dei impie factum, movit Vicarium Abbatis, ut de comburendis Livii ossibus cogitaret. Cœperat jam malleo craneum diffringere, cum negotiis quibusdam gravioribus e cænobio evocatur. Vix abscesserat, cum Rolandus rogatus a nobilium virorum turba, quæ confluxerat, arcam & ossa T. Livii patriæ dono dedit. Proceres, ac si viventem Livium amplecterentur, plumbeum tumulum extulere. Libet illustres viros recensere, qui humeros submiserunt. Alterum arcæ caput extulit Andreas Dandulus, Patricius Venetus; alterum Polentonus; medium subiere Palamedes (Palaminus vulgo) Vitalianus & Peraghinus Peraga, aurati Equites, Alexander de Doctõribus, Jo. Franciscus Capistensis, & Nicolaus Porcellinus, Jurisconsulti. Sequen-

bantur feralem pompam Zacharias Trivisarius Prætor, & Leonardus Mocenicus Præfæctus, mox quicumque literarum studio, vel patriæ caritate tenebantur. Funus delatum est per frequentiora urbis loca in Prætoris regiam, donec publico decreto statueretur, qui optimi civis memoriæ satis prospici posset. Quorundam sententia fuit, ut apud Fanum Sancti Clementis, qua forum respicit, publico ære cænotaphium T. Livii e marmore excitaretur. Quidam optimates privata pecunia Livio multo nobilius monumentum pollicebantur, si prope eorum ædes liceret ipsius Livii ossa transferre. Duo potissimum ad eam rem contendebant, Ludovicus Buzzacarinus, eruditus ac dives admodum, & Henricus Scrovinius Eques. Attamen publicæ in Livium pietati decere visum est, ipsius ossa in augustissimam aulam Prætorii referre, & antiquum lapidem cum Epitaphio adjicere. Hæc Cavacius. Uberius totam historiam complures alii hoc loco perfequuntur; quos lector inspicere potest.

Ad publicæ voluntatis decretum loco selecto, ossa Livii occidentem versus in Prætorii pariete supra ostium, qua nunc Sanitatis officium, ut vocant, aditur, locata fuere: eaque sub rudi simulacro, & ab ejus effigie omnino dissimili, hoc epitaphio, a Leonardo Justiniano, Patavii tunc Prætor, addito condecorata fuere:

O S S A
 T. LIVII PATAVINI
 UNIUS OMNIUM
 MORTALIUM JUDICIO
 DIGNI CUIUS
 PROPE INVICTO CALAMO
 INVICTI P. R.
 RES GESTÆ
 CONSCRIBERENTUR:

Anno CIÖCCCLII eximium quodpiam Livii monumentum expetens Alphonfus, Aragonum rex, per Antonium Bevatellum Panormitanum, Legatum suum, poetam insignem, a Patavinis brachii os impetravit. Eodem tempore Livii maxilla, æneo orbe clausa, fornici Archivi Civitatis nostræ appensa fuit; ubi & hodie spectatur. Supra ostium vero, ubi ossa reposita fuerunt, illa parte, qua Palatium respicit, tale positum fuit monumentum:

INCLITO ALPHONSO

ARAGONUM REGI STUDIORUM FAUTORI
 REIPUBLICÆ VENETÆ FŒDERATO ANTONIO
 PANORMITA POETA LEGATO SUO
 ORANTE ET MATTHÆO VICTURIO HUIUS
 URBIS PRÆTORE CONSTANTISSIMO IN-

TERCEDENTE EX HISTORIARUM PAREN-
TIS T. LIVII OSSIBUS QUÆ HOC TUMULO
CONDUNTUR BRACHIUM PATAVINI CIVES
IN MUNUS CONCESSERE ANNO CHRISTI
MCCCCLI. XIV KAL. SEPTEMBRIS.

Regis autem desiderium mors antevertit. Bra-
chium namque istud a Panormitano vix Neapolim
delatum est, cum Alphonsus fatis concessit. Illud
itaque Panormita religiose custodivit, ac in deli-
ciis habuit, dum vixit. Eo mortalibus erepto, cum
Jo. Jovianus Pontanus publici muneris, quo fun-
gebatur, a secretis regni successor, ipsum quoque
brachium obtinisset, exiguo id tumulo, extra de-
lubrum a se erectum, sub tali inscriptione con-
didit: ¹

T. LIVII

HISTORICI BRACHIUM QUOD OLIM
ANTONIUS PANORMITA A PATAVINIS
IMPETRAVERAT JO. JOVIANUS PONTANUS
MULTOS POST ANNOS CONDIDIT.

Monumentum vero Livii, quod in D. Justinæ
æde conservabatur, anno CIOIOXLVII in Præto-
rium una cum ipsius ossibus fuit translatum; ubi

¹ Pignor. in. Origin. Pat. cap. 17.

nōstra ætate conspicitur. Apici ejus additus fuit vultus e marmore, qui penes Alexandrum Bassanum Patavinum servabatur. Ænea utrinque accesserunt simulacra; e parte dextra Æternitatis, e sinistra Minervæ; sub primo Tiberis, sub altero Medoacus excurrit: inter utrumque fluvium Lupa Romulo & Remo ubera præbet. Subjectam his simulacris tabulam æneam Lazarus Bōnāmicus Bassanensis, vir doctissimus, politiorum literarum in Gymnasio tunc Professor celebris, hoc epigrammate decoravit:

*Ossa, tuumque caput cives tibi, maxime Livi,
Prompto animo hic omnes composuere tui.*

Tu famam æternam Romæ, patriæque dedisti:

Huic oriens, illi fortia facta canens.

At tibi dat patria hæc: & si majora liceret,

Hoc totus staret aureus ipse loco.

Inscriptionem porro idem subdit:

T. L I V I U S

Q U A R T O I M P E R I I

T I B E R I I C Æ S A R I S

A N N O V I T A E X C E S S I T

Æ T A T I S V E R O S U Æ L X X V I .

Ceterum ne summæ erga clarissimum civem observantiæ testimonia deficerent, etiam supra Præ-

torii ostium, sub magna statua marmorea librum apertum tenente, manumque ori admovente cum hoc symbolo, *Parvus ignis magnum sæpe suscitavit incendium*, majores nostri hoc monumentum statuerunt :

T. LIVIUS PATAVINUS

HISTORICORUM LATINI NOMINIS FACILE PRINCEPS CUJUS. LACTEAM ELOQUENTIAM ÆTAS ILLA QUÆ VIRTUTE PARITER AC ERUDITIONE FLOREBAT ADEO ADMIRATA EST UT MULTI ROMAM NON UT URBEM RERUM PULCHERRIMAM AUT URBIS ET ORBIS DOMINUM OCTAVIANUM SED UT HUNC VIRUM INVISERENT AUDIRENTQUE A GADIBUS PROPECTI SINT. HIC RES OMNES QUAS POPULUS ROMANUS PACE BELLOQUE GESSIT QUATUORDECIM DECADIBUS MIRA STILI FELICITATE COMPLEXUS SIBI AC PATRIÆ GLORIAM PEPERIT SEMPITERNAM.

Veterem Livii inscriptionem, in aula Prætorii positam, aliamque in ædibus Capilisteorum ad Sanctum Danielem, suo loco expendendam, minime ad Livium pertinere, his verbis demonstrare co-

natur ingeniosissimus Pignorius : ¹ *La iscrizione si come l'ho per antica, così non credo, che appartenga al nostro T. Livio. Il mio argomento è, che T. Livio scriveva SIBE & QUASE, non SIBI & QUASI, & così Asconio Pediano, come racconta Quinctiliano nel libro primo à capi VII delle sue institutioni oratorie, & questa è simile peregrinità di ortographia, e di voci, & forse di elocutione era la Patavinità, che Asinio Pollione haveva osservato in Livio. Quo quidem argumento Livii monumento nequidquam decedere puto : etenim Asinius Pollio, non ut stili elegantiam extolleret, sed ut formam dicendi irrideret, acerbe dixerat, Livium sibi videri Patavinitatem sapere : ut bene patriæ studiosissimus Tomasinus ² observavit. Pub. Terentius ³ etiam, qui, Tranquillo teste, *Inter finem secundi belli Punici & initium tertii natus est & mortuus, multo ante Livium, in Eunucho loco foli scripsit**

—— *Mihi solæ ridiculo fuit.*

Quam dicendi formam observavit clarissimus Clavallensis Comes Gaspar Scioppius ⁴, qui in patria nostra sibi gratissima aliquamdiu vixit, diemque nuper clausit extremum. Quid apud Quinctilianum ⁵ clarius? *Non E quoque I loco fuit : ut*

¹ In Origin. Patav. cap. 17.

² In Vita Livii cap. 5.

³ Act. 5. Scen. 6.

⁴ Suspectar. Lect. lib. I. Ep. 1.

⁵ Instit. Orat. lib. I. cap.

4.

*Menerva, & Leber, & Magester, & Dijove, & Vejo-
ve, pro Dijovi, & Vejovi?* Adde lapides antiquos
minime Patavinos; in quibus SIBE pro SIBI ob-
servatur. Talem e Romanis descripsit Gruterus ¹:

DIS. MANIB.

M. VINICI. M. F.

SALVIARI

VIXIT. ANN. XXXII

MENS. VI.

VINICIA. HELPIS

PATRON. ET

CONJUGI

INDULGENTISS.

ET SIBE.

T.] Livii prænomen *Titus* est; vel, quod Festo ²
auctore, *Tituli milites appellarentur, quasi tutuli, quod
patriam tuerentur, unde & Titi prænomen ortum est;*
vel a Sabino nomine, ut putat Valerius ³, quem
Sigonius & Panvinius ⁴ secuti sunt.

¹ Fol. 958. n. 1.

² Tit. T. De Nom. im-
fit.

³ De Nom. Rom.

⁴ De Antiq. Nom.

LIVIÆ T. F. QUARTÆ L. HALYS.] Hæc quarta Livii filia fuit, ut jam observavi: &, ut docet Panvinius ¹, LIVIA T. F. QUARTA nupfit L. HALY. Sic enim credo cum Scardeonio hæc explananda esse; non autem LIVIÆ T. F. QUARTÆ LEGIONIS HALYS; ut, teste Scardeonio ², Blondus Flavius de Italia illustrata censuit. Scardeonius ³ enim vere affirmat, quod Legio non sola litera L, sed LEG. in monumentis exprimebatur; & quod Legio quarta non Halys, sed Scythica erat dicta; ut in quodam ex nostris epitaphiis, in vico Putei Vitaliani sito, suo tempore declarabimus. Sitne vero L. HALYS ille, qui & L. Magius appellatur, gener T. Livii, focerique causa laudatissimus Rhetor, de quo Seneca ⁴, prudens fileo, cum certi nihil habeam. Eundem tamen esse Scardeonius ⁵ asserit: *Quod autem Lucius Magius & Halys appelletur, minime absurdum videri debet: cum id fere civibus Romanis conveniat, ut tribus nominibus inscribantur. Dicitur autem est Halys ab Haly fluvio & cognomine Hispano, unde forte profectus erat.* Pro sententiæ suæ fundamento epitaphium Saguntinum, ab Achille Statio Lusitano receptum, sed mutilum affert: quod ut integrum habeatur, sic legendam ex Grutero ⁶:

¹ De Antiq. Nom.

² Lib. I. Class. 3.

³ In March. Tarvis.

⁴ In Epist. lib. 5. Controv.

⁵ Loco citato.

⁶ Fol. 778. n. 2.

V. F.

C. GRATTIUS

HALYS. SIBI. ET

GRATTIÆ. MYRSINI

UXORI. KARISSIM.

ANN. XXXVII

SIBI. ET. SUIS

CONCORDIALIS] Ex hac voce ea semper mihi fuit opinio, templum Divæ Justinæ non fuisse ædem Jovis, in qua Cleonymi Lacedæmonii spolia appensa fuere, ut Blondo Flavio ¹ placet; nec Martis aut Junonis, ut tradit Paulus Merula ²; sed Concordiæ. Non enim unum hoc saxum habemus, quod Concordialis dignitatis testimonium præbeat, nempe Sacerdotis Deæ Concordiæ, sed alia etiam, quæ hoc ipsum confirmant. Concordialis autem sacerdos, teste Scardeonio ³, cui lubens subscribo, Patavii fuit magnæ dignitatis & æstimationis; qui nempe præerat templo ab Antenore erecto: in quo forsitan, postquam ⁴

—— *Urbem Patavi sedesque locavit*

Teucrorum, & genti nomen dedit, armaque fixit.

¹ In Ital. illust. loc. cit.

² Cosmogr. Par. 2. lib. 4.

³ Scard. loc. cit.

⁴ Æneid. I, 251 sq.

Et quoniam de Cleonymo mentio incidit, non possum præterire festivum navium certamen, quod singulis etiamnum annis apud nos tanquam urbi peculiare celebrari in flumine solet, originem hæud dubie sortitum ab illo, quod fufis, Cleonymo duce, Græcis, Patavii ob publicam lætitiâ fuit editum. Et hinc ait Livius ¹: *Patavii monumentum navalis pugnae eo die, quo pugnatum est, quotannis sollemni certamine navium in flumine oppidi medio exercetur.* Unde & mihi persuadeo, eandem pugnandi formam retineri. Parvæ enim naviculæ, sex robustissimorum remigum impulsu incitatae, ex adverso sibi committuntur: in prora viri lanceis armati, asferem, densissimis clavis infixis munitum, scuti loco prætendentes consistunt; qui validissimo impetu tamdiu in se mutuo irruunt, dum alteruter in aquas dejiciatur. Hoc autem celebre spectaculum diebus festis Pentecostes plerumque peragitur.

PATAVI] Vox ista, quæ loco *Patavii* hic habetur, monumenti hujus antiquitatem eruditissimo cuidam viro suspectam reddit; quod nec publice profiteri est veritus. Verum enimvero facili negotio mihi dubium tolli videtur; cum Virgilius ipse, qui T. Livii temporibus vixit, *Patavi* loco *Patavii* scriptum reliquerit: unde quidni hoc etiam in monumento toleretur?

¹ Hist. lib. 10, cap. 2.

De capite vero supra Livianum hoc monumentum posito, quod Pignorius ¹ Cn. Lentuli Marcellini effigiem referre putat, consulatur eruditissimus Tomafinus ².

¹ In Origin. Patav. cap. 17. ² In vita Livii, cap. 103.

NOTITIA LITERARIA

15

D E

T. LIVIO

E X

Jo. Alb. Fabricii Bibliotheca Latina a Jo. Aug.
Ernesti auctius edita Tom. 1, cap. XI.

LIVII ætas.

TITUS LIVIUS anno Urbis Romæ 695. ¹ natus Patavii ² oppido vetustissimo Italiæ ad Tima-

¹ Si Eusebio fides in Chronico.

² Hinc Asinius Pollio teste Quinctiliano l. 1. c. 5. & l. 8. c. 1. ajebat se in Livii scriptis *Patavinitatem* quandam, hoc est, dictiones nonnullas Patavinis proprias & Romanis auribus insolentes observasse, quarum tamen nulla in scriptis ejus, quæ hodie supersunt vestigia superesse contendit Salmasius in funere linguæ Hellenisticæ p. 236. & Dan. Georgius Morhofius in libro singulari de Patavinitate Liviana Kilon. 1685. & inter alias ejus

diff. Hamb. 1669. 4. In hujus libri capite III Morhofius disserit etiam de sepulcro ac monumento Livii, quod Patavini hodieque ostentant, ac pluribus celebravit Jac. Philippus Tomasius in T. Livii vita (Patav. 1630. 4. Amst. 1670. 12.) capite IX. Confer, si placet, Sertorii Ursati marmora erudita Epist. VIII. & Monum. Patav. p. 27 & 202. Trewenschroederi fastos Livianos p. 304. & Joannem Mabillonium T. 1. Musei Italici p. 30. Marquardus vero Gudius V. C. observavit, mo-

vum fluvium, Romæ postea Claudii Imperatoris studia moderatus, ut colligas e Suetonii Claud. c. 41. scriptor sublimi & lactea sermonis ubertate: unus res Romanas æquare feliciter ausus, obiit in patria septuagenario major, quarto anno Tiberii Imp. Urbis 770. post C. n. 17. Ab Augusto Livius dictus est *Pompejanus*, quod tantis laudibus extulisset Pompejum: neque id tamen amicitiae eorum officisse testatur Tacitus IV, 34. Annal. Cum viveret, paucis probatum, sed post fata demum meritos honores consecutum affirmat vetus auctor apud Svidam in *Κορυϋτος*. Tamen nec vivi exiguam famam fuisse, fidem facit Gaditanus ¹ ille, qui Livii nomine gloriaque excitatus ad visendum eum ab ultimo terrarum orbe venit, statimque ut videbat, abiit. Nec mortuo impetum ² quorundam, aut

numentum hoc non esse T. Livii, sed cujusdam ejus liberti, cui T. Livius Halys nomen erat, filiae. De Liviana Patavinitate Ptolemæus Flavius Anconitanus cap. 45. conjectaneor. editorum Anconæ 1522. 8. & in Tomo 1. Lampadis artium Gruterianæ p. 972. & D. Balthasar Stolbergius de barbarismis & solœcismis N. T. objectis c. 20. Nonnulla nuper in dictione Livii reprehendere ausus est Schurzschius præfatione ad dissertationes academicas; quemadmodum ejus scribendi ge-

nus & stilum defendit Jo. Tolandus in præf. ad Adælidæmonem.

¹ Refert Plinius II, 3. Epist. & S. Hieronymus Epist. 103. ad Paulinum.

² Caligulam de scriptis T. Livii abolendis cogitasse narrat Sueton. c. 34. Idem de Gregorio I. Pontifice infra referam. Caligula vero Livium reprehendit ut verbosum in historia negligentemque, Gregorius ut prodigiorum nimis frequentem prædicatorem. Mentitum in quibusdam notavit etiam Vopiscus Aureliano c. 2.

criticorum ¹ rigorem constat pepercisse. *Candidissimum omnium magnorum ingeniorum aestimatorem* vocat M. Seneca suaforia VII, & Tacitus IV, 34. *Annal. eloquentiæ ac fidei præclarum imprimis*, magno & vero elogio. Livii lætione a morbo convaluiffe narrant Ferdinandum Catholicum: perinde ut Curtii Alphonsum Arragoniæ Regem. Buchananus vero ut Livium nobis alterum exhiberet, libros ejus superstites a capite usque ad calcem traditur perlegisse non minus vigesies, ² atque ita ad opus Historiæ Scoticæ componendæ se accinxisse. Alia in Livii laudem Augustus Buchnerus dissert. Academica 393. Citatur a Livio *Fabius Pictor*, scriptorum antiquissimus I, 44. II, 40. VIII, 30. X, 37. Tum *Valerius Antias* IV, 23. XXV, 39. XXVI, 49. XXIX, 35. XXX, 19. 29. XXXII, 6. XXXIII, 10. 30. 36. XXXIV, 15. XXXVI, 19. 38. XXXVIII, 23. & *Macer Licinius* IV, 7. 20. 23. atque *Q. Tubero* IV, 23. X, 9. Ex Græcis scriptoribus *Polybius*,

¹ Jo. Brodæus ad III, 23. Antholog. p. 379. *Livium citare quid attinet, sempiternum Gallorum adversarium (sicuti recte collegit Glareanus) cujus fides merito infamatur, atque ut invidiæ plena ab Antonino Pio (respicit locum in Antonini Itinerario) ut gloriæ a Plinio (præfat. Hist. nat.) ut mendaciæ ab Augusto, Liviomastige scilicet, Pompejanum cum appellante (Tacit. IV, 34. Annal.) ut perperam cum Halicarnasseo, Diodoro,*

Polybio, a multis, ut secum pugnans, a Laurentio Valla; ut fabulosa veluti de Cæco & Evandro liquet, notatur lætæa illa ubertas &c. Jac. Palmerius in Exerc. ad optimos auctores Græcos p. 188. seq. carpit, ut aretalogum & Romanorum mancipium, plagiarium Polybii, Galli nominis inimicum &c.

² Elias Francus præfat. programmatum, editorum Islebiæ 1699. 8.

quem non incertum auctorem appellat XXXIII, 10. XXXIV, 10. XXXVI, 19. XXXIX, 52. Sæpe etiam mentionem facit *librorum linteorum*, quorum fide, tanquam auctoritate actorum publicorum, scriptores antiquissimi sunt usi, sed de illis dictum infra lib. IV, c. 5. n. x. De defectu fide dignorum monumentorum ¹ antiquioribus temporibus caliginem offundente queritur tum alibi, tum VIII, 40. *Et singulorum gesta & publica monumenta rerum confusa, nec quisquam æqualis temporis illius scriptor exstat, quo satis certo auctore stetur.*

Historiæ Romanæ libri CXLII.

Historiam Romanam, five, ut ipse XLIII, 13. & Julius Firmicus ² appellat, *Annales* ab Urbe condita ad bellum Germanicum mortemque Drusi, h. e. ad annum 744. persecutus est libris CXLII, ³ quos scripsit aliquot & forte pluribus, ut videtur ⁴, an-

¹ Hinc *frequentissime dubitare* Livium scribit Quinctilian. lib. 2, cap. 4.

² Vide Jo. Friderici Gronovii Monobiblon Observationum in scriptores ecclesiasticos p. 95.

³ *Epitomas* habemus librorum tantummodo CXL. Sed libri CXXXVI & CXXXVII epitome desideratur, ut observatum Sigonio, qui in MS. Codice vacuum intervallumprehendit, adeoque assentitur Petrarchæ, libros non

CXL, sed CXLII a Livio scriptos esse testanti. Vide Tomum tertium editionis Gronovianæ pag. 1076.

⁴ Lipsius lib. 1, cap. 20. Electorum, Vossius de Hist. lat. & Hanckius V. C. lib. 1. de scriptoribus rer. Rom. cap. IX, ante Cantabros A. U. C. 729. domitos scriptum librum saltim primum Historiarum Livii non dubitant. Sed Joannes Masson Historiæ & Chronologiæ veteris peritissimus lib. de Jani

nis post clausum ab Augusto Imp. prima vice templum Jani, cum ille anno Urbis 725. in pugna Actiaca M. Antonium vicisset. Ex his non exstant plures hodie quam 35. in quorum secundi capite 21. queritur, haud facile fuisse etiam illis temporibus certi quid & explorati de antiquioribus Romanorum ætatibus tradere. *Tanti, inquit, errores implicent temporum, aliter apud alios ordinatis magistratibus, ut nec qui Consules secundum quosdam, nec quid quoque anno actum sit, in tanta vetustate non rerum modo, sed etiam auctorum, dicere possis.* In temporum notatione Livius, perinde ut Dionysius Halicarnass. secutus est rationes Catonianas, quæ æram Urbis Varroniana biennio faciunt recentiorem. Vide H. Dodwelli dissert. X de Cyclis §. 59. 80. 87. ad initium Tab. XIII, & appendice ad prælect. Cambdenian. atque in Apparatu ad Dionysii Halicarnassei Chronologiam, & in Chronologia ipsa, quæ Dionysio in editione Oxoniensi subjicitur, Liviique singulis paginis editionis a Thom. Hearne curatæ est adscripta. In re militari Romana peccasse aliquando Livium, confundentem tempora ac diversas ætates, notavit Salmasius lib. de re militari Rom. p. 1295. 1300. 1302. 1310. 1319. seq. 1416. &c. T. 10. thesauri Antiquitatt. Rom. Græviani,

templo Christo nascente referato pag. 51. seq. & 165. scribit Livium in Historiam scribendam incubuisse non absurdis contendit argumentis. Anno Urbis 725. cepisse

scribere Livium, & a. 745. ultimam Historiæ suæ manum imposuisse, H. Dodwelli conjectura est in Annalibus Vellejanis p. 65.

*1 - B. or p. choda, H. or ma do 3 val, summa t. h. s. d. 29
- 815 v. a. l. a. p. m. s. h. (c. 218 - 167)*

Ex his supersunt XXXV.

Ex illis XXXV¹ libris, quos dixi extare, sunt primi decem, qui origines Urbis historiarumque usque ad annum 460. complectuntur. Deinde vicefimus primus, & qui sequuntur, usque ad quadragesimum quintum, quibus historia ab initiis belli Punici secundi, quod anno 536. cœpit ad an. 586. perducitur. Symmachi & Sidonii ætate, Livii quos hodie desideramus libri adhuc exstabant. *Revolve*, inquit Symmachus IV, Epist. 17. *Patavini scriptoris extrema, quibus res C. Cæsaris explicantur.* Sidonius Epist. IX, 14. *Burgundioni*, panegyricum Julii Cæsaris meditati, commendat *quæ titulis Dictatoris in vicli scripta Patavinis sunt Voluminibus.* Librum centesimum tertium citat Serenus Sammonius, ubi de carbunculo morbo :

*Tertia namque Tibi simul & centesima Livii
Charta docet, ferro talem candente dolorem
Exsectum, aut potò raparum semine pulsam.*

Guilelmus Malmesburiensis lib. II rerum Angliæ

¹ Ita malui Libros quam Decadas numerare, quia Livium in Decadas non ipse qui scripsit, sed legentium ignavia scidit, ut pridem monitum Francisco Petrarchæ in Epistola ad Boccacium pag. 1001. Vide Petrum Crinitum XII, 7. de honesta disciplina, & Sigonium in limi-

ne notar. Vossium arte Historica p. 131. Ut Livius in Decadas, sic Olympiodori Historiarum libri in δεκαλόγως dividuntur apud Photium Cod. LXXX. Lib. CXXXVI. allegatur a Censorino cap. 17. Librum CXIII bis citat Priscianus.

pag. 183. *Julium Cæsarem Livius commemorat quinque solum cohortes habuisse, quando civile bellum inchoavit, cum quibus, inquit, Orbem terrarum adorsus est.* Ex eodem Livio p. 162. videtur afferre dictum Scipionis: *Imperatorem me mater mea, non bellatorem, peperit.* Livii *Macedonica*, quæ laudat Angelus Decembrius libro VII politicæ literariæ p. 552. non alia sunt, quam quæ editis historiarum libris continentur XXXIX, sqq. Dolendum est, lucem non vidisse Lambecii, quam lib. 2, pag. 944. 977. promisit, dissertationem de XII. Codicibus MStis Livii, qui una cum duabus & triginta ejusdem Historici præcipuis editionibus in Bibl. Cæsarea Vindobonensi asservantur.

E P I T O M Æ.

Epitome librorum Livianorum, sive *breviarium* T. Livii, quod notis Sigonii, Martini Antonii Delrii, ¹ Jo. Douiatii & J. F. Gronovii illustratum habemus, etiam eorum librorum, qui interciderunt, duobus forte 136 & 137, ut supra dixi, exceptis, a L. Annaeo Floro scriptum esse vulgo existimatur, cum cujus libris quatuor epitomes rerum Romanarum sæpissime prodiit: etsi vel ideo, quod in his subinde a Livio dissentit, nonnulli duos diversos voluerunt Floros comminisci, ut Balthasar Bo-

¹ Brevia Delrii in Epitomen Livii scholia prodierunt cum ejus notis in Solinum Antwerp. 1571. 8. Edita est

etiam Epitome illa cum Sigonii & Delrii notis, Genev. 1606. 8.

nifacius XV, 5. Hist. ludicræ: alii vero, ut Dionysium Gothofredum facere memini, suspicati sunt, Livium ipsum, ex more veterum, epitomas illas, veluti indices, præfixisse singulis libris, quæ deinde cum altera epitome rerum Romanarum confundi, atque adeo ad Florum auctorem referri facile potuerint. *Junium* quoque *Maximum*, æqualem Statii Poetæ, Historias Sallustii Liviique in epitomen contraxisse, viri docti observant ex his verbis IV silvar. 7. *Omne queis mundi senium remensus Orsa Sallusti brevis & Timavi reddis alumnum.* Notum præterea est ex Servio ad *Æneid.* X, 388. *Rufum Festum Avienum* totum Livium Jambis olim expressisse. Sed & illa Avieni metaphrasis pridem intercidit.

Epitomæ hæc *Livii* cum *Floro* sæpius editæ prodierunt, etiam separatim Venet. 1521. 8. ap. Aldum, & Basil. 1590. 8. & cum *Car. Sigonii* atque *Antonii Delrii* notis Genev. 1606. 8. quam editionem Gervasiensem vocat Thomas Hearne, qui in *Livio* suo Oxonii edito, breviarium istud *Livii* summo studio ad Codices MSS. & impressos exegit, collatis etiam, quæ Petrus Pithœus ad id annotaverat. Sed etiam in edd. recentioribus, ut Gronovianis, earum cura est habita, diligentissime autem in *Drakenborckiana*, in qua & *Sigonii Delriique*, & *Dukeri* ipsius notæ egregiæ accessere.

Vir eruditiss. Janus Vincentius Gravina Orat. 1. de instauratione studiorum p. 12. Romanorum res gestas initio per compendium petere suadet ab hac *Epitome Liviana*, ut quæ longe simplicior & can-

didior fit Flori & Velleji libris, resque exprimat propriis & convenientibus verbis, absque fuce & argutiis, quibus non satis uterque illorum abstinerit, e quibus, periculum fit, ne puerorum animi fallacibus illis & meretriciis orationis ornamentis a nervosa & civili scribendi consuetudine abducantur. Præterea *Johannes Jensus*, consulturus juvenum studiosorum tempori, quorum plerique mole Livii deterriti, ultra primam decadem haud progrediuntur, atque adeo delibatis modo adolescentis populi Romani rebus, maturum adulti ejusdem populi vigorem intactum relinquunt, *Epitomen novam historiae Rom. totius Livii*, verbis ejus contextam, neque multo grandiore una Livii decade composuit, inscripsitque *T. Livii Patavini Historiarum corpus concinnius*, ex Gymnasio Dordraceno, typis Bramiis luculentis, anno 1711. 8. Ceterum Livium ipsum evolvere cupientibus hoc compendio suo neutiquam e manibus excutere voluit florentissimum scriptorem, sed tantum iis, qui magnitudine operis removeri se ab ejus lectione patiuntur, succurrere, ut Historiam Romanam Livianam totam intra brevius spatium absolvere possint. Speciem ista habent. Qui historiae Rom. compendium requirant, iis vero ita consuli possit: nec ad notitiam generalem historiae Rom. Liviana lectione opus fit. Qui autem Livium cognoscere velint, iis talibus libellis non consulitur: & possunt etiam juvenes longius progredi in Livio cognoscendo, si modo vera ratio in eo tractando in scholis adhibeatur, de qua videndus Gesnerus in præfatione ea, quam

editioni Lips. a. 1735 præmisit. Sed opus est magistro, qui ipse intelligat, nec opus habeat ad singulas horas trepidare in præparatione ad locum intelligendum, quem explicare vult.

SUPPLEMENTA.

Perditos Livii libros ingenio quodammodo restituit vir doctissimus *Jo. Freinshemius*, argumento eorum ex epitomis petito, & adhibitis græcis & latinis, quæ exstant, monumentis, explicato tanta industria & felicitate, ut ipse non dubitet profiteri; *se neutiquam metuere, ne quis ex omnibus his scriptoribus, qui sunt in hominum manu, aliquid efficiat in hoc genere concinnius, copiosius, verius.* Primi decem libri Regiæ Christianæ dicati viderunt lucem Holmiæ 1649. 12. Libri sexaginta deinde Argentorati an. 1654. 4. quos Gallice etiam vertit Petrus Rye-rus. Denique adjunctis XXXV, postumis, quos ab heredibus Galli redemerant, universi libri XCV, supplementorum vulgati sunt a Jo. Dujatio, in editione Livii ad usum Delphini; sed vulgati tum sunt parum emendate, ut dolet Jo. Clericus V. C. Tomo 3 Bibl. selectæ p. 366. correxit vero Creverius. Ac dolendum est, ea hodie vix legi. Qui judicare possunt, fatebuntur, egregium opus esse, quale singulis sæculis vix singuli conficere possint. *Fragments* e libris Livii deperditis servavere Grammatici latini veteres, interdum sub libri indicio, interdum simpliciter: quæ ad calcem edd. quarundam, nominatim ed. Drakenborchianæ T. VI. reperiuntur. Est vero

etiam e Codice Laudino prolata *ῥῆσις*, quæ pro fragmento Livii esset. Id est hujusmodi, pertinetque ad L. XXII, 18. post verba *Allifas loco alto m. confedit*: Et reparando suggestu manu haud magna Allifæ incœnia, quasi palans perveniens, ex oppido bellum instructa armamentis erupit, quam consul vi captam trucidatis, qui in ea constiterant, reservat ad pugnam. Sed oppidani, sicut quibus curæ pusillum inerat, in diem alterum umbonibus belluatis paucos fugaces invadunt, elephantemque omine meliori receptant, & Allifas, Rufium quondam vocitatas, ab dextro sequente sinistrum, augurio nomen imponunt accolæ. — Super hoc fragmento legenda Dodwelli Dissertatio supra memorata, in Hearnii notis & T. VII. ed. Dr. qui historiam, quæ est in fragmento, explicat & defendit: nec tamen sibi satisfacit & pronuntiare audet, eam veram esse, vel fragmentum hoc esse Livii. Spurium recte judicat Cuperus libro de Elephantis in numis c. 4, ut & alii.

SCRIPTA Livium illustrantia.

Sunt & alia quædam scripta recentiorum, quibus Livio, vel ejus rebus, aut scriptis lux nonnulla affertur. Sunt autem duplicis generis: alterum est Criticum & Grammaticum; alterum Politicum. Ex illo genere, ut mittam eos, qui non peculiaribus libris id fecere, sed per occasiones varias, ut *Perizonius* excellentibus & nunquam satis laudandis Animadversionibus historicis, *Pighius*

in Annalibus, *Lipſius* & alii; ex illo igitur genere ſunt *F. Urſinus* in Notis in varios hiſt. Antverp. 1595. 8: *Marcellus Donatus* in Dilucidationibus, ſimilis inſtituti, non tamen admodum probatis elegantibus iudicibus. *Latinus Latinus* in Biblioth. Tom. II. *Jo. Velcurio*, qui notas in L. I. II. edidit, *Petrus Nannius* in L. III. Lovan. 1545. 4. *Jo. Saxoniſ* ad L. XXI & XXII. Baſ. 1547. (de quo v. *Suſfridus Petri* Scriptt. Friſ. p. 104.) ut taceamus eos, quos T. VII. inferuit *Drakenborchius*: *Faernus* in Cenſura Emendd. Sigonii, *Averanius* in Diſſ. XXXI. ad loca *Livii* T. II. Operum.

Ex genere altero ſunt: *Nicol. Machiavelli* in Decadem primam *Livii* diſſertationes tribus libris diſtributæ, & Italice primum, deinde Latine, Gallice denique, atque in aliis forte linguis editæ, deque Republica & religione Romanorum veterum, etiam de re militari, *Folardo* iudice¹ acutiſſime diſputantes. *Casparis Facii Politica Liviana*, quibus artibus comparatum auctumque, & quibus erroribus ac vitiis amiſſum Imperium veteris Romæ fuerit, *Altenburg*. 1617. 4. *Ant. Cicarelli de Foligno* diſſertationes in *Livium*, Rom. 1589. 4. Italice. *Jo. Schefferi* in Librum I *Livii* Exercitationes VII. *Upſal*. 1665. 4. *Nic. Belli* ſive *Bellefontani*² diſſertationes in optimos veteris ac novæ Hiſtoriæ ſcriptores, imprimis *Curtium*, *Suetonium*, *Tacitum*, *Livium* &c. *Francof*. 1626. *Jo. Gillejus* in laudem *Hanni-*

¹ Obſervatt. in *Polybium*
T. 1. pag. 223.

² Nomen ut videtur ficti-

tium. v. *Thomaſ. de plagio*
§. 238. Lib. ipſe undique cor-
raſus, nec magnæ adeo rei.

balis apud Livium, Basil. 1550. 8. *Georgii Martini Dorn* specimen Institutionis Politicæ Livianæ, Giesfæ. 1657. 8. *Iusti Reiffenbergii* monita, exempla, consilia Politica Liviana, Francof. 1629. 8. *Phil. Loniceri* Icones Livianæ versibus illustratæ, ib. 1573. 8. *Sebastiani Maccii* de Historia Liviana volumen factis amplum laudat Erythræus pinacotheca I, p. 277.

Ad prius genus referre possis & hos: Livium cum Thucydide, ut Tullium cum Demosthene, contulit Rhenatus Rapinus singulari diatriba, Gallice plus semel excusa, post editionem Paris. 1681. 12. De *Polybii* Liviique diversa scribendi ratione, & quantum hic illum imitatus fuerit, consulendæ sunt Jo. Henr. Bœcleri *Lectiones Polybianæ* p. 199. sq. H. Casauboni præfatio ad Polyb. & Fulvius Ursinus in notis ad excerpta de legationibus, H. Casaubonus in Casaubonianis p. 73. Vere prædicat Quintilianus lib. X, cap. 1. lacteam Livii ubertatem, aitque, eum cum in narrando miræ esse jucunditatis clarissimique candoris, tum in concionibus, supra quam enarrari possit, eloquentem. Quis unquam Camillum brevius vel dignius laudavit, quam ubi Livio est *vir unicus pace & bello*? Quis Catonem, quam ex Livio Hieronymus Proœmio lib. 2. in Oseam: *Cujus gloriæ neque profuit quisquam laudando, nec vituperando quisquam nocuit, cum utrumque summis præditi fecerint ingeniis.* Inprimisque admirabilis est in narrationibus rerum majorum & ornatis, ut de Horatiis & Curiatiis; in descriptionibus porro rerum & locorum, denique in Elogiis virorum magnorum, ut Hannibalis, Fabii,

Scipionis, quæ solet vel in principio rerum ab iis gestarum, vel post mortis narrationem ponere. *Henr. Chr. Crellii* de T. L. dictione progr. prodiit Francof. ad Viadr. 1729. 4. *Ejusd.* de T. Livio aptissimo stili cultioris magistro, *ibid.* 1732. 4. De lactea Livii ubertate disp. scripsit *J. H. Parreidt.* Lips. 1746. De Livio ejusque virtutibus diff. *Jo. Chr. Briegleb.* Coburg. 1778. Orationes sive Conciones CXCIII e Livio excerptæ cum notis Joach. Perionii, Paris. 1532, 8. Antv. 1535. 8. & Basil. 1545. 8. item e Livio & aliis Latinis, tum Græcis quoque Historicis excerptæ cura H. Stephani prodierunt a. 1570. f. Atque illæ quidem e Latinis Historicis frequenter deinde recusæ sunt, Coloniae & in Belgio, tum Lipsiæ, Joach. Gesenio recensente, denique ex accuratiore recognitione Christophori Cellarii V. C. Lips. 1699. 12. Sic in Orationes e decade tertia Rhetoricam & dialecticam analysin contexit, & miscellanea, observationes, & apophthegmata a se enotata subjunxit Reinhardus Lorichius Hadamarius, Francof. 1537. 8. Orationes rectas in Livio & Sallustio olim reprehendit Pompejus Trogus, teste Justino XXXVIII, 4. nullas nisi obliquas in historia ferens. Neque dubium est, Orationes ejusmodi Livium ex ingenio suo probabiliter composuisse, ut illustris Norisius diff. 1. Cenotaph. Pisan. cap. 1. demonstrat exemplo petito e Livii XXXIV, 5. ubi L. Valerius tribunus inducitur, M. Porcio Catoni 37 vix annos nato Origines ipsi scriptas objiciens, de quibus illa ætate Cato ne quidem cogitaverat. Sed tota hæc causa Orationum in historicis latinis, hic

accurate explicari non potest: quæ a paucis satis recte intelligitur. Metium vero Pompeianum a Domitiano Imp. interfectum narrat Xiphilinus pag. 222, quod Conciones Imperatorum Ducumque apud Livium frequenter lectitans imperium affectare videretur. T. Livius (quem merito πολιτικώτατον scriptorem appellat Thomas de Pinedo ¹, in aphorismos & porismata redactus est, in recreationibus ² Academicis Grosianis, *Christiani Adami*, liberi Baronis Gros de Torckau, Erlangæ 1713. 4. Tomo tertio. *Sententiosè* ³ a Livio dicta collegit Nic. Cragius, Hafniæ. 1582. 12. & Jacobus Corbinellius, Paris. 1694. 12. *les anciens Historiens latins réduits en maximes. Premier volume, Tite Live.* Lexicon Livianum moliti sunt quidam, item Indices latinitatis: ut *G. P. Schulzius*, Prof. Francof. *Joach. Borghesius*, Prof. Groninganus, & alii: nemo perfecit. Nunc Glossarium exquisitioris latinitatis Liv. habemus in editione nupera Lips. Cæsarem & Livium ex antiquis numis 983, & inscriptionibus 542, insigni studio *Henrici van der Borcht*, Comiti Arundello familiaris, illustratum habebat Francofurti ad Mœnum Zacharias Conradus ab Uffenbach.

MSSi Codices Liviani multi exstant, quorum magno numero usus est Drakenborchius, item Hear-

¹ Pinedo notis ad Steph. Byz. pag. 557.

² De his Acta Eruditor. a. 1714. pag. 81.

³ Laudavit merito Livium eo nomine Corbinellius, quod

sententias non ita historiae suæ intexuit, ut emineant extra corpus orationis expressæ, sed intexto vesti colore niteant. Confer Bælii Lexicon in *Theon*, nota G.

nus, Crevierius &c. Inprimis insignis est Puteanus; literis uncialibus, & nulla ferme vocum distinctione exaratus: de quo Salmasius Epistola ad Sarravium p. 188. edit. Ultraject. post Epistolas Gudianas. *Jani Gebhardi* varias lectiones Codicum trium MSS. Livii Palatinorum ex auctione Bibl. Gudianæ nactus *Henr. Leonh. Schurz fleischius* ¹ specimen illarum in librum primum vulgavit Halæ Sax. 1712. 4.

LIBRI deperditi frustra expectati.

Perditorum ex Livii historia librorum sæpe vana spes facta, vani sumtus impensi; qua de re legendus doctiss. Morhofius libro de Livii Patavinitate capite I. Apud Arabes quidem libros Livii universos exstare pridem affirmavit Thom. Erpenius Orat. 2. de lingua Arabica. Et in CPolitana Bibliotheca integrum fuisse Livium Arabice, non dubitavit Petrus de Valle, part. 1. Itinerar. Epist. IX: sed oblatis a magno Duce Florentino 5000 piastrorum, & a legato Regis Christianissimi decies mille thaleris, inveniri nusquam potuit: longe majore etiam 50000 scutatorum proposito præmio, vanus promissor fuit Justinianus Chius. Alii in Fessana Bibliotheca asservari scripserunt. *Utinam ex Fessanis tenebris*, inquit Abr. Hinkelmannus præfat. ad Coranum Arabice editum lit. k. *incomparabilis Livius integer erueretur, & vel rudi versione in lucem ederetur! sane qua felicitate Curtium Freinshemius, eadem, & forte majore, Livium illustris Gronovius no-*

¹ Acta Erud. a. 1717. p. 406.

bis facile restitueret. Richardus Montacutius præf. in Apparatum ad Origines Ecclesiasticas negat, *Decades Livii unquam restaurandas, nisi forsitan, ut splendide mentitur Hispanus quidam παντοπόρος, apud ultimos hominum Æthiopes in montis Amara Βιβλιοταφω.* Latina ipsa Livii traditur habuisse, & ex Bibliotheca Drunthemensi in Norvegia accepisse Martinus Grœningius, Cantor Bremensis Capituli a. C. 1521 denatus. Aliud librorum Livii deperditorum exemplar scriptum in membranis fertur fuisse in Gallia in Abbatia fontis Ebraldi, quod ab Abbatissa thesauri ignara concessum pharmacopolæ cuidam, ab hoc venditum homini, qui membranis illis reticula sphæruleis sive pilis volantibus mittendis & accipiendis obducebat, quod a viro aliquo docto forte observatum tunc demum est, cum membranæ illæ ad unam omnes essent consumptæ, ut ex ore Joannis Capellani accepit Colomesius in Opuſculis p. 105. & in Bibl. selecta pag. 31. seq. ubi etiã Epistolam ejusdem Capellani profert de hoc argumento. Idem relatum memini in Pithœanis, & in parte sec. Menagianorum p. 97. Bonnetus Bourdelotius in notis ad Bibliothecam selectam Colomesii, cum auctario recusam Parisiis 1531. 12. p. 41. *L'an 1682, je vis à S. Germain des Grecs de l'Isle de Chio, qui venoient pour traiter avec Mr. Colbert d'un Tite Live entier, qu'ils disoient avoir dans leur Isle, & qui avoit été sauvé de l'incendie de la Bibliothèque de Constantinople. On dit, que le marché en avoit été conclu à 60000 livres, & qu'on avoit envoyé dans l'Isle pour le copier, de peur, que le vaisseau, qui l'ap-*

porteroit , venant par malheur à périr , la perte ne fût irréparable. On ne parloit dans ce temps là que du plaisir, qu'auroient les gens de lettres, de voir un Tite Live entier : car le Roi , disoit-on, le faisoit imprimer à ses frais , & le donnoit au public à bon marché. Mais depuis ce temps-là on n'a point entendu parler ni des Grecs de Chio , ni du Tite Live. Quod autem in Catalogo MSS. Bibl. Bodlejanæ p. 60. inter libros Guil. Laudi num. 127. memoratur *T. Livii Decas secunda*, error est, nam tertiam legi debere in præfatione Voluminis annotatur. Porro Gregorio I. Pontifici Livianorum librorum jacturam tribuere non dubitat Rich. Montacutius præf. ad Analecta, quoniam in Antonini Summa legitur, Gregorium M. (ita Imp. Caligula olim cogitavit de Virgilio Liviique scriptis abolendis, teste Suetonio) quoscunque nancisci potuit Livii codices combussisse, quod nempe ab eo multa prodigia ¹ narrarentur,

1 Tot prodigia Livio commemorata, quibus integrum librum Julius Obsequens implevit, ita defenſitavit homo minime superstitiosus e Gallicis Mottanus Vayerus : *Ce n'est pas dire qu'il ait eu intention de faire croire ce dont il n'estoit pas lui-même persuadé ; au contraire, il débite tous ces prodiges de telle sorte, qu'on voit bien qu'il n'a eu autre but que faire comprendre de quelles erreurs le peuple estoit alors abusé, les loix de l'Histoire l'obligeant à cela.* T. 1.

Opp. pag. 117. edit. in fol. adde p. 227 & 371. Idem dicere liceat de Dione, Apiano, & Pausania, Historicis Græcis, qui superstitione populari abrepti arguuntur. Uti e contrario palam prodigia illa flocci pendens Polybius contemptæ religionis reus audit, mediam sententiam probante Plutarcho, quo iudice τῶν τοιοῦτων καὶ πιστεῦειν σφόδρα καὶ τὸ λίαν ἀπιστεῖν, æque durum & periculosum est, in Camillo f. 132. Confer, si placet, J. Rualdum

quæ facerent ad idolosum superstitionem probandam. Hanc Antonini narrationem in dubium vocat Jacobus Gretferus lib. I de jure prohibendi libros malos c. XXX. Librorum Livii, qui exstant, exemplum eleganter scriptum ut a. 1455 a Poggio Florentino sibi compararet, agrum, quem habebat, vendere non dubitavit Antonius Beccatellus, Pannonitanus, ut ex ejus Epistola ad Arragoniæ Regem Alonsum refert Gallæsius libro de Bibliothecis p. 186. In Leibnitianis, sive Otio Hanoverano nobilissimi Viri Jo. Frid. Felleri p. 156. legas, Patrem Zwenbruckium sancte affirmasse Patri Gamanfio, se in manibus habuisse Bremæ MStum Livii plenius, sed cum mercator justo carius vendere vellet, neglexisse: cum rursus quæreret, post mercatoris mortem, non comparuisse. His adde, quæ ex J. Renneri Chronico Bremensi ad an. 1521 de Martino Groningo, qui deperditos Livii libros habuerit, narratur in Bibliotheca Bremensi historico theologica Tomo sive classe 2, fasc. 1. p. 143. seq.

SCRIPTA ejus alia deperdita.

Scripta Livii etiam alia apud veteres memorantur, ut *Dialogi*, quos non magis Philosophiæ

in Plutarchi vita c. XXIX. Neque omnibus fidem habuisse se Livius ipse pluribus locis testatur, ut XXIV, 10. *Prodigia eo anno multa nuntiata sunt, quæ quo magis credebant simplices ac religiosi*

homines, eo plura nuntiabantur. Sic Tacitus III, 55. Hist. post prodigia quædam memorata: *Sed præcipuum, inquit, ipse Vitellius ostentum erat, ignarus militiæ, improvidus consilii.*

quam Historiæ annumerari potuisse, ait Seneca Epistola centesima: *Libri Philosophici*, sive ex professo Philosophiam continentis, id. *Epistolæ ad filium*, qua Demosthenem atque Ciceronem illi legendos unice suavit, brevissima & tutissima ad eloquentiam via, Quintil. X. 1. Fragmenta duo insignia Livii de Cicerone, quæ existant apud M. Senecam suavoria sexta, ex historiæ libro CXX petita sunt. Etiam Livii filii scriptis usum se profitetur Plinius libro V. Hist. natural. *nisi locus mendosus est*, inquit Harduinus, & *ex præpostera Livii repetitione Livii filii conficta vox*. Si Henr. Dodwellum audimus, defunt hodie in Livio præter tot libros integros, & quæ in quinque, qui existant postremis a Jo. Dujatio ex ingenio suppletæ sunt lacunæ, etiam hinc inde quædam, ubi nulla sunt in editis Codicibus neque in MSS. hiatum vestigia: *Defunt in rebus Coriolani bina Consulium paria e Dionysio Halicarnasseo supplenda, Livii ipsius rationibus plane necessaria. Et anni quoque U. C. Catoniani 179. tribunos militares consulari potestate omisso ex ipso Livio evincimus. Et in censorum successione multa supponit Livius, frustra plane in hodiernis Livii exemplaribus quærenda. Deest etiam in eodem locus, quo tertium inierint decemviri, cum tamen tertium illius Magistratus annum supponant ejus rationes. Sic etiam in tribunorum plebejorum decennali seditione & Magistratum Curulium Anarchia deest annus, quem tamen non agnoscunt modo, verum etiam exigunt ejus calculi recte & pro ipsius mente positi.* Hæc Dodwellus diff. 10. de Cyclis & in Chronologia Dionysii Halicarnassei, & in diff. de fragmento Livii, quod

e MS. Laudino primum editum est. De reliquiis corporis T. Livii, si Diis placet, inventis Patavii, ad animum lectoris recreandum juvat adscribere hæc ex paralipomenis ad propylæum Papebrochianum Actis Sanctorum Maji præmissum p. 145. *Abhinc duobus circiter seculis* ¹ *nescio quo casu in quodam angulo nobilis monasterii S. Justinæ Patavii detecta est plumbea sandapila, ossa quædam servans. Ad ditum erat Epitaphium T. Livii nomen præferens. Mox desiderium honorandi memoriam scriptoris tam clari impulit Patavinos, ut depositum tam carum in Curie atrium transferrent, ubi magnificentum erexere monumentum. Andreas Dandulus Senator Venetus, tresque simul aut quatuor Equites læti humeros feretro subjicere; Zacharias Trevisanus, & Leonardus Mocenigus, duo Reip. Magistratus, funus inclitum prosequerentur, solenni cum pompa, per nobiliores urbis vicos circumductum. Alphonsus Rex Arragonum, literatorum amator insignis & æstimator, simul atque thesaurum hunc erutum agnovit, transmitti sibi brachium postulavit per Antonium Panormitanum ² inclytum Poetam, qui legatione pro Rege ordinaria apud Remp.ungebatur. Datum id precibus Regis, missum brachium, cui longo post temporis intervallo monumentum statui curavit Jovianus Pontanus, erepto rebus humanis Alfonso,*

¹ A. 1541. Giornale de' letterati d'Italia T. XIV. p. 358.

² Idem Panormitanus ad eundem Alphonsum p. 118. Epist. Sed & illud a prudentia tua scire desidero, uter, ego, an

Poggius melius fecerit: is ut villam Florentiæ emeret, Livium vendidit, quem sua manu pulcherrime scripserat: ego ut Livium (120. aureis) emam, fundum prescripsi.

priusquam Neapolim navis appelleret tanto insignis munere, quod avide Princeps erat præstolatus.

Ridetur Livius a Lancelloto, quod scripsit faxis pluiffe. Et tamen lapides de cœlo subinde cadere testatissimum est, & multis exemplis comprobatum ab Antonio Vallifnerio, in Diario Veneto, Giornale de' letterati d'Italia Tom. V. p. 201. & T. XXVII. p. 173. seq. Alienum Livium fuisse a credulitate superstitionosa, facile etiam testantur hæc loca lib. V, cap. 21. *Hæc ad ostentationem scenæ gaudentis miraculis aptiora quam ad fidem, neque affirmare neque refellere operæ pretium est.* Et VIII, 6. *nam & vera esse, & apte ad repræsentandum iram Deum ficta possunt.* Male de religione ac pietate, pessime de Livio meritis est Jo. Tolandus, qui ut illum a superstitionis culpa, quod multi jam ante illum fecere, absolveret, adstrinxit invitum irreligiositatis & ἀσεβήτων crimine, veluti nihil possit esse medium inter modestum contemptorem anilium, quales erant pleræque Romanæ, superstitionum, & impudentem atque impium conculcatorem Numinis & omnis in universum religionis. Tolandi liber inscribitur, *Livius ἀσεβήτων, sive de superstitionis culpa Livio falso imposita dissertatio*, Hagæ Comitum a. 1709. 8. Scripsit adversus eum D. Jacobus Fayus Ultraj. 1709. 8. Scripsit & Elias Benedictus, Gallice, Delphis 1712. 8. scripsere item alii. Sed non opus puto multis cum eo contendere, cui ita perit frons, ut non erubescat Mosen venditare pro assertore Spinositimi.

LIVII alii scriptis clari.

Alius ab utroque fuit 1) *Livius* patria *Pænus*, quem Valerius quidam in Epistola ad Rufinum, de non ducenda uxore, quæ legitur inter Opera S. Hieronymi, *gravem & uxoratum historiographum* vocat (forte confundens eum cum T. Livio) refertque his verbis reprehendisse Cannium, a Gadibus Herculis Poetam facundiæ lenis & jucundæ, (Martiali, qui ejus sæpe meminit, æqualem) quod multarum gauderet amoribus: *Nosram Philosophiam participare non poteris, dum a tot participaris. Non enim eo jecore Junonem amat Titius, quod multi vultures in multa divellunt.* Hujus Livii nullam fieri mentionem in præclaro Vossii opere de Historicis latinis, miratur Colomesius notis ad Gyraldum de Poetis p. 235. Alius 2) *Livius*, *Poeta Christianus*, seculo post natum Christum quinto clarus, cujus meminit Honoratus in vita Hilarii Arelatensis. Vid. Casp. Barthii Advers. XLVIII, 16. Prætereo 3) *Livium Andronicum* Tragicum latinum antiquissimum, de quo infra libro IV. & de quorum scriptis nihil constat, ut 4) *Livium*, Augusti tabularium Atalianum in veteri inscriptione apud Laur. Begerum V. C. in spicilegio Antiquitatis p. 78. vel denique recentiores, ut 5) *Titum Livium Burattinum*, Regis Poloniarum Architectum, cujus literas ad se scriptas exhibet Athanasius Kircherus T. 2. Œdipi Ægypt. parte 2. p. 303. 6) *M. Livium Sanutum* cujus Geographia Italice prodiit Venet. 1588. 8. 7) *T. Livii Foro-Julienensis* librum de vita Henrici V, Angliæ

Regis, ad Henricum VI ejus filium, non ita pridem vulgavit V. C. Thom. Hearne Oxon. 1716. 8.

Ut Flav. Josephus ab Hieronymo Epist. 22. ad Eustochium dictus *Judæorum Livius*, sic Baronium, *Livium Ecclesiasticum* appellare non dubitavit Secundus Lancellotus¹. Hieronymi Suritæ Epitaphium:

*Livius Arragonum jacet hoc Surita sepulcro,
 Nil magis hoc dignus nomine notus erit.
 Historicum studiis, annales nomine vicit
 Ipse suum nomen, seque suosque libros.*

¹ Oggidi T. 2. p. 568.

I N D E X

T I T I L I V I I

EDITIONUM POST DRAKENBORCHII, FABRICII
 ERNESTII ET HARLESII CURAS
 AUCTIONUM ET IN VI ÆTATES S. CLASSES DIGESTUS.

Æ T A S I. A U T O G R A P H A R I A

1469 — 1518.

Præivere, *princeps* Jo. Ant. *Campanus*, & Jo. *Andreas* Alerienfis Epifcopus, ille Romanæ I, hic II curator. Inter hos, qui maxime Andream fecuti funt, denuo textum recognoverunt, Petrus *Justinus Philelphus*, qui Mediolanenfi II, Lucas *Porrus*, qui Tarvifinæ II, tribus poft annis repetitæ, præfuit, M. Ant. *Sabellicus*, cujus Livius ad vetuftum exemplar collatus inde a Veneta II obtinet edd. & Jod. *Badius Ascenfus*, qui Sabellicanas curas fuarum edd. bafin fecit, fed & ipfe collationibus cum X codd. MSS. per Gerhardum *Vercellenfem* factis ufum fe profiteretur in *Ascenfiana* II an. 1513.

1469 *Romana* I, fol. II. tom. fine nota anni, cura Ant. *Campani*, per *Udalricum Gallum*. Hanc effe editionem principem, ut verbis utamur cl. Harlefii, multis probat argumentis Laire in fpecimine p. 137 — 141, & primam quidem Decada 1469, duas autem ultimas decadas non ferius, quam ineunte anno 1470 primum vidiffe lucem. Anno 1471 allignant illam editionem Maittairius in *Annal. typogr.* tom. I p. 72. Gronov. in præf. *Drakenb.* in clencho edi-

tionum, Ernestius in Fabricii B. L. Contra Clericus & Hearne referunt illam ad. an. 1472. At Laire destruendo has suspiciones docet p. 141, Campani versus solitos, in hoc quoque exemplo conspicuos

*Anser Tarpeji custos Jovis: unde: quod alis
 Confreperes: Gallus decidit: Ulter adest
 Vuldricus Gallus: ne quem poscantur in usum,
 Edocuit pennis nil opus esse tuis.
 Imprimi ille die: quantum non scribitur anno:
 Ingenio, haud noceas, omnia vincit homo.*

Campanus.

significare, quæcunque editio illos habeat adjectos, eam a medio anno 1469 usque ad finem Decembris a. 1470 prodire debuisse, quia toto eo tempore, nec ulterius, officinæ Ulrici *Han* præfuit Campanus, quo profecto, ineunte a. 1471, alia usus est Ulricus formula. Aliud argumentum ducit ex caractere minuto, quo versus Campani in hoc exemplo exarati sunt; quo quidem impressi libri prius exierunt ex Ulrici officina, quam caractere majore descripti, & quem, profecto Campano, atque a. 1471 societate inita, proprium sibi reservavit. Ceterum hanc ed. Gruterus in notis ad edit. suam 1628, vocat posteriorem, uti Romanam, quæ ab Jo. Andrea Alerienti curata sequitur, priorem putavit.

•••• *Romana* II, fol. sine anni nota, per Conr. *Schweinheim* & Arn. *Pannarz*, cura Jo. Andr. Episcopi Alerientis, qui edit. hanc a se recognitam, addita præfatione, quam pleræque editiones seculo XV & initio seculi XVI excusæ servarunt, dedicavit summo Pontifici Paulo II Veneto, & Marco Sancti Marci Cardinali. — Hujus editionis 275 exempla excusa traduntur in indice librorum per dictos artifices impressorum, subjuncto epistolæ Jo. Andrea ad Xystum IV d. 20. Mart. an. 1472, in Maittairii ann. typogr. T. I, p. 48 & Bibl. lat. Fabricio-Ernestiana T. III, p. 564 sq. n. (o). Eam autem a. 1471 antevertisse, eo argumento probat Jo. Frid. Gronovius in Præf. quod illo anno Paulus Pontifex, cui dicatur, mortalitatem explevit. Hinc Fabricius

in B. L. eam retulit ad an. 1470, similiterque viri clariss. Thom. Hearne & Jo. Clericus in Indice præcipuarum Livii editionum. Vid. Laire specim. p. 160. Verum Maittairius in Annal. typogr. tom. I p. 66, & tom. IV p. 283, potius referendam contendit ad an. 1469, quia Veneta Livii editio, quæ sequitur, & lucem adspexit a. 1470, eandem, quam hæc Romana, Episcopi Aleriensis epistolam præfert, & huic posterior, quam illa, censenda est. Aleriensis enim epistola indicat, eam editioni, quæ Romæ excusa est, dedicandæ conscriptam esse: neque facile credi potest, utramque editionem, alteram Romæ, alteram Venetiis eodem anno exiisse. Sed quoque de ipsius editoris nomine non convenit. Vide Drakenb. in elencho, qui præcipue de nomine Episcopi Aleriensis, quod Ughellus in Ital. sacra tom. III, p. 503 *Joannem Antonium de Buxiis* perperam scripsit, multus est. Plura & certiora de vero nomine *Jo. Andreae* tradit Freytag in Appar. Liter. tom. III. p. 619. sqq. Præterea monendum est, in hac edit. undetriginta libros esse, nempe 1 — 10 & 31 — 40, sed sine libro 33, qui & ab omnibus abest, usque ad edit. Moguntinam: etsi in nonnullis exemplis numerus denarius plenus videtur.

1470 *Veneta* I, fol. per *Vindelinum Spirenses*, sive de Spira. In hac editione denuo apparere epistolam Jo. Andreae, Episcopi Aleriensis, quæ jam in præcedenti Romana data erat, monuit Maittairius in Annal. typogr. tom. I, pag. 69 & tom. IV, p. 289. Ad finem hujus edit. adscribitur annus MCCCCLXX, & subjiciuntur sex & quadraginta versus, quos ex exemplo hujus raro obviæ editionis in Bibl. Senat. Lips. exstante adscribimus:

*Proderat haud multum, Livî, abs te scripta fuisse
 Maxima, si Romæ facta pari eloquio:
 Quæ seu desidiis, alio seu crimine quovis,
 Sive & temporibus cuncta fere occiderant:
 Quaque superfuerant opera, hæc tam rara videri,
 Ut pene ipsorum copia nulla foret.
 Et VINDELINO debebis tu quoque, formis
 Egregie impressit has modo qui decadis:*

Atque ipsas iisdem scævis (sic) velut hostibus acri
 Bello oppugnatas fortiter cripuit.
 Hac etenim studiis non tantum Romulidumve
 Historiis opera, quam tibi, consuluit.
 Quippe tuo hac in re cum Romæ nomine juncto,
 Alterutrum servans servat utrumque simul.
 Ergo tua ut perdens opera est invisus habendus,
 Horum servator sic tibi amandus erit.
 Magna loquat, sed vera tamen. Conferre putatur
 Ad famam natos progenuisse probos.
 Non parvo majora tamen monumenta putanda
 Sunt opera, excellens quæ parit ingenium.
 Nec vero tantum fluxi quia corporis illi
 Existunt fœdus, perpetui hæc animi:
 Verum etiam nati quia non a patribus omnes,
 Sunt quibus affecti dotibus, accipiunt.
 Si qua autem gravis atque ornata oratio, qualem
 Cernimus esse tuam, composita existerit:
 Huic nihil est prorsus, quod non suus afferat auctor:
 Sive ejus formam, sive alia aspicias.
 Ipse hanc effingit, poluit hanc, atque induit ipse,
 Ipse, anima tanquam, sensibus instituit.
 An natos igitur servantis cuncta putares
 Te debere, nihil hæc opera eximia?
 Adde, quod & perpulchra effinxit & optima, cunctis
 Hoc (sic) etiam ut placeant, hæc monumenta tua,
 Atque tot impressit, totum bis jam possit in orbem
 Diffundi, atque ævum nomen in omne tuum.
 Sed tua quæ probitas, dignas non ambiget ullus
 Quin habeas grates ipse tuo artificii.
 Id superest, quando nulla est tam digna supellex, (sic)
 Quæque tot ac tantis usibus esse queat.
 Si neque jam magno sumtu magnove labore,
 Sed sibi quam minimo quisque parare valet:
 Historias quisquis, quisquis sua commoda curat,
 Impressa hæc frustra non sinat esse opera.
 Verum sic etenim sua quemque industria multum
 Juverit, ipsa paret, læditet ipsa diu.

Hanc edit. Augustæ Vindelicorum eodem anno re-
 petitam esse, hujusque exemplum extare in Bibl.
 Senat. Lips. falsum est.

1472 *Romana* III, fol. per *Conr. Schweynheim & Arn. Pannartz*. Iterata editio *Andreae*, cujus tamen epistola deficit. Ad finem *Livii* hi versus leguntur:

Adspicis, illustris lector, quicumque libellos,

Si cupis artificum nomina nosse, lege.

Aspera ridebis cognomina Teutona, forsan

Mitiget ars Musis inscia verba virum.

*Conradus Schweynheim Arnoldus Pannartzque magistri
Romæ impresserunt talia multa simul.*

In domo *Petri de Maximis* MCCCCLXXII, die XVI Julii. vid. *Laire* p. 179—qui idem pag. 230 de versione *Ferrarii Italica* 1476 *Romæ*, indeque orta controversia, pluribus differit.

1478 *Mediolanensis* I, fol. arte & impensis *Philippi de Lavagnia*. In plerisque *Andreae* sequitur editionem.

1480 *Mediolanensis* II, fol. per *Anton. Zarothum*: quam recognovit *Perr. Justinus Philelfus*. In fine adscripta sunt hæc verba: *Hæc tres Titi Livii Decadas Petrus Justinus Philelfus, ut amicis quibusdam suis morem gereret, quam diligentissime recognovit. Impressit autem Mediolani opifex consummatissimus Antonius Zarothus, opera & impensis Joannis Legnani, decimo Kalendas Novembres: regnantibus illustrissimis Mediolani ducibus Bona, & Joanne Galeacio Maria Sphortia, anno a natali Christiano millesimo quadringentesimo octogesimo.*

————— *Tarvisina* I, per *Michaellem Manzolinum*, *Parmensem*. In fine hæc adscripta inveniuntur: *Titi Livii Patavini historici illustris decadis quartæ libri finiunt, quos Michael Manzolinus Parmensis ductu, impensâ, solertique diligentia viventibus posterisque imprimi curavit anno salutis MCCCCLXXX pridie Kalendas Novembres. Locus, ubi liber impressus est, non additur. Monet autem Maittairius in Annal. typogr. Tom. IV. p. 406. librum impressum quidem esse a typographo Parmensi, non tamen, ut Orland. pag. 148 putabat, Parmæ; putat autem eum deceptum esse a Cornelio Beughemio pag. 85, quem sæpius describere solet. Eodem inductus errore Drakenborchius hanc editionem in notis Parmensem vocavit.*

sed perperam. Nam ex Maittairii annal. typogr. tom. I, p. 84 & tom. IV, pag. 235, disci potest, Michaellem Manzolinum Parmensem typographiam *Tarvisi* exercuisse, ibidemque ab anno 1477 --- 1481 varios libros emisisse; (ut Cæsarem, nobis ad an. 1480 annotatum.) Ex his patet, hanc Livii editionem esse *primam Tarvisinam*.

- 1481 *Paris*. fol. Hanc editionem memorat Maittairius Annal. typogr. Tom. V. part. II pag. 532, sed ex aliena & incerta traditione.
- 1482 *Tarvisina* II, fol. per Jo. *Vercellium*. Ad calcem hæc leguntur: *Has Titii Livii decadas a Luca Porro quam diligentissime recognitas, Tarvisii Joannes Vercellius impressit anno salutis millesimo quadringentesimo octogesimo secundo*.
- 1483 *Tarvisina* III, fol. per Michaellem *Manzolinum* Parmensem. — Hanc edit. ex Biblioth. Hohendorfianna laudat Maittairius in Annal. Typogr. Tom. IV, p. 450. Ex illis, quæ ad similem editionem anno 1480 excusam, dicta sunt, constat, hanc quoque impressam esse *Tarvisii*.
- 1485 *Tarvisina* IV, fol. Titii Livii Patavini Historiarum Decas I. III & IV. --- Præmissa: 1) Epistola nuncupatoria Jo. *Andræ* Episcopi Aleriensis ad summum Pont. Paulum II Venetum, & Marcum Sancti Marci Cardinalem. 2) L. *Flori* Epitoma Decadum quatuordecim T. Livii Patavini Historici in centum & quadraginta libros distinctum. — In fine: *Has Titii Livii Decades a Luca Porro quam diligentissime recognitas Tarvisii Joannes Vercellensis impressit. Anno salutis millesimo quadringentesimo quinto*. Perraram hanc editionem diligentius descripsit Cl. *Denis* in, *Merkwürdigkeiten der Garell. Biblioth.* pag. 113 --- 114. Maittairius, eumque secutus Ernestius, (cujus tamen in bibliotheca exstabat) hanc edit. quidem memorant, sed nullam *Flori* mentionem faciunt. vid. Annal. typogr. Tom. I, pag. 180. T. V, part. I, voce *Flori*, & part. II, voce *Livii & Flori* pag. 21. 22. 519. 532. 568. 570. cf. Jo. Frid. Gronovii præfat. edit. c. n. var. ap. Elzev. 1679. 8. T. I. J. A. Fabricii B. L. Venet. 1728. 4. Tom. I, pag. 194 --- 195 & 204.

- *Paris.* fol. Memorat hanc edit. Maittairius in Annal. typogr. Tom. V, part. II. p. 532. sed ex aliena & incerta traditione.
- 1491 *Veneta* II, fol. cum annotationibus *Sabellici*. Hanc edit. ex Fabricii B. L. memorat Maittairius in Annal. Typogr. Tom. I, p. 309. Sed Tom. IV, p. 532 addit, ad ejus calcem hanc formulam adjectam esse: *Impress. die V Novembris MCCCCLXXXI, regnante Augustino Barbadoico duce Venetiarum.* Cujus vero typis excusa fuerit, neutro loco memoratur. Ipse Sabellicus in præfatione refert, se Livium ad vetustum exemplar, ex bibliotheca Benedicti *Cornarii* Patricii Veneti depromptum, contulisse, petente Bernardino *Herafmio* Novocomensi, homine fide & industria singulari, ut clarissimam historiam aliquanto integriorem novæ impressioni subjeceret. Verum licet plures circa annum hunc typographi Bernardini Venetiis floruerint, nullus tamen memoratur Bernardinus *Herafmio* Novocomensis. Habuit hanc ed. quoque Chr. Gottl. *Schwarzius*, teste indice librorum fec. XV impressorum, quos possidet Ch. G. Schw. concinnatus a J. C. H. & J. P. R. Norimb. 1727. Part. II, pag. 38.
- 1492 *Veneta*, fol. Hæc edit. ex Bibl. Adr. *Pauw* recensetur apud Maittair. in Annal. typogr. Tom. I, p. 314, & Tom. IV, p. 545. Suspicio tamen est, hanc & præcedentem eandem esse, earumque alteram, & quidem hanc, ex solo operarum errore natam esse.
- 1493 *Veneta* III, fol. per *Matthæum Capcasa* Parmensem. Memorat hanc edit. Maittairius in Annal. typ. Tom. V, part. II, pag. 23 ex *Orland.* pag. 418.
- 1495 *Mediolan.* III, fol. per *Uldericum Scinzenzeller*, impensis *Alexandri Minutiani*. Editionem hanc memorans Maittairius in Annal. typogr. T. I, pag. 332 & Tom. IV, pag. 590, testatur, ad finem ejus hæc verba legi: *Impressit Uldericus Scinzenzeler, impensis Alexandri Minutiani; ex quam emendato exemplari, si cum ceteris conferes, quam facillime intelliges, candidissime lector; cui etiam librariorum culpam, quantum licuit, idem Alexander præstare conatus est, Mediolani pridie quam Lud. M. SF. Anglus princeps sapien-*

tissimus hujus incliti imperii sceptrum & ducalia insignia a Maximiliano imperatore per legatum acciperet. Anno salutis MCCCCLXXXV. die XXV Maji.

— Veneta IV, Pincii I, fol. cum figg. ligno satis nitide excusis. T. Livii Decades. præmittitur epistola nuncupatoria Jo. Andreae Episcopi Aleriensis ad summum Pont. Paulum II Venetum, & Marcum Sancti Marci Cardinalem — L. Flori epitoma Decadam quatuordecim T. Livii Patavini Historici in centum & quadraginta libros distincta — accedunt M. Antonii Sabellici ad magnificum & præstant. virum Benedictum Cornarium, Patricium Venetum epistola præfatoria. 2) M. Antonii Sabellici brevissimæ in Livium annotationes, locis suo ordine aut in integrum restituis, aut in fronte, ne quid temere offendetur, brevi indice relatis. In fine: Titi Livii Patavini Decades expliciunt. Venetiis per Philippum Pincium Mantuanum summa cura & diligenti studio impressæ. Anno ab Incarnatione Domini MCCCCXCV, III Nonas Novembris. Imperante Serenissimo Augustino Barbadico, Venetiarum Duce felicissimo. Registrum excipiunt insignia typographica, quibus postea Juntae usi sunt, lilium scil. & literæ L. A. vid. Maittairii Annal. typogr. Tom. I, pag. 333 & Tom. V. l. citt. Fabricii B. L. Venet. 1728. 4. & Ernestii edit. qui autem de Floro nullam facit mentionem. Liber XXXI, f. primus quartæ Decadis, qui in superioribus editionibus in duas partes scissus erat, in hac edit. in suum ordinem restitutus est, finiturque verbis: *in Hispania jussit*. Liber igitur XXXIII desideratur. Raritatem h. e. testantur Bauer in biblioth. libr. rar. univers. Tom. II, pag. 297. Biblioth. Schwarz. II. 236.

1498

Veneta V, fol. per Bartholomæum de Zanis de Portesio. — Recensuit hanc editionem Maittairius in Annal typogr. Tom. I, pag. 353, & Tom. IV, p. 662, addens, eam sine notis prodiisse. Hoc falsum: nam exemplar in biblioth. Trajectina servatum Sabellici annotationes habet repetitas. Ad calcem h. e. hæc adscribuntur verba: *Titi Livii Patavini Decades expliciunt, Venetiis per Bartholomæum de Zanis de Portesio summa cura & diligenti studio impressæ. Anno ab Incarnatione Domini 1498 die XX Junii.*

1501

Veneta VI, fol. per *Georgium de Rusconibus Mediolanensem*. In fine: *Titi Livii Patavini Decades expli-
ciunt, Venetiis per Georgium de Rusconibus Mediola-
nensem summa cura & diligenti studio impressæ, anno
ab Incarnatione Domini 1501, die 4 Decembris*. Exstat
in locupletissima bibl. Leidensi, in *Catal. Bibl. clar.
J. Aug. Ernesti Lips.* 1782, p. 173, n. 2567; atque
eadem continet, quæ ambæ præcedentes.

1505

Mediolan. IV, fol. apud *Alexandrum Minutianum*.
Huic editioni præfixa Minutiani epistola data est
Mediolani Idibus Sept. 1505. ad finem autem libri
hic temporis character invenitur: *Apud Alexandrum
Minutianum Nonis Quinseilibus mense Julii*. Ex his
conjectitur, hanc editionem referendam esse ad an-
num MDV; ac verisimile videtur, excusam esse
Mediolani. In ea enim urbe Minutianus tabernam
librariam etiam seculo præcedente exeunte exer-
cuit, & impensas in editionem Livii, quæ anno
MCCCCXCV in ea urbe prodiit, contulit, ut su-
pra vidimus. Ipse etiam hoc seculo XVI ineunte
ibidem varios libros typis impressit: anno MDII
Justinum, vid. *Maittairii Annal. typogr. Tom. II*,
pag. 156; anno MDIII Bernardi Corii *Historiam Me-
diolanensem*, vid. *Maittairium ibid.* pag. 163 &
165; anno MDXIII *Josephi opera latine, & Ege-
sippum*, vid. *Maittair. ibid.* pag. 247. Livium hunc
a se editum Minutianus dedicavit *Jaffredo Carolo
Jurisconsultissimo, Delphinatus ac Mediolanensis se-
natus Præsidi sapientissimo, testatus, se non imita-
tum esse eorum temeritatem, qui, ut scire videantur,
omnia corrigere ac emendare profitentur: sed quæ sibi
aut dubia aut obscura visa fuerunt, ea se intentata
reliquisse, ut per prislinæ dictionum aliqua vestigia vera
& sincera lectio investigari possit.* — Verum ut pateat,
quid de hoc sive editore, sive typographo sentien-
dum sit, adscribamus locum ex *Parrhasii Epistola*,
qua *Commentarium in Claudiani libros de Raptu
Proserpinæ eidem Jaffredo Carolo dedicat*. Ita in-
quit: *Non est (ne nobis blandiamur) hodie, non est
Horatio bene monenti parere, scriptaque vel in paucos
menses, nedum (quod illi placet) in annos novem com-
primere, nisi laboris sui fructu fraudari quis velit. Ad-*

sunt enim ignavissimi quidam fuci, qui favis alienisque mellificationibus insidiantur: & quæ multo longoque studio comperta sunt ab aliis, impudentissime pro suis ostentant. Ut iste vix satis idoneus impressor, qui castigationes in Livium meas ex magna parte subripere, tibi que nuncupatim dicare non erubuit: in quo non minus existimationi tuæ, quam mihi, fecit injuriam. quasi vero divinus tuus animus interceptis gaudeat rebus, & in hoc etiam Superos non imiteatur, quibus (ut Porphyrius auctor est) furta non litant. Ego, vir integerrime, triennio jam Livii bellum Macedonicum, frequenti professus auditorio, singulis lectionibus emendavi, quod ante nos (absit verbo invidia) nemo tentavit: ostendique certissimis argumentis, ab eo, quam dixi, Decada depravatam locis amplius mille. Veritus itaque, ne sua laniena per nos in publicum proderetur, editione prævenire festinavit: eamque rem dissimulante me laturum speravit, si sub umbra tui nominis emitterentur: ac si non eadem gratiora tibi futura sint a proprio justoque domino, quam ab invercundo plagiatario. Cum præsertim nusquam ille potuerit afferre correctionis alienæ rationem, quod nos inter legendum fecimus, quæ propediem sub tuis auspiciis exhibit in publicum, sex in toto Livio vulnerum milibus a me curatis, aut splenio contestis.

2506

Veneta VII, fol. per fratres Joannem & Bernardinum Vercellenses, c. Sabellici annotationibus (omissa tamen ejus ad Cornarium præfatione.) In fine hæc leguntur: *Titi Livii Patavini decades expliciunt, Venetiis per Joannem ac Bernardinum ejus fratrem Vercellenses summa cura & diligenti studio impressæ, anno Domini MCCCCCVI, XXVII Nonas Januarii imperante Serenissimo Leonardo Lauridano Venetiarum duce felicissimo.* cf. Maïttair. annal. typogr. Tom. V, part. II. pag. 21.

2510

Ascensiana I, fol. impensis Jo. Parvi & Ascensii. Præfixa est huic edit. Jodoci Badii Ascensii epistola ad Georgium Alcinum, hanc temporis notam præferens: *Ex Chalcographia nostra apud Parrhisios, pridie annuntiationis atque incarnationis dominicæ MDX.* Præterea Sabellici in Livium Annotationes, deficiente tamen ejus ad Cornarium præfatio.

ne, tum ipsius Badii Ascensii in Livianam lectionem Isagogen cum præmii primi expositione. Ad calcem hæc verba reperiuntur: *Diligentiore cura, in ædibus Ascensianis, in illustri Parrhisiorum Academia, impensis Joannis Parvi & ipsius Ascensii. Anno salutis Christianæ MDX ad Idus Martias. vid. Maittair. Annal. typogr. tom. II pag. 216, & Freytag Appar. liter. III pag. 616 sqq. ubi hæc editio uberius describitur.*

1511 *Veneta VIII, Pincii II, fol. T. Livii Patavini Decades cum figuris noviter expressæ. Adversam tituli paginam occupare incipit Jo. An. Episcopi Aleriensis ad summum pont. Paulum II Venetum & Marcum Sancti Marci Cardinalem Epistola. quam sequitur L. Flori Epitoma Decadum XIV T. Livii in CXL libros distinctum fol. II, b - XVI incl. & a fol. XVII - XX incl. M. An. Sabellici brevissimæ in Livium Annotationes &c. Fini- tur ipsa Liviana historia fol. CCLIII b his verbis: Titi Livii decades feliciter expliciunt: Venetiis a Philippo Pincio Mantuano Impressæ Anno Domini MCCCCXI die XXVII Septembris. Incliti Domini Leonardi Lauredani Venetiarum Ducis Serenissimi tempestate. Registrum. — Defende nos beate pater Antoni. — Hæc editio a Maittairio in Annal. omi- ssa servatur in bibl. publica Amstelodamensi, & Gymn. Bipontini, cui eam addidit vener. Jo. Christianus Tatsch, consiliarius & eccl. A. C. pastor primarius.*

f. l. & a. 8. 2 voll. Editio exscripta literis curren- tibus, quales fuere Aldinæ, cum Augustini Becharii alloquio ad studiosos. Fuit penes clar. Jo. Aug. Ernesti, teste Catal. n. 2860 p. 190. Male vulgo ser- tur ap. Badium Ascensium edita, cum potius Ve- netiis prodiiisse videatur; cf. quæ monuimus ad Ju- stini ed. 1510 in Indice ejus edd. p. XVI. Ernestius in Bibl. Fabr. inter Livii edd. eam memorans in- quit, quam Parisiensem Ascensii faciunt & assignant vel anno 1501, ut Jo. Frid. Gronovius, vel 1511, ut Drakenborchius; sed forma literarum est, quam *cursum* dicunt, quæ an. 1501 nondum nota extra Italiam fuit (v. edd. Virgilii) estque ipsa talis, qua- lis est in ed. Quintiliani per Jo. Rossellum, & Plau-

ti per Carpentarium, qui Lugduni artem typographicam exercuit. „

- 1513 *Ascensiana* II, cum L. Flori in omnes libros epitome recognita & annot. M. Ant. Sabellici fol. Titulus præfert signum Jo. *Parvi*, quem Jod. *Badius* Ascensus focium sibi sumferat; nempe duo leones, scutum illico & literis J. P. inscriptum sustinentes, adjecto subtus nomine ejus *JEHANN PETIT*. Sub signo leguntur hæc verba: *Venundantur ab Johanne Parvo & Jodoco Badio Ascensio*. In hac editione, quam etiam Maittairius in annal. typograph. omisisse videtur, continentur eadem omnia, quæ in antea memorata an. MDX exstabant; ita tamen, ut Ascensii in Livianam lectionem Isagoge auctior prodierit, & insuper addatur vocabulorum Livianorum compendiarum explanatio. Præterea, contextum Livianum cum decem diversæ monetæ aut scripturæ codicibus (per Gerhardum Vercellensem Burgundum) collatum esse, nova Ascensii præfatio priorî subjecta docet, quæ hanc notam chronologicam præfert: *Pridie natalis Dominici MDXIII*. In calce libri hæc formula adscripta reperitur: *Ex ædibus Ascensianis longe accuratiore, quam pridem, vigilantia, collato videlicet exemplari cum decem venerandæ vetustatis codicibus, & non oscitantis judicio recognito, atque plus quam sexcentis locis illustrato, in illustri Parrhisiorum Academia, impensis Johannis Parvi, & ipsius, qui impressit, Ascensii, anno redemptionis humanæ MDXIII ad Nonas Decembres.* — Vid. Catal. Bibl. Bunav. To. I vol. I p. 296.

- 1516 *Ascensiana* eadem recusa ab Gotfrido *Hittorpio*, (cive & typographo Colonienfi). Quæ editio, a Maittairio in Annal. typograph. non recensita, cum eadem omnia exhibet, quæ *Ascensiana Parisina* II, eique quam simillima est, adeo ut utraque totidem foliis absolvatur, (absolvitur autem hæc III foliis CCLXXX) tamen a priori differt. Ipsa hæc Colonienfis pro *Parisina* habetur Drakenborchio, Fabricio s. Ernestio, & Harlesio: sed falsi videntur; quod titulus ipse a Drakenborchio descriptus, & ratio vocum in Parisinis Ascensii omnibus literis exaratarum per compendia scribendi prodit. Titulus

præfert enim binos leones, scutum bipartitum sustinentes, in cujus superiori parte conspiciuntur tres coronæ, aequali ordine aliæ ad latus aliarum dispositæ, pars autem inferior pellis murinæ imaginem imitatur, addito subtus nomine LODOVICUS HORNKEN. Infra legitur: *Venundantur ab Godfrido Hittorio.* In fine libri: *Ex Ædibus Ascensianis longe accuratiore quam pridem vigilantia: collato videlicet exemplari cum decem venerandæ vetustatis codicibus: & non oscitantis iudicio recognito: atque plus quam sexcentis locis illustrato: in illustri Parrhisorum Academia: rursus opera & accurate Ascensiana: Anno redemptionis humanæ MDXVI ad nonas Junias.* cf. Cat. Bibl. Bunav. T. I, vol. J, p. 296. Godofr. enim Hittorius, quod omnibus notum est, Coloniae librariam rem doctè exercuit; Lodovicus vero Hornken, cujus insigne in titulo expressum est, bibliopola tum fuit celebris, cujus sumtibus etiam an. 1519 A. Gellius Basileæ ap. Andr. Cratandrum excusus est; uti an. 1526 idem Gellius sumtu & ære Godfr. Hittorii ab Euch. Cervicorno repetitus est. Socii igitur tum fuisse videntur L. Hornken, & G. Hittorp, qui infra ad an. 1528 redibit. Est hujus ed. exemplum sine titulo penes G. C. Crollium; unde ordinem edendi huc transcribere lubet: Post folium titulo inscriptum, (quod deest) 1) *Tabula Alphabetica. Rerum & verborum accurate. M. Ant. Sabellici in marginibus sequentis operis annotatorum, & industriæ Ascensianæ auctorum index serie alphabetica ab Ascensio recentius recollectus.* fol. 2 - 7 (a). 2) *Jod. Badii Ascensii in Livianam lectionem Isagoge: cum præemii primi expositione ante ipsam ponenda: a) Regulae T. Livio observatae, b) Vocabulorum Livianorum explanatio Ascensii.* (aa 5 foliis.) 3) *Tabula in Epitomen L. Flori* (bb 4 fol.) 4) *Epitome L. Flori* (bb - dd f. 7.) 5) *T. Livii Decades &c. cum marginalibus Sabellici.*

1517 *Lipsiæ, Primæ Decadis Livianæ Lib. I, per Jac. Thanner.* 4. Memoratur in Sam. Engellii Bibl. selectissima, Bernæ. 1743 edita, p. 44.

1518 *Lipsiensem L. I. Dec. I edit. & quidem juventuti dicatam* 4, alii ad hanc annum referunt.

ÆTAS II. MOGUNTINA

1518 — 1531.

Quamvis enim Ascensianam secutæ sint maxime Parisinæ, laus tamen prima manet Moguntinæ, quæ ex Cod. Bibl. Mog. præstantissimo L. XXXIII & XL explevit, & ex eodem varietatem lectionis in XL libros a Nic. *Carbachio* excerptam habet; unde profecere *Aldinæ*, curante *Afulano*, & *Aldinarum* simia, *Junina*. Laudabilis vero etiam fuit cura ab *Jac. Sobio* in *Livium* collata, qui non solum hac ætate *Coloniensibus* edd. ornamenta attulit, sed & sequenti ætati bene præivit.

1518 & 1519. *Moguntia*, fol. *Titus Livius Patavinus* historicus, duobus libris auctus, cum *L. Flori* epitome, indice copioso & annotatis in libros VII, belli *Macedonici*. Cum privilegio *Decennii*. In fine: *Moguntia in ædibus Joannis Scheffer, mense Novembri anno MDXVIII.* — Præmissum est *Imperatoris Maximiliani* privilegium, datum die nona mensis *Decembris an. MDXVIII.* (quod typis renovandum curavit *Jo. Beckmann* in *Bevtragen zur Geschichte der Erfindungen, Gætting. & Lipsiæ part. I. 1780*, ubi pag. 85---94 de privilegiis agit.) Privilegium sequitur primo *Ulrichi Hutteni* equitis Præfatio ad *Albertum Brandenburgensem, Cardinalem, Archiepiscopum Moguntinum & Magdeburgensem, principem Electorem*; tum *Erasmi* data VII Kal. *Mart. an. MDXIX* ad *Misobarbaros* atque eosdem *Philomusos* Præfatio. Post indicem deinde in *Livium* ejusque epitomas, & consules in *Livio* & epitomis occurrentes, ordine *Chronologico* dispositos, sequuntur epitomæ *Livianæ*, & ipsius *Livii* contextus. Admodum autem memorabilis est hæc editio, quia prima omnium exhibuit maximam partem libri XXXIII, a cap. XVII §. 6. usque ad libri istius finem, qui integer antea pro deperdito habitus est, & ultimam partem lib. XL, a cap. XXXVII § 3, usque ad finem: quæ operis *Liviani* particulæ in lucem protractæ sunt ex bibliothecæ *Moguntinæ*, quæ est in æde maxima ac metropolitana (divi

Martini) perquam vetusto codice, characteribus Longobardicis in membrana scripto. Cum autem codex ille, omnium hujus partis præstantissimus, qui partem lib. XXXIII ultimam & libros sequentes usque ad finem libri XL continebat, passim a vulgata priorum editionum lectione diversus abiret, Nicolaus *Carbachius* cum dignum censuit, quem diligenter cum olim exculis committeret, ejusque excerptas variantes, quarum 2000 notavit, huic Livii editioni subjiceret, præmissa præfatione, Idibus Mart. an. MDXIX data, qua consilii rationem reddidit. Eo autem factò optime de Livio meritus est, atque hunc thesaurum, aut certe ejus partem nobis servavit; qui utrum hodie adhuc supersit, aut ubi lateat, incertum est. Idem *Carbachius* cum Jac. Micyllo Livium germ. versum edidit an. 1533 Moguntia ap. eundem Jo. Schefferum. De præstantia & raritate hujus editionis vide *Maittairii* *Annal. typogr.* Tom. II, pag. 333 -- 334. Tom. V, part. I. voce *Flori.* *Bunemanni* *Catal. Mss. & libror. rarissimor.* *Mindæ,* 1732. 8. p. 31. sqq. *Fabricii* *B. L. Venet.* 1728. Tom. I, p. 195 -- 196, & *Ernestii* edit. Tom. I, p. 282. *Hamberger* *zuverlässl. Nachr.* Tom. I, pag. 532. *Harlesii* *Introd. in Notit. Literat. Romanæ.* Tom. II, pag. 417. *Harwood's* *Uebersicht verschiedener Ausgaben der griechischen und Römischen Classiker, übersetzt von Fr. Carl. Alter,* *Wien* 1778. *Biblioth. Schwarz.* I. 105. *Bauer.* *Biblioth. libr. rar. univers.* Tom. II, p. 297. *Catal. Bibl. Uffenbach.* Tom. II, append. p. 105 --- 106. *Catalogue de la Biblioth. de feu M. le Duc de la Valliere.* Part. I. n. 4859, & *Prix des livres &c.* n. 4859.

1518 -- 1521. 1533. *Aldina* I, 8. voll. 5. *Ex XIV Titi Livii Decadibus. Prima. Tertia. Quarta, in qua præter fragmenta III, & X Libri, quæ in Germania nuper reperta, hic etiam continentur, multa adulterina expunximus, multa vera recepimus, quæ in aliis non habentur.* -- *Epitome singulorum librorum XIV Decadum.* -- *Historia omnium XIV Decadum in compendium redacta ab L. Floro.* -- *Polybii lib. V de rebus Romanis latinitate donati a Nicolao Perotto. Index copiosissimus rerum omnium memorabilium.* -- *Ne quis alius, aut us-*

quam locorum Venetæ ditionis impune hos libros imprimat, Senatus Veneti decreto cautum est -- Præmissis hoc titulo, volumen primum exhibet *Francisci Asulani* (vel potius *Francisci Torrisani* s. *Turresani* de *Asula*, Aldi affinis) *Epistolam ad lectores* — *Inscriptiones II Patavii repertas* — *Elenchum Regum, Dictatorum, Coss. cet. & aliorum quæ hac I Decade continentur* --- *Indicem rerum omnium vel scitu opportunarum vel lectu dignarum, quæ prima hac continentur Decade &c.* — Inde sequitur novus titulus: *Titi Livii Patavini Decas Prima* -- *Francisci epistola ad Andream Naugerium, Patricium Venetum.* Hanc epist. sequuntur decem libri primæ Decadis — *Errata* — *Registrum* s. series plagularum. In fine: *Venetiis in ædibus Aldi & Andreae (Torresani s. Turresani de Asula) Soceri, Mense Decembri MDXVIII.* Volumen II præ se fert titulum: *Index Decadis tertie; Syllabus Dictatorum, Consulium &c.* -- *Index rerum omnium vel scitu opportunarum* (ut supra) — *Decem libri Decadis tertie*, quibus præmissus est titulus: *Titi Livii Decas tertia.* Hunc excipit *Epistola Francisci Asulani ad Jo. Baptistam Rhamnusium.* In fine sequuntur *Errata* — *Registrum*, & subscriptio: *Venetiis in ædibus Aldi & Andreae Soceri. Mense Februario MDXIX.* Volumen III inscribitur: *Index Decadis quartæ.* Subjicitur *Syllabus Dictorum & Index rerum memorabilium* (ut supra.) Tum sequitur novus titulus: *Titi Livi Patavini Decas quarta* — *Francisci Asulani ad Jo. Baptistam Turrianum Patricium Veronensem epistola*, quam excipiunt *Libri X* hujus Decadis, (ut in editione Moguntina) & *Registrum.* In fine: *Venetiis in ædibus Aldi & Andreae Soceri, mense Novembri MDXX.* Voluminis quarti titulus est: *Titi Livii Patavini Decadum Epitomæ. Lucius Florus.* Sequuntur: *Epitomata* -- inde alius titulus: *Lucius Florus.* Hunc excipit *Francisci Asulani ad Raymundum Turrianum Patricium Veronensem epistola*, & ipsius *Flori* textus. Pagina 69 novus titulus occurrit: *Polybii historiarum libri quinque in latinam conversi linguam, Nicolao Perotto interprete.* Versionem ipsam præcedunt *Francisci Asulani epist. ad lectorem & Nicolai Perotti in Polybii historiarum libros præmium ad L. Pont. Max.*

In fine voluminis separato folio exstat Registrum & subscriptio: *Venetis in adibus Aldi & Andreae Soceri. Mense Martio MDXXI.* Volumen V. f. appendix hujus editionis. Titulus: *Titi Livii Patavini Decadis quintæ libri quinque.* (scil. lib. XLI-XLV) Inde sequuntur *epitomata & textus Livianus - Syllabus Prætorum -- Consulum cet -- Index rerum - Registrum.*

In fine: *Venetis in adibus Hæredum Aldi Manatii Romani & Andreae Apulani Soceri, mense Majo MDXXXIII.* -- Raritatem editionis hujus præstantis variorum eruditorum, qui eam commemoravere, satis probant errores, nec non bibliothecarum catalogi, in quibus rarissime integra invenitur. Ex supra dictis, uti ex Catalogo Crevennianæ Bibliothecæ, in quo de hac edit. perquam diligenter differitur, indice Drakenborchiano, & Ernestii editione Bibliothecæ Fabricianæ corrigi possunt Maittairius, Fabricius, Debure, Harwood, Alter, Pinelli, Jagemann, Bauer &c. Vide Catalogue &c. de M. Crevenna Tom. V. pag. 127 -- 128. Ernestii edit. Fabricianæ Bibl. Lat. Tom. I, p. 282. Maittairii Annal. typogr. Tom. II, p. 316, 335, 598, 613, 787, & Tom. V, part. I, p. 404. Tom. V, part. II, p. 22. Fabricii B. L. Venet. 1728. Tom. I, p. 196. Debure bibliograph. instructive n. 4806. Harwood a View of the Greek and Roman Classics &c. the second Edition corrected London 1778. pag. 182. Harwoods Ueberlicht verschiedener Ausgaben, übersetzt von Fr. Carl Alter. Wien 1778. p. 250. Pinelli Prospetto di varie editioni &c. Venet. 1782. p. 209. Jagemanns Geschichte der freyen Künste und Wissenschaften in Italien. Leipzig, 1777. Tom. I, p. 343. Hieron. Tiraboschi Storia della Litteratura Italiana. Modena. 1772. Tom. I, pag. 313. Baueri Biblioth. libror. rar. univers. Tom. II, p. 298.

1520 *Venet.* fol. Memorat hanc Maittairius in Annal. typograph. Tom. II, pag. 498, eamque excusam esse dicit per Melchiorem *Scffam* & Perrum de *Ravanis* socios, die III Maji. Sed neque Hearnius, neque Clericus, hanc memorat.

1521 *Aldina* II; *Venetis.* fol. apud Aldum. Recensent hanc editionem Hearnius & Clericus, Gælneri Ca-

atalogus librorum, qui in officina Aldi Manutii Venetiis excusi sunt; Tom. III Annal. typogr. inseruit Maistairius, in quo pag. 245 memorantur Livii omnia, accurate denuo impressa, in folio (1521). Occurrit etiam in Catal. Henr. Hadr. van der Marck, pag. 21, inter editiones Aldinas fol. ubi tamen & alia an. 1520 edita memoratur, parum curate. Nos inde & ex Indice librorum ex typogr. Aldina editorum, quos possidebat Chr. Gottl. Schwarz, Prof. Aitorf. an. 1725, (etiam inserto Frid. Jac. Beyschlagii Syllogae variorum opusculorum T. I, fasc. III, n. X, p. 663) titulum ed. hujus pleniorē damus: *T. Livii Decas prima, tertia, quarta, cujus tertio libro prima pars, qua desiderabatur, & decimo, quicquid fore in calce nos habebamus, additum est, verum præter hæc veluti fragmenta quarta Decadi adjuncta. Duplex epitome, quarum altera per singulos XIII decadem libros summam explicatur, qua in illis continebantur; altera est L. Fiori qui omnem historiam ex T. Livio excerpfit. Polybii L. V de rebus Romanis in latinum traducti a Nicolao Peroto, quos in locum secunda Decada substituímus, quia multa in illis leguntur, qua secunda Decade continebantur. Index copiosissimus rerum magis memorabilium. Venetiis in ædibus Aldi & Andreae Soceri. MDXXI.* — Præfatio hujus editionis habet plura ad typographicam illorum temporum rationem pertinentia, ut propterea lectu digna sit, imprimis querelas de Juntis, qui & ipsi edidere Livium ex Aldina.

1522 & 1533 *Juntina*: Florent. 8. ap. hæredes Philippi Juntæ. --- Hanc editionem habuit & consuluit J. Fr. Gronovius, qui in Præfatione testatur, eam per Aldina vestigia incessisse, carmine etiam in laudem Asulani præposito. Eandem recensuit etiam Maistairius in Annal. typogr. Tom. V, part. II, pag. 22, qui docet, singulis tomis, Decadas I, III & IV, continentibus, ad calcem adjectam esse hanc formulam: *Florentia per hæredes Philippi Juntæ MDXXII. septimo Idus Augusti.* postea vero repertos quintæ Decadis priores quinque libros, sive eorum fragmenta, itidem ex Juntarum officina prodierunt, hæc subscriptione ad finem addita: *impres. Florentiæ in ædi-*

bus Bernardi Junta, anno XXXII supra M. & D. duodecimo Kal. Majas.

1525 *Colon. fol. ap. Joannem Soterem. cum Floro. Hujus edit. titulus testatur, Livii libros triginta, qui foli ex centum quadraginta supersunt, auctore Jacobo Sobio, castigatiores, quam antehac unquam vili sunt, prodire anno MDXXV, mense Septemb. Dedicatio Sobii subscriptas præfert Kalendas Septembres a. Domini MDXXV. Denique ad calcem libri hæc verba adjecta existant: Colonia apud Jo. Soterem, impensis honesti civis Petri Quentel anno MDXXV, mense Augusto. Sobium, Livii editorem, laudans Sturmius in Epiit. dedicator. ante Tom. II. Orat. Ciceronis dicit, Coloniae literas floruisse, cum in ea Sobius aliique docerent, Sobium vero tunc vim morbi abstulisse. Editionem hanc Livianam, quam curavit Sobius. ut ceteris castigatiorem, laudat Rhenanus ad Livii lib. XXVII cap. XVI, § 10 & ad cap. XVII, § 11. Ejus conjecturam, quam in contextum recepit, quamvis præter MSSorum auctoritatem. nihilominus ut ingeniosam prædicat Gruterus ad Livii lib. I, c. XXIII, § 6. Perperam Fabricius in B. L. editionem hanc Basileensem vocavit, dicens *Livium anno MDXXV Basilea ex Jacobi Sobii castigatione prodisse.**

1526 *Haganoæ. 4. T. Livii Patav. hist. Rom. Ex catal. Bibl. S. J. Mont. pag. 137.*

1527 *Paris. fol. ap. Pet. Vidovæum. Recenset hanc edit. Maittaireius in Annal. typogr. Tom. II, pag. 688, ac testatur, eam venundatam fuisse a Joanne Parvo bibliopola adscriptitio, impressam vero a Petro Vidovæo mense Aprili, MDXXVII.*

1528 *Colon. fol. ap. Euch. Cervicornum. Huic editioni locus, ubi prodiit, adscriptus non apparet, sed tantum excusa esse dicitur ab Euchar. Cervicorno. Eum vero chalcographiam & ante & post annum 1528 Coloniae exercuisse, ibique varios libros Godofrido Hittorio, civi & bibliopola Coloniaensi, typis suis descripsisse constat. Maittaireius nullam hujus edit. mentionem in Annal. typogr. facit, eam tamen memorarunt Fabricius in B. L. & Hearnius*

ac Clericus in Indice editionum Livianarum. Eandem tantum se vidisse, sed consulere non potuisse, Jac. Frid. Gronovius in Præfatione testatur. Præfat. h. edit. promittit textum castigatiorem, & est ille paululum diversus a superioribus, quod e variis lectionibus is, qui curavit, delegit eas, quæ meliores videbantur. Sed non est id magnum.

1529

Paris. f. ap. Nicolaum Savetier. Recensuit hanc edit. Maittairius in Annal. typogr. Tom. II, pag. 721, & auctor est, ei hanc notam additam esse: *Veneunt in ædibus Ambrosii Girault, in vico divi Jacobi, sub insigni regis David, imprimebat Nicolaus Savetier mense Aprili 1529.* Contra exemplaris, quod Drakenborchii oculis subjectum fuit, initium hæc adscripta habuit: *Veneunt in Clauso Brunelli apud Nicolaum Crespin, sub signo Divæ Catharinæ; finis vero: Imprimebat Nicolaus Savetier mense Aprili 1529.* Hinc colligitur, vel Nicolaum Savetier Livium, suis impensis excusum, distrahendum dedisse duobus bibliopolis, Ambrosio Girault & Nicolao Crespin; vel ambos illos, inita societate, Livium opera Savetierii imprimi curasse, & quemque eorum recepta exemplaria suis nominibus notasse. Editionem hanc *Levescaium* curasse, J. Fr. Gronovius in præfat. Fabricius in B. L. & Hearnius ac Clericus in indice edit. Liv. testantur. Certe ejus Dedicatio ad Jo. de Tartas J. U. consultissimum in capite hujus edit. existat. Vix tamen aliquid de suo contulit, sed ubique ferme editionem Ascensianam a. 1513 vel a. 1516 secutus est, & lectiones illis suis proprias adoptavit.

1530

Paris. fol. ap. Bad. Ascensium. In titulo libri hæc nota conspicitur: *Venerunt ipsi Ascensio 1530.* Dedicatio subscriptio his verbis concipitur: *E Chalcographia nostra apud Parrhisios rursus ad sextum Kalendas Novemb. MDXXX.* Ad finem autem libri XL hæc formula additur: *Sub prelo Ascensio ad VI Kal. Novemb. 1530.* Cum autem anno sequenti MDXXXI, Simon Gryneus quinque postremos Livii libros, a se in MSto vetusto repertos, opera Frobenii primum Basileæ edidisset, mox eodem adhuc anno Ascensius non modo recens inventos ac pub-

licatos Livii libros typis suis Parisiis descripsit, hoc temporis caractere post libri XLV finem addito: *Sub prelo Ascensiano anno MDXXXI, mense Julio*: verum etiam Chronologiam Glareani, quæ in eadem editione Basileensi primum lucem adspexit, in ordinem literarum digessit, ac libro XLV subjecit, addita hac subscriptione: *sub prelo Ascensiano ad Idus Julias anno MDXXXI*. Infuper hæc editio eadem omnia complectitur, quæ editiones priores Ascensianas annorum 1513 & 1516 continere antea suo loco diximus; nec quidquam novi boni habet.

ÆTAS III primo *BASILIENSIS* tum *ALDINA*
& *FRANCOFURTENSIS*

1531 — 1588.

Quæ ab an. 1531, nova Livio supplementa ex Cod. Laurishamensi attulit præfante Def. *Erasmo* Roterodamo, administrante Sim. *Grynæo*, unde edd. Basilienses Frobenianæ, Episcopianæ & Hervagianæ auctiores, ac simul, primo B. *Rhenani*, Sigism. *Gelenii*, Henr. *Glareani*, curis instructæ; dein etiam opera *Cælii Secundi Curionis*, qui textum denuo cum melioribus exemplaribus contulit, ab an. 1549 emendatioribus, additisque porro variorum notis, ampliores. Profecere hinc etiam Venetæ, Parisinæ, Lugdunenses, maxime Gryphianæ, etiam *Glareani*, Theod. *Morelli* & Jo. *Velcurionis*, Jo. *Saxonii* cet. vel emendd. vel notis adauctæ, unde rursus Basilienses evasere locupletiores. Sed hos mox superavit Carolus *Sigonius*, felicitate & emendandi & illustrandi Livii, quam Aldinæ ab an. 1555 tres suam fecere. Basiliensium (Grynæi & Curionis) & Lugdunensium Glareani, & Aldinarum cum Sigonii scholiis bona conjungere tandem Francofurtenses Feyerabendinæ 1568 & 1578, ad quas ornandas etiam noviter contulere Joach. *Grellius* Chronologiam T. Livii post Glareani & Sigonii curas congestam, & Wilh. *Godelevæus* suas in Livium observationes docte conscriptas. Tacemus Jac. *Ge-*

horrium, qui Parisinæ 1573, cum notis varr. suas præmisit.

1531

Basil. I. fol. in sex partes divisa. In fronte legitur: *En magnis impendiis, summisque laboribus damus amice lector T. Livii Patavini Latinæ historiæ principis quidquid hætenus fuit æditum, sed aliquanto quam antea, tum magnificentius, tum emaculatius. Accesserunt autem Quintæ Decadis Libri quinque, nunquam antehac æditi, quos adjecimus ex vetustissimo codice, cuius copiam nobis fecit celebre Monasterium Lorsense. Addita est Chronologia Henrici Glareani, temporum supputationem, & personarum nomina, in quibus antehac ingens erat confusio, dilucide commonstrans. Adjunctus est & index copiosissimus. Fruere lector, favens illorum industria, qui nec sumptu nec labore deterrentur a provehenda re literaria. Basileæ in officina Frobeniana mense Martio anno MDLXXXI. Cautum est privilegio Cæsareæ Majestatis, ne quis intra sex annos has T. Livii decadas, aut partem earum, intra Ro. imperii fines excudat, aut alibi excusas importet. Hunc titulum excipit: Des. Erasmi Roterodami ad Carolum Montiojum epistola nuncupatoria, (variis postea editionibus adjuncta.) Sequuntur: 1. *L. Flori Epitome Historiarum T. Livii Patav. (Libb. I--X)* 2. *T. Livii Patav. Historiarum ab U. C. Decadis primæ Libb. I--X. pagg. 244. Pars II. T. Livii Patav. Decas tertiæ. Hunc titulum excipiunt: 1. T. Livii Patav. Historiarum ab urbe condita Decadis tertiæ Libri primi Epitome. (Libb. I-X)* 2. *T. Livii Patav. Hist. ab U. C. Decadis tertiæ (Libb. I--X) pagg. 243. Pars III. Titi Livii Patav. Decas quarta. Titulum sequuntur: 1. T. Livii Patav. Hist. ab U. C. Decadis quartæ Libri primi Epitome. (Libb. I-X)* 2. *T. Livii Patav. Hist. ab U. C. Decadis quartæ (Libb. I-X) pagg. 210. Pars IV. T. Livii Patav. Historiarum ab U. C. Decadis quintæ Libri quinque, nunc primum excusi. In officina Frobeniana, anno MDLXXXI. Cum gratia & privilegio Cæsareo ad annos sex. Sequuntur: 1. T. Livii Patav. Hist. ab U. C. Libri quadregesimi primi Epitome (Libb. XLI--XLV)* 2. *T. Livii Patav. Hist. ab U. C. Decadis quintæ liber primus acephalus. (Libb. I-V) pagg. 91. In fine: B 1-**

flexa, in officina Frobeniana per Hieron. Frobenium, Jo. Hervagium, & Nic. Episcopium, CIOIOXXXI. Pars V. T. Livii Patav. Decadum XIV Epitomæ. Inde sequitur textus epitomatum, foliis XX, sine paginarum numeris. Pars VI. Chronologia s. temporum supputatio in omnes T. Livii Decadas, multa diligentius expendens, quæ superiores sugerant, per Henr. Glareanum Helvetium, poetam laureatum, publicum in celebri Friburgensium Academia honestissimarum disciplinarum professorem. Basileæ ex offic. Frobeniana CIOIOXXXI. mense Martio. Cui præmittitur Epistola nuncupatoria auctoris ad Rev. & Illustr. Balthasarem Episcopum Constantiensem &c. data Friburgi Brisgoiæ CIOIOXXXI. Volumen claudit: Index trium cum dimidia Decadum T. Livii, foliis 16. in quorum ultimo comparent insignia typographiæ Frobenianæ. Folio 15 legitur Allocutio ad Lectorem: Si forte cupis nosse, quantum quoque loco desit in his quinque recens repertis libris, scito archetypum universum quaternionibus triginta quatuor constare, quorum singuli folia octo habuerunt. Unius folii modum intelliges ex primi Libri duobus deinceps fragmentis, quorum alterius *DEDUXIT* initium est, alterius *MORE*: nam ea singulis foliis continentur. Ex eo quaternionum numero primus periit. Proximi duo exstant integri. Ex quarto & quinto supra memorata fragmenta duntaxat supersunt. Sextus & alii deinceps usque quintum decimum exstant integri. Decimus quintus & tres proxime sequentes interciderunt. Sex ordine proximi habentur integri. Ex vigesimo quinto quaternione perierunt duo extrema, item duo media folia: ex sequenti quatuor media: ex vigesimo septimo duo media: ex sequenti unicum, quo quartus liber clausus fuerat: atque tot foliis liber is diminutus est. Reliqui sex quintum librum continententes integri sunt, præter trigésimum duobus extremis foliis, & ultimum primo duntaxat, mutilos. Nam omnium postremum vacaverat. De hoc codice Laurifhaimensi, qui nunc est in Bibl. Aug. Vindobonensi vid. Lambecius in Comm. de illa Bibl. L. II, p. 493 sqq. qui ostendit, multa adhuc ex eo corrigi posse. Ceterum de edit. hac classica videbis Præf. edit. Gronov. T. I. Amst. 1679. Indicem edd. Dra-

kenborchii, repetitum in e.l. Ernestii 1769. T. III. Fabricii B. L. T. I, p. 283. Harlesii Introd. in notit. Lit. Rom. II, pag. 421.

1532 *Venet.* fol. ap. Lucam Antonium Juntam. Hanc edit. recensuit Maittairius in *Annal. typogr.* Tom. II, pag. 771, & hoc modo descripsit: *T. Livius; accesserunt Decadis V libri quinque, nunquam antehac editi, cum Chronologia Henrici Glareani, in ædibus Lucae Antonii Juntae Florentini MDXXXII.* in initio additur, *mensē Februario; in fine die decima Januavii.*

— *Parif.* 8. ap. Sim. Colinæum prodierunt conciones Livii c. n. Joach. Perionii Benedictini Cormœriaceni. Hanc edit. memorarunt Crenius Anniadv. philol. & hist. P. VIII, p. 32, Hulsii aliorumque Catalogi. Vid. etiam Maittairii *Annal. typograph.* Tom. V. part. II, pag. 23.

1533 Aldinæ volumen V additum, ne quid deesset isti editioni, 8. Exhibet vero illud Decadis V libros recens editos a Sim. Grynzæo in ed. Basil. Froben. cf. supra ad an. 1518 — 1521.

— Juntina (an. 1522) pariter aucta est volumine; quo repertos Decadis V libros V priores s. eorum fragmenta contineri supra jam annotavimus.

1535 *Basil.* II, fol. T. Livii Patavini Latinæ Historiæ Principis Decades tres cum dimidia, longe tamen quam nuper emaculatiores, quod nunc demum ad vetera contulerimus exemplaria, ubi quantum sit deprehensum mendorum, facile indicabunt doctissimæ in hunc auctorem Beati Rhenani & Sigismundi Gelenii adjunctæ annotationes. Addita est Chronologia Henrici Glareani, ab ipso recognita & aucta, cum Indice copioso. Basileæ in officina *Frobeniana* anno MDXXXV. In fine: *Basileæ in officina Frobeniana per Hieronymum Frobenium & Nicolaum Episcopium mensē Decembri an. MDXXXV.* Continet autem hæc edit. ferme eadem, quæ Frobeniana a. 1531, nisi quod in hac jam primum appareant B. Rhenani & Sigism. Gelenii in Livium notæ; & quod Glareani Chronologia, ab ipso recognita, auctior prædeat, a Troja capta usque ad Justinianum Cæsarem. Testatur insuper titulus h. l. historiam Livianam

longe, quam nuper, emaciatiorē prodire, quod nunc demum ad vetera exemplaria collata sit.

. . . . f. l. & a. 8. voll. III. Livius. Decas III, IV, V. it. Epitoma historiarum Livii. Acc. Chronologia in omnem Romanam historiam per Henr. Glareanum & Gregor. Haloandrum. vid. Cat. libr. in Bibl. Gœtt. in duplo exstantium.

1537 Lugd. 8. voll. IV. part. VII. *T. Livii Patavini Latinae historiae principis Decas prima cum Epit. L. Floriantrosam appositis, accuravit Doct. quorumcunque virorum arctatione: subinde indicem adnectere placuit. Pari commeditate reliquas, quæ manifesto exstare creduntur, in omnium gratiam seorsim excusimus: id ante nos nemo unquam. Fruere feliciter. Lugduni apud Hæredes Simonis Vincentii MDXXXVIII.* In fine: *Excudebant Lugduni Melchior & Gaspar Trechfel fratres 1536.* — *Titi Livii Patavini Decas Tertia. Cum indice rerum magis insignium ad finem posito.* ibid. eod. — *T. Livii Patav. Decas Quarta cum Indice cet.* ibid. eod. In fine: *Excudebant Lugduni Melchior & Gaspar Trechfel fratres 1537.* — *Titi Livii Patavini Decadæ quintæ libri quinque. Index præterea appositus.* ibid. eod. In fine, ut supra — *Titi Livii Patavini Decadæ XIV Epitome.* ibid. eod. In fine, ut supra. — *Chronologia sive temporum supputatio in omnem Romanam Historiam a Troja capta ad millesimum ducentimum octogesimum tertium ab Urbe condita annum, quæ auctor ipse Livius, simulque Romana historia multum accepit lucis, per Henricum Glareanum P. L.* ibid. eod. In fine, ut supra. *Annotationes Beati Rhenani, & Sigismundi Geleni, Doctiss. virorum, in exstantes Titi Livii libros,* ibid. eod. — Editio hæc satis nitida literis Italicis ad modum Seb. Gryphii excusa est. Annotationibus præmittitur Epistola *Erasmii Roterod.* ad Carolum Montiojum, data ap. Friburgum Belsæ. Kalend. Martiis anno MDXXXI (ex edit. Balth. Frobeniana ejusdem anni.) Alii ex una hac ed. male fecere duas, alteram Trechfeliorum, alteram Sim. Vincentii.

———— *Frankfurti.* 8. Hæc edit. memoratur in bibliothecæ Cœmianæ Catalogo pag. 68. forsitan convenit cum seq.

———— Livii orationes omnes e Libris de II bello Punico

artificio dialectico & rhetorico illustravit Reinhardus Lorichius *Had. marius* &c. Francof. 8. cf. Crenium animadv. philol. & hist. P. VIII, p. 32.

- *Bafil.* III. 8. cum *Rhenani* & *Gelenii* notis & *Glareani* Chronologia. In hac, notante Fabricio, decimo libro subnotata hæc leguntur verba, quæ & alii viri docti in inscriptis Livii codicibus deprehenderunt: *N comachus Dexter V. C. emendavi ad exemplum parentis mei Clementiani. Victorianus V. C. emendabam Domnis Symachis.*
- 1538 *Parif.* 4. ap. Vascofanum. In una bibl. Hulsiana Tom. II. num. 5535, hæc edit. memorata invenitur, & ex typographia Vascofani prodiisse & tres decades continere dicitur.
- 1539 *Bafil.* IV, fol. ex officina Hervagiana. Editio hæc eadem continet, quæ Basileensis Frobeniana a. 1535. Vid. Catal. Bibl. Bun. Tom. I, vol. I, p. 296.
- 1540 Henr. *Loriti Glareani*, adnotationes in Livii historiam Rom. cum chronologia in Rom. historiam *Valæ*; acc. *Badii* elenchus & judicium de quibusdam locis apud Livium. *Bafil.* fol.
- *Lugdunensis, Glareani.* Memoratur hæc edit. in Indice editionum Livianarum Hearnii & Clerici.
- 1541 *Venet.* fol. ap. hæredes Lucæ Antonii Juntæ. Repet. edit. a. 1532.
- *Parif.* 8. ap. Sim. Colinæum. Editio nitidissima.
- 1542 *Lugd. Glareani* II, f. Gryphiana 8. voll. 4. ap. Seb. Gryphium. Tres priores tomi continent superstites Livii libros: quartus *Glareani* notas, præmissâ ejus ad Carolum V Imperatorem Præfatione, data *Friburgi Brisgoiæ, anno a Jesu Christi natali MDXL Kalend. Mij's*; tum Laurentii Vallæ de Tarquiniis adversum Livium disputationes, ejusque emendationes ad sex libros priores Livii de bello Punico secundo; deinde *Glareani* Chronologiam per Jodocum Badium Ascensum in seriem literarum redactam; & ultimo loco ipsam *Glareani* Chronologiam auctam, cum Præfatione ad Ferdinandum Cæsarem, data *Friburgii Brisgoiæ, anno a Christo nato MDXL, Kalend. Septembribus.* Gesnerus in Pandectis lib. de Historiis duodecimo apud Maittairium in *Annal. typogr.* Tom. II, pag. 572 refert, hac edi-

tione contineri Annotationes Beati Rhenani, Sigismundi Gelenii, Henrici Glareani, ac Chronologiam ejusdem Glareani. Editio exstat in Bibl. Trajectina: verum Rhenani & Gelenii Annotationes non adsunt.

1543

Parif. fol. ap. Mich. Vascofanum. Appositus quidem titulus testatur, Livium, hunc prodiisse *Parifis* apud *Audoenum Parvum* sub *Lilio aureo* ad *Divum Jacobum MDXLIII*; verum privilegium, ut Livius hoc modo imprimeretur, Senatus *Parifienfis* anno 1542 nono Kalend. Novemb. concessit *Michaeli Vascofano & Audoeno Parvo*. Titulus etiam, qui annotationibus adjunctis præmittitur, definit hac formula: *Parifis* imprimebat *Michael Vascofanus* sibi & *Odoino Parvo*. Unde colligo, editionem hanc excusam esse typis Vascofani, venditam autem fuisse partim ab eo, partim ab *Odoino Parvo*. Hæc autem editio non modo continet omnia, quæ præcedens *Lugdunensis Gryphiana* anni 1542 5 verum etiam *Sabellici* pauculas annotationes.

Bafil. V, fol. *Titi Livii Pat. Latinæ historiæ* principis *Decades* tres cum dimidia, longe tamen quam nuper emaculatiores, quod nunc demum ad vetera contulerimus exemplaria, ubi quantum sit deprehensum mendorum, facile indicabunt doctissimæ in hunc auctorem *Beati Rhenani & Sigismundi Gelenii* adjunctæ annotationes. Addita est *Chronologia Henrici Glareani*, ab ipso recognita & aucta: cum gemino *Indice*, quorum alter, qui est *Orationum* hujus auctoris, jam primum accessit. *Basileæ* per *Joan. Hervagium*. Anno *MDXLIII*. Ergo est repetitio ed. 1535. Præmittuntur *Sig. Gelenii*, *Erasmi Roter.* an. 1531, *epistolæ* dedicatoriæ, *B. Rhenani & Sig. Gelenii* annotationes p. 1—65. Dein cum *Flori epitome hist. Livii*, tum *Livii Decades* I, III, IV. Alterum quasi *Tomum* constituunt singulari hoc titulo: *T. Livii Patavini historiarum ab U. C. Decadis V. Libri V. Basileæ per Jo. Hervagium*. Claudit *Tomum*: *Chronologia* — ab *Troja* capta ad 1282 ab *U. C.* — per *Henr. Glareanum*. *Basil.* *MDXLIII* (alteram hujus *Chronol.* partem ab an. 773 *Tib. Aug.* IV, ad an. 1287, *Justiniani IV*, s. annum *Chr.* 537,

ex Greg. *Haloandro* mutuatus erat.) Index rerum & verborum est per Nic. *Episcopium* congestus. Servatur hæc ed. in Bibl. Gymn. Bip. unde eam curatius descripsimus.

1544 *Argent.* 8. prodierunt Jo. *Velcurionis* Notæ in Livii lib. I & II, quæ postea sæpius aliis editionibus insertæ sunt. Memoravit hanc editionem Fabricius in B. L.

1545 *Lovanii.* 4. lucem vidisse Notas Petri *Nannii* in Livii libr. III testatur Fabricius in B. L.

1548 *Lugd.* 12. voll. 4. ap. Seb. Gryphium. Edit. Lugdunensem Gryphianam hujus ejusdem anni, sed in 8, memorant Hearnius & Clericus in Indice Edit. Livian.

1549 *Basil.* VI, fol. ap. Jo. Hervagium. Titulo hujus editionis illa adscripta est formula: *Basileæ per Joannem Hervagium, anno MDXLIX mense Martio.* quæ eadem ferme in fine libri occurrit. Recensuit hanc edit. *Cælius Secundus Curio*, qui in præfatione, data *Basileæ Kal. Jan. MDXLIX* affirmat, se Livium contulisse cum veteribus & novis aliquot melioribus exemplaribus, atque Livii ad ducenta loca emendasse & pristino restituisse nitore. Adjectæ sunt Rhenani ac Gelenii annotationes, & Glareani Chronologia. Perperam Hearnius & Clericus in Indice Edit. Livian. referunt, editionem hanc recensuisse Hervagium, qui eam tantum typis suis descripsit. Quod vero Drakenb. ad annum 1554, quæ Frobeniano — Curion. editio repetita est cum notis, ut in Fabricii B. L. I, p. 284 traditur, L. Vallæ, Sabellici & Curionis, negat, Curionem ulla unquam *castigationes* aut *notas in Livium* conscripsisse, in eo errasse videtur. Saltem in *Athenis Rauricis* pag. 292 dicitur Curio edidisse *in Livium notas & præfationem de mensuris, ponderibus reque nummaria Romanorum & Græcorum.* Basil. 1549. fol. Omittitur tamen ibi in catalogo scriptorum Curionis editio Livii.

— J. *Peronii* in omnes Livii conciones notæ. Basil. 8. rep. ed. Colinæi Paris. 1532.

1552 *Paris.* fol. ap. Mich. Vascofanum. Maittaireus in *Anal. typogr.* Tom. III, p. 613 refert, Mich. Vascofanum hanc editionem dedicasse Jacobo Varadeo, in supremo Parisiensi Senatu regio consiliario, epistola data X Kal. Jun. MDLII. Prodiisse autem cum

annotationibus diverforum, & in Glareani annotationum fronte legi, typis descriptam esse apud Mich. Vascofanum & Audoenum Parvum. -- Vascofanum tantum priorem edit. a. 1543 repetiisse, suspicatur Drakenb. & Ernest. affirmat in Fabricii B. L. Hancius jam antea in libro de Scriptt. rerum Rom. P. I, c. IX, p. 59, n. 6. Livium cum Vallæ emendd. Sabellici, Rhenani & Gelenii annott. Parisiis an. 1552 prodiisse retulit.

- 1553 *Lugdun.* fol. cum Vallæ emendd. Sabellici, Velcurionis, Rhenani, Gelenii, Glareani annotat. Theod. Morelli emendd. Saxonii scholiis. *Lugduni apud Antonium Vincentium MDLIII.* In eju^s fine: *Lugduni, excudebat Johannes Frellonius MDLIII.*
- 1554 *Lugd.* 8. voll. IV, ap. Seb. Gryphium. Hanc edit. memorat etiam Maittair. Tom. V. Annal. typogr. part. II, pag. 22. ex quo, ut & ex bibl. Henr. Hadr. van der Mark, Toparchæ in Leur, part. II, p. 59 constat, anno sequenti ibidem ex eadem officina, quali hujus editionis appendicem, novum tomum prodiisse, continentem Rhenani, Gelenii, & Glareani in Livium annotationes. Sed Fabricius in B. L. Gryphium eo anno in 8 excudisse refert notas Rhenani, Gelenii, Sabellici, Jo. Velcurionis & Jo. Saxonii, cum Chronologia Glareani.
- *Lugd.* 12. voll. III, ap. Seb. Gryphium. Hæc editio recensetur etiam in modo laudata bibl. Marckiana, & ap. Fabric. in B. L.
- *Basil.* VII, 8. voll. IV, ap. Nic. Episcovium juniorem. Idem Episcopus anno MDLVI, huic editioni, tanquam appendicem, adjecit tomum V, qui continet Scholia & Chronologiam Sigonii.
- *Basil.* VIII, 8. voll. II, ap. Jo. Hervagium. cum notis & castigationibus Vallæ, Sabellici & Cælii Secundi Curionis. Vid. edit. a. 1540, & Maittairium in Annal. typogr. Tom. V, part. II, pag. 22.
- 1555 *Basil.* IX, fol. per Joannes Hervagios. Hæc editio continet omnia, quæ viri docti ad Livii emendationem vel illustrationem hoc tempore in lucem emiserant: ita tamen, ut Vallæ, Sabellici, Rhenani, Gelenii & Theodorici Morelli in Livium Castigationes in ipsis annotationibus Glareani suis lo-

cis insertæ sint, atque editor, se illas, quas futiles & nullius momenti judicarat; inde rejecisse testatus fuerit, ne inutili labore lectorem gravaretur.

- *Aldina*, Sigonii I, fol. ap. *Paulum Manutium*, Aldi filium. Hæc editio prima exhibet egregia Caroli Sigonii scholia, quibus Livii historiæ & earum epitomæ partim emendantur, partim explanantur: ut & ejusdem Sigonii in eisdem libros Chronologiam, ipsorumnet auctorum verbis confirmatam. Erravit itaque Hearnius, qui scholiis Sigonii Chronologiam Glareani junctam in hac & aliis Sigonii editionibus credidit, quem ejus errorem improvide adaptatit Jo. Clericus.
- 1556 *Sigonii* scholia in Livium prodire Basileæ per Nic. Episcopium. 8, tanquam V tomus s. appendix Basiliensis an. 1554 ap. eundem 8.
- 1562 *Paris.* fol. ap. Mich. Vascofanum. Repetit. edit. a. 1543.
- 1566 *Aldina*, Sigonii II auctior, Venet. ap. Paul. Manutium, Aldi filium. fol. In hac editione repetita sunt Sigonii scholia in Livium, ejusdemque, non vero, ut Hearnius & Clericus affirmant, Glareani Chronologia Liviana. In scholiis autem Sigonius multa mutavit, meliora sive sponte, sive a Faerno, Rortortello, aliisque edoctus.
- 1568 *Francofurt.* I Feyerabendina s. Godelevæi. fol. *Titi Livii Pat. Rom. hist. principis Libri quotquot ad nostram ætatem pervenerunt: una cum doctissimorum Virorum in eos lucubrationibus, post omnes aliorum edd. summa fide ac diligentia & veterum & recentiorum collatione recogniti & artificiosis picturis, præcipuas historias apte representantibus exornati, inque duos Tomos distributi, quibus quæ contineantur, post præfationem patebit. Francofurti ad Mœnum MDLXVIII, cum gratia & privilegio Cesaris.* — In præfatione Tomi I, Alberto Duci Baviariæ inscripta Georgius Corvinus & Sigism. Feyerabend consilium historiæ Livianæ a se editæ sic exponunt: *Toties vero ea prelis Variorum excusa, ut exteri Veneti & Galli, cum nostris hominibus in hac edenda certasse videantur, nobis diligens accurataque circumspectio adhibenda fuit, ut eas rationes sequeremur, quibus nostra editio, si non ceteris melior*

ornatiorque, aliis tamen & boritate & ornatu par esset. — Ideoque — omnium quotquot habere potuimus editionum exemplaribus collectis, lectionem quæ omnium emendatissima, ac Livianæ ubertati convenientissima videretur, imitati sumus, nihil in eo facientes, cujus ex diligenti exemplarium inter se collatione probabilis ratio lectori facillime apparere non queat. Deinde cum quam plurima apud hunc Authorem loca essent, quæ erudita enodatione ac diligenti illustratione indigerent, non solum ei, quæ antea doctorum virorum in eum vel Observationes vel Annotationes exierant, adjunximus: sed & cum variis in locis ab iis, quasque aliud agentibus, quam plurima ad sententiam Livii recte assequendam perquam utilia annotata, vel in adversaria relata perspiceremus, ea collecta atque in unum veluti corpus redacta, tanquam novam accessionem ei adjecimus — præcipuas historias eximias picturis effingi, rerumque, quæ a Livio lacteo eloquentiæ fonte illustrantur, expressas imagines, vivamque effigiem eorum oculis subjici curavimus. Præfationi subjunctus est Catalog. librorum, Annotationum, emendationum, observationum, scholiorum aliorumque opusculorum, quæ in duobus hisce Livianis Tomis continentur: *PRIORE TOMO* Epist. Erasmi ad Car. Montiojum. Sim. Grynæi de utilitate legendæ historiæ, præfatio. Barthol. Marliani — de Origine Urbis Romæ, caput. Mellalæ Corvini libellus ad Octav. Aug. in quo Rom. historia ab exordio quam brevissime describitur. Sexti Ruffi, de hist. Romanorum brevis libellus. Tabula concionum atque orationum omnium T. Livii velut generis divisionem in species complectens &c. (agnationes familiarum ex Comm. Eliæ Veneti Santonis in Eutropium scriptis, Scipionis Afr. II, Porcii Catonis, Octav. Cæs. Germ. in. Cæs.) Cœlii Secundi Curionis libellus de Mensuris, ponderibus reque numaria Græcorum & Rom. L. Flori Epit. in singulos T. Livii libros. T. Livii — libri omnes — (c. figg.) Historiarum — accuratissimus Index. Chronologia nova in T. Livii hist. accommodata ad tabulas Capitolinas Verrii Flacci (a Joach. Grellio, qui præfatus est Kzl. Nov. 1568.) Franc. Robortelli de convenientia supputationis Livianæ ann. cum marmoribus Rom. quæ in Capitolio supersunt. *TOMO POSTERIORE* (cui & singu-

laris titulus præfixus est cum nominibus auctorum) Pomponii Læti *de Antiqq. U. Rom. libellus*. Jo. Barthol. Marliani *Antiquæ Romæ Topographia epit.* Pub. Victoris *de U. Romæ regionibus & locis*. H. Loriti Glareani — *Annott.* — Car. Sigonii *scholia*, quibus *T. L. historiæ earumque epitomæ partim emendantur, partim etiam explanantur cum Glareani responsionibus*. Ejusd. *Chronologia*. Laur. Vallæ *Judicium de quibusdam Livii locis &c.* Eiusd. *Emendationes in VI libris de bello Punico II.* M. Ant. Sabellici, B. Rhenani, Sig. Gelenii *doctissimæ annott.* Jo. Velcurionis *Introd. in universam Rom. hist.* Jo. Saxonii *Commentarioli duo ad L. XXI & XXII.* Willh. Godelevæi *in omnes libros Obsf. doctissimæ ex variis auctorum scriptis collectæ*. Hæc vero cum in singulari suo titulo dicantur *nunc primum in lucem editæ*, & ipsa Godelevæi ep. Eusebio Episcopo, typographo Basil. inscripta sit *M'dera d. XV J.in. 1568*, nihilque a Franc. Modio, qui anno demum 1586 advenit, in hanc ed. collatum, eam male inter edd. Modianæ recensiois vulgo referri, potiusque Godelevæi ob recens adjunctas obsf. dici posse patet. Quin ipse scribit ad Episcopium, se hanc suam opellam ipsi, quippe cui Livii impressio ex Hervagiana hereditate delatam esse compererit, primo transmittere in animo habuisse. *Ceterum, pergit, cum Francofurtenses Typographos, viros optimos, studio rei literariæ juvandæ te in ea anteveritisse cognovissem, quidquid hujus opellæ fuit, ipsis tradidi.* Unde simul colligimus, Godelevæi Obsf. mendose ab aliis ad priores annos referri, ut in Indice Drakenborchiano ad an. 1551. Ceterum quis textum rexerit, aut id temporis a Sigism. Feyerabendio adhibitus sit corrector operarum typogr. nobis haud repertum; nisi is fuerit Joach. Grellius, Chronologiæ Livianæ auctor. Franc. certe Modium an. demum 1586 adhibere cœpit Sig. Feyerabendus, teste Melch. Adamio in vita Modii inter vitas Philos. edit. III, pag. 198. Servatur autem hæc edit. in Bibl. principali Bippontina.

1572 *Aldina III, Sigonii iterum auctior. Venetiis in ædibus Manutianis, fol. cum Sigonii scholiis ab auctore multis in partibus auctis, & Chronolog. Liviana. Continet*

etiam *Defensiones scholiorum Sigonii contra Robortellum & alios.*

1573

Paris. fol. II partes. *Titi Livii Patavini historia Romanæ ab urbe condita libri XLV*, quotquot ad nostram ætatem pervenerunt, cum commentariis omnium interpretum ad explicationem locorum difficilium, e regione insertis. His adjecimus, ultra brevem *Livii L.* etiam *Flori* epitomen: *Sigonii* chronologiam, *Pomponii Læti* de antiquitatibus Romanorum, & pleræque ali: ad Romanam historiam pertinentia, quæ pagina VI docebit. *Lutetiæ Parisiorum*, apud *Michaellem Sonnum* via *Jacobæa*, sub scuto *Basilienfi MDLXXIII*, cum privilegio Regis. In fine: *Lutetiæ*, cudebat, typisque mandabat *Joannes Charron*, Typographus, anno Domini millesimo quingentesimo septuagesimo tertio, quarto Idus Junii MDLXXIII. Verso titulo pag. 3 legitur *Jacobi Gohorii ad Reverendum Carnutum antiplitem D. Nicolaum Thuanum* epistola dedicatoria data *Lutet. Paris. MDLXXIII Idibus Junii*. Itaque (ait *Gohorius*) *T. Livius*, meis animadversionibus paucis licet instructus, primum prodit in lucem, qui si quando iterum dabitur, multo prodibit instructior. (Hæc *Gohorii* verba probant, *Ernestium* in B. L. aliam *Parisinam* edit. 1572 per *Jac. Gohorium* cum multorum notis memorantem errasse.) — Dedicacionem excipit *Joannis Charronnii*, Typographi, de hujus operis statu & ordine ad lectorem. Subjicitur, ut in titulo promissum est, enumeratio contentorum hujus edit. scil. *Des. Erasmi* epistola — *Sim. Grynaus* de utilitate legend. histor. — *Barth. Marlinus* de orig. urbis Romæ — *Messalæ Corvini* lib. in quo omnis Romana historia &c. complectitur — *Sexti Ruffi* de hist. Romanor. lib. — *M. Ant. Sabellici* de laudibus historiæ oratio — *Phil. Beroaldi* oratio continens historiæ laudationem in *T. Livium* — *Stephani Nigri* præfatio in *T. Livium* — De historia *T. Livii*, quod in libros, non in Decades, ab auctore divisa sit &c. — *Laurent. Vallæ* disputatio de *Tarquiniis* adversus *Livium*. *Elias Vinetus* de agnationibus familiarum — *Henrici Glareani* brev. Compend. hist. Romanæ — *Jo. Velcurionis* in *T. Livii* historiam argumentum — *Car. Sigonii* in sua scholia præfatio — *L.*

Flori rerum Romanarum libri IV. — *Jac. Gohorii* in III libb. *Titi Livii animadversiones* — *Titi Livii Patavini* historiae ab urbe condita libb. qui exstant XXXV, cum annotationibus doctor. virorum infertis e regione ipsius historiae foliatim: videlicet *Henr. Glareani Loriti* in omnes libros — *Car. Sigonii*, quibus Liv. historiae & earum epitomae partim emendantur, partim etiam explanantur — *Laur. Vallae* in VI primos libb. de bello Punico — *Jo. Velcurionis* in duos primos libros ab urbe condita — *Beati Rhenani & Sigismundi Gelenii* in omnes libb. T. Liv. — *Jo. Saxonii Hattesledii* in lib. XXI & XXII — *Wilhelmi Godelevai* in omnes libros T. Livii observationes ex variis auctorum scriptis collectae. — Accedunt ad calcem operis absolutae cognitionis historiae Romanae gratia, ne quid, quod ad rem faceret, praetermitteretur: *M. Ant. Sabbellici* annotatt. in Liv. — *Chronologia* in T. Livii histor. accommodata. ad tabulas Capitolinas, *Verrii Flarci* annott. utiliss. varietatem seu diffensionem auctorum circa consulum Romanorum nomina demonstrantibus illustrata. — *Car. Sigonii* Chronolog. in T. Liv. historias ab urbe condita. — *Ejusd.* in Chronologiam Scholia — *Pomponii Laeti* de antiquitat. urb. Romae libellus — *Jo. Barth. Marliani* de antiquae Romae topographia epitome in sept. libb. — *Pub. Victoris* de urbis Romae regionibus & locis lib. — *Romanae* liquorum mensur. mai. in minor. distributae. — Tabula concionum atque oratt. omnium T. Livii &c. — Index locupletissimus tam nominum prior. quam rerum & materiarum &c.

1578

Francos. II, *Feyerabendi* s. *Godelevai*, fol. ap. Jo. & Sigism. Feyerabendt, duobus tomis. In tomi I hujus edit. titulo illa adscribitur nota: *Francosfurti ad Mœnum apud Joannem & Sigismundum Feyerabendt. MDLXXVII.* ad finem dedicationis, inverso ordine, memorantur *Sigismundus & Joannes Feyerabendt cognati*. Eodem iterum modo ad finem primi & secundi tomi: *Impressum Francosfurti ad Mœnum, apud Georgium Corvinum, impensis Sigismundi & Johannis Feyerabendinorum MDLXXVIII.* Repetitio est mera ed. Francosfurt. l. Feyerabendinae.

ÆTAS IV MODIO -- GRUTERIANA

1588 — 1645

a Franc. Modio, qui ab an. 1586 Corrector typographiæ Feyerabendinæ Livium denuo ad MSS. Codd. in his Moguntinos, recensuit, suasque notas Feyerabendinæ III c. n. varr. adjecit, sed & duas alias minoris formæ eodem anno curavit; tum a Jano Grutero, qui ab an. 1608 Livium ex Codd. Pal. & edd. principibus suaque doctrinæ ratione recensuit, inque capita divisit, iterum an. 1619, utrumque sine notis, & 1628 tertium recensuit notisque auxit criticis & politicis, quarum primam inepte expressit Parisina an. 1625, tertiam aliæ dein, etiam Elzeviriana 1634, cui Dan. Heinsius præfatus est. Novam post illos duumviros recensione instituit Jo. Frid. Gronovius, novæ ætatis Princeps futurus.

1588 *Frankfurt. Feyerabendina* III, f. *Modii* I: T. Livii Pat. Historicorum Rom. Principis Libri omnes superstites, recogniti & emendati ad MSS. Codicum Fuldensium, Moguntinensium & Colonienfium fidem a Franc. Modio. fol. impensis Sigism. Feyerabendii & sociorum. Ex titulo, Grellii Chronologiæ, & aliorum virorum doctorum Annotationibus præfixo, & ex nota ad calcem operis obvia constat, librum hunc excusum esse typis Joannis Wechelii, & impensis Sigismundi Feyerabendii, Henrici Thackii, & Petri Vischeri, sociorum. Ceterum continet quidem eadem omnia ferme, quæ præcedentes editiones anni 1568. & 1578, nisi quod huic insuper accesserunt notæ ipsius *Modii*, una cum fragmentis vetustiorum historicorum (per Anton. Riccobonum collectis) quos Livius secutus est.

————— *Frankof.* 8. Vol. III ex *Modii* recognitione. Laudarunt hanc edit. Fabricius in B. L. Hearnius & Clericus. Fuit in Bibl. Hulsiana. Vid. ejus Catal. tom. III, num. 5917.

————— *Frankof.* 12. Vol. III. Memorat hanc Fabricius in B. L. Exstat etiam in Appendice Bibl. Leidensis pag. 519.

- 1589 *Londini*, 4. cum chronologia Verrii Flacci ac notis Robortelli & Godelevæi.
- *Lugd.* 8. Memorarunt hanc edit. Hearnius & Clericus, ac testati sunt, ei additam esse Chronologiam, accommodatam ad tabulas Capitolinas Verrii Flacci, (forte intelligitur illa, quam Joach. Grellius ex prioribus Glareani & Sigonii composuit) & Annotationes Godelevæi.
- 1592 *Aldina*, Sigonii IV, fol. ap. Aldi Nepotem. Repet. edit. 1572.
- 1595 *Antv.* 8. ex offic. Plantiniana ap. Viduam & Joan. Moretum prodierunt Fragmenta Historicorum, dudum ab Anton. *Augustino* collecta, & a Fulvio *Ursino* emendata: quibus subjunctæ sunt ejusdem Ursini in varios historicos, & inter illas etiam in Livium, notæ.
- 1599 *Francof.* 8. vol. III. Memoratur hæc edit. in Catal. Bibl. Hulf. tom. III, num. 5918.
- 1608 *Gruteri* I, Francofurti ad Mœnum fol. ex offic. typogr. Joannis *Saurii*, impensis heredum Petr. Fischeri. Titulus alteri operis parti additus refert, prodidisse quidem ex officina Sauriana, sed impensis Jonæ *Rhodii* anno MDCVII. Jonas Rhodius autem a Grutero in præfatione *Jonas Rosa* vocatur. Hanc Livii editionem recensuit Janus Gruterus, & notas virorum doctorum ferme omnium, quas priores editiones continebant, exhibuit, exceptis tamen illis Velcurionis & Saxonii: recenter vero addidit notas *Fulvii Ursini* & *Marcelli Donati*. Bene etiam instituit Gruterus libros in partes minores secare, quæ *capita* vulgo dicunt.
- 1609 Eadem. Francof. 8. Memorant hanc edit. Hearnius & Clericus, testati, adjunctas esse Godelevæi observationes. Præmissa est huic ed. epistola dedicatoria ad Fridericum juniorem Com. Pal. Principem juventutis (Fridericum dein V inter Electt. regni Bohemiæ æmulum.) quam in Gruteriana III omissam repetiere Francofurtenses juniores, in iisque illa an. 1659.
- *Aureliæ Allobrogum* (Genevæ) ap. Petrum la Roviere, fol. in Corpore scriptorum Latinorum veterum Historiæ Romanæ.

1612 *Francof.* fol. Titi Livii Patavini libri omnes superflites recogniti pridem & emendati ad MSS. Codd. Fuldensium Moguntinensium & Colonientium fidem (a Francisco Modio) nunc vero etiam ad membranas Bibliothecæ Palatinæ Electoralis a *Jano Grutero*. Accedunt in eundem Livium observationes, emendationes, annotationes denique variæ variorum Laur. Vallæ, M. Ant. Sabellici, Beat. Rhenani, Sigism. Gelenii, Henr. Lorit. Glareani, Caroli Sigonii, Guil. Godelevæi, Franc. Modii, Fulv. Ursini, Marcelli Donati. Quorum interim scriptis admixta plurima e monumentis Cælii Rhodigini, Alex. ab Alexandro, Guiliel. Budæi, Desid. Erasmi, Petri Nannii, Lazari Baihii, Hadr. Turnebi, Lili Giralardi, Ant. Augustini, Jacobi Cujacii, Franc. Robortelli, Gabr. Faerni, Onufr. Panvini, Jacobi Revardi, Barnab. Brissonii, Petr. Pithœi, Justi Lipsii. Cum indice rerum ac verborum locupletiss. huic novissimæ editioni adaptato. Cum gratia & privilegio sac. Cæs. Maj. ad decennium. MDCXII. Francofurti ad Mœnum ex officina typogr. Jo. Saurii, impensis Jac. Fischeri. In fine: *Francofurti ex offic. Sauriana, sumptibus Jonæ Rhodii MDCVII.* — Annotationes Sigonii, Godelevæi, Modii, Ursini & Donati in titulo promissæ in nostro exemplo desunt. Unde, & ex diverso in fine adscripto anno suspicamur, hanc edit. nihil novi habere præter titulum, eandemque esse cum ed. a. 1608.

1613 *Gruteri.* Francof. 12 ex edit. Jani Gruteri, 3 voll.

1614 *Lugd.* 8. Hanc edit. memorat Fabricius in B. L.

1616 T. Livii Historiarum ab U. C. Lib. XXXIII præcipua parte, quæ desiderabatur, expletus ex Cod. MSto. Venetiis 8. Memoratur in Catal. Bibl. Uffenbach. 1729 T. I, p. 628, n. 84.

— *Romæ* 8, ap. Barth. Zannetrum. Hæc editio continet tantum librum XXXIII Livii, & in ea primùm nunc e codice bibliothecæ cathedralis Bambergensis Caspar *Lufignanus* evulgavit principium hujus libri sive XVII priora capita, quæ antea desiderabantur, additis Francisci *Bartholini* Urbinatis, qui ex codice descriptum Romani attulerat, & Antonii *Quærengi* Castigationibus. Observat autem Fabricius

in B. L. male in fronte atque per omnes paginas inscribi librum XLIII. Error tamen ab editore, libro jam absoluto, deprehensus est, unde etiam pag. ultima sive 79 hæc verba adduntur: *Ubicumque impressum est lib. XLIII lege XXXIII.* Quin etiam, divenditis jam aliquibus exemplaribus, primum folium recusum, & error emendatus est. Liber ille XXXIII etiam separatim editus est Venet. 1616, 8. Castigatus Paderbornæ 1617, 8 ab Jo. Horrione cum ejusdem notis, & Parisiis 1616, 8. Inde post in aliis editionibus insertum hoc supplementum, ut Francof. 1619, 8 &c.

1619 *Gruteri II*, Francof. 8. Hanc denuo a se eo tempore recensitam, & a tutoribus Fischerianis impressam esse, testatur Gruterus in præfatione editionis anni 1628.

1621 *Lugd. 4.* cum Chronologia & Indicibus. Memorant hanc edit. Hearnius & Clericus.

———— *Ebroduni*, fol. in corp. hist. Romanæ Scriptt. latt. veterum.

1622 *Genev.* 8.

1623 *Genevæ*, fol. in corp. hist. Rom. Scriptt. latt. veterum.

1625 *Parif.* fol. In calce libri hi quinque bibliopolæ, tanquam focii, memorantur, Josephus Cottereau, Sebastianus Chapelet, Jacobus Quesnel, Dionysius Moreau, & Samuel Thibouft. Hi primam Gruteri editionem anni 1608, & omnia in illam recepta, eo inscio & non consulto, tanta superstitione exprimere conati sunt, ut paginæ paginis responderent. Verum pessime a librariis habita innumeris eorum negligentia commissis erroribus scætet; quos insuper Gruterus in Præfat. editionis tertiæ anni 1628 eo nomine traduxit, quod, curis suis secundis relictis, primas secuti sint, quasi frugibus repertis adhuc glandium amarore delectarentur. Insuper observat, nihil boni in tam vasti operis progressu expectandum esse de illis, qui in ipso statim titulo, sive, ut loquitur, in frontispicii meditullio tantopere impegerunt, ut ridiculis solæcismis se prostituerint. In fine hujus editionis conspiciuntur *Excerpta ex Livii Decadibus moralia, politica & historica*, cum aliis Latinorum & Græcorum scriptorum locis

& *Eclogis collata ordine Alphabetico, Fed. Morelli Professorum & Interpretum regionum Decani opera ac studio. Perperam Hearnius hanc edit. retulit ad annum 1623, quem tamen secutus est Clericus.*

1628

Gruteri III, fol. T. Livii Pat. Historicorum Rom. Principis Libri omnes superstites Recogniti & emendati ad MSS. Codd. Fuldensium, Moguntinensium & Colonien- sium fidem a Franc. Modio. Nunc etiam comparati cum Membranis Bibliothecæ Palatinæ Electoralis, melioresque facti cura tertia Jani Gruteri. Cujus accedunt notæ criticæ & politicæ nec non quinquaginta aliquot in Corn. Tacitum discursus, aut auctiores longe prioribus, aut nove vulgati. c. priv. S. C. Maj. Francofurti ad M. Excusi typis Guolphgangi Hofmanni, impensis hæredum Jacobi Fischeri. In præfatione ad Lectorem Gruterus sic orditur: Quale fatum fuit Franc. Modii in Livio publicando sub annum 1588, tale etiam fere meum, hoc est, tantum non capitale. Bis vulgavimus Patavinum istum an. scil. 1607, fol. & an. 1619; sed utrumque absque notis, quod nunquam aut ocii tantum, aut temporis datum fuisset. — Unde factum, ut ante plures annos excitaverim disciplinæ meæ alumnum Janum Gebhardum — ut post me prioresque Criticos Historici hujus non versus modo singulos, sed & verba syllabasque & diligentius & exactius — ad fidem auctoritatemque MSS. Pal. aliarumque Bibliothecarum monumenta examinaret. (cf. literas ab ipso Gebhardo ad Chstph. Hœflichium Ictum Reipubl. Norimberg. a secretis, d. 24 Jul. an. 1617 scriptas in doctiss. Jo. Henr. Andreae Rectoris Gymn. Heidelberg. iterato specimine de Jano Gebhardo Palatino a. 1780 p. 18 §. VIII) Eo in opere dum sedulo versatur; ecce tibi decumana bellorum etiam nunc insipientium tempestas. ea Gebhardum quoque extra patriam longius ejecit (an. 1621.) Quare postquam Livium Fischeriani tutores tertium revocare cupiunt sub præla sua, tertioque opem operamque nostram implo- rant, rejeci eos ad viridiam Gebhardi genua, cui tantum non facem meam antea tradidissem, rudem profecto meritis — Verum quid? dum ipsi hæc atque illa cau- santur — id ipsum denegare non potui, quin eisdem præter notas veteres, deproperatas ante annos 20 ad

hunc nostrum, polliceor insuper recentiores politicas e naufragio librariæ meæ adhuc reliquas. — Increpata dein Parisina ed. 1625, quæ Gruteri recensione præ se ferebat, nequidem secunda, sed primæ traduce totum Livium a se relectum emendatumque a capite ad calcem confirmans pergit: *Multa certe in textu emendavi, plura etiam delevi, sed præcautionibus semper aut libris scriptis, aut edd. omnium primis Jo. Andreæ, & Joan. Campani, idoque paribus dignitate autographariis, unde manarunt, parcius nihilominus postremis his aurem præbui; gnarus quantum etiam religiosorum morum Critici ingenio suo permittere soleant. Quæ in Livianis delevi, ea se erant momenti majoris, fideliter semper indicavi in Notis meis: sin erant minoris, silentio involvi. Cui enim bono jactare se de particula aliqua eiectione, quam vel lascivioso appareat natam in officinis interpretum? — Tales distinnaculas pluribus adhuc locis perstare, non semel queror in notis; sed non etiam ausus sum tollere, nullo verificante codice pluteario. Quæ in Livio mutavi, pendunt aut a libris nostris aliorumve; aut a judicio certissimo excellentium in his literis Virorum, qui lætè antiquas ad ceteram limatæ veritatis serio explorarunt. In nominibus propriis non fui admodum scrupulosus; arbitratus parum referre, exanarereque Tybris an Tibris, Æmylius an Æmilius. Ne tamen hæc quis putet me fecisse affinem negligentia, is sciat excussisse & Parvini, & Goltzii & Sigonii & Ursini & Pignii libros: quæque proxime accedere videbantur ad Tabulas Capitolinas, ad ceteros historicos recepisse ultro in contextum. Quid enim superstitiosius, quam recedere nolle a chirographariis schedis, atque adherere in omnibus per omnia; quum experientia clamet plerasque depictas, aut ab hominibus lingua Latina tantum non rudius, aut saculo illo, quo eadem lingua interpolabatur vel barbariæ facibus, vel aliter pronuntiabatur, quam florente imperio &c.* — *Hactenus de Livii textu. Simile quid utinam pronuntiare possem de notis. Incredibile sane est, quantis laboribus & ærumnis confectatus sit optimus Gruterus, qui in ipso opere morbo graviore, rursus Heidelbergam migratione, belli tumultibus in usque facta Amanuensis cæde &c. interpellatus af-*

fectusque tandem ex opere toto ipse notulas requirere ac feligere necesse habuit, quos urgenti typographo daret. cetera tacemus. Ita vero finitur hæc ejus epistola: *Deproperabam animo ac corpore æger, sine Augusti mensis, c1630cxxxvii Heidebergæ.* Neque diu supervixit huic ed. Gruterus; sed obiit d. XX Sept. eodem anno. Maluimus vero Gruteri curam in hac ed. positam ipsius verbis defendere, quam aliorum iniqua judicia huc admittere. Plurimum sane ei debet lectio Liviana, quod cuique pateat, qui eam cum Gronoviana contulerit. Sed & accessere ad hanc ed. (quam nobiscum communicavit optimus Collega Marc. Ern. Henr. Berkmann, Prof.) alia, quorum est post præf. & Elogia Livii Catalogus: *Tabulæ concionum &c. Calii Secundi* lib. de Mensuris &c. *Pomp. Læti* Antiq. Romæ. *Martiani* de ant. Romæ typogr. Epit. *P. Victoris* de U. Romæ locis ac regionibus. *Epit.* in singulos Livii Libros attributa L. *Floro.* Atque hæc præmittuntur libris Livii. Hos sequitur C. Sigonii Chronol. Index Livii accuratissimus ad libros & capita. *Wilh. Guætelæi* Obf. (quas Bibliopolæ suo consilio additas proprio ornavunt titulo) Fragmenta vetustiorum historicorum &c. quos Livius secutus est &c. collecta per Franc. *Riccobonum.* Apparatum hunc claudunt J. Gruteri Notæ in T. Livium. *Gruteri* in Tacitum discursus ed. II auctiores ibid. ap. eisdem eodem.

1633 *Amstærd.* 12. ap. Guil. *Blæu.*

1634 *Elzeviriana* I, Gruteri s. Dan. *Heinsii.* Lugd. Bat. 12. III. Nihil præfatus est, nec in dedicatione institutum & rationem edendi declaravit *Heinsius.* Enimvero illa ed. est mera repetitio exempli Gruteriani a. 1628, mendis novis aucta.

—— Gruteri ex recens. Francof. 8. voll. III.

Æ T A S V G R O N O V I A N A

1645 — 1735

2 Jo. Frid. *Gronovio,* qui cum an. 1645 Livium a se recognitum cum notis seorsim excusis edidisset, an. 1679

denuo atque ita curavit, ut in eo exemplum tractandi auctoris ederet; hinc princeps novæ ætatis exstitit. Accessit Supplementorum Livianorum egregius scriptor Jo. *Freinshemius*; quæ primus corpori *Liviano* adjunxere Jo. *Doujatius* in usum Delphini, & J. *Clericus*, quorum operam conjunxit *Veneta* Doujatii melior proles. Francofurtenses interea Gruterianam vel II vel III inconsulti propagarunt.

- 1645 *Elzeviriana* II, *Gronovii* I, Lugd. Bat. vol. IV. ex offic. Elzeviriana. Prima hæc est editio, eaque portabilis, quæ prodiit ex recensione J. Fr. *Gronovii*. Ejus autem quartus tomus, qui etiam seorsum venit, continet J. Fr. *Gronovii* notas in Livium. Accessit *Ismaelis Bullialdi* Epistola de Solis defectu, cujus Livius lib. XXXVII meminit. Fabricius in B. L. Venet. excusa pag. 200 de hac edit. sic habet: Ex recens. Jo. Frid. *Gronovii*. Lugd. Bat. 1645, 12. tribus voll. apud Elzevirium (Elzevirios) emendata & nitidissima editio, capitibus etiam, quod in *Heinsiana* desideratur, distincta. Et ead. pagina: In editione notarum *Gronovii* patris ad Livium Lugd. Bat. 1645, 12. f. To. IV hujus edit. exstant nonnulla, quæ in posterioribus *Livii* edit. an. 1665 & 1679 cum notis variorum frustra quæras. Hæc omnia, (quo vero instituto, nescio) in *Ernestii* editione Fabriciani operis desiderantur. Vid. *Ernestii* edit. Fabricianæ B. L. To. 1, p. 285. Emendandus est & *Debure* (in nota ad num. 4808) ubi *Heinsiana* edit. an. 1634 *Gronoviana* an. 1645 præferri dicitur.
- 1649 Supplementorum Livianorum Jo. *Freinshemii* decas. Holmiæ 12.
- 1654 *Elzeviriana* III, *Gronovii*. Lugd. Bat. 12. voll. III ap. Elzevirium. Recusus est solus textus ex recensione *Gronoviana* a. 1645.
- 1659 *Francof.* ap. Joh. Beyerum, Ammonium & Serlinum, 8. ad fidem vetustiss. MSS. Bibl. Pal. castigatus a Jano *Grutero*. Acc. Index copiosissimus. Editio IV & melior. Præmittitur *Gruteri* dedicatoria ad *Fredericum* (V) Palatinum principem Juventutis (ex edit. 1609) & separatim additas habet *Wilh. Godelevæi* observatt. ibid. eod. Mentitur vero editio-

- nem meliorem illa Gruteri III an. 1628, eaque ultima.
- 1661 *Elzeviriana* IV, Gronovii. Amstelæd. 12. voll. III. ap. Lud. & Dan. Elzevirios.
- 1665 *Elzeviriana* V, Amstel. 8. voll. III. ap. Lud. & Dan. Elzevirios. cum perpetuis J. Fr. Gronovii & Car. Sigonii variorumque notis sub textu. Neque tamen Gronovius, summius criticus, sibi aut Livio semper cavere potuit, monente Drakenb. præf. pag. 69.
- 1674 Jo. Freinshemii vetus Rom. historia s. supplementorum Livianorum Libri LX. Argentorati. 4. ap. Sim. Pauli.
- 1677 Romæ prodiit Bibliotheca sacra & profana *Latini Latini*: cujus parti secundæ insertæ sunt ejus observationes & correctiones in T. Livium, in fol.
- 1678 *Elzeviriana* VI, Amstel. 12. voll. III ap. Daniel. Elzevirum, ex recensione J. Fr. Gronovii. Repet. Gronovianæ a. 1654 aut 1661.
- 1679 *Elzeviriana* VII, Amstel. 8. voll. III. *T. L. historiarum, quod exstat, cum perpetuis Caroli Sigonii & Jo. Frid. Gronovii notis. Jac. Gronovius probavit suasque & aliorum notas adjecit. Amst. ap. Dan. Elzevirium.* In fine T I nova paginarum serie sequuntur: Car. Sigonii Chronologia in Liv. histor. *Ejusd.* in Chronologiam scholia – *Ejusd.* Livianorum scholiorum defensiones. Secundo tomo, nova pagin. serie subjiciuntur: Jacobi Jo. Fr. F. Gronovii Epistolæ, in quibus multa Titi Livii loca geographica emendantur & illustrantur. Tertio tomo accedit *Ismael. Bullialdi* Epistola de defectu Solis &c. Singulis vero Tomis Indices adjecti sunt. Hæc edit. habetur optima, & insigne exemplum scriptorum latinorum diligenter accurateque tractandorum, & tamen sine ostentatione doctrinæ. Addendus autem est *liber novus observationum Gronov.* Daventr. 1652, 12. sive *liber quartus observationum* in altera Gronovianarum editione, a Frid. Platnero Lipsiæ 1755, 8. curata: in quo permulta Livii loca copiosius & diligentius excutiuntur & explicantur.
-
- 1679 *Cantabrigiæ*, 8. voll. II. Repetit. præcedentis. – 1682 *Paris.* 4. voll. IV. T. Livii Patav. historiarum Libri qui exstant, interpretatione & notis

illustravit *Jo. Doujatius*, Antecessorum Paris. & regiorum Profess. Primicerius. Jussu Christianissimi Regis, in usum Ser. Delphini. Accessere librorum omnium deperditorum Supplementa per *Jo. Freinshemium*, quæ magna ex parte nunc primum prodeunt in lucem. Paris. ap. Fredericum Leonard. Cum privilegio Regis. In hac ed. Freinshemii Supplementa primum corpori Liviano adjuncta sunt. Sed Doujatii opera idoneis judicibus parum probata est. Ipse etiam lacunas quasdam librorum posteriorum explere tentavit, non fatis feliciter.

- 1694 *Patavina* I, 12. voll. V. recensente ad optima exemplaria Jacobo *Giacometto*, qui capitum argumenta, chartasque Geographicas, & Analyfin Rhetoricam concionum, M. Ant. Feracii studio compositam, indiceſque legum, Magistratum ac Sacerdotiorum Romanorum adjunxit.
- 1696 *Francoſ.* 8. 3 tomi ap. Frid. Kuochium: T. Livius Patav. tertia Jani *Gruteri* cura recognitus curante Jo. Gerardo *Arnoldo*, Gymnaſii Francoſutani Rectore. In hac capitum quoque diſtinctio & anni Urbis in ora libri notati comparent, præmiſſa editoris diſſertatione de Livii vita & ſcriptis.
- 1703 *Lond.* 8. voll. II. Fabricius in B. L. teſtatur, hanc edit. ad Gronovianam recenſitam, lemmatibus hiſtoricis ad paginarum oras notatis, tabulisque Geographicis inſtructam eſſe.
- 1707 *Pat. vina* II, 12. vol. V. Memoratur hæc editio in Catal. bibl. Hulſianæ, tom. III, num. 5920.
- 1708 *Oxon.* 8. voll. VI, ex recenſione Thom. *Hearne*. Singulis paginis ſubjectæ ſunt variæ lectiones e Codicibus MSS. ſex recens & aliis pridem collatis, atque ex impreſſis, tum in ſuprema paginæ parte ſemper notatur annus U. C. & ante Chriſtum natum, denique tomo VI ſubjunctæ præter novos factique locupletes atque accuratos indices, lacunarum in libris quinque poſtremis ſupplementa a Jo. Doujatio composita, & novæ editorum in Livium notæ: item Dodwelli diſſert. de fragmento Liviano, de quo poſt. — Textus eſt Gronovianus.
- 1710 *Amſtel.* 8. vol. X, ap. Henr. Wetſtenium. Tit. Livii hiſtor. quod exſtat, c. integris Jo. Freinſhemii ſup-

plementis emendatioribus & suis locis collocatis, tabulis geographicis & copioso indice. Recensuit & notulis auxit Jo. Clericus. Tomus X habet Geographiam Livianam (XIV tabulis comprehensam) & Indicem rerum locupletissimum in Livii hist. & suppl. Freinsh. Textus est Gronovianus. Notæ haud magni sunt momenti, & editio usibus tironum scholasticis destinata videtur. Freinshemii supplementa paulo minoribus literis, quam in Doujatiana excusa sunt, sed quod multi credo factum nollent, omissa loca auctorum, quæ in marginibus Doujatianis annotata ubique leguntur, e quibus Freinshemius sua repetiit. Servatur in Bibl. Gymn. Bipontini.

1715 *Venet.* 4. voll. VI. *Doujatiana* in usum Delphini a. 1679 -- 1682 recusa est curante Carolo *Banarrigo*. In calce additæ etiam breves notæ Jo. Clerici, indexque locupletissimus *Wetstenianus*. Ad Freinshemii vero supplementa scriptorum veterum loci diligentius allegati, quam in Parisiensi editione. Tomus vero septimus, quem additurum editor promisit, vocum omnium Livianarum phrasumque, lucem non vidit. Adest in Bibl. eadem.

1718 *Patavina* III, 4. voll. IV. Tit. Livii Patavini histor. Romanæ libri, qui supersunt.

— *Patavii* 12. Livius c. epitome L. Flori, variis lect. Chronologia, Indicibus &c. 5 tomi 4 voll.

1722 *Lond.* 12. voll. VI, sine nomine editoris. Forte repetitio est editionis Clerici a. 1710. (cura *Maittairei*.)

1727 *Patavina* IV, 12. tomis V, a Jacobo *Jacobetto* & M. Ant. *Feracio* procurata.

1735 *Lips.* 8. III tomi, omissis supplementis, ad Clerici editionem, sed vitiose expressa cum Jo. Matth. *Gesneri* præf. lectu dignissima de cursoria & stataria auctorum latinorum lectione in scholis, præsertim Livii.

ÆTAS VI CREVERIO — DRAKENBORCHIANA

1735 — 1784

1735 -- 1740 *Parif.* 4. voll. V. T. L. historiarum ab urbe condita libri, qui supersunt, XXXV, cum supple-

mentis librorum amissorum, a Jo. Freinshemio concinnatis. Recensuit & notis illustravit J. B. L. *Crevier* — Prof. Rhet. in Coll. Dormano - Bellovacensi Univ. Paris. — sumt. Gabr. Franc. Quillau & Jo. Defaint. cf. Catal. Bibl. Bunav. T. I, vol. I, pag. 297. Textus basis est Gronovianus, sed locis, etsi perpaucis, correctus e MSS. & edd. pr. conjecturis in notas rejectis, quæ sunt non adeo multæ, breves & sine ostentatione doctrinæ, interdum tamen leviores & tironibus quam viris aptiores. In iis conficiendis usus est superioribus interpretibus, inprimis Sigonio & Gronovio, sed quæ ab iis sumsit, sub eorum nomine dedit, ubi longiore & exquisitiore disputatione opus erat, rem rejecit ad calcem operis. Explevit & lacunas, in ipso textu positas suis supplementis. Recognovit etiam supplementa Freinshemii, nonnullis locis emendavit, & notulas addidit: uno loco etiam aliquid addidit L. CXXII. Indicia denique auctorum in margine sæpe correxit. Accessere Indices, Geographicus & rerum in textum Livii & Suppl. Freinsh. qui e Clerici editione sumtus est. Indicem Latinitatis, promissum in præfatione, non dedit. Sed de instituto viri doctissimi qui velint diligentius cognoscere, adeant præfationem, in qua & de Livio & ejus editoribus & interpretibus dixit.

1738 -- 1746 *Amstel.* 4. T. L. Patavini historiarum ab urbe condita libri, qui supersunt, omnes, cum notis integris Laur. Vallæ, M. Ant. Sabellici, Beati (Bildii) Rhenani, Sigism. Gelenii, Henr. Loriti Glareani, Car. Sigonii, Fulvii Ursini, Franc. Sanctii, Jo. Frid. Gronovii, Tanq. Fabri, Henr. Valesii, Jac. Perizonii, Jac. Gronovii, excerptis Petri Mannii, Justi Lipsii, Frid. Modii, Jani Gruteri, nec non ineditis Jani Gebhardi, Carol. Andr. Dukeri, & aliorum, curante Arnaldo *Drakenborch*, qui & suas annotationes adjecit. Accedunt Supplementa deperditorum T. Livii librorum, a Jo. Freinshemio concinnata. Tomi VII. *Amstel.* ap. Jac. Wetstein, & G. Smith, *Lugd. B.* ap. Sam. Luchtmanns. Tomi I & II 1738. III, 1740. IV, 1741. V, 1743. VI, 1744. VII, 1746. 4 maj. In longa doctaque præfatione,

volumini ultimo præfixa, diligenter persequitur Drakenb. Vallæ vitam, interpretes atque editores Livii, sui que instituti rationem. Basis quidem est contextus Gronovianus, at quam plurimis locis vel purgatus a mendis typographicis, vel ad optimos Codd. quorum plus triginta contulit, atque editiones correctus atque emaculatus. Quidquid ad emendationem melioremque expositionem Livii tam criticam, quam grammaticam atque historicam conferre potuit, id sedulo congeffit & largiffima manu effudit Drakenb. atque reliquit in notis exquisitæ latinitatis artisque criticæ thesaurum, conjunctis animadversionibus Sigonii, Gronovii, Perizonii, & Dukeri. Neque tamen diffitendum est, immensam Gronovii ac Drakenborchii diligentiam studiumque maxime laudabile nondum effecisse, ut nulla omnino ulcera residerent: immo vero multi quædam viderunt, iisque sanandis admoverunt manus. Ultimus tomus, præter præfationem Drakenb. & multorum superiorum æditorum præfationes atque dedicationes, nec non indices utiles & copiosos, habet varios libellos, partim ad historiam Livii, partim ad loca quædam illustranda pertinentes: quorum significationem nonnullis, qui caro illo carent exemplo, haud ingratam fore arbitramur. 1 – 3. Vita Livii ex G. J. Vossii historicis latinis, & ex Balth. Bonifacii historiæ Romanæ scriptoribus, tum Jac. Phil. Tomasini Livius Patavinus; 4. Sertotii Ursati interpretatio inscriptionis monumenti Liviani; 5. Laur. Pignorii defensio Liviana; 6. Chr. Gottl. Jæcher de suspecta Livii fide; 7 – 9. Dan. Georg. Morhof, Jo. Buherius, & Jac. Facciolatus de Patavinitate Liviana; 10. Jo. Henr. Bœclerus de Polybii Livii que diversa scribendi ratione & hujus imitatione; 11. Carol. Sigonii Chronolog. Liviana; 12. ejusdem Livianorum scholiorum aliquot defensiones adversus Glareanum & Rorbortellum; 13. Gabr. Faerni censura emendationum Livianarum Car. Sigonii; 14. Car. Sigonii ad epist. Faerni responsio; 15. Jac. Gronovii Epistolæ, in quibus multa Livii loca geographica emendantur & illustrantur; 16. Laur. Vallæ disput. duo Tarquinii, Lucius & Aruns, Prisci Tarquinii filine, an nepo-

tes fuerint; 17. Perizonii cap. VII animadversionum historicarum; 18. Jo. Frid. Gronovii cap. XIV ex libro IV Observationum; 19. Henr. Dodwelli diff. ad fragmentum e MSto Landino, Livii lib. XXII, cap. 18 §. 5. memoratum; 20. Jo. Frid. Gronovii nota ad Livii libr. LXXIX cap. 18 §. 9. excerpta ex prima editione notarum ejus in Livium; 21. Henr. Glareani genealogia Scipionum; 22. Ism. Bullialdus de defectu Solis, cujus meminit Livius lib. XXXVII cap. 4. 23. Matth. Ægyptii explicatio Scti de Bacchanalibus; 24. Variorum annotationes ad Livii lib. XXXIX cap. 19 §. 5. 25. Excerptum ex Petri Lambecii bibl. Vindobonensi de antiquissimo Livii codice MSto. 26. Excerptum ex Livii editione Basileensi a. 1531 de lacunis ejusdem codicis; 27. Excerptum ex Henr. Leon. Schurzfleischii notitia bibliothecæ Vinariensis, ad Livii libr. XLV. cap. 29 §. 5 pertinens. — Post nubem dedicationum &c. sequuntur 1. præfatio Henr. Leon. Schurzfleischii ante specimen notarum Gebhardi in Livium; 2. e-logia & judicia auctorum de Livio; 3 & 4. syllabus MStorum, qui in hac editione adhibiti sunt, atque præcipuarum editionum, quas diligentissime recenset; 5. collatio fragmenti, ut existimatur, Livii & particulæ Polybii ex libr. I interprete Leonardo Aretino; 6. Addenda & emendanda.

1740 *Patavii* 12. ap. Jo. Manfrè, V tomi. Opera quæ supersunt, periochis insuper, variis lectt. chronologia & rhetoricis exercitationibus illustrata. Accedunt capita XVII, quæ hæctenus desiderabantur. Adnotationes variorum excerptæ ex ed. Oxoniensi an. 1708 cum mappis.

— *Basil.* 8. voll. III. ap. E. & J. R. Thurnisios fratres. Repet. Gronovianæ a. 1679. Est in Bibl. Gymn. Bip.

1743 -- 1748 *Heidelbergæ*, fol. in collectione scriptorum veterum latinorum historiæ Romanæ: curante Bennone Caspate *Haurisio*. Tom. I. Is vero suo consilio L. XI -- XX ex Suppl. Jo. Freinsheimii adjecit, & lacunas hinc inde ex Suppl. Jo. Doujatii explevit; sed post L. XLV cetera Freinsheimii supplementa omisit. Textui subjecit lectionum quandam varietatem, passim notas adspersit; fastos præmisit; opus

figg. æncis numisque ornavit. Neque tamen sic editionem suam approbavit.

- 1747 *Parisi*. 8. voll. VI, ex priorē recensione Creveriana 1735 – 1740. cum notis usui scholarum accommodatis.
- 1751 *Venetiis*, V voll. Repetitiō Creverianæ per Remondinium, additis Chronologiis, Rhetoricis Exercitationibus, universæ Romanæ historiæ Epitomis, XVII capitibus Livio adscriptis, nec non variorum, præsertim Jo. Clerici, adnotationibus.
- *Patavii*, typis Seminarii: T. Livii Pat. Opera, obscuriorum locorum interpretationibus & selectis adnotationibus illustrata, cum supplementis in postremos libros, ex rec. Arn. Drakenborchii. VI voll. quorum postremum prænotatur: Exercitationes rhetoricæ in Orationes T. Livii, quibus accedunt Jo. Clerici animadversiones, & ex aliis auctoris Patavinitas, Vita & Elogia.
- *Berolini* (Ulmæ) 8. voll. III. curante Jo. Petro Millero.
- 1752 *Edinburg*. 12 maj. voll. IV. T. L. historiarum ab urbe condita libri, qui supersunt, cum omnium Epitomis, ac deperditorum fragmentis: ad optimas editiones castigati, accurante Tho. Ruddimannio, A. M. Edinburgi, in ædibus T. & W. Ruddimanni, Prostant autem Amstelædami, apud Jacobum a Westein. MDCCLII. De accurata & nitida hac edit. videlicet Harlesium pag. 427, & Harwood a View — (edit. II) pag. 183. item *Alterii* versionem primæ edit. Harwoodiani operis l. c. Ex typographi præfatione ad lectorem Tomo I hujus Livii editionis præmissa, hæc delibamus: *Ad illam* (edit.) *Drakenborchii præcipue* — *editionem quam damus exigere visum est* — *Non adeo tamen arte nos constringi passus sumus, ut ne latum unguem quidem ab eo recedere auderemus, ubi ratio id poscere videbatur: quædam enim mutanda monuit & ostendit cl. Kennethus Mackenzie causarum patronus in collegio Edinb.* — *quæ absque hæsitatione in textum recepimus.* — Inde confitetur typographus id factum esse partim *ex aliorum emendat. jam publicatis, partim ex varr. MSS. codicibus per ipsum Drakenborchium notatis.*

CXLVI NOTITIA LITERARIA

- 1759 *Patavii*, 8 min. VI voll. T. Livii Opera quæ supersunt, obscuriorum locorum interpretationibus & selectis annotationibus illustrata, cum Suppl. in postremos libros, J. B. L. *Crevier* editio postrema. Vol. V & VI præter indicem rerum continentur: Index descriptionum, Index legum, Tabula omnium magistratuum P. Rom. eorumque ministrorum, Tabula omnium Sacerdotiorum, Exercitationes rhetoricæ in Orat. T. Livii, Index locorum communium, ex quibus oratt. argumenta desumpta sunt, Index affectuum juxta Aristotelis præcepta, Index morum, Variæ Lectt. ex duobus MSS. Mutinensibus, T. Livii fragmenta, Jo. Clerici animadversiones, Adnotationes in T. Liv. partim excerptæ ex ed. Oxon. 1708, partim nunc additæ a F. A. Z. Car. Sigonii Chronologia, alia Chronologia, Compendiaria expositio ponderum mensurarumque, Car. Sigonii Ordo hist. Lat. T. Livii Vita, libri, editiones &c. ex Jo. Alb. Fabricii B. L. Laur. Pignorii defensio Liv. Jo. Buherius & Jac. Facciolatus de Patavinitate Liv. Elogia & Judicia auctorum de T. Liv.
- 1759 — 1761 *Halæ*. 8. voll. III.
- 1768 *Paris*. 12. voll. VI. ex rec. & c. not. *Crevierii*.
- 1769 *Lipsiæ*. 8. voll. III. T. Livii Patavini historiarum libri, qui supersunt omnes, ex recensione Arn. *Drakenborchii* cum indice rerum locupletissimo. Accessit præter varietatem Lectt. Gronovianæ & Creverianæ Glossarium Livianum curante Augusto Guil. *Ernestii*.
- 1771 *Lemgov*. 8. Livius pro prima classe Gymnasior. scholarumque latinarum ita excerptus, ut intra anni spatium prælegi possit, a M. Mart. *Særgel*. v. ad a. 1784.
- 1773 *Hamburgi*, fol. Fragmentum ex libro XCI historiarum T. L. primum erutum ex cod. MS. Vaticano, quondam Palatino, a cel. Paul. Jac. *Bruns*. quod eodem anno prodiit Lipsiæ. 8, cum præfatione J. A. *Ernesti*. Item Romæ cum scholiis *Giovenazii* (s. Juvenatii) cura Franc. *Cantellerii*.
- 1775 *Paris*. 12. voll. VII. cura Lallemandi, typis Jo. *Barbou*.
- 1778 *Bamberg*. 8. voll. IV. T. Livii Patav. histor. libri, qui supersunt omnes, ex recensione *Drakenborchii* edit. *Ernesti*.

- *Wirceburgi*. 8.
- 1779 — 1783 *Manhemii*. 8. voll: XII. ex recensione Drakenborchianum cum variis lectionibus ex Gronov. & Crever.
1780. *Lips.* 8. T. Livii operum Pentas I, II & III scholarum in usum animadversionibus illustravit Fr. Andr. Stroth, Gothani Gymnas. Rector. Basis est edit. Drakenb. interdum tamen discedit Strothius, & dissensus rationem reddit in notis, in quibus præterea de lectione aut sensu verborum modo parcius, modo liberalius, disputat.
1784. Livius excerptus a M. Mart. Frid. Særgel, Prof. P. Ord. Coll. Carolini & Gymn. Brunsvic. Rectore dirig. Editio novissima totum Livium comprehendens. Tom I & II, 8. Tomus I ex ed. 1771 recusus XX libros priores habet, alter ceteros excerptos, ita ut series historię servata sit; qua de causa non solum consules, & argumentum eorum, quæ prætermissa sunt, sed & epitomæ librorum deperditorum, fastique Liviani additi sunt. Ita quidem Liviana lectio curriculo annuo in scholis absolvi potest, quo consilio ipse editor quædam de operis usu magistros maxime in præf. monuit; sed quod adolescentum pecuniæ s. inopiæ quam oculis parcendum magis videbatur, typis justo minoribus excusus est hic Liviolus. Sic *Comm. Gœttingenses dicti Gelehrte Anzeigen*. partic. 178 d. 6 Nov. 1784. p. 1784. Sed vide, quæ in *Notitia lit.* p. LXXXI adversus Jenfianam epitomen monuit Ernestius.

Nos textum quidem Livii Drakenborchianum, sed de novo cum præstantioribus editionibus, Basiliensi II, Aldina Sigonii, Gruteriana, Gronoviana & Creveriana collatum recepimus. Supplementa a Freinshemio scripta ex ipsa eorum editione Argentoratensi suo loco addenda censuimus, ita ut, quod Clericus neglexerat, nomina Auctorum, quos Freinshemius secutus erat, paginis subjiceremus singulis; quem in finem Doujatianam in usum Delfini Venetiis ac-

curatius recusam adhibemus. Neque vero pari in auctoritate nobis sunt illa Doujatii; unde ab iis abstinuimus.

Primo huic volumini vitam Livii præmifimus a Jac. Phil. Tomafino docte scriptam, quam pariter Livio suo Drakenborchius subjungendam duxit. In Indice editionum vel auctius, vel accuratius edendo, quid præstitum fit, judicabunt, qui nostram operam cum illa Drakenborchii, vel Ernestii in B. L. Fabriciana, vel Harlesii conferre voluerint. In quo quidem labore pulcherrime nobis subvenit summa viri perillustis, Henr. Conr. *HEIDEGGERI*, Tribuni Tigurini, humanitas. Is enim, quamvis gravioribus negotiis curisque reipublicæ melioribus quotidie intentus, id tamen studiis nostris, s. Livii nostri amicis, dedit, ut qua lætiori editionum veterum & rarissimarum copia præstat ipsius Bibliotheca amplissima, ex ea repeteret accuratiores descriptiones earum, quas paucioribus videre contigit. hinc notitiam Tarvisinæ IV an. 1485, Venetæ IV an. 1495, Moguntinæ, & Aldinæ I an. 1518 sqq. Basiliensis I an. 1531, Lugdunensis an. 1537, Parisinæ an. 1573, Viri summi studiis nobiscum debent lectores. Tandem confirmamus, nos, præter Indicem in fronte promissum, *Fastos Consulares* ultimo volumini addituros esse; ne quid desideretur, quod ad distincte cognoscendam rerum gestarum feriem faciat.

TITI LIVII PATAVINI VERSIONES.

GERMANICÆ.

- 1505 *Römische Historie ufs Tito Livio gezogen. In fine: Gedruckt und geendet in der loblichen Stadt Mentz durch Fleifs Johan Schœffers Buchtrucker d. selbst am sechsten tag des Monedts Marcij Nach Christi unsers Herrn Geburth tausend fünffhunderth und im fünfften Iare. III Part. fol. c. figg. ligno incisis. Prima pars continet versionem prioris Decadis Liv. auctore Bernh. Schœfferlin J. U. D. Cæs. cum præmissa dedicatione ad Maximilianum Imp. Secundæ insunt Supplementa in T. Liv. ab eodem Schœfferlinio germanice conscripta. qui cum operi immortalus esset, versionem absolvit Ivo Wutigius J. C. D. & Canonicus apud St. Victorem Moguntiae, ejus præfatio legitur in fronte Part. III. Rarissimum hunc librum possidet perill. Heideggerus Trib. Tigur. Ceterum Fabricius adnotat, quædam ejus exempla excusa esse in membrana. Exstabat quoque in Bibl. Uffenbach. Cat. T. II App. n. 230, p. 80.*
- 1514 *Römische Historie Titi Livii meniglich kurzweilig und dienstlich zu lesen. Mentz, bei Joh. Schœffer. fol. c. figg.*
- 1523 *Römische Historien Titi Livii mit etlichen neuen translationen, so kurtzuerschienen jahren im hohen thum zu Mentz im latein erfunden, und vorhin nit mehr gesehen sein. Davon such im endt des Registers. fol. c. figg. Præfixum habet privilegium Maximiliani Imp. da-*

tum a. 1515XVIII. In fine legitur: *Gedruckt und geendet zu Mentz durch Johann Schaeffer: nach Christi unsers herren geburt: tausent fünffhundert und zwanzig drey jare.* Hæc eadem continet, quæ superior an. 1505, addita tamen nunc primum versione librorum recens Moguntiaë repertorum, auctore Nic. Carbachio, cum ejusdem Epistola ad Lectorem, in qua queritur de difficultate vertendorum auctorum Latinorum, unde particulam huc transcribere libet: -- *Wie ich auch vornæmlich entpfunden hab in disen zweyen teyln des hochberümpften geschichtschreibers Titi Livij, under welchen das erst begreiffi schier das ganz XXXIII buch der Ræmischen historien von Livio beschriben. Das ander inhelt das hinderst und lest stüek des XL buchs, die inwendig in vier jaren erstmals, und vor nie, ussgangen sein im truck, und im hohem thumstiffi hie zu Mentz newlich gefunden sein worden. Dan in dem ursprünglichen exemplar vil wort also unsteiffig geschriben stehn, das man junemer muß nachgedencken, und sich uff sie besinnen, wan sie zu lesen sein, zu zeiten etlich wort, etwan auch viel zeil ussgelassen sein, von denen die meynung und verstant gantz verdunckelt würt. Derenhalben niemant mich verdencken mag des unfleifs &c. Gegeben zu Mentz uff Mitwochen nach dem tag der gebererin gots Marie im fünftzehen hundertsten und im drei und zwentzigsten jar Christi unsers Heylandts. Servatur in Bibl. Ducali Bip. cf. Joh. Gottl. Schummels Uebersetzer Bibliothek. Wittenb. u. Zerbst. 1774. pag. 240 sq. & Cat. Bibl. Uffenb. T. II App. II, n. 328, p. 110.*

1533

Eadem -- auctior: *Titi Livii des aller redsprechister und hochberümpften Geschichtschreibers Romische historien mit etlichen neuwen translationen &c. durch Nic. Carbachium und Jac. Mycyllum. Getruckt zu Meynz durch Joanem Schaeffer MDXXXIII. fol. Eadem in Bibl. Uffenbach. Catal. T. II App. II n. 333 p. 111 sq. additur incunabulis artis typogr. ob inligne de ejus inventione testimonium, quod in fine dedicationis ad Reg. Rom. his verbis legitur: *Solch Werck, allermechtigster König das zuvor an ewer Königlichen Maj. zu Ehren, dazu Fürsten und Herren auch Gemeynnden und Stetten Deutscher Nation zu Nuze in**

Teutsch bracht und in der löbl. Statt Meynz gefertigt und gedruckt ist, woll Euwer Ko. Ma. gnediglich aufnehmen, in welcher Statt auch anfangklich die wunderbare kunst der Truckerey und im ersten von dem kunstreichen Johann GUTTENBERG do man zalt nach Christli unsers Herren geburt tausent vierhundert und sunffzig Jar erfunden und darnach mit Fleifs, Kost und Arbeyt Johann FAUSTEN und Peter SCHOEFFERS zu MEYNZ gebessert und beständig gemacht ist worden. Darumb dieselb Statt nicht allein bey Teutscher Nation, sonder auch bey aller Welt in ewige Zeyt (als wol verdienet) gebreist vnd gelobt sol werden, und die Burger und Einwohner daselbst des billich genießen.

1541 Ead. repet. ibid. fol.

1546 Ead. ibid. fol.

1551 Eadem: Titi Livii des aller Redsprechisten und Hochberümpfsten Geschichtschreibers Römische Historien jetzundt mit gantzem fleifs besichtigt, gebessert und gemehret. Welche allen Rittermessigen, Gewaltigen, Regierern der Landt und Stett, so sich inn Tügent, Mannheyt, oder Ritterlichen thatten underlehn zu üben, nit alleyn zu lesen lüstlig, sonder jnen, auch cynem jeden menschen gemeynes stands, vast nützlich und zu wissen noth seindt. Getruckt in der Churfürstlichen State Meynitz, durch Ivonem Schæffer, im Jare 1551. fol. c. figg. in IV Part. divisa. In fine: Vollendet am neunnden tag des Winthermonats, Als mann zalt nach der Geburt unsers lieben Herrn Jesu Christi 1551. Exstat in Bibl. Ducali Bip.

1562 Argentor. fol.

1568 Livius & Florus Germanice per Zachar. Müntzerum; Francof. fol.

1571 Eadem, ibid. fol.

1574 h. a. Argentoratensem memorat Fabricius, forte eandem cum sequente.

1575 Titus LIVIUS und Lucius FLORUS von Ankunfft und Ursprung des Römischen Reichs, der alten Römer herkommen, Sitten, Weissheyt, Ehrbarkeyt, löblichem Regiment, Ritterlichen thaten, Victori und Sig, gegen ihren Feinden &c. Jetzund auff dafs newe auff den

Latein verteutscht, und mit ordentlicher verzeychniß der fürnemsten Historien, Jarrechnung, kurzer Livischen Chronica, Register, und schœnen Figuren gezieret, desgleichen vorhin im Truck nie aufsgangen. Mit Rœmischer Key. Maist. Freihelt. fol. charta maj. In fine: Getruckt zu Straßburg, durch Theodosium Rihel. 1575. Præmittitur dedicatio ad Max. II Imp. in qua Rihelius agit de consilio suo, complures veteres historicos, germanice versos, edendi; data d. 18 Martii, 1574. Exstat in Bibl. Duc. Bip.

- 1594 Argentor. fol.
 1605 Argentor. fol.
 1616 Argentor. fol.
 1776 -- 1782 T. Liv. Rœmische Geschichte, aus dem Lat. überfetzt von Joh. Fr. Wagner. Lemgo. 4 Th. 8 maj.
 1777 -- 1779 T. Liv. Rœmische Geschichte überfetzt von M. Cilano, mit Anmerkungen von Adler. Hamb. 8 Th. 8 maj.

Singulas particulas s. orationes T. Livii ex Latino in Germanicum sermonem transfulerunt Jo. Petr. Miller, Jo. Mich. Heinze, Jo. Eust. Goldhagen, Schwabius, Lindnerus, Kinderlingius, Auctor libri inscripti *der Lehrmeister*, & Mayus. de quibus vid. si placet, Schummelius l. supra cit.

G A L L I C Æ.

- 1515 Les grandes Décades de Tit. Livius, traduites de latin en françois, (p. Pierre Bercheure ou Berchoire) nouvellement corrigées & amendées. & en suivant les faits du dit T. Livius aucunes additions de plusieurs grands historiographes si comme Orose, Salluste, Suctone & Lucain. Paris. Guillaume Eustache 1514. & François Regnault 1515. fol. 3 voll.
 1530 Les grandes Décades de Tite Live, avec des additions de plusieurs grands Historiographes, si comme Dion, Salluste, Suetone & Lucain. Paris. X Livres. fol. (charact. Goth.)

- 1553 Primæ Decadis liber secundus interprete Henr. *Sal-*
lenovano prodiit Pictavii.
- Idem ex versione Jac. *Gohorrii*, Lugd.
- 1562 T. Livius, Claudio *Guichardo* interprete. Paris.
- 1568 Les concions & harangues de Tite Live, traduites
en François par J. de *Amelin*. Paris. *Vascofan.* 8.
- 1582 Les Décades de Tite Live traduites en François par
Vigenere *Hamelin* & Antoine de la *Faye*. à Paris. fol.
- 1583 Eadem versio rep.
- T. Livius Gallice versus a Blasio *de Vigenere*. Paris.
2 voll. fol. Præter Livii textum continet notas Vi-
generii in primam Decadem.
- 1584 Ant. *Fayi* versio rep. 3 voll.
- 1606 Blasii *de Vigenere* versio rep. Paris. 2 voll. fol.
- 1617 Eadem, ibid. 2 voll. fol.
- 1653 Les Décades de Tite Live, depuis la naissance de
Rome jusqu'à la réduction de la Macedoine, avec
les Supplémens de Freinshemius : traduits du Latin
en François par Pierre du *Ryer*. à Paris. 2 voll. fol.
- Eadem versio rep. Lugd. 14 voll. 12.
- 1700 Eadem rep. Roterod. 8 voll. 12.
- 1723 Traduction du XXXIII livre de Tite Live par Fran-
çois de *Malherbe*. vid. ej. Opp. Paris. 12. T. II.
Hanc Malherbii interpretationem pro insigni exem-
plo commendat Sorellus in Bibl. Gallica.

I T A L I C Æ.

- per Christoph. *Landinum*. Memorat hanc Fabricius
T. I Bibl. Lat. p. 289 ed. Ern. sed sine a. & l. nota.
- Diece libri della prima Deca di Tito Livio, tradot-
ti di latino in lingua volgare, con epistola dedica-
toria da Luca di Giovanni Bonacorsi Cartolajo Fio-
rentino (*in Firenze, Luca Bonacorsi*) fol. circa annum
1472.
- 1476 interprete Rugero *Ferrario*. Romæ. fol. 3 voll. vid.
Lambecius lib. 2. de Bibl. Vindob. pag. 947. Sed
- T. Liv. Vol. I.* 1

dubitavit Maffejus, num hic auctor esset Italicæ versionis, an potius exscriptor. Interpretem Maitairius fuisse docet.

- 1478 Eadem per Ant. de Bononia. Venet. fol.
- 1481 Eadem, ibid. fol.
- Eadem : Le Deche di T. Livio. In Vinegia, per Octaviano Scoto, adi XXIII de giuguo. fol.
- 1490 Eadem, ibid. ap. Barthol. de Zanis. fol.
- 1493 Eadem : Le Deche, cioe la prima, terza & quarta di T. Livio vulgare historiate; con uno certo trattato de bello Punico, composto da M. Leonardo Aretino. In Vinegia, per Zouane Vercellese. fol.
- 1511 Eadem, ibid. fol. una cum Leonh. Aretini libro de bello Pun.
- 1535 Le Deche di Tito Livio. Vinegia. 4.
- 1544 interprete Jac. *Nardi* Fiorentino, Venet. fol. ap. Juntas.
- 1547 Eadem, ibid. ap. eofd. fol.
- 1554 Eadem : Le Deche di T. Livio delle historie Romane, tradotte nella lingua Toscana da Jac. *Nardi*, cittadino Fiorentino, & nuovamente dal medesimo gia la terza volte rivedute & emendate &c. In Vinegia, nella Stamperia de Giunti. fol.
- 1562 Eadem, ibid. ap. eofd. fol.
- 1574 Eadem : Le Deche de T. Livio Padovano dell' Istorie Romane, divise in due parti. Tradotte in lingua Toscana da M. Jac. *Nardi*, cittadino Fiorentino. Con le Postille, che dichiarano secondo i nomi moderni, i paesi, le citta, i fiumi, i luoghi, le monete e molte altre cose, degne d'esser notate, per intelligenza del Lettore. Con la tavola de' Re, Consoli, Tribuni, Dittatori, Pretori, Edili curuli, Censori, Auguri, Pontefici, Interregi, e delle cose notabili. Dichiaratione di molti vocaboli Toscani, dal Traduttore in molti luoghi usati, con l'indice delle Sentenze che nell' opera si contegno. In Vinegia, al segno del Seminante. Il voll. 4.
- 1575 Eadem : Deche di Tito Livio, già tradotte da M. Jac. *Nardi*, cittadino Fiorentino : & hora, oltra

quello, che è nella fequente faccia notato, rivedute, corrette, accrefciute de Sommarij a ciafcun libro, & de gli anni della città nella margini d'effo, & del Supplemento della feconda deca, da M. Franc. Turchi Trevigiano. In Vinegia d'i Giunti. fol. Verſio excellens, coque multum æſtimata. vid. Fontanini Bibl. dell' eloquenza Italiana &c. Venez. 1753. T. II, pag. 287.

B E L G I C Æ.

- 1541 Antwerp. fol.
 1562 Colon. ap. Jo. Gymnicum. fol.
 1571 ibid. ap. eund. fol.
 1614 Titi Livii Romenſche hiftorien. Amft. fol.
 1635 De Romenſche hiftorie door Titus Livius. Amft. fol. c. figg.

A N G L I C Æ.

- 1600 The Roman Hiftory, written by Titus Livius, translated by Philemon *Holland*. Lond. fol.
 1745 Londini. Recenſetur in Ephemcr. Trivult. a. 1745, menſe Martio art. XXII.

S U E C I C Æ.

- 1626 Holmiæ, fol. Erico Benedicto *Schrædero* Nycopenſi interprete.

H I S P A N I C Æ.

- 1550 Compendio de las catorze decadas de Tito Livio Paduano. Argent.
 1553 Colon. ap. Arn. Birkmannum, fol. ad Philippum Principem.

G R Æ C A.

Livium Græcum lingua vulgari fecit *Maurocordatus de Scarlati*, interpres & Confiliarius Portæ Ottomanicæ; qui a. C. 1712 diem obiit: sed necdum edita est illa interpretatio.

A R A B I C A.

De Arabica versione dictum supra pag. LXXXVIII.

TITI LIVII PATAVINI
HISTORIARUM
LIBRI.

TITI LIVII PATAVINI
 HISTORIARUM

AB URBE CONDITA

LIBER I.

EPITOME

LIBRI PRIMI.

Adventus Æneæ in Italiam, & ejus res gestæ referuntur. Ascarnii regnum Albæ, & deinceps Silviorum. Numitoris filia a Marte compressa, nati Romulus & Remus. Amulius obtruncatus. Urbs a Romulo condita. Senatus lectus. Cum Sabinis bellatum. Opima spolia Jovi Feretrio lata. In curias populus divisus. Fidenates & Vejentis victi. Romulus consecratus. Numa Pompilius ritus sacrorum tradidit: Jano templum constituit; ejusque portam, pacatis omnibus circa populis, primus clausit: cum Dea Egeria sibi congressus nocturnos esse simulans, feroces populi animos ad religionem perpulit. Tullus Hostilius Albanos bello petiit. Post hæc trigeminorum pugna. Horatius absolutus. Metti Fuffetii supplicium. Alba diruta, Albani in civitatem recepti. Sabinis bellum indictum. Ad postremum fulmine Tullus absumtus. Ancus Marcius cærimonias, a Numa institutas, renovavit. Latinis victis & ad civitatem adscitis montem Aventinum assignavit. Politorium, urbem Latinorum, bello repeti-

T I T I L I V I I

tam, quam prisca Latini occupaverant, diruit. pontem publicium in Tiberim fecit. Janiculum collem Urbi addidit. fines imperii protulit. Ostiam condidit. Regnavit annos viginti quatuor. Eo regnante Lucumo, Damarati Corinthii filius, a Tarquinii, Etruriae civitate, Romanus venit; &, in amicitiam Anci receptus, Tarquinii nomen ferre coepit; & post mortem Anci regnum excepit. Centum additis, Patrum numerum auxit. Latinos subegit, circum designavit, ludos edidit. Sabinorum bello petitus equitum centurias ampliavit. Tentandae scientiae causa Atti Navii auguris, consuluisse fertur, an id, de quo cogitaret, effici posset: quod cum ille fieri posse respondisset, iussisse, eum novacula cotem praecidere; idque protinus ab Atto factum. Sabinos praeterea acie vicit, urbem muro circumdedit, cloacas fecit. Occisus est ab Anci filiis, cum regnasset annos triginta octo. Successit ei Ser. Tullius, natus ex captiva nobili Corniculana; cui puero, adhuc in cunis posito, caput arsisse traditum est. Veientes atque Etruscos praelio fudit. Censum primus egit. Lustrum condidit, quo civium capita censa octoginta millia esse dicuntur. Classes centuriasque descripsit. Pomœrium protulit. Colles Urbi, Quirinalem, Viminalem, Esquilinumque adjecit. Templum Dianae cum Latinis in Aventino fecit. Interfectus est a L. Tarquinio, Prisci filio, consilio filiae suae Tulliae, cum regnasset annos quadraginta quatuor. Post hunc L. Tarquinius Superbus, neque Patrum, neque populi iussu, regnum invasit: quo die scelerata Tullia per patris jacentis corpus carpentum egit. Armatos circa se ad custodiam corporis sui habuit. Turnum Herdonium fraude interemit. Bellum cum Volscis gessit; & ex eorum praeda templum Jovi in Capitolio fecit. Terminus & Juventas non addixere: quorum aera moveri non potuerunt. Filii Sex. Tarquinii dolo Gabios in potestatem suam redegit. Hujus filiis Delphos profectis, & consulentibus, quis eorum regnaturus esset Romae, dictum est, eum regnaturum,

qui primus matrem osculatus esset. Quod responsum cum ipsi aliter interpretarentur, Junius Brutus, qui cum iis profectus erat, prolapsus se simulavit, & terram osculatus est. idque factum ejus eventus rei comprobavit. Nam cum, impotenter se gerendo, Tarquinius Superbus omnes in odium sui adduxisset; ad ultimum, propter expugnatam nocturna vi a Sexto filio ejus Lucretiæ pudicitiam (quæ, vocato patre ad se Tricipitino & viro Collatino, obtestata, ne inulta mors ejus esset, cultro se interemit) Bruti opera maxime expulsus est, cum regnasset annos viginti quinque. Tunc consules primum creati sunt L. Junius Brutus & L. Tarquinius Collatinus.

P R Æ F A T I O.

FACTURUSNE operæ pretium sim, si a primordio urbis res populi Romani perscripserim, nec satis scio; nec, si sciam, dicere ausim: quippe qui cum veterem, tum vulgatam esse rem videam; dum novi semper scriptores, aut in rebus certius aliquid allaturos se, aut scribendi arte rudem vetustatem superaturos credunt. Utcunque erit, juvabit tamen, rerum gestarum memoriæ principis terrarum populi pro virili parte & me ipsum consuluisse; &, si in tanta scriptorum turba mea fama in obscuro sit, nobilitate ac magnitudine eorum, meo qui nomini officient, me consolent. Res est præterea & immensi operis, ut quæ supra septingentesimum annum repetatur; & quæ, ab exiguis profecta initiis, eo creverit, ut jam magnitudine laboret sua: & legentium plerisque, haud dubita,

quin primæ origines proximaque originibus minus præbitura voluptatis sint, festinantibus ad hæc nova, quibus jam pridem prævalentis populi vires se ipsæ conficiunt. Ego contra hoc quoque laboris præmium petam, ut me a conspectu malorum, quæ nostra tot per annos vidit ætas, tantisper, certe dum prisca illa tota mente repeto, avertam, omnis expers curæ, quæ scribentis animum, etsi non flectere a vero, sollicitum tamen efficere possit. Quæ ante conditam condendamve urbem, poeticis magis decora fabulis, quam incorruptis rerum gestarum monumentis, traduntur, ea nec affirmare, nec refellere in animo est. Datur hæc venia antiquitati, ut, miscendo humana divinis, primordia urbium augustiora faciat. Et, si cui populo licere oportet, consecrare origines suas, & ad Deos referre auctores; ea belli gloria est populo Romano, ut, cum suum conditorisque sui parentem Martem potissimum ferat, tam & hoc gentes humanæ patiantur æquo animo, quam imperium patiuntur. Sed hæc & his similia, utcunque animadversa aut existimata erunt, haud in magno equidem ponam discrimine. Ad illa mihi pro se quisque acriter intendat animum, quæ vita, qui mores fuerint: per quos viros, quibusque artibus, domi militiæque, & partum & auctum imperium sit. labente deinde paulatim disciplina, velut desidentes primo mores sequatur animo; deinde ut magis magisque lapsi sint; tum ire cœperint præcipites: donec ad hæc tempora, quibus nec vitia nostra, nec remedia pati possumus, perventum est. Hoc illud est præci-

pue in cognitione rerum salubre ac frugiferum, omnis te exempli documenta in illustri posita monumento intueri: inde tibi tuæque reipublicæ, quod imitere, capias: inde, fœdum inceptu, fœdum exitu, quod vitas. Ceterum aut me amor negotii suscepti fallit, aut nulla unquam respublica nec major, nec sanctior, nec bonis exemplis ditior fuit: nec in quam civitatem tam seræ avaritia luxuriaque immigraverint: nec ubi tantus ac tam diu paupertati ac parsimoniæ honos fuerit. adeo, quanto rerum minus, tanto minus cupiditatis erat. Nuper divitiæ avaritiam, & abundantes voluptates desiderium per luxum atque libidinem pereundi perdendique omnia invexere. Sed querelæ, ne tum quidem gratæ futuræ, cum forsitan & necessariæ erunt, ab initio certe tantæ ordiendæ rei absint. Cum bonis potius ominibus votisque ac precationibus Deorum Dearumque, si, ut poetis, nobis quoque mos esset, libentius inciperemus, ut orsis tanti operis successus prosperos darent.

L I B E R I.

I. **J**AM primum omnium satis constat, Troja capta, in ceteros sævitum esse Trojanos; duobus, Ænea Antenoreque, & vetusti jure hospitii, & quia pacis reddendæque Helenæ semper auctores fuerant, omne jus belli Achivos abstinuisse. Casibus deinde variis Antenorem cum multitudine Henetum, qui,

feditione ex Paphlagonia pulsi, & sedes & ducem; rege Pylæmene ad Trojam amisso, quærebant, venisse in intimum maris Hadriatici sinum: Euganeisque, qui inter mare Alpesque incolebant, pulsus, Henétos Trojanosque eas tenuisse terras: & in quem primum egressi sunt locum, Troja vocatur, pagoque inde Trojano nomen est: gens universa Veneti appellati. Ænean, ab simili clade domo profugum, sed ad majora initia rerum ducentibus fatis, primo in Macedoniam venisse: inde in Siciliam quærentem sedes delatum: ab Sicilia classe Laurentem agrum tenuisse: Trojæ & huic loco nomen est. Ibi egressi Trojani, ut quibus ab immenso prope errore nihil, præter arma & naves, superesset, cum prædam ex agris agerent, Latinus Rex Aborigineisque, qui tum ea tenebant loca, ad arcendam vim advenarum armati ex urbe atque agris concurrunt. Duplex inde fama est. Alii prælio victum Latinum pacem cum Ænea, deinde affinitatem junxisse tradunt: alii, cum instructæ acies constitissent, priusquam signa canerent, processisse Latinum inter primores, ducemque advenarum evocasse ad colloquium: percontatum deinde, qui mortales essent, unde, aut quo casu profecti domo, quidve quærentes in agrum Laurentem exissent? postquam audierit, multitudinem Trojanos esse; ducem Ænean, filium Anchisæ & Veneris; cremata patria & domo profugos sedem condendæque urbi locum quærere: & nobilitatem admiratum gentis virique, & animum vel bello vel paci paratum, dextera data fidem futuræ amicitiae sanxisse. Inde fœdus ictum

inter duces, inter exercitus salutationem factam. Ænean apud Latinum fuisse in hospitio. ibi Latinum apud Penates Deos domesticum publico adjunxisse foedus, filia Æneæ in matrimonium data. ea res utique Trojanis spem affirmat tandem stabili certa-
que sede finiendi erroris. Oppidum condunt. Æneas ab nomine uxoris Lavinium appellat. Brevi stirps quoque virilis ex novo matrimonio fuit; cui Ascanium parentes dixere nomen.

II. Bello deinde Aborigines Trojanique simul petiti. Turnus rex Rutulorum, cui pacta Lavinia ante adventum Æneæ fuerat, prælatum sibi advenam ægre patiens, simul Æneæ Latinoque bellum intulerat. Neutra acies læta ex eo certamine abiit. victi Rutuli: victores Aborigines Trojanique ducem Latinum amifere. Inde Turnus Rutulique, diffisi rebus, ad florentes Etruscorum opes Mezentiumque eorum regem confugiunt: qui, Cære opulento tum oppido imperitans, jam inde ab initio minime lætus novæ origine urbis, & tum nimio plus, quam satis tutum esset accolis, rem Trojanam crescere ratus, haud gravatim socia arma Rutulis junxit. Æneas, adversus tanti belli terrorem ut animos Aboriginum sibi conciliaret, ne sub eodem jure solum, sed etiam nomine omnes essent, Latinos utramque gentem appellavit. Nec deinde Aborigines Trojanis studio ac fide erga regem Ænean cessere. fretusque his animis coalescentium in dies magis duorum populorum Æneas, quanquam tanta opibus Etruria erat, ut jam non terras solum, sed mare etiam per totam Italiæ longitudinem, ab Al-

pibus ad fretum Siculum, fama nominis sui implefset; tamen, cum mœnibus bellum propulsare posset, in aciem copias eduxit. Secundum inde proelium Latinis, Æneæ etiam ultimum operum mortalium fuit. Situs est, quemcunque eum dici jus fasque est, super Numicium flumen. Jovem indigetem appellant.

III. Nondum maturus imperio Ascanius Æneæ filius erat: tamen id imperium ei ad puberem ætatem incolume mansit. tantisper tutela muliebri (tanta indoles in Lavinia erat) res Latina & regnum avitum paternumque puero stetit. Haud nihil ambigam, (quis enim rem tam veterem pro certo affirmet?) hiccine fuerit Ascanius, an major, quam hic, Creusa matre Ilio incolumi natus, comesque inde paternæ fugæ, quem Julum eundem Julia gens auctorem nominis sui nuncupat. Is Ascanius, ubicunque & quacunque matre genitus, (certe natum Ænea constat) abundante Lavinii multitudine, florentem jam (ut tum res erant) atque opulentam urbem matri, seu novercæ, reliquit: novam ipse aliam sub Albano monte condidit; quæ, ab situ porrectæ in dorso urbis, Longa Alba appellata. Inter Lavinium & Albam Longam coloniam deductam triginta ferme interfuere anni. tantum tamen opes creverant, maxime fufis Etruscis, ut ne morte quidem Æneæ, nec deinde, inter muliebrem tutelam rudimentumque primum puerilis regni, movere arma aut Mezentius Etruscique, aut ulli alii accolæ ausi sint. Pax ita convenerat, ut Etruscis Latinisque fluvius Albula, quem nunc Tiberim vocant, finis effet. Silvius deinde regnat, Ascanii filius, casu quodam

in silvis natus. Is Ænean Silvium creat. Is deinde Latinum Silvium. Ab eo coloniæ aliquot deductæ, Prisci Latini appellati. Mansit Silvius postea omnibus cognomen, qui Albæ regnarunt. Latino Alba ortus, Alba Atys, Atye Capys, Capye Capetus, Capeto Tiberinus; qui, in trajectu Albulæ amnis submersus, celebre ad posteros nomen flumini dedit. Agrippa inde Tiberini filius; post Agrippam Romulus Silvius, a patre accepto imperio, regnat. Aventino, fulmine ipse ictus, regnum per manus tradidit. is, sepultus in eo colle, qui nunc est pars Romanæ urbis, cognomen colli fecit. Proca deinde regnat: is Numitorem atque Amulium procreat. Numitori, qui stirpis maximus erat, regnum vetustum Silvix gentis legat. Plus tamen vis potuit, quam voluntas patris aut verecundia ætatis. Pulso fratre, Amulius regnat: addit sceleri scelus: stirpem fratris virilem interimit: fratris filix Rheæ Silvix per speciem honoris, cum Vestalem eam legisset, perpetua virginitate spem partus adimit.

IV. Sed debebatur, ut opinor, fatis tantæ origo urbis, maximique secundum Deorum opes imperii principium. Vi compressa Vestalis, cum geminum partum edidisset, seu ita rata, seu quia Deus auctor culpæ honestior erat, Martem incertæ stirpis patrem nuncupat. Sed nec Dii, nec homines, aut ipsam, aut stirpem a crudelitate regia vindicant. sacerdos vincita in custodiam datur; pueros in profluentem aquam mitti jubet. Forte quadam divinitus super ripas Tiberis effusus lenibus stagnis, nec adiri usquam ad justum cursum poterat amnis; &

posse quamvis languida mergi aqua infantes, spem ferentibus dabat. ita velut defuncti regis imperio, in proxima alluvie, ubi nunc ficus Ruminalis est, (Romularem vocatam ferunt) pueros exponunt. Vastæ tum in iis locis solitudines erant. Tenet fama, cum fluitantem alveum, quo expositi erant pueri, tenuis in sicco aqua destituisset, lupam sitientem ex montibus, qui circa sunt, ad puerilem vagitum cursum flexisse: eam submissas infantibus adeo mitem præbuisse mammas, ut lingua lambentem pueros magister regii pecoris invenerit. Faustulo fuisse nomen ferunt. Ab eo ad stabula Larentiæ uxori educandos latos. Sunt, qui Larentiam, vulgato corpore, lupam inter pastores vocatam putent: inde locum fabulæ ac miraculo datum. Ita geniti, itaque educati, cum primum adolevit ætas, nec in stabulis, nec ad pecora segnes, venando peragrarè circa saltus. Hinc, robore corporibus animisque sumto, jam non feras tantum subsistere, sed in latrones, præda onustos, impetus facere, pastoribusque rapta dividere: & cum his, crescente in dies grege juvenum, feria ac jocos celebrare.

V. Jam tum in Palatino monte Lupercal hoc fuisse ludicrum ferunt, & a Pallanteo, urbe Arcadica, Pallantium, dein Palatium, montem appellatum. Ibi Evandrum, qui ex eo genere Arcadum multis ante tempestatibus ea tenuerat loca, sollemne allatum ex Arcadia instituisse, ut nudi juvenes, Lyceum Pana venerantes, per lusum atque lasciviam currerent; quem Romani deinde vocarunt Inuum. Huic deditis ludicro, cum sollemne notum esset, insidia-

ros ob iram prædæ amissæ latrones, cum Romulus vi se defendisset, Remum cepisse; captum regi Amulio tradidisse, ultro accusantes. Crimini maxime dabant, in Numitoris agros ab his impetum fieri: inde eos, collecta juvenum manu, hostilem in modum prædas agere. sic Numitori ad supplicium Remus deditur. Jam inde ab initio Faustulo spes fuerat, regiam stirpem apud se educari; nam & expositos jussu regis infantes sciebat, & tempus, quo ipse eos sustulisset, ad id ipsum congruere; sed rem immaturam, nisi aut per occasionem, aut per necessitatem, aperiri noluerat. necessitas prior venit. ita, metu subactus, Romulo rem aperit. Forte & Numitori, cum in custodia Remum haberet, audissetque, geminos esse fratres, comparando & ætatem eorum, & ipsam minime servilem indolem, tetigerat animum memoria nepotum: sciscitandoque eodem pervenit, ut haud procul esset, quin Remum agnosceret. Ita undique regi dolus nectitur. Romulus, non cum globo juvenum, (nec enim erat ad vim apertam par) sed aliis alio itinere jussis certo tempore ad regiam venire pastoribus, ad regem impetum facit: & a domo Numitoris alia comparata manu adjuvat Remus. ita regem obtruncant.

VI. Numitor, inter primum tumultum hostes invasisse urbem atque adortos regiam dictitans, cum pubem Albanam in arcem præsidio armisque obtinendam advocasset; postquam juvenes, perpetrata cæde, pergere ad se gratulantes vidit, extemplo advocato concilio, scelera in se fratris, originem ne-

potum, ut geniti, ut educati, ut cogniti essent, cædem deinceps tyranni, seque ejus auctorem ostendit. Juvenes, per mediam concionem agmine ingressi, cum avum regem salutassent, secuta ex omni multitudine consentiens vox ratum nomen imperiumque regi effecit. Ita Numitori Albana permissa re, Romulum Remumque cupido cepit, in iis locis, ubi expositi, ubique educati erant, urbis condendæ. & supererat multitudo Albanorum Latinorumque. ad id pastores quoque accesserant, qui omnes facile spem facerent, parvam Albam, parvum Lavinium, præ ea urbe quæ conderetur, fore. Interventit deinde his cogitationibus avitum malum, regni cupido, atque inde foedum certamen coortum a fatis miti principio. Quoniam gemini essent, nec ætatis verecundia discrimen facere posset, ut Dii, quorum tutelæ ea loca essent, auguriis legerent, qui nomen novæ urbi daret, qui conditam imperio regeret, Palatium Romulus, Remus Aventinum ad inaugurandum templa capiunt.

VII. Priori Remo augurium venisse fertur, sex vultures: jamque, nuntiato augurio, cum duplex numerus Romulo se ostendisset, utrumque regem sua multitudo consalutaverat. tempore illi præcepto, at hi numero avium, regnum trahebant. Inde, cum altercatione congressi, certamine irarum ad cædem vertuntur. ibi in turba ictus Remus cecidit. Vulgatiores fama est, ludibrio fratris Remum novos transiluisse muros: inde ab irato Romulo (cum verbis quoque increpitans adjecisset, *Sic deinde, quicumque alius transiliet mœnia mea*) interfec-

tum. Ita solus potitus imperio Romulus: condita urbs conditoris nomine appellata. Palatium primum, in quo ipse erat educatus, muniit: sacra Diis aliis Albano ritu, Græco Herculi, ut ab Evandro instituta erant, facit. Herculem in ea loca, Geryone interemto, boves mira specie abegisse memorant, ac prope Tiberim fluvium, qua, præ se armentum agens, nando trajecerat, loco herbido, ut quiete & pabulo læto reficeret boves, & ipsum fessum via procubuisse. ibi cum eum, cibo vinoque gravatum, sopor oppressisset, pastor accola ejus loci, nomine Cacus, ferox viribus, captus pulchritudine boum, cum avertere eam prædam vellet; quia, si agendo armentum in speluncam compulisset, ipsa vestigia quærentem dominum eo deductura erant; averfos boves, eximium quemque pulchritudine, caudis in speluncam traxit. Hercules, ad primam auroram somno excitus, cum gregem perlustrasset oculis, & partem abesse numero sensisset, pergit ad proximam speluncam, si forte eo vestigia ferrent. quæ ubi omnia foras versa vidit, nec in partem aliam ferre, confusus atque incertus animi, ex loco infesto agere porro armentum coepit. Inde cum actæ boves quædam ad desiderium, ut sit, relictarum mugissent, reddita incluserum ex spelunca boum vox Herculem convertit. quem cum vadentem ad speluncam Cacus vi prohibere conatus esset; ictus clava, fidem pastorum nequidquam invocans, morte occubuit. Evander tum ea, profugus ex Peloponneso, auctoritate magis, quam imperio, regebat loca: venerabi-

lis vir miraculo literarum, rei novæ inter rudes artium homines; venerabilior divinitate credita Carmentæ matris, quam fatiloquam, ante Sibyllæ in Italiam adventum, miratæ hæ gentes fuerant. Is tum Evander, concursu pastorum, trepidantium circa advenam manifestæ reum cædis, excitus, postquam facinus facinorisque causam audivit, habitum formamque viri aliquantum ampliorem augustioremque humana intuens, rogitat, qui vir esset? Ubi nomen patremque ac patriam accepit; *Jove nate, Hercules, salve*, inquit; *te mihi mater, veridica interpres Deum, auclurum cælestium numerum cecinit; tibi que aram hic dicatum iri, quam opulentissima olim in terris gens Maximam vocet, tuoque ritu colat.* Dextra Hercules data, *accipere se omen impleturumque fata, ara condita atque dicata*, ait. Ibi tum primum bove eximia capta de grege, sacrum Herculi, adhibitis ad ministerium dapemque Potitiis ac Pinaris, quæ tum familiæ maxime inclitæ ea loca incolebant, factum. Forte ita evenit, ut Potitii ad tempus præsto essent, iisque exta apponerentur; Pinaris, extis adefis, ad ceteram venirent dapem: inde institutum mansit, donec Pinarium genus fuit, ne extis sollemnium vescerentur. Potitii, ab Evandro edocti, antistites sacri ejus per multas ætates fuerunt: donec, tradito servis publicis sollemni familiæ ministerio, genus omne Potitiorum interiit. Hæc tum sacra Romulus una ex omnibus peregrina suscepit; jam tum immortalitatis virtute partæ, ad quam eum sua fata ducebant, fautor.

VIII. Rebus divinis rite perpetratis, vocataque

ad concilium multitudine, quæ coalescere in populi unius corpus nulla re, præterquam legibus, poterat, jura dedit. quæ ita sancta generi hominum agresti fore ratus, si se ipse venerabilem insignibus imperii fecisset, cum cetero habitu se augustiorem, tum maxime lictoribus duodecim sumtis, fecit. Alii ab numero avium, quæ augurio regnum portenderant, eum secutum numerum putant. me haud pœnitet eorum sententiæ esse, quibus & apparitores & hoc genus ab Etruscis finitimis, unde sella curulis, unde toga prætexta sumta est, numerum quoque ipsum ductum placet: & ita habuisse Etruscos, quod, ex duodecim populis communiter creato rege, singulos singuli populi lictores dederint. Crescebat interim urbs, munitionibus alia atque alia appetendo loca, cum in spem magis futuræ multitudinis, quam ad id, quod tum hominum erat, munirent. Deinde, ne vana urbis magnitudo esset, adjiciendæ multitudinis causa, vetere consilio condentium urbes, qui, obscuram atque humilem conciendo ad se multitudinem, natam e terra sibi prolem ementiebantur; locum, qui nunc septus descendantibus inter duos lucos est, Asylum aperit. eo ex finitimis populis turba omnis sine discrimine, liber an servus esset, avida novarum rerum perfugit: idque primum ad coeptam magnitudinem roboris fuit. Cum jam virium haud pœniteret, consilium deinde viribus parat. centum creat senatores: sive quia is numerus satis erat; sive quia soli centum erant, qui creari Patres possent. Patres certe ab honore, patriciique progenies eorum appellati.

IX. Jam res Romana adeo erat valida, ut cuilibet finitimarum civitatum bello par esset: sed, penuria mulierum, hominis ætatem duratura magnitudo erat; quippe quibus nec domi spes prolis, nec cum finitimis connubia essent. Tum ex consilio Patrum Romulus legatos circa vicinas gentes misit, qui societatem connubiumque novo populo peterent. *Urbes quoque, ut cetera, ex infimo nasci: deinde, quas sua virtus ac Dii juvent, magnas opes sibi magnumque nomen facere. Satis scire, origini Romanæ & Deos adfuisse, & non defuturam virtutem. proinde ne gravarentur homines cum hominibus sanguinem & genus miscere.* Nusquam benigne legatio audita est: adeo simul spernebant, simul tantam in medio crescentem molem sibi ac posteris suis metuebant. A plerisque rogitantibus dimissi, *Ecquod feminis quoque asylum aperuissent? id enim demum compar connubium fore.* Ægre id Romana pubes passa, & haud dubie ad vim spectare res cœpit, cui tempus locumque aptum ut daret Romulus, ægritudinem animi dissimulans, ludos ex industria parat, Neptuno Equestri sollempnes: Consualia vocat. Indici deinde finitimi spectaculum jubet: quantoque apparatu tum sciebant, aut poterant, concelebrant; ut rem claram expectatamque facerent. Multi mortales convenere, studio etiam videndæ novæ urbis; maxime proximi quique, Cæninentes, Crustumini, Antemnates. Jam Sabinorum omnis multitudo, cum liberis ac conjugibus, venit. Invitati hospitaliter per domos, cum situm moeniaque & frequentem tectis urbem vidissent, mirantur, tam bre-

vi rem Romanam crevisse. Ubi spectaculi tempus venit, deditæque eo mentes cum oculis erant, tum ex composito orta vis: signoque dato juventus Romana ad rapiendas virgines discurrit. Magna pars forte, ut in quem quæque inciderat, raptæ; quasdam forma excellente, primoribus Patrum destinatas, ex plebe homines, quibus datum negotium erat, domos deferebant. Unam, longe ante alias speciè ac pulchritudine insignem, a globo Talassii cujusdam raptam ferunt. multisque sciscitantibus, cuinam eam ferrent, identidem, ne quis violaret, Talassio ferri clamitatum; inde nuptialem hanc vocem factam. Turbato per metum ludicro, mœsti parentes virginum profugiunt, incusantes violati hospitii foedus, Deumque invocantes, cujus ad sollemne ludosque, per fas ac fidem decepti, venissent. Nec raptis aut spes de se melior, aut indignatio est minor: sed ipse Romulus circuibat, docebatque: *Patrum id superbia factum, qui connubium finitimis negassent; illas tamen in matrimonio, in societate fortunarum omnium civitatisque, &, quo nihil carius humano generi sit, liberum fore. Mollirent modo iras: &, quibus fors corpora dedisset, darent animos. Sæpe ex injuria postmodum gratiam ortam: eoque melioribus usuras viris, quod adnissurus pro se quisque sit, ut, cum suam vicem functus officio sit, parentum etiam patriæque expleat desiderium.* Accedebant blanditiæ virorum, factum purgantium cupiditate atque amore: quæ maxime ad muliebre ingenium efficaces preces sunt.

X. Jam admodum mitigati animi raptis erant.

at raptarum parentes tum maxime sordida veste lacrimisque & querelis civitates concitabant. nec domi tantum indignationes continebant, sed congregabantur undique ad Titum Tatium, regem Sabinorum: & legationes eo, quod maximum Tatii nomen in his regionibus erat, conveniebant. Cæninenses Crustuminique & Antemnates erant, ad quos ejus injuriæ pars pertinebat. Lente agere iis Tatius Sabinique visi sunt. Ipsi inter se tres populi communiter bellum parant. Ne Crustumini quidem atque Antemnates, pro ardore iraque Cæninensium, fatis se impigre movent. ita per se ipsum nomen Cæninum in agrum Romanum impetum facit. Sed effuse vastantibus fit obvius cum exercitu Romulus, levique certamine docet, vanam sine viribus iram esse: exercitum fundit fugatque: fuscum persequitur: regem in prælio obruncat & spoliat: duce hostium occiso, urbem primo impetu capit. Inde exercitu victore reducto, ipse cum factis vir magnificus, tum factorum ostentator haud minor, spolia ducis hostium cæsi suspensa fabricato ad id apte ferculo gerens, in Capitolium ascendit: ibique ea cum ad quercum pastoribus sacram deposuisset, simul cum dono designavit templo Jovis fines, cognomenque addidit Deo: *Jupiter Feretri*, inquit, *hæc tibi victor Romulus rex regia arma fero, templumque iis regionibus, quas modo animo metatus sum, dedico, sedem opimis spoliis, quæ, regibus ducibusque hostium cæsis, me auctorem sequentes, posteri ferent.* Hæc templi est origo, quod primum omnium Romæ sacratum est. Ita deinde Diis visum, nec irri-

tam conditoris templi vocem esse, qua laturos eo spolia posteros nuncupavit: nec multitudine compositum ejus doni vulgari laudem. Bina postea inter tot annos, tot bella, opima parta sunt spolia, adeo rara ejus fortuna decoris fuit.

XI. Dum ea ibi Romani gerunt, Antemnatium exercitus per occasionem ac solitudinem hostiliter in fines Romanos incursionem facit. Raptim & ad hos Romana legio ducta palatos in agris oppressit. Fusi igitur primo impetu & clamore hostes: oppidum captum. duplicique victoria ovantem Romulum Herfilia conjux, precibus raptarum fatigata, orat, ut parentibus earum det veniam, & in civitatem accipiat: ita rem coalescere concordia posse. Facile impetratum. Inde contra Crustuminos profectus, bellum inferentes. Ibi minus etiam, quod alienis cladibus ceciderant animi, certaminis fuit. Utroque coloniæ missæ. plures inventi, qui propter ubertatem terræ in Crustuminum nomina darent. & Romam inde frequenter migratum est, a parentibus maxime ac propinquis raptarum. Novissimum ab Sabinis bellum ortum, multoque id maximum fuit. nihil enim per iram aut cupiditatem actum est: nec ostenderunt bellum prius, quam intulerunt. Consilio etiam additus dolus. Sp. Tarpejus Romanæ præerat arci. Hujus filiam virginem auro corrumpit Tatius, ut armatos in arcem accipiat. aquam forte ea tum sacris extra moenia petiturum ierat. Accepti obrutam armis necavere: seu ut vi capta potius arx videretur, seu prodendi exempli causa, ne quid usquam fidum proditori esset. Additus

fabulæ, quod vulgo Sabini aureas armillas magni ponderis brachio lævo, gemmatosque magna specie annulos habuerint, pepigisse eam, quod in sinistris manibus haberent: eo scuta illi pro aureis donis congesta. Sunt, qui eam ex pacto tradendi, quod in sinistris manibus esset, directo arma petisse dicant: & fraude visam agere, sua ipsam peremptam mercede.

XII. Tenuere tamen arcem Sabini: atque inde postero die, cum Romanus exercitus instructus, quod inter Palatinum Capitolinumque collem campi est, compleisset, non prius descenderunt in æquum, quam, ira & cupiditate recuperandæ arcis stimulante animos, in adversum Romani subiere. Principes utrinque pugnam ciebant; ab Sabinis Mettus Curtius, ab Romanis Hostus Hostilius. hic rem Romanam iniquo loco ad prima signa animo atque audacia sustinebat. Ut Hostus cecidit, confestim Romana inclinatur acies; fusaque est ad veterem portam Palatii. Romulus, & ipse turba fugientium actus, arma ad cœlum tollens, *Jupiter, tuus, inquit, jussus avibus hic in Palatio prima urbi fundamenta jeci. arcem jam, scelere emptam, Sabini habent. inde huc armati, superata media valle, tendunt. At tu, pater Deum hominumque, hinc saltem arce hostes: demeterrorem Romanis, fugamque sædam siste. Hic ego tibi templum Statori Jovi, quod monumentum sit posteris, tua præsentis ope servatam urbem esse, voveo. Hæc precatus, veluti si sensit auditas preces, Hinc, inquit, Romani, Jupiter optimus maximus resistere atque iterare pugnam jubet.* Resistere Romani, tanquam cœ-

Iesti voce jussi. ipse ad primores Romulus provocat. Mettus Curtius ab Sabinis princeps ab arce decurrerat, & effusos egerat Romanos, toto quantum foro spatium est. nec procul jam a porta Palatii erat, clamitans, *Vicimus perfidos hospites, imbelles hostes. Jam sciunt, longe aliud esse virgines rapere, aliud pugnare cum viris.* In eum, hæc gloriantem, cum globo ferocissimorum juvenum Romulus impetum facit. Ex equo tum forte Mettus pugnabat: eo pellicili facilius fuit: pulsum Romani persequuntur. & alia Romana acies, audacia regis accensa, fundit Sabinos. Mettus in paludem sese, strepitu sequentium trepidante equo, conjecit: adverteratque ea res etiam Sabinos tanti periculo viri. Et ille quidem, annuentibus ac vocantibus suis, favore multorum addito animo, evadit. Romani Sabinique in media convalle duorum montium redintegrant prælium; sed res Romana erat superior.

5 XIII. Tum Sabinæ mulieres, quarum ex injuria bellum ortum erat, crinibus passis scissaque veste, victo malis muliebri pavore, ausæ se inter tela volantia inferre, ex transverso impetu facto, dirimere infestas acies, dirimere iras; hinc patres, hinc viros orantes, *ne se sanguine nefando soceri generique respergerent: ne parricidio macularent partus suos, nepotum illi, liberum hi progeniem. Si affinitatis inter vos, si connubii piget, in nos vertite iras: nos causa belli, nos vulnerum ac cædium viris ac parentibus sumus. melius peribimus, quam sine alteris vestrum viduae aut orbæ vivemus.* Movet res tum multitudinem, tum duces. Silentium & repentina fit quies. inde ad fœ-

dus faciendum duces prodeunt: nec pacem modo, sed & civitatem unam ex duabus faciunt: regnum confociant, imperium omne conferunt Romam. Ita geminata urbe, ut Sabinis tamen aliquid daretur, Quirites a Curibus appellati. monumentum ejus pugnae, ubi primum ex profunda emerfus palude equus Curtium in vado statuit, Curtium lacum appellarunt. Ex bello tam tristi læta repente pax cariore Sabinas viris ac parentibus, & ante omnes Romulo ipsi, fecit. Itaque, cum populum in curias triginta divideret, nomina earum curiis imposuit. Id non traditur, cum haud dubie aliquanto numerus major hoc mulierum fuerit, ætate, an dignitatibus suis virorumve, an forte lectæ sint, quæ nomina curiis darent. Eodem tempore & centuriæ tres equitum conscriptæ sunt, Ramnenses ab Romulo, ab Tito Tatius Titienfes appellati. Lucerum nominis & originis causa incerta est. Inde non modo commune, sed concors etiam regnum duobus regibus fuit.

XIV. Post aliquot annos propinqui regis Tatii legatos Laurentium pulsant. cumque Laurentes jure gentium agerent, apud Tatium gratia suorum & preces plus poterant. Igitur illorum poenam in se vertit. nam Lavinii, cum ad sollempne sacrificium eo venisset, concursu facto interficitur. Eam rem minus ægre, quam dignum erat, tulisse Romulum ferunt, seu ob infidam societatem regni, seu quia haud injuria cæsum credebat. Itaque bello quidem abstinuit: ut tamen expiarentur legatorum injuriæ regisque cædes, foedus inter Romam Laviniumque

urbes renovatum est. Et cum his quidem insperata pax erat: aliud multo propius, atque in ipsis prope portis, bellum ortum. Fidenates, nimis vicinas prope se convalescere opes rati, priusquam tantum roboris esset, quantum futurum apparebat, occupant bellum facere. juventute armata immissa, vastatur agri quod inter urbem ac Fidenas est. Inde ad lævam versi, quia dextra Tiberis arcebat, cum magna trepidatione agrestium populantur: tumultusque repens, ex agris in urbem illatus, pro nuntio fuit. Excitus Romulus (neque enim dilationem pati tam vicinum bellum poterat) exercitum educit: castra a Fidenis mille passuum locat. ibi modico præsidio relicto, egressus omnibus copiis, partem militum locis circa densa obsita virgulta obscuris subsidere in insidiis iussit; cum parte majore atque omni equitatu profectus, id quod quærebat, tumultuoso & minaci genere pugnae, adequitando ipsis prope portis, hostem excivit: fugæ quoque, quæ simulanda erat, eadem equestris pugna causam minus mirabilem dedit, & cum, velut inter pugnae fugæque consilium trepidante equitatu, pedes quoque referret gradum, plenis repente portis effusi hostes, impulsâ Romana acie, studio instandi sequendique trahuntur ad locum insidiarum. Inde subito exorti Romani transversam invadunt hostium aciem. Addunt pavorem mota e castris signa eorum, qui in præsidio relicti fuerant. ita multiplici terrore perculsi Fidenates, prius pæne quam Romulus, quique cum eo equis ierant, circumagerent frenis equos, terga vertunt: multoque effu-

sius, (quippe vera fuga) qui simulantes paulo ante secuti erant, oppidum repetebant. non tamen eripuerunt se hosti: hærens in terga Romanus, prius quam fores portarum objicerentur, velut agmine uno irrumpit.

XV. Belli Fidenatis contagione irritati Vejentium animi, & consanguinitate, (nam Fidenates quoque Etrusci fuerunt) & quod ipsa propinquitas loci, si Romana arma omnibus infesta finitimis essent, stimulabat, in fines Romanos excucurrerunt, populabundi magis, quam iusti more belli. Itaque non castris positis, non expectato hostium exercitu, raptam ex agris prædam portantes, Vejos rediere. Romanus contra, postquam hostem in agris non invenit, dimicationi ultimæ instructus intentusque, Tiberim transit. quem postquam castra ponere, & ad urbem accessurum Vejentes audivere; obviam egressi, ut potius acie decernerent, quam inclusi de tectis mœnibusque dimicarent. Ibi, viribus nulla arte adjutis, tantum veterani robore exercitus rex Romanus vicit: persecutusque fusos ad mœnia hostes, urbe valida muris ac situ ipso munita abstinuit: agros rediens vastat, ulciscendi magis, quam prædæ, studio. Eaque clade, haud minus quam adversa pugna, subacti Vejentes, pacem petiti oratores Romam mittunt. Agri parte multatis in centum annos induciæ datæ. Hæc ferme, Romulo regnante, domi militiæque gesta: quorum nihil absoum fidei divinæ originis divinitatisque post mortem creditæ fuit: non animus in regno avito recuperando, non condendæ urbis

confilium, non bello ac pace firmandæ. ab illo enim profectu viribus datis tantum valuit, ut in quadraginta deinde annos tutam pacem haberet. multitudini tamen gratior fuit, quam Patribus; longe ante alios acceptissimus militum animis. trecentosque armatos ad custodiam corporis, quos Celeres appellavit, non in bello solum, sed etiam in pace, habuit.

XVI. His immortalibus editis operibus, cum ad exercitum recensendum concionem in campo ad Capræ paludem haberet; subito coorta tempestas cum magno fragore tonitribusque tam denso regem operuit nimbo, ut conspectum ejus concioni abstulerit. nec deinde in terris Romulus fuit. Romana pubes, sedato tandem pavore, postquam ex tam turbido die serena & tranquilla lux rediit, ubi vacuum sedem regiam vidit, etsi fatis credebat Patribus, qui proximi steterant, sublimem raptum procella; tamen, velut orbitatis metu icta, mœstum aliquamdiu silentium obtinuit. Deinde, a paucis initio facto, Deum Deo natum, regem parentemque urbis Romanæ salvere universi Romulum jubent: pacem precibus exposcunt, uti volens propitius suam semper fospitet progeniem. Fuisse credo tum quoque aliquos, qui discerptum regem Patrum manibus taciti arguerent: manavit enim hæc quoque, sed perobscura, fama. Illam alteram admiratio viri & pavor præsens nobilitavit. Consilio etiam unius hominis addita rei dicitur fides. namque Proculus Julius, sollicita civitate desiderio regis, & infensa Patribus, gravis, ut traditur, quamvis

magnæ rei auctor, in concionem prodit. *Romulus*, inquit, *Quirites*, *parens urbis hujus*, *prima hodierna luce cælo repente delapsus*, *se mihi obvium dedit*. *Cum perfusus horrore venerabundusque adstitissem*, *petens precibus*, *ut contra intuiti fas esset*; *abi*, *nuntia*, inquit, *Romanis*, *Cælestes ita velle*, *ut mea Roma caput orbis terrarum sit*: *proinde rem militarem colant*: *sciantque*, *& ita posteris tradant*, *nullas opes humanas armis Romanis resistere posse*. *hæc*, inquit, *locutus*, *sublimis abiit*. Mirum, quantum illi viro, nuntianti hæc, fidei fuerit; quamque desiderium Romuli apud plebem exercitumque, facta fide immortalitatis, lenitum sit.

XVII. Patrum interim animos certamen regni ac cupido versabat. necdum a singulis, quia nemo magnopere eminebat in novo populo, pervenerant factiones: inter ordines certabatur. oriundi ab Sabinis, ne, quia post Tatii mortem ab sua parte non erat regnatum, in societate æqua possessionem imperii amitterent, sui corporis creari regem volebant. Romani veteres peregrinum regem aspernabantur. In variis voluntatibus regem tamen omnes volebant, libertatis dulcedine nondum experta. Timor deinde Patres incessit, ne civitatem sine imperio, exercitum sine duce, multarum circa civitatum irritatis animis, vis aliqua externa adoriretur. & esse igitur aliquod caput placebat; & nemo alteri concedere in animum inducebat. Ita rem inter se centum Patres, decem decuriis factis, singulisque in singulas decurias creatis, qui summæ rerum præessent, consociant. decem imperi-

tabant, unus cum insignibus imperii & lictoribus erat: quinque dierum spatio finiebatur imperium, ac per omnes in orbem ibat: annumque interval- lum regni fuit. id ab re, quod nunc quoque tenet nomen, Interregnum appellatum. Fremere deinde plebs, multiplicatam servitutem, centum pro uno dominos factos: nec ultra nisi regem, & ab ipsis creatum, videbantur passuri. Cum sensissent ea mo- veri Patres; offerendum ultro rati, quod amissuri erant, ita gratiam ineunt, summa potestate popu- lo permessa, ut non plus darent juris, quam de- tinerent. decreverunt enim, ut, cum populus re- gem jussisset, id sic ratum esset, si Patres auctores fierent. hodieque in legibus magistratibusque ro- gandis usurpatur idem jus, vi adempta: priusquam populus suffragium ineat, in incertum comitorum eventum Patres auctores fiunt. Tum interrex, con- cione advocata, *Quod bonum, faustum, felixque sit,* inquit, *Quirites, regem create; ita Patribus visum est. Patres deinde, si dignum, qui secundus ab Ro- mulo numeretur, crearitis, auctores fient.* Adeo id gratum plebi fuit, ut, ne victi beneficio videren- tur, id modo sciscerent juberentque, ut senatus de- cerneret, qui Romæ regnaret.

XVIII. Inclita justitia religioque ea tempestate Numæ Pompilii erat. Curibus Sabinis habitabat, consultissimus vir, ut in illa quisquam ætate esse poterat, omnis divini atque humani juris. Aucto- rem doctrinæ ejus, quia non exstat alius, falso Sa- mium Pythagoran edunt: quem, Servio Tullio reg- nante Romæ, centum amplius post annos, in ul-

tima Italiae ora, circa Metapontum Heracleamque & Crotona, juvenum æmulantium studia cœtus habuisse constat. Ex quibus locis etsi ejusdem ætatis fuisset, quæ fama in Sabinos, aut quo linguæ commercio, quenquam ad cupiditatem discendi excivisset? quoque præsidio unus per tot gentes, dissonas sermone moribusque, pervenisset? Suapte igitur ingenio temperatum animum virtutibus fuisse opinor magis; instructumque non tam peregrinis artibus, quam disciplina tetrica ac tristi veterum Sabinorum: quo genere nullum quondam incorruptius fuit. Audito nomine Numæ, Patres Romani, quanquam inclinari opes ad Sabinos, rege inde sumto, videbantur; tamen, neque se quisquam, nec factionis suæ alium, nec denique Patrum aut civium quenquam præferre illi viro ausi, ad unum omnes Numæ Pompilio regnum deferendum decernunt. Accitus, sicut Romulus augurato urbe condenda regnum adeptus est, de se quoque Deos consuli iussit. inde ab augure (cui deinde, honoris ergo, publicum id perpetuumque sacerdotium fuit) deductus in arcem, in lapide ad meridiem versus confedit. Augur ad lævam ejus, capite velato, sedem cepit, dextra manu baculum sine nodo aduncum tenens, quem lituum appellarunt. inde ubi, prospectu in urbem agrumque capto, Deos precatus, regiones ab oriente ad occasum determinavit; dexteram ad meridiem partes, lævas ad septemtrionem esse dixit. Signum contra, quo longissime conspectum oculi ferebant, animo finivit. Tum, lituo in lævam manum translato,

dextra in caput Numæ imposita, precatus est ita : *Jupiter pater, si est fas, hunc Numam Pompilium, cujus ego caput teneo, Regem Romæ esse, uti tu signa nobis certa acclarassis inter eos fines, quos feci.* Tum peregit verbis auspicia, quæ mitti vellet. quibus missis, declaratus rex Numa de templo descendit.

XIX. Qui, regno ita potitus, urbem novam, conditam vi & armis, jure eam legibusque ac moribus de integro condere parat. quibus cum inter bella assuescere videret non posse, quippe effera-
tos militia, animos; mitigandum ferocem populum armorum defuetudine ratus, Janum ad infimum Argiletum, indicem pacis bellicæ, fecit: apertus ut in armis esse civitatem, clausus pacatos circa omnes populos significaret. Bis deinde post Numæ regnum clausus fuit: semel T. Manlio consule, post Punicum primum perfectum bellum: iterum, quod nostræ ætati Dii dederunt ut videremus, post bellum Actiacum, ab Imperatore Cæsare Augusto, pace terra marique parta. Clauso eo, cum omnium circa finitimorum societate ac fœderibus junxisset animos, positus externorum periculorum curis, ne luxuriarentur otio animi, quos metus hostium disciplinaque militaris continuerat; omnium primum, rem ad multitudinem imperitam, & illis seculis rudem, efficacissimam, Deorum metum injiciendum ratus est. qui cum descendere ad animos sine aliquo commento miraculi non posset; simulat sibi cum Dea Egeria congressus nocturnos esse: ejus se monitu, quæ acceptissima Diis essent, sacra instituire; sacerdotes suos cuique Deorum

præficere. Atque omnium primum, ad cursum lunæ, in duodecim menses describit annum. quem (quia tricenos dies singulis mensibus luna non explet, defuntque dies solido anno, qui solstitiali circumagitur orbe) intercalariis mensibus interponendis, ita dispensavit, ut quarto & vigesimo anno ad metam eandem Solis, unde orsi essent, plenis annorum omnium spatiis dies congruerent. Idem nefastos dies fastosque fecit, quia aliquando nihil cum populo agi utile futurum erat.

XX. Tum sacerdotibus creandis animum adjecit, quanquam ipse plurima sacra obibat, ea maxime, quæ nunc ad Dialem flaminem pertinent. Sed, quia in civitate bellicosa plures Romuli, quam Numæ, similes reges putabat fore, iturosque ipsos ad bella; ne sacra regiæ vicis desererentur, flaminem Jovi assiduum sacerdotem creavit, insignique eum veste & curuli regia sella adornavit. huic duos flamines adjecit: Marti unum, alterum Quirino. Virginesque Vestæ legit, Alba oriundum sacerdotium, & genti conditoris haud alienum. his, ut assiduæ templi antistites essent, stipendium de publico statuit: virginitate aliisque cærimoniis venerabiles ac sanctas fecit. Salios item duodecim Marti Gradivo legit, tunicæque pictæ insigne dedit, & super tunicam æneum pectori tegumen: cœlestiaque arma, quæ ancilia appellantur, ferre, ac per urbem ire canentes carmina cum tripudiis sollempnique saltatu jussit. Pontificem deinde Numam Marcium, Marci filium, ex Patribus legit, eique sacra omnia exscripta exsignataque attribuit; quibus hostiis, qui-

bus diebus, ad quæ templa sacra fierent, atque unde in eos sumtus pecunia erogaretur. Cetera quoque omnia publica privataque sacra Pontificis scitis subjecit: ut esset, quo consultum plebes veniret; ne quid divini juris, negligendo patrios ritus, peregrinosque adsciscendo, turbaretur. Nec cœlestes modo cærimonias, sed iusta quoque funebria placandosque Manes, ut idem Pontifex edoceret; quæque prodigia, fulminibus aliove quo visu missa, susciperentur atque curarentur: ad ea elicienda ex mentibus divinis, Jovi Elicio aram in Aventino dicavit, Deumque consuluit auguriis, quæ suscipienda essent.

XXI. Ad hæc consultanda procurandaque, multitudine omni a vi & armis conversa, & animi aliquid agendo occupati erant, & Deorum assidua insidens cura, cum interesse rebus humanis cœleste Numen videretur, ea pietate omnium pectora imbuerat, ut fides ac jusjurandum, proximo legum ac pœnarum metu, civitatem regerent. & cum ipsi se homines in regis, velut unici exempli, mores formarent; tum finitimi etiam populi, qui ante castra, non urbem, positam in medio ad sollicitandam omnium pacem, crediderant, in eam verecundiam adducti sunt, ut civitatem, totam in cultum versam Deorum, violari ducerent nefas. Lucus erat, quem medium ex opaco specu fons perenni rigabat aqua: quo quia se persæpe Numa sine arbitris, velut ad congressum Deæ, inferebat, Camenis eum lucum sacravit; quod earum ibi concilia cum conjuge sua Egeria essent. Et soli Fidei

sollemne instituit. ad id sacrarium flamines bigis, curru arcuato, vehi iussit, manuque ad digitos usque involuta rem divinam facere: significantes fidem tutandam, sedemque ejus etiam in dextris sacratam esse. Multa alia sacrificia locaque sacris faciendis, quæ Argeos pontifices vocant, dedicavit. Omnium tamen maximum ejus operum fuit tutela per omne regni tempus, haud minor pacis, quam regni. Ita duo deinceps reges, alius alia via, ille bello, hic pace, civitatem auxerunt. Romulus septem & triginta regnavit annos: Numa tres & quadraginta. Tum valida, tum temperata & belli & pacis artibus, erat civitas.

XXII. Numæ morte ad interregnum res rediit. Inde Tullum Hostilium, nepotem Hostilii, cujus in infima arce clara pugna adversus Sabinos fuerat, regem populus iussit. Patres auctores facti. Hic non solum proximo regi dissimilis, sed ferocior etiam Romulo fuit. tum ætas viresque, tum avita quoque gloria animum stimulabat. Senescere igitur civitatem otio ratus, undique materiam excitandi belli quærebat. Forte evenit, ut agrestes Romani ex Albano agro, Albani ex Romano prædas invicem agerent. Imperitabat tum C. Cluilius Albæ. Utrunque legati fere sub idem tempus ad res repetendas missi. Tullus præceperat suis, ne quid prius, quam mandata, agerent. satis sciebat, negaturum Albanum; ita pie bellum indici posse. Ab Albanis socordius res acta: excepti hospitio ab Tullo blande ac benigne, comiter regis convivium celebrant. tantisper Romani & res repeterant prio-

res, & neganti Albano bellum in trigesimum diem indixerant. hæc renuntiant Tullo. Tum legatis Tullus dicendi potestatem, quid petentes venerint, facit. illi, omnium ignari, primum purgando terunt tempus: *Se invitos quidquam, quod minus placeat Tullo, dicturos; sed imperio subigi: res repetitum se venisse. Ni reddantur, bellum indicere iustos.* Ad hæc Tullus: *Nuntiate, inquit, regi vestro, regem Romanum Deos facere testes, uter prius populus res repetentes legatos aspernatus dimiserit, ut in eum omnes expetant hujusce clades belli.*

XXIII. Hæc nuntiant domum Albani. Et bellum utrinque summa ope parabatur, civili simillimum bello, prope inter parentes natosque, Trojanam utramque prolem, cum Lavinium ab Troja, ab Lavinio Alba, ab Albanorum stirpe regum oriundi Romani essent. Eventus tamen belli minus miserabilem dimicationem fecit: quod nec acie certatum est; & tectis modo dirutis alterius urbis, duo populi in unum confusi sunt. Albani priores ingenti exercitu in agrum Romanum impetum fecere. castra ab urbe haud plus quinque millia passuum locant, fossa circumdant: fossa Cluilia ab nomine ducis per aliquot secula appellata est, donec cum re nomen quoque vetustate abolevit. In his castris Cluilius Albanus rex moritur; dictatorem Albani Mettum Fuffetium creant. Interim Tullus ferox, præcipue morte regis, magnumque Deorum numen, ab ipso capite orsum, in omne nomen Albanum expetiturum pœnas ob bellum impium dictitans, nocte, præteritis hostium castris, infesto exercitu in agrum Albanum pergit. Ea

res ab stativis excivit Mettum. ducit, quam proxime ad hostem potest: inde legatum præmissum nuntiare Tullo jubet, priusquam dimicent, opus esse colloquio: si secum congressus sit, satis scire, ea se allaturum, quæ nihilo minus ad rem Romanam, quam ad Albanam, pertineant. Haud aspernatus Tullus, tametsi vana afferebantur, in aciem educit. Exeunt contra & Albani. Postquam instructi utrinque stabant, cum paucis procerum in medium duces procedunt. Ibi infit Albanus: *Injurias & non redditas res ex fœdere, quæ repetitæ sint, & ego regem nostrum Cluiliam, causam hujusce esse belli, audisse videor: nec te dubito, Tulle, eadem præ te ferre. sed, si vera potius, quam dictu speciosa dicenda sunt, cupido imperii duos cognatos vicinosque populos ad arma stimulat. Neque, recte, an perperam, interpretor: fuerit ista ejus deliberatio, qui bellum suscepit. me Albani gerendo bello ducem creavere. Illud te, Tulle, monitum velim: Etrusca res, quanta circa nos teque maxime sit, quo propiores vos, hoc magis scis. multum illi terra; plurimum mari pollent. Memor esto, jam, cum signum pugnae dabis, has duas acies spectaculo fore; ut fessos confectosque, simul victorem ac victum, aggrediantur. Itaque, si nos Dii amant, quoniam, non contenti libertate certa, in dubiam imperii servitiique aleam imus, ineamus aliquam viam, qua utri utris imperent, sine magna clade, sine multo sanguine utriusque populi, decerni possit. Haud displicet res Tullo, quanquam tum indole animi, tum spe victoriæ, ferocior erat. Quærentibus utrinque ratio initur, cui & fortuna ipsa præbuit materiam.*

XXIV. Forte in duobus tum exercitibus erant trigemini fratres, nec ætate, nec viribus dispares. Horatios Curiatiosque fuisse, satis constat; nec ferme res antiqua alia est nobilior. tamen in re tam clara nominum error manet, utrius populi Horatii, utrius Curiatii fuerint. Auctores utroque trahunt: plures tamen invenio, qui Romanos Horatios vocent. hos ut sequar, inclinatur animus. Cum trigeminis agunt reges, ut pro sua quisque patria dimicent ferro: ibi imperium fore, unde victoria fuerit. nihil recusatur: tempus & locus convenit. Priusquam dimicarent, fœdus iustum inter Romanos & Albanos est his legibus, ut, cujusque populi cives eo certamine vicissent, is alteri populo cum bona pace imperitaret. Fœdera alia aliis legibus, ceterum eodem modo omnia fiunt. Tum ita factum accepimus, nec ullius vetustior fœderis memoria est. Feialis regem Tullum ita rogavit: *Jubesne me, Rex, cum patre patrato populi Albani fœdus ferire?* jubente rege, *Sagmina, inquit, te, Rex, posco.* Rex ait, *Puram tollito.* Feialis ex arce graminis herbam puram attulit. postea regem ita rogavit: *Rex, facisne me tu regium nuntium populi Romani Quiritium? vasa, comitesque meos?* Rex respondit: *Quod sine fraude mea populi Romani Quiritium fiat, facio.* Feialis erat M. Valerius. patrem patratum Sp. Fusium fecit, verbena caput capillofque tangens. Pater patratus ad jusjurandum patrandum, id est, fanciendum fit fœdus; multisque id verbis, quæ longo effata carmine non operæ est referre, peragit. Legibus deinde recitatis: *Audi,*

inquit, *Jupiter; audi, pater patrate populi Albani; audi tu, populus Albanus; ut illa palam prima postrema ex illis tabulis cerave recitata sunt sine dolo malo, utique ea hic hodie rectissime intellecta sunt, illis legibus populus Romanus prior non deficiet. Si prior defexit publico consilio, dolo malo: tu illo die, Jupiter, populum Romanum sic ferito, ut ego hunc porcum hic hodie feriam: tantoque magis ferito, quanto magis potes pollesque.* Id ubi dixit, porcum faxo filice percussit. Sua item carmina Albani suumque jusjurandum per suum dictatorem suosque sacerdotes peregerunt.

XXV. Foedere icto, trigemini, sicut convenerat, arma capiunt. Cum sui utrosque adhortarentur, *Deos patrios, patriam ac parentes, quidquid civium domi, quidquid in exercitu sit, illorum tunc arma, illorum intueri manus: feroces & suoapte ingenio, & pleni adhortantium vocibus, in medium inter duas acies procedunt. Confederant utrinque pro castris duo exercitus, periculi magis praesentis, quam curae, expertes. quippe imperium agebatur, in tam paucorum virtute atque fortuna positum. itaque ergo erecti suspensique in minime gratum spectaculum animo intenduntur. Datur signum. infestisque armis, velut acies, terni juvenes, magnorum exercituum animos gerentes, concurrunt: nec his, nec illis periculum suum; publicum imperium servitiumque obversatur animo, futuraque ea deinde patriae fortuna, quam ipsi fecissent. Ut primo statim concursu increpuere arma, micantesque fulsere gladii, horror ingens spec-*

tantes perstringit: &, neutro inclinata spe, torpebat vox spiritusque. Confertis deinde manibus, cum jam non motus tantum corporum, agitatioque anceps telorum armorumque, sed vulnera quoque & sanguis spectaculo essent; duo Romani, super alium alius, vulneratis tribus Albanis, exspirantes corruerunt. ad quorum casum cum conclamasset gaudio Albanus exercitus, Romanas legiones jam spes tota, nondum tamen cura, deseruerat, exanimes vice unius, quem tres Curiatii circumsteterant. Forte is integer fuit, ut universis solus nequaquam par, sic adversus singulos ferox. ergo, ut segregaret pugnam eorum, cepit fugam, ita ratus secuturos, ut quemque vulnere affectum corpus fineret. Jam aliquantum spatii ex eo loco, ubi pugnatum est, aufugerat, cum respiciens videt magnis intervallis sequentes; unum haud procul ab sese abesse. in eum magno impetu rediit. Et, dum Albanus exercitus inclamat Curiatii, uti opem ferant fratri, jam Horatius, caeso hoste victor, secundam pugnam petebat. tum clamore, qualis ex insperato faventium solet, Romani adjuvant militem suum: & ille defungi praelio festinat. Prius itaque, quam alter, qui nec procul aberat, consequi posset, & alterum Curiatium conficit. Jamque, æquato Marte, singuli superebant; sed nec spe, nec viribus pares. alterum, intactum ferro corpus & geminata victoria, ferocem in certamen tertium dabant: alter, fessum vulnere, fessum cursu trahens corpus, victusque fratrum ante se strage, victori objicitur hosti. nec illud

proelium fuit. Romanus exsultans, *Duos, inquit; fratrum manibus dedi: tertium causæ belli hujusce, ut Romanus Albano imperet, dabo.* Male fufinenti arma gladium superne jugulo defigit: jacentem spoliât. Romani ovantes ac gratulantes Horatium accipiunt; eo majore cum gaudio, quo prope metum res fuerat. Ad sepulturam inde suorum nequaquam paribus animis vertuntur; quippe imperio alteri aucti, alteri ditionis alienæ facti. Sepulcra exstant, quo quisque loco cecidit: duo Romana uno loco propius Albam, tria Albana Romam versus; sed distantia locis, & ut pugnatum est.

XXVI. Priusquam inde digrederentur, roganti Metto, ex fœdere ictô quid imperaret, imperat Tullus, uti juventutem in armis habeat: usurum se eorum opera, si bellum cum Vejentibus foret, ita exercitus inde domos abducti. Princeps Horatius ibat, trigemina spolia præ se gerens. cui soror virgo, quæ desponsa uni ex Curiatiiis fuerat, obvia ante portam Capenam fuit: cognitoque super humeros fratris paludamento sponsi, quod ipsa confecerat, solvit crines, & flebiliter nomine sponsum mortuum appellat. Movet feroci juveni animum comploratio sororis in victoria sua tantoque gaudio publico. Stricto itaque gladio, simul verbis increpans, transfigit puellam. *Abi hinc cum immaturo amore ad sponsum, inquit, oblita fratrum mortuorum vivique, oblita patriæ. Sic eat, quæcunque Romana lugebit hostem.* Atrox visum id facinus Patribus plebique: sed recens meritum factô obstabat. tamen raptus in jus ad regem. Rex, ne ipse

tam tristis ingratiq̄ue ad vulgus iudicii, aut, secundum iudicium, supplicii auctor esset, concilio populi advocato, *Duumviro*s, inquit, qui *Horatio perduellionem iudicent, secundum legem facio*. Lex horrendi carminis erat: *Duumviri perduellionem iudicent. Si a duumviris provocarit, provocatione certato: si vincent, caput obnubito: infelici arbori reſte ſuſpendito: verberato vel intra pomœrium, vel extra pomœrium*. Hac lege duumviri creati, qui se absolvere non rebantur ea lege, ne innoxium quidem, posse, cum condemnassent; tum alter ex his, *P. Horati, tibi perduellionem iudico*, inquit. *I, licitor, colliga manus*. Accesserat licitor, injiciebatque laqueum. tum Horatius, auctore Tullo, clemente legis interprete, *Provoco*, inquit. ita de provocatione certatum ad populum est. Moti homines sunt in eo iudicio, maxime *P. Horatio* patre proclamante, *se filiam jure cœsam iudicare. ni ita esset, patrio jure in filium animadversurum fuisse*. Orabat deinde, *ne se, quem paulo ante cum egregia stirpe conspexissent, orbem liberis facerent*. Inter hæc senex, juvenem amplexus, spolia Curiatorum fixa eo loco, qui nunc *Pila Horatia* appellatur, ostentans, *Hunc cœne*, aiebat, *quem modo decoratum ovantemque victoria incedentem vidistis, Quirites, eum sub furca vincitum inter verbera & cruciatus videre potestis? quod vix Albanorum oculi tam deforme spectaculum ferre possent*. *I, licitor, colliga manus, quæ paulo ante armatæ imperium populo Romano pepererunt*. *I, caput obnube liberatoris urbis hujus: arbori infelici suspende: verbera, vel intra pomœrium, modo inter*

illa pila & spolia hostium; vel extra pomœrium, modo intra sepulcra Curiatorum. Quo enim ducere hunc juvenem potestis, ubi non sua decora eum a tanta fœditate supplicii vindicent? Non tulit populus nec patris lacrimas, nec ipsius parem in omni periculo animum: abolveruntque admiratione magis virtutis, quam jure causæ. Itaque, ut cædes manifesta aliquo tamen piaculo lueretur, imperatum patri, ut filium expiaret pecunia publica. Is, quibusdam piacularibus sacrificiis factis, quæ deinde genti Horatiæ tradita sunt, transmissio per viam tigillo, capite adoperto, velut sub jugum misit juvenem. Id hodie quoque publice semper refectum manet. Sororium tigillum vocant. Horatiæ sepulcrum, quo loco corruerat ic̄ta, constructum est faxo quadrato.

XXVII. Nec diu pax Albana mansit. invidia vulgi, quod tribus militibus fortuna publica commissa fuerit, vanum ingenium dictatoris corrumpit; &, quoniam recta consilia haud bene evenerant, pravis reconciliare popularium animos cœpit. Igitur, ut prius in bello pacem, sic in pace bellum quærens, quia suæ civitati animorum plus, quam virium, cernebat esse, ad bellum palam atque ex edicto gerendum alios concitat populos: suis per speciem societatis prodicionem reservat. Fidenates, colonia Romana, Vejentibus fociis consilii assumtis, pacto transitionis Albanorum, ad bellum atque arma incitantur. Cum Fidenæ aperte descissent, Tullus, Metto exercituque ejus ab Alba accito, contra hostes ducit. Ubi Anienem transiit, ad con-

fluentes collocat castra. Inter eum locum & Fidenas Vejentium exercitus Tiberim transferat. Hi & in acie prope flumen tenere dextrum cornu: in sinistro Fidenates propius montes consistunt. Tullus adversus Vejentem hostem dirigit suos: Albanos contra legionem Fidenatium collocat. Albano non plus animi erat, quam fidei. nec manere ergo, nec transire aperte ausus, sensim ad montes succedit. Inde, ubi satis subisse sese ratus est, erigit totam aciem; fluctuansque animo, ut tereret tempus, ordines explicat. Consilium erat, qua fortuna rem daret, ea inclinare vires. Miraculo primo esse Romanis, qui proximi steterant, ut nudari latera sua sociorum digressu senserunt: inde eques citato equo nuntiat regi, abire Albanos. Tullus in re trepida duodecim vovit Salios, fanaque Pallori ac Pavori. equitem, clara increpans voce, ut hostes exaudirent, redire in proelium jubet: *Nihil trepidatione opus esse: suo jussu circumduci Albanum exercitum, ut Fidenatium nuda terga invadant.* idem imperat, ut hastas equites erigere jubeat. Id factum magnæ parti peditum Romanorum conspectum abeuntis Albani exercitus intersepsit. qui viderant, id, quod ab rege auditum erat, rati, eo acrius pugnant. Terror ad hostes transit: & audiverant clara voce dictum, & magna pars Fidenatium, ut qui coloni additi Romanis essent, latine sciebant. Itaque, ne subito ex collibus decursu Albanorum intercluderentur ab oppido, terga vertunt. Instat Tullus, fusoque Fidenatium cornu, in Vejentem, alieno pavore perculsum, fero-

cior redit. Nec illi tulere impetum: sed ab effusa fuga flumen obiectum a tergo arcebat. Quo postquam fuga inclinavit; alii, arma fœde jactantes, in aquam cæci ruebant; alii, dum cunctantur in ripis, inter fugæ pugnæque consilium oppressi. Non alia ante Romana pugna atrocior fuit.

XXVIII. Tum Albanus exercitus, spectator certaminis, deductus in campos. Mettus Tullo devictos hostes gratulatur: contra Tullus Mettum benigne alloquitur. Quod bene vertat, castra Albanos Romanis castris jungere jubet: sacrificium lustrale in diem posterum parat. Ubi illuxit, paratis omnibus, ut assolet, vocari ad concionem utrumque exercitum jubet. Præcones, ab extremo orsi, primos excivere Albanos. hi, novitate etiam rei moti, ut regem Romanum concionantem audirent, proximi confitere. Ex composito armata circumdatur Romana legio. centurionibus datum negotium erat, ut sine mora imperia exsequerentur. Tum ita Tullus inquit: *Romani, si unquam ante aïas ullo in bello fuit, quod primum Diis immortalibus gratias ageretis, deinde vestræ ipsorum virtuti; hesternum id prælium fuit. Dimicatum est enim non magis cum hostibus, quam, quæ dimicatio major atque periculosior est, cum proditione ac perfidia sociorum. Nam, ne vos falsa opinio teneat, injussu meo Albani subire ad montes: nec imperium illud meum, sed consilium & imperii simulatio fuit: ut nec, vobis ignorantibus deferi vos, averteretur a certamine animus; & hostibus, circumveniri se a tergo ratis, terror ac fuga injiceretur. Nec ea culpa, quam arguo, omnium Al-*

banorum est. ducem secuti sunt: ut & vos, si quo ego inde agmen declinare voluissem, fecissetis. Mettus ille est ductor itineris hujus, Mettus idem hujus machinator belli, Mettus fœderis Romani Albanique ruptor. Audeat deinde talia alius, nisi in hunc insigne jam documentum mortalibus dedero. Centuriones armati Mettum circumstant. rex cetera, ut orsus erat, peragit. Quod bonum, faustum, felixque sit populo Romano ac mihi, vobisque, Albani: populum omnem Albanum Romam traducere in animo est; civitatem dare plebi; primores in patres legere; unam urbem, unam rempublicam facere. Ut ex uno quondam in duos populos divisa Albana res est, sic nunc in unum redeat. Ad hæc Albana pubes, inermis ab armatis septa, in variis voluntatibus, communi tamen metu cogente, silentium tenet. Tum Tullus: *Mette Fuffeti*, inquit, si ipse discere posses fidem ac fœdera servare, vivo tibi ea disciplina a me adhibita esset. Nunc quoniam tuum insanabile ingenium est, at tu tuo supplicio doce humanum genus ea sancta credere, quæ a te violata sunt. Ut igitur paulo ante animum inter Fidenatem Romanamque rem ancipitem gessisti; ita jam corpus passim distrahendum dabis. Exinde, duabus admotis quadrigis, in currus earum distentum illigat Mettum. deinde in diversum iter equi concitati, lacerum in utroque curru corpus, qua inhæserant vinculis membra, portantes. Avertere omnes a tanta fœditatē spectaculi oculos. Primum ultimumque illud supplicium apud Romanos exempli parum memoris legum humanarum fuit. in aliis gloriari licet, nulli gentium mitiores placuisse pœnas.

XXIX. Inter hæc jam præmissi Albam erant equites, qui multitudinem traducerent Romam. Legionem deinde ductam ad diruendam urbem. Quæ ubi intravere portas, non quidem fuit tumultus ille, nec pavor, qualis captarum esse urbium solet; cum, effractis portis, stratimve arietem muris, aut arce vi capta, clamor hostilis & cursus per urbem armatorum omnia ferro flammaque miscet: sed silentium triste ac tacita mœstitia ita defixit omnium animos, ut præ metu obliti, quid relinquerent, quid secum ferrent, deficiente consilio, rogitantesque alii alios, nunc in liminibus starent, nunc errabundi domos suas, ultimum illud visuri, pervagarentur. Ut vero jam equitum clamor exire jubentium instabat, jam fragor tectorum, quæ diruebantur, ultimis urbis partibus audiebatur, pulvisque, ex distantibus locis ortus, velut nube inducta omnia impleverat; raptim, quibus quisque poterat, elatis, cum larem, ac penates, tecta que, in quibus natus quisque educatusque esset, relinquentes exirent, jam continens agmen migrantium impleverat vias: & conspectus aliorum mutua miseratione integrabat lacrimas: vocesque etiam miserabiles exaudiebantur; mulierum præcipue, cum obsessa ab armatis templa augusta præterirent, ac velut captos relinquerent Deos. Egressis urbem Albanis, Romanus passim publica privataque omnia tecta adæquat solo, unaque hora quadringentorum annorum opus, quibus Alba steterat, excidio ac ruinis dedit. Templis tamen Deum (ita enim edictum ab rege fuerat) temperatum est.

XXX. Roma interim crescit Albæ ruinis. duplicatur civium numerus. Cœlius additur urbi mons; & , quo frequentius habitaretur, eam sedem Tullus regiæ capit, ibique habitavit. Principes Albanorum in Patres, ut ea quoque pars reipublicæ cresceret, legit Tullios, Servilios, Quinctios, Geganos, Curiatios, Clœlios: templumque ordini ab se aucto curiam fecit, quæ Hostilia usque ad patrum nostrorum ætatem appellata est. & , ut omnium ordinum viribus aliquid ex novo populo adjiceretur, equitum decem turmas ex Albanis legit. Legiones & veteres eodem supplemento explevit, & novas scripsit. Hac fiducia virium Tullus Sabini bellum indicit, genti ea tempestate secundum Etruscos opulentissimæ viris armisque. Utrunque injuriæ factæ, ac res nequidquam erant repetitæ. Tullus ad Feroniæ fanum mercatu frequenti negotiatores Romanos comprehensos querebatur. Sabini suos prius in lucum confugisse, ac Romæ retentos. hæ causæ belli ferebantur. Sabini, haud parum memores, & suarum virium partem Romæ ab Tatio locatam, & Romanam rem nuper etiam adjectione populi Albani auctam, circumspicere & ipsi externa auxilia. Etruria erat vicina, proximi Etruscorum Vejentes. Inde, ob residuas bellorum iras maxime sollicitatis ad defectionem animis, voluntarios traxere. & apud vagos quosdam ex inopi plebe etiam merces valuit. Publico auxilio nullo adjuti sunt. valuitque apud Vejentes (nam de ceteris minus mirum est) pacta cum Romulo induciarum fides. Cum bellum utrinque summa ope

pararent, vertique in eo res videretur, utri prius arma inferrent; occupat Tullus in agrum Sabinum transire. Pugna atrox ad silvam Malitiosam fuit: ubi & peditum quidem robore, ceterum equitatu aucto nuper, plurimum Romana acies valuit. Ab equitibus repente investis turbati ordines sunt Sabinorum: nec pugna deinde illis constare, nec fuga explicari sine magna caede potuit.

XXXI. Devictis Sabinis, cum in magna gloria magnisque opibus regnum Tulli ac tota res Romana esset, nuntiatum regi Patribusque est, in monte Albano lapidibus pluuisse. Quod cum credi vix posset; missis ad id visendum prodigium, in conspectu, haud aliter quam cum grandinem venti glomeratam in terras agunt, crebri cecidere coelo lapides. Visi etiam audire vocem ingentem ex fummi cacuminis luco, ut patrio ritu sacra Albani facerent, quæ, velut Diis quoque simul cum patria relictis, oblivioni dederant: & aut Romana sacra susceperant; aut, fortunæ, ut fit, obirati, cultum reliquerant Deum. Romanis quoque ab eodem prodigio novemdiale sacrum publice susceptum est: seu voce cœlesti ex Albano monte missa, (nam id quoque traditur,) seu aruspicum monitu. mansit certe sollemne, ut, quandoque idem prodigium nuntiaretur, feriæ per novem dies agerentur. Haud ita multo post pestilentia laboratum est. unde cum pigritia militandi oriretur; nulla tamen ab armis quies dabatur a bellicoso rege, salubriora etiam credente militiæ, quam domi, juvenum corpora esse: donec ipse quoque longinquo morbo est in-

plicitus. Tunc adeo fracti simul cum corpore sunt spiritus illi feroces, ut, qui nihil ante ratus esset minus regium, quam sacris dedere animum, repente omnibus magnis parvisque superstitionibus obnoxius degeret, religionibusque etiam populum impleret. Vulgo jam homines, eum statum rerum, qui sub Numa rege fuerat, requirentes, unam open ægris corporibus relictam, si pax veniaque ab Diis impetrata esset, credebant. Ipsum regem, tradunt, volventem commentarios Numæ, cum ibi quædam occulta sollempnia sacrificia Jovi Elicio facta invenisset, operatum his sacris se abdidisse: sed non rite initum aut curatum id sacrum esse; nec solum nullam ei oblatam cœlestium speciem, sed ira Jovis, sollicitati prava religione, fulmine ictum cum domo conflagrasse. Tullus magna gloria belli regnavit annos duos & triginta.

XXXII. Mortuo Tullo, res, ut institutum jam inde ab initio erat, ad Patres redierat: hique interregem nominaverant. quo comitia habente, Ancus Marcium regem populus creavit: Patres fuisse auctores. Numæ Pompilii regis nepos, filia ortus, Ancus Marcius erat. qui, ut regnare cœpit, & avitæ gloriæ memor, & quia proximum regnum, cetera egregium, ab una parte haud satis prosperum fuerat, aut neglectis religionibus, aut prave cultis; longe antiquissimum ratus, sacra publica, ut ab Numa instituta erant, facere; omnia ea ex commentariis regis pontificem in album relata proponere in publico jubet. inde & civibus otii cupidis, & finitimis civitatibus facta spes, in

avi mores atque instituta regem abiturum, Igitur Latini, cum quibus, Tullo regnante, ictum fœdus erat, sustulerant animos: &, cum incurfionem in agrum Romanum fecissent, repetentibus res Romanis superbe responsum reddunt; desidem Romanum regem inter sacella & aras acturum esse regnum rati. Medium erat in Anco ingenium, & Numæ, & Romuli memor: &, præterquam quod avi regno magis necessariam fuisse pacem credebat, cum in novo, tum feroci populo; etiam, quod illi contigisset otium, sine injuria id se haud facile habiturum: tentari patientiam, & tentatam contemni: temporaque esse Tullo regi aptiora, quam Numæ. Ut tamen, quoniam Numa in pace religiones instituisset, a se bellicæ cærimonix procederentur; nec gererentur solum, sed etiam indicerentur bella aliquo ritu; jus ab antiqua gente Æquiculis, quod nunc feciales habent, descripsit, quo res repetuntur. Legatus, ubi ad fines eorum venit, unde res repetuntur, capite velato filo (lanæ velamen est) *Audi, Jupiter, inquit, audite, fines, (cujuscunque gentis sunt, nominat) audiat fas. Ego sum publicus nuntius populi Romani: juste pieque legatus venio, verbisque meis fides sit.* Peragit deinde postulata. Inde Jovem testem facit: *Si ego injuste impieque illos homines illasque res dedier nuntio populi Romani mihi exposco, tum patriæ compotem me nunquam sris esse.* Hæc, cum fines suprascendit, hæc, quicunque ei primus vir obvius fuerit, hæc, portam ingrediens, hæc, forum ingressus, paucis verbis carminis concipiendique jurisjurandi muta-

tis, peragit. si non deduntur, quos exposcit, diebus tribus & triginta (tot enim sollemnes sunt) peractis, bellum ita indicit: *Audi, Jupiter, & tu, Juno, Quirine, Diique omnes cœlestes, vosque terrestres, vosque inferni, audite. Ego vos testor, populum illum, (quicumque est, nominat) injustum esse, neque jus persolvere. Sed de istis rebus in patria majores natu consulimus, quo pacto jus nostrum adipiscamur.* Cum his nuntius Romam ad consulendum redit. Confestim rex his ferme verbis Patres consulebat: *Quarum rerum, litium, causarum condixit pater patratus populi Romani Quiritium patri patrato priscorum Latinorum hominibusque priscis Latinis, quas res dari, fieri, solvi oportuit, quas res nec dederunt, nec fecerunt, nec solverunt, dic, inquit ei, quem primum sententiam rogabat, quid censes?* Tum ille: *Puro pioque duello quærendas censeo; itaque consentio, consciscoque.* Inde ordine alii rogabantur: quandoque pars major eorum, qui aderant, in eandem sententiam ibat, bellum erat consensu. Fieri solitum, ut fecialis hastam ferratam aut sanguineam præuistam ad fines eorum ferret, &, non minus tribus puberibus præsentibus, diceret: *Quod populi priscorum Latinorum hominesque prisci Latini adversus populum Romanum Quiritium fecerunt, deliquerunt, quod populus Romanus Quiritium bellum cum priscis Latinis jussit esse, senatusque populi Romani Quiritium censuit, consensit, conscivit, ut bellum cum priscis Latinis feret; ob eam rem ego populusque Romanus populis priscorum Latinorum hominibusque priscis Latinis bellum indico facioque.* id ubi dixisset, hastam in fines eorum

emittebat. Hoc tum modo ab Latinis repetitæ res, ac bellum indictum: moremque eum posteri acceperunt.

XXXIII. Ancus, demandata cura sacrorum flaminibus sacerdotibusque aliis, exercitu novo conscripto profectus, Politorium, urbem Latinorum, vi cepit; secutusque morem regum priorum, qui rem Romanam auxerant hostibus in civitatem accipiendis, multitudinem omnem Romam traduxit. &, cum circa Palatium, sedem veterum Romanorum, Sabini Capitolium atque arcem, Cœlium montem Albani impleissent; Aventinum novæ multitudini datum. additi eodem haud ita multo post, Tellenis Ficanaque captis, novi cives. Politorium inde rursus bello repetitum, quod vacuum occupaverant prisca Latini. eaque causa diruendæ urbis ejus fuit Romanis, ne hostium semper receptaculum esset. Postremo, omni bello Latino Medulliam compulsio, aliquamdiu ibi Marte incerto, varia victoria pugnatum est: nam & urbs tuta munitionibus, præsidioque firmata valido erat, &, castris in aperto positis, aliquoties exercitus Latinus cominus cum Romanis signa contulerat. Ad ultimum, omnibus copiis conmissus Ancus, acie primum vincit: inde, ingenti præda potitus, Romam redit, tum quoque multis millibus Latinorum in civitatem acceptis; quibus, ut jungeretur Palatio Aventinum, ad Murciæ datæ sedes. Janiculum quoque adjectum; non inopia loci, sed ne quando ea arx hostium esset. id non muro solum, sed etiam, ob commoditatem itineris, ponte subli-

cio, tum primum in Tiberi factò, conjungi urbi placuit. Quiritium quoque fossa, haud parvum munimentum a planioribus aditu locis, Anci regis opus est. Ingenti incremento rebus auctis, cum in tanta multitudine hominum, discrimine recte an peperam facti confuso, facinora clandestina fierent, carcer ad terrorem incrementis audaciæ media urbe, imminens foro ædificatur. Nec urbs tantum hoc rege crevit, sed etiam ager finesque. Silva Mæsia Vejentibus ademta, usque ad mare imperium prolatum, & in ore Tiberis Ostia urbs condita: salinæ circa factæ, egregieque rebus bello gestis, ædis Jovis Feretrii amplificata.

XXXIV. Anco regnante, Lucumo, vir impiger ac divitiis potens, Romam commigravit, cupidine maxime ac spe magni honoris, cujus adipiscendi Tarquiniis (nam ibi quoque peregrina stirpe oriundus erat) facultas non fuerat. Damarati Corinthii filius erat; qui, ob seditiones domo profugus, cum Tarquiniis forte confedisset, uxore ibi ducta duos filios genuit. Nomina his Lucumo atque Aruns fuerunt. Lucumo superfuit patri, bonorum omnium heres: Aruns prior, quam pater, moritur, uxore gravida relicta. Nec diu manet superstes filio pater: qui cum, ignorans nurum ventrem ferre, immemor in testando nepotis decessisset, puero, post avi mortem in nullam sortem bonorum nato, ab inopia Egerio inditum nomen. Lucumoni contra, omnium heredi bonorum, cum divitiæ jam animos facerent, auxit ducta in matrimonium Tanaquil, summo loco nata, & quæ

haud facile iis, in quibus nata erat, humiliora fineret ea, quæ innupfisset. Spernentibus Etruscis Lucumonem, ex fule advena ortum, ferre indignitatem non potuit; oblitaque ingenitæ erga patriam caritatis, dummodo virum honoratum videret, consilium migrandi ab Tarquiniis cepit. Roma est ad id potissimum visa. in novo populo, ubi omnis repentina atque ex virtute nobilitas sit, futurum locum forti ac strenuo viro: regnasse Tatium Sabinum: arcessitum in regnum Numam a Curibus: & Ancum Sabina matre ortum, nobilemque una imagine Numæ esse. Facile persuadet, ut cupido honorum, & cui Tarquini materna tantum patria esset. Sublatis itaque rebus commigrant Romanam. Ad Janiculum forte ventum erat. ibi ei, carpento sedenti cum uxore, aquila suspensis demissa leniter alis pileum aufert: superque carpentum cum magno clangore volitans, rursus, velut ministerio divinitus missa, capiti apte reponit: inde sublimis abiit. Accepisse id augurium læta dicitur Tanaquil, perita, ut vulgo Etrusci, cœlestium prodigiorum mulier. Excelsa & alta sperare complexa virum jubet. eam alitem eâ regione cœli & ejus Dei nuntiam venisse. circa summum culmen hominis auspiciam fecisse. levasse humano superpositum capiti decus, ut divinitus eidem redderet. Has spes cogitationesque secum portantes, urbem ingressi sunt; domicilioque ibi comparato, L. Tarquinius Priscum edidit nomen. Romanis conspicuum eum novitas divitiæque faciebant: & ipse fortunam benigno alloquio, comitate invitandi,

beneficiisque, quos poterat, sibi conciliando, adjuvabat; donec in regiam quoque de eo fama perlata est: notitiamque eam brevi, apud regem liberaliter dextreque obeundo officia, in familiaris amicitiae adduxerat jura, ut publicis pariter ac privatis consiliis bello domique interesset; &, per omnia expertus, postremo tutor etiam liberis regis testamento institueretur.

XXXV. Regnavit Ancus annos quatuor & viginti, cuilibet superiorum regum belli pacisque & artibus & gloria par. Jam filii prope puberem aetatem erant. eo magis Tarquinius instare, ut quam primum comitia regi creando fierent. Quibus indictis, sub tempus pueros venatum ablegavit. isque primus & petisse ambitiose regnum, & orationem dicitur habuisse ad conciliandos plebis animos compositam: *Cum, se non rem novam petere: quippe qui non primus, quod quisquam indignari mirarive posset, sed tertius Romae peregrinus regnum affectet: & Tatium non ex peregrino solum, sed etiam ex hoste, regem factum: & Numam, ignarum urbis, non petentem, in regnum ultro accitum. Se, ex quo sui potens fuerit, Romam cum conjuge ac fortunis omnibus commigrasse: majorem partem aetatis ejus, qua civilibus officiis fungantur homines, Romae se, quam in vetere patria, vixisse: domi militiaeque sub haud poenitendo magistro, ipso Anco rege, Romana se jura, Romanos ritus didicisse. Obsequio & observantia in regem cum omnibus, benignitate erga alios cum rege ipso certasse.* Haec eum haud falsa memorantem ingenti consensu populus Romanus regnare jussit. Er-

go virum, cetera egregium, secuta, quam in petendo habuerat, etiam regnantem ambitio est. nec minus regni sui firmandi, quam augendæ reipublicæ memor, centum in Patres legit; qui deinde minorum gentium sunt appellati: factio haud dubia regis, cujus beneficio in curiam venerant. Bellum primum cum Latinis gessit, & oppidum ibi Apiolas vi cepit: prædaque inde majore, quam quanta belli fama fuerat, reventa, ludos opulentiùs instructiusque, quam priores reges, fecit. Tum primum circo, qui nunc maximus dicitur, designatus locus est: loca divisa Patribus equitibusque, ubi spectacula sibi quisque facerent, fori appellati. Spectavere furcis duodenos ab terra spectacula alta sustinentibus pedes. Ludicrum fuit equi pugilefque, ex Etruria maxime acciti. sollempnes deinde annui mansere ludi, Romani Magnique varie appellati. Ab eodem rege & circa forum privatis ædificanda divisa sunt loca; porticus tabernæque factæ.

XXXVI. Muro quoque lapideo circumdare urbem parabat, cum Sabinum bellum cœptis intervenit. Adeoque ea subita res fuit, ut prius Anienem transirent hostes, quam obviam ire ac prohibere exercitus Romanus posset. Itaque trepidatum Romæ est. & primo dubia victoria, magna utrinque cæde pugnatum est. Reductis deinde in castra hostium copiis, datoque spatio Romanis, ad comparandum de integro bellum, Tarquinius, equitem maxime suis deesse viribus ratus, ad Ramnes, Titienfes, Luceres, quas centurias Romulus

scripserat, addere alias constituit, suoque insignes relinquere nomine. Id quia inaugurato Romulus fecerat, negare Attus Navius, inclitus ea tempestate augur, neque mutari, neque novum constitui, nisi aves addixissent, posse. Ex eo ira regi mota, eludensque artem, ut ferunt, *Agēdum*, inquit, *divine tu, inaugura, ferine possit, quod nunc ego mente concipio*. Cum ille in augurio rem expertus, profecto futuram dixisset: *Atqui hoc animo agitavi*, inquit, *te novacula cotem discissurum. cape hæc, & perage, quod aves tuæ feri posse portendunt*. tum illum haud cunctanter discidisse cotem ferunt. Statua Atti capite velato, quo in loco res acta est, in comitio, in gradibus ipsis ad lævam curiæ fuit: cotem quoque eodem loco sitam fuisse memorant, ut esset ad posteros miraculi ejus monumentum. Auguriis certe sacerdotioque augurum tantus honos accessit, ut nihil belli domique postea, nisi auspicato, gereretur: concilia populi, exercitus vocati, summa rerum, ubi aves non admisissent, dirimerentur. Neque tum Tarquinius de equitum centuriis quidquam mutavit: numero alterum tantum adjecit, ut mille & octingenti equites in tribus centuriis essent. Posteriores modo sub iisdem nominibus, qui additi erant, appellati sunt: quas nunc, quia geminatæ sunt, sex vocant centurias.

XXXVII. Hac parte copiarum aucta, iterum cum Sabinis confligitur. Sed præterquam quod viribus creverat Romanus exercitus, ex occulto etiam additur dolus, missis, qui magnam vim lignorum in Anienis ripa jacentem, ardentem in flumen con-

jicerent: ventoque juvante accensa ligna, & pleraque in ratibus impacta, sublicis cum hærent, pontem incendunt. Ea quoque res in pugna terrorem attulit Sabinis. Effusis eadem fugam impedit: multique mortales, cum hostem effugissent, in flumine ipso periere: quorum fluitantia arma ad urbem cognita in Tiberi, prius pæne, quam nuntiaripotest, insignem victoriam fecere. Eo proelio præcipua equitum gloria fuit. utrimque ab cornibus positos, cum jam pelleretur media peditum suorum acies, ita incurrisse ab lateribus ferunt, ut non sisterent modo Sabinas legiones, ferociter instantes cedentibus, sed subito in fugam averterent. Montes effuso cursu Sabini petebant, & pauci tenere; maxima pars, ut ante dictum est, ab equitibus in flumen acti sunt. Tarquinius, instandum perterritis ratus, præda captivisque Romam missis, spoliis hostium (votum id Vulcano erat) ingenti cumulo accensis, pergit porro in agrum Sabinum exercitum inducere. &, quanquam male gesta res erat, nec gesturos melius sperare poterant, tamen, quia consulendi res non dabat spatium, ire obviam Sabini tumultuario milite. iterumque ibi fusi, perditis jam prope rebus, pacem petiere.

XXXVIII. Collatia, & quidquid circa Collatiam agri erat, Sabinis ademptum. Egerius (fratris hic filius erat regis) Collatiæ in præsidio relictus. deditosque Collatinos ita accipio, eamque deditiois formulam esse. Rex interrogavit: *Estisne vos legati oratoresque, missi a populo Collatino, ut vos populumque Collatinum dederetis? Sumus. Estne popu-*

lus Collatinus in sua potestate? Est. Deditisne vos, populumque Collatinum, urbem, agros, aquam, terminos, delubra, utensilia, divina, humanaque omnia, in meam populique Romani ditionem? Deditimus. At ego recipio. Bello Sabino perfecto, Tarquinius triumphans Romam rediit. Inde priscis Latinis bellum fecit. ubi nusquam ad universæ rei dimicationem ventum est: ad singula oppida circumferendo arma, omne nomen Latinum domuit. Corniculum, Ficulea vetus, Cameria, Crustumærium, Ameriolla, Medullia, Nomentum, hæc de priscis Latinis, aut qui ad Latinos defecerant, capta oppida. Pax deinde est facta. Majore inde animo pacis opera inchoata, quam quanta mole gesserat bella: ut non quietior populus domi esset, quam militiæ fuisset. Nam & muro lapideo, cujus exordium operis Sabino bello turbatum erat, urbem, qua nondum munita erat, cingere parat: & infima urbis loca circa forum aliasque interjectas collibus convalles, quia ex planis locis haud facile evehebant aquas, cloacis e fastigio in Tiberim ductis siccant: & aream ad ædem in Capitolio Jovis, quam voverat bello Sabino, jam præfagiente animo futuram olim amplitudinem loci, occupat fundamentis.

XXXIX. Eo tempore in regia prodigium visu eventuque mirabile fuit. Pueri dormienti, cui Servio Tullio nomen fuit, caput arsisse ferunt multorum in conspectu. Plurimo igitur clamore inde ad tantæ rei miraculum orto excitos reges. & cum quidam familiarium aquam ad reslinguendum ferret, ab regina retentum: sedatoque eam tumultu,

moveri vetuisse puerum, donec sua sponte ex-
 rectus esset. Mox cum somno & flammam abiisse.
 Tum abducto in secretum viro Tanaquil, *Viden' tu*
puerum hunc, inquit, *quem tam humili cultu educa-*
mus? Scire licet, hunc lumen quondam rebus nostris
dubiis futurum, præsidiumque regiæ afflictæ. proinde
materiem ingentis publice privatimque decoris omni in-
dulgentia nostra nutriamus. Inde puerum liberum lo-
 co cœptum haberi, erudiri que artibus, quibus inge-
 nia ad magnæ fortunæ cultum excitantur. Evenit
 facile, quod Diis cordi esset. Juvenis evasit ve-
 re indolis regiæ. nec, cum quæreretur gener Tar-
 quinio, quisquam Romanæ juventutis ulla arte con-
 ferri potuit: filiamque ei suam rex despondit. Hic
 quacunque de causa tantus illi honos habitus cre-
 dere prohibet, serva natum eum, parvumque ip-
 sum servasse. Eorum magis sententiæ sum, qui, Cor-
 niculo capto, Ser. Tullii, qui princeps in illa ur-
 be fuerat, gravidam viro occiso uxorem, cum in-
 ter reliquas captivas cognita esset, ob unicam no-
 bilitatem ab regina Romana prohibitam ferunt ser-
 vitio, partum Romæ edidisse, Prisci Tarquinii do-
 mo. Inde tanto beneficio & inter mulieres fami-
 liaritatem auctam, & puerum, ut in domo a par-
 vo educum, in caritate atque honore fuisse: for-
 tunam matris, quod capta patria in hostium ma-
 nus venerit, ut serva natus crederetur, fecisse.

XL. Duodequadragesimo ferme anno, ex quo
 regnare cœperat Tarquinius, non apud regem mo-
 do, sed apud Patres plebemque, longe maximo ho-
 nore Ser. Tullius erat. Tum Anci filii duo etsi an-

tea semper pro indignissimo habuerant, se patrio regno tutoris fraude pulsos, regnare Romæ advenam, non modo civicæ, sed ne Italicæ quidem stirpis; tum impensius his indignitas crescere, si ne ab Tarquinio quidem ad se rediret regnum, sed præceps inde porro ad servitia caderet: ut in eadem civitate post centesimum fere annum, quam Romulus Deo prognatus, Deus ipse, tenuerit regnum, donec in terris fuerit, id servus serva natus possideat. tum communē Romani nominis, tum præcipue id domus suæ dedecus fore, si, Anci regis virili stirpe salva, non modo advenis, sed servis etiam, regnum Romæ pateret. Ferro igitur eam arceri contumeliam statuunt. Sed & injuriæ dolor in Tarquinium ipsum magis, quam in Servium, eos stimulat: & quia gravior ultor cædis, si superesset, rex futurus erat, quam privatus: tum, Servio occiso, quemcunque alium generum delegisset, eundem regni heredem facturus videbatur. Ob hæc ipsi regi infidiæ parantur. Ex pastoribus duo ferocissimi delecti ad facinus, quibus consueti erant uterque agrestibus ferramentis, in vestibulo regiæ, quam potuere tumultuosissime, specie rixæ in se omnes apparitores regios convertunt. inde, cum ambo regem appellarent, clamorque eorum penitus in regiam pervenisset, vocati ad regem pergunt. Primo uterque vociferari, & certatim alter alteri obstrepere: coerciti ab licitore, & jussi in vicem dicere, tandem obloqui desistunt. Unus rem ex composito orditur. Cum intentus in eum se rex rotus averteret, alter elatam securim in caput de-

jecit: relictoque in vulnere telo, ambo se foras ejiciunt.

XLI. Tarquinius moribundum cum, qui circa erant, excepissent, illos fugientes lictores comprehendunt. clamor inde concursusque populi, mirantium quid rei esset. Tanaquil inter tumultum claudi regiam jubet, arbitros ejecit: simul; quæ curando vulnere opus sunt, tanquam spes subesset, sedulo comparat: simul, si destituat spes, alia præfidia molitur. Servio propere accito cum pæne exsanguem virum ostendisset; dextram tenens orat, ne inultam mortem foci, ne focrum inimicis ludibrio esse sinat. *Tuum est, inquit, Servi, si vir es, regnum; non eorum, qui alienis manibus pessimum facinus fecere. Erige te, Deosque duces sequere, qui clarum hoc fore caput divino quondam circumfuso igni portenderunt. Nunc te illa cælestis excitet flamma: nunc expergiscere vere. Et nos peregrini regnavimus. Qui sis, non unde natus sis, reputa. Si tua re subita consilia torpent, at tu mea sequere.* Cum clamor impetusque multitudinis vix sustineri possiet, ex superiore parte ædium per fenestras, in novam viam veras, (habitabat enim rex ad Jovis Statoris) populum Tanaquil alloquitur: jubet *bono animo esse: sopitum fuisse regem subito ictu: ferrum haud alte in corpus descendisse: jam ad se redisse. Inspectum vulnus, absterso cruore: omnia salubria esse: considerare, propediem ipsum eos visuros. Interim Ser. Tullio jubere populum dicto audientem esse. Eum jura redditurum, obiturumque alia regis munia esse.* Servius cum trabea & licторibus prodit; ac sede regia sedens alia de-

cernit, de aliis consulturum se regem esse simulat. Itaque, per aliquot dies, cum jam exspirasset Tarquinius, celata morte, per speciem alienæ fungendæ vicis suas opes firmavit. tum demum palam facto, & comploratione in regia orta, Servius præsidio firmo munitus, primus injussu populi, voluntate Patrum regnavit. Anci liberi, jam tum comprehensus sceleris ministris, ut vivere regem, & tantas esse opes Servii nuntiatum est, Sueffam Pometiam exfulatum ierant.

XLII. Nec jam publicis magis consiliis Servius, quam privatis, munire opes. & ne, qualis Anci liberum animus adversus Tarquinium fuerat, talis adversus se Tarquinii liberum esset, duas filias juvenibus regiis, Lucio atque Arunti Tarquiniis, jungit. Nec rupit tamen fati necessitatem humanis consiliis, quin invidia regni etiam inter domesticos infida omnia atque infesta faceret. Peropportune ad præsentis quietem status bellum cum Vejentibus (jam enim induciæ exierant) aliisque Etruscis sumtum. In eo bello & virtus & fortuna enituit Tullii: fusoque ingenti hostium exercitu, haud dubius rex, seu Patrum, seu plebis animos periclitaretur, Romam rediit. Aggrediturque inde ad pacis longe maximum opus: ut, quemadmodum Numa divini auctor juris fuisset, ita Servium conditorem omnis in civitate discriminis ordinumque, quibus inter gradus dignitatis fortunæque aliquid interlucet, posteriori fama ferrent. Censum enim instituit, rem saluberrimam tanto futuro imperio: ex quo belli pacisque munia non viritim, ut ante, sed pro habi-

tu pecuniarum fierent. Tum classes centuriasque & hunc ordinem ex censu descripsit, vel paci decorum, vel bello.

XLIII. Ex iis, qui centum millium æris, aut majorem censum haberent, octoginta confecit centurias, quadragenas seniorum ac juniorum. Prima classis omnes appellati. Seniores, ad urbis custodiam ut præsto essent: juvenes, ut foris bella gererent. arma his imperata, galea, clypeum, ocreæ, lorica, omnia ex ære; hæc ut tegumenta corporis essent. tela in hostem, hastaque & gladius. Aditæ huic classi duæ fabrûm centuriæ, quæ sine armis stipendia facerent. datum munus, ut machinas in bello ferrent. Secunda classis intra centum usque ad quinque & septuaginta millium censum instituta; & ex his, senioribus junioribusque, viginti conscriptæ centuriæ: arma imperata, scutum pro clypeo, & præter lorica omnia eadem. Tertiæ classis in quinquaginta millium censum esse voluit. totidem centuriæ & hæ, eodemque discrimine ætatum factæ: nec de armis quidquam mutatum; ocreæ tantum ademptæ. In quarta classe census quinque & viginti millium, totidem centuriæ factæ. arma mutata; nihil præter hastam & verutum datum. Quinta classis aucta, centuriæ triginta factæ: fundas lapidesque missiles hi secum gerebant. in his accensi, cornicines, tibicinesque, in tres centurias distributi. Undecim millibus hæc classis censebatur. Hoc minor census reliquam multitudinem habuit. inde una centuria facta est, immunis militia. Ita pedestri exercitu ornato distribu-

toque, equitum ex primoribus civitatis duodecim scripsit centurias. Sex item alias centurias tribus ab Romulo institutis sub iisdem, quibus inauguratæ erant, nominibus fecit. Ad equos emendos dena millia æris ex publico data; &, quibus equos alerent, viduæ attributæ, quæ bina millia æris in annos singulos penderent. Hæc omnia in dites à pauperibus inclinata onera. Deinde est honos additus. non enim (ut ab Romulo traditum ceteri servaverant reges) viritum suffragium eadem vi eodemque jure promiscue omnibus datum est: sed gradus facti, ut neque exclusus quisquam suffragio videretur, & vis omnis penes primores civitatis esset. Equites enim vocabantur primi; octoginta inde primæ classis centuriæ: ibi si variaret, quod raro incidebat, ut secundæ classis vocarentur: nec fere unquam infra ita descenderent, ut ad infimos pervenirent. Nec mirari oportet, hunc ordinem, qui nunc est, post expletas quinque & triginta tribus, duplicato earum numero, centuriis juniorum seniorumque, ad institutam ab Ser. Tullio summam non convenire. quadrifariam enim urbe divisa regionibus colibusque, quæ habitabantur partes, Tribus eas appellavit, ut ego arbitror, ab tributo: nam ejus quoque æqualiter ex censu conferendi ab eodem inita ratio est. Neque hæc tribus ad centuriarum distributionem numerumque quidquam pertinere.

XLIV. Censu perfecto, quem maturaverat metu legis de incensis latæ cum vinculorum minis mortisque, edixit, ut omnes cives Romani, equites peditesque, in suis quisque centuriis, in campo Mar-

tio prima luce adefsent. Ibi instructum exercitum omnem suo vetaurilibus lustravit. idque conditum lustrum appellatum, quia is censendo finis factus est. Millia octoginta eo lustro civium censa dicuntur. Adjicit scriptorum antiquissimus Fabius Pictor, eorum, qui ferre arma possent, eum numerum fuisse. Ad eam multitudinem urbs quoque amplificanda visa est. Addit duos colles, Quirinalem, Viminalemque. Inde deinceps auget Esquilias: ibique ipse, ut loco dignitas fieret, habitat. Aggere & fossis & muro circumdat urbem. ita pomœrium profert. Pomœrium, verbi vim solam intuentes, postmœrium interpretantur esse. Est autem magis circa murum locus, quem in condendis urbibus quondam Etrusci, qua murum ducturi erant, certis circa terminis inaugurato consecrabant: ut neque interiore parte ædificia mœnibus continuarentur, quæ nunc vulgo etiam conjungunt; & extrinsecus puri aliquid ab humano cultu pateret soli. Hoc spatium, quod neque habitari, neque arari fas erat, non magis quod post murum esset, quam quod murus post id, pomœrium Romani appellarunt. & in urbis incremento semper, quantum mœnia processura erant, tantum termini hi consecrati proferebantur.

XLV. Auçta civitate magnitudine urbis, formati omnibus domi & ad belli & ad pacis usus, ne semper armis opes acquirentur, consilio augere imperium conatus est, simul & aliquod addere urbi decus. Jam tum erat inclitum Dianæ Ephesiæ fanum: id communiter a civitatibus Asiæ factum fa-

ma ferebat. Cum consensum Deosque confociatos laudaret mire Servius inter proceres Latinorum, cum quibus publice privatimque hospitia amicitiasque de industria junxerat; sæpe iterando eadem, perpulit tandem, ut Romæ fanum Dianæ populi Latini cum populo Romano facerent. Ea erat confessio, caput rerum Romanam esse, de quo toties armis certatum fuerat. Id quanquam omissum jam ex omnium cura Latinorum, ob rem toties infeliciter tentatam armis, videbatur; uni se ex Sabinis fors dare visa est privato consilio imperii recuperandi. Bos in Sabinis nata cuidam patrifamilie dicitur, miranda magnitudine ac specie. Fixa per multas ætates cornua in vestibulo templi Dianæ monumentum ei fuere miraculo. Habita, ut erat, res prodigii loco est: & cecinere vates, cujus civitatis eam civis Dianæ immolasset, ibi fore imperium: idque carmen pervenerat ad antistitem fani Dianæ. Sabinus, ut prima apta dies sacrificio visa est, bovem Romam actam deducit ad fanum Dianæ, & ante aram statuit. Ibi antistes Romanus, cum eum magnitudo victimæ celebrata fama movisset, memor responsi Sabinum ita alloquitur: *Quidnam tu, hospes, paras, inceste sacrificium Dianæ facere? Quin tu ante vivo perfunderis flumine? Infima valle præfluit Tiberis.* Religione tactus hospes, qui omnia, ut prodigio responderet eventus, cuperet rite facta, ex templo descendit ad Tiberim. Interea Romanus immolat Dianæ bovem. id mire gratum regi atque civitati fuit.

XLVI. Servius, quanquam jam usu haud dubium

regnum possederat, tamen, quia interdum iactari voces a juvene Tarquinio audiebat, se injussu populi regnare, conciliata prius voluntate plebis, agro capto ex hostibus viritim diviso, ausus est ferre ad populum, *vellent, juberentne, se regnare?* tantoque consensu, quanto haud quisquam alius ante, rex est declaratus. Neque ea res Tarquinio spem affectandi regni minuit: immo eo impensius, quia de agro plebis adversa Patrum voluntate sengerat agi, criminandi Servii apud Patres, crescendo in curia sibi occasionem datam ratus est, & ipse juvenis ardentis animi, & domi uxore Tullia inquietum animum stimulante. Tulit enim & Romana regia sceleris tragici exemplum, ut tædio regum maturior veniret libertas; ultimumque regnum esset, quod scelere partum foret. Hic L. Tarquinius (Prisci Tarquinii regis filius neposne fuerit, parum liquet; pluribus tamen auctoribus filium ediderim) fratrem habuerat Aruntem Tarquinium, mitis ingenii juvenem. His duobus, ut ante dictum est, duæ Tullia, regis filia, nupsent, & ipsæ longe dispares moribus. Forte ita inciderat, ne duo violenta ingenia matrimonio jungerentur, fortuna, credo, populi Romani, quo diuturnius Servii regnum esset, constituique civitatis mores possent. Angebatur ferox Tullia, nihil materiae in viro neque ad cupiditatem, neque ad audaciam esse: tota in alterum versa Tarquinium, eum mirari, eum virum dicere, ac regio sanguine ortum: spernere sororem, quod virum nacta muliebri cessaret audacia. Contrahit celeriter similitudo eos, ut

fere fit malum malo aptiffimum: fed initium turbandi omnia a femina ortum eft. Ea, fecretis viri alieni alluefacta fermonibus, nullis verborum contumeliis parcere, de viro ad fratrem, de forore ad virum; & fe rectius viduam, & illum coelibem futurum fuiſſe contendere, quam cum impari jungi, ut elanguendum aliena ignavia eſſet. Si ſibi eum, quo digna eſſet, Dii dediffent virum, domi ſe propediem viſuram regnum fuiſſe, quod apud patrem videat. Celeriter adoleſcentem ſuæ temeritatis implet. Aruns Tarquinius & Tullia minor prope continuatis funeribus cum domos vacuas novo matrimonio feciffent, junguntur nuptiis, magis non prohibente Servio, quam approbante.

XLVII. Tum vero in dies infeſtior Tullii ſenectus, infeſtius cœpit regnum eſſe. jam enim ab ſcelere ad aliud ſpectare mulier ſcelus: nec nocte, nec interdium virum conquieſcere pati, ne gratuita præterita parricidia eſſent. *Non ſibi deſuiſſe, cui nuptæ diceretur, nec cum quo tacita ſerviret: deſuiſſe, qui ſe regno dignum putaret; qui meminiffet, ſe eſſe Prifci Tarquiniî filium; qui habere, quam ſperare, regnum mallet. Si tu is es, cui nuptam eſſe me arbitror, & virum & regem appello: ſin minus, eo nunc pejus mutata eſt res, quod iſthic cum ignavia eſt ſcelus. Quir accingeris? Non tibi ab Corintho, nec ab Tarquiniis, ut patri tuo, peregrina regna moliri neceſſe eſt. Dii te penates patriique, & patris imago, & domus regia, & in domo regale ſolium, & nomen Tarquinium creat vocatque regem. Aut ſi ad hæc parum eſt animi, quid fruſtraris civitatem? quid te ut regium juvenem con-*

*spici finis? Faceſſe hinc Tarquinius, aut Corinthum. Devolvere retro ad ſtirpem, fratri ſimilior, quam patri. His aliifque increpando juvenem inſtigat, nec conquieſcere ipſa poteſt: ſi, cum Tanaquil, peregrina mulier, tantum moliri potuiſſet animo, ut duo continua regna, viro, ac deinceps genero, dediffet; ipſa, regio femine orta, nullum momentum in dando adimendoque regno faceret. His muliebribus inſtinctus furiis Tarquinius circumire & preſare minorum maxime gentium Patres: admonere paterni beneficii, ac pro eo gratiam repetere: alligere donis juvenes: tum de ſe ingentia pollicendo, tum regis criminibus, omnibus locis creſcere. poſtremo, ut jam agenda rei tempus viſum eſt, ſtipatus agmine armatorum, in forum irrupit: inde, omnibus perculſis pavore, in regia ſede pro curia ſedens, Patres in curiam per præconem ad regem Tarquinium citari juſſit. Convenere extemplo, alii jam ante ad hoc præparati, alii metu, ne non veniſſe fraudi eſſet, novitate ac miraculo attoniti, & jam de Servio actum rati. Ibi Tarquinius, maledicta ab ſtirpe ultima orſus: *Servum, ſervaque natum, poſt mortem indignam parentis ſui, non inter regno, ut antea, inito, non comitiis habitis, non per ſuffragium populi, non auctõribus Patribus, muliebri dono regnum occupaffe. Ita natum, ita creatum regem, ſautoreſ inſimi generis hominum, ex quo ipſe ſit, odio alienæ honeſtatis ereptum primoribus agrum ſordidiſſimo cuique diviſiſſe: omnia onera, quæ communia quondam fuerint, inclinaffe in primores civitatis: inſtituiſſe cenſum, ut inſignis ad invidiam locupletiorum**

fortuna esset, & parata, unde, ubi vellet, egentissimis largiretur.

XLVIII. Huic orationi Servius cum intervenisset, trepido nuntio excitatus, extemplo a vestibulo curiæ magna voce, *Quid hoc, inquit, Tarquini, rei est? qua tu audacia me vivo vocare ausus es Patres; aut in sede considerare mea?* Cum ille ferociter ad hæc, *Se patris sui tenere sedem, multo, quam servum, potiolem, filium regis regni heredem: satis illum diu per licentiam eludentem insultasse dominis;* clamor ab utriusque fautoribus oritur, & concursus populi fiebat in curiam: apparebatque regnaturum, qui vicisset. Tum Tarquinius, necessitate jam ipsa cogente, ultima audere: multo & ætate & viribus validior, medium arripit Servium; elatumque e curia in inferiorem partem per gradus dejicit. Inde ad cogendum senatum in curiam redit. Fit fuga regis apparitorum, atque comitum. Ipse prope exsanguis, cum semianîmi regio comitatu domum se reciperet, pervenissetque ad summum Cyprium vicum, ab iis, qui missi ab Tarquinio fugientem consecuti erant, interficitur. Creditur, quia non abhorret a cetero scelere, admonitu Tulliaë id factum. carpento certe (id quod satis constat) in forum invecsta, nec reverita cœtum virorum, evocavit virum e curia; regemque prima appellavit. a quo faceffere jussa ex tanto tumultu cum se domum reciperet, pervenissetque ad summum Cyprium vicum, ubi Dianium nuper fuit; flectenti carpentum dextra in Virbium clivum, ut in collem Esquiliarium eveheretur, restitit pavidus, atque inhibuit

frenos is, qui jumenta agebat, jacentemque dominæ Servium trucidatum ostendit. Fœdum inhumanumque inde traditur scelus; monumentoque locus est: Sceleratum vicum vocant, quo amens, agitantibus furiis sororis ac viri, Tullia per patris corpus carpentum egisse fertur; partemque sanguinis ac cædis paternæ cruento vehiculo, contaminata ipsa resperfaque, tulisse ad penates suos virique sui: quibus iratis, malo regni principio similes propediem exitus sequerentur. Servius Tullius regnavit annos quatuor & quadraginta, ita ut bono etiam moderatoque succedenti regi difficilis æmulatio esset. Ceterum id quoque ad gloriam accessit, quod cum illo simul justa ac legitima regna occiderunt. Id ipsum tam mite ac tam moderatum imperium, tamen, quia unius esset, deponere eum in animo habuisse, quidam auctores sunt; ni scelus intestinum liberandæ patriæ consilia agitantis intervenisset.

XLIX. Inde L. Tarquinius regnare ocepit, cui Superbo cognomen facta indiderunt, quia fœcerum gener sepultura prohibuit, *Romulum quoque insepultum perisse* dictitans: primores Patrum, quos Servii rebus favisse credebat, interfecit: conscius deinde, male quærendi regni ab se ipso adversus se exemplum capi posse, armatis corpus circumsepsit. neque enim ad jus regni quidquam præter vim habebat; ut qui neque populi jussu, neque auctoribus Patribus regnaret. Eo accedebat, ut in caritate civium nihil spei reponenti, metu regnum tutandum esset: quem ut pluribus incuteret, cognitiones ca-

pitalium rerum sine consiliis per se solus exercebat: perque eam causam occidere, in exilium agere, bonis multare poterat non suspectos modo aut invisos, sed unde nihil aliud, quam prædam, sperare posset. Ita Patrum præcipue numero imminuto, statuit nullos in Patres legere; quo contemptior paucitate ipsa ordo esset, minusque per se nihil agi indignarentur. Hic enim regum primus traditum a prioribus morem de omnibus senatum consulendi solvit: domesticis consiliis rempublicam administravit: bellum, pacem, fœdera, societates per se ipse, cum quibus voluit, injussu populi ac senatus, fecit, diremitque. Latinorum sibi maxime gentem conciliabat, ut peregrinis quoque opibus tutior inter cives esset. neque hospitia modo cum primoribus eorum, sed affinitates quoque, jungebat. Octavio Mamilio Tusculano, (is longe princeps Latini nominis erat, si famæ credimus, ab Ulixæ Deaque Cîrce oriundus) ei Mamilio filiam nuptum dat; perque eas nuptias multos sibi cognatos amicosque ejus conciliat.

L. Jam magna Tarquinii auctoritas inter Latinorum proceres erat; cum, in diem certam ut ad lucum Ferentinæ conveniant, indicit: esse, quæ agere de rebus communibus velit. Conveniunt frequentes prima luce. ipse Tarquinius diem quidem servavit; sed paulo ante, quam sol occideret, venit. Multa ibi tota die in concilio variis jactata sermonibus erant. Turnus Herdonius ab Aricia ferociter in absentem Tarquinium erat inventus; *Haud mirum esse Superbo inditum Romæ cognomen.*

(jam enim ita clam quidem mussitantes, vulgo tamen, eum appellabant.) *An quidquam superbius esse, quam ludificari sic omne nomen Latinum? Principibus longe ab domo excitis, ipsum, qui concilium indixerit, non adesse. tentari profecto patientiam, ut, si jugum acceperint, obnoxios premat. Cui enim non apparere, affectare eum imperium in Latinos? Quod si sui bene crediderint cives, aut si creditum illud, & non raptum parricidio sit, credere & Latinos (quanquam ne sic quidem alienigenæ) debere. Sin suos ejus pœniteat, (quippe qui alii super alios trucidentur, exsulatum eant, bona amittant,) quid spei melioris Latinis portendi? Si se audiant, domum suam quemque inde abituros; neque magis observaturos diem concilii, quam ipse, qui indixerit, observet. Hæc atque alia eodem pertinentia feditiosus facinorosusque homo, hisque artibus opes domi nactus, cum maxime differeret, intervenit Tarquinius. Is finis orationi fuit. Aversi omnes ad Tarquinium salutandum. qui, silentio facto, monitus a proximis, ut purgaret se, quod id temporis venisset, *Disceptatorem*, ait, *se sumtum inter patrem & filium: cura reconciliandi eos in gratiam moratum esse: &, quia ea res exemisset illum diem, postero die acturum, quæ constituisset. Ne id quidem ab Turno tulisse tacitum ferunt. dixisse enim, Nullam breviorē esse cognitionem, quam inter patrem & filium, paucisque transigi verbis posse: ni pareat patri, habiturum infortunium esse.**

LI. Hæc Aricinus in regem Romanum increpans ex concilio abiit. Quam rem Tarquinius aliquanto, quam videbatur, ægrius ferens, confestim Tur-

no necem machinatur; ut eundem terrorem, quo civium animos domi oppresserat, Latinis injiceret. & quia pro imperio palam interfici non poterat, oblato falso crimine infontem oppressit. Per adversæ factionis quosdam Aricinos servum Turni auro corrupit, ut in deversorium ejus vim magnam gladiatorum inferri clam sineret. ea cum una nocte perfecta essent, Tarquinius, paulo ante lucem accitis ad se principibus Latinorum, quasi re nova perturbatus, *Moram suam hesternam, velut Deorum quadam providentia illatam, ait, saluti sibi atque illis fuisse. ab Turno dici sibi & primoribus populorum parari necem, ut Latinorum solus imperium teneat. Aggressurum fuisse hesterno die in concilio. dilatam rem esse, quod auctor concilii afuerit, quem maxime peteret. Inde illam absentis infestationem esse natam, quod morando spem destituerit. Non dubitare, si vera deserantur, quin prima luce, ubi ventum in concilium sit, instructus cum conjuratorum manu armatusque venturus sit. Dici, gladiatorum ingentem numerum esse ad eum convectum. id vanum necne sit, extemplo sciri posse. Rogare eos, ut inde secum ad Turnum veniant.* Suspectam fecit rem & ingenium Turni ferox, & oratio hesternæ, & mora Tarquini; quod videbatur ob eam differri cædes potuisse. Eunt inclinatis quidem ad credendum animis, tamen, nisi gladii deprehensis, cetera vana existimaturi. Ubi est eo ventum, Turnum ex somno excitatum circumstant custodes: comprehensisque servis, qui caritate domini vim parabant, cum gladii abditi ex omnibus locis deverticuli protraherentur; enimvero

manifesta res viva, injectæque Turno catenæ: & confestim Latinorum concilium magno cum tumultu advocatur. Ibi tam atrox invidia orta est, gladiis in medio positis, ut, indicta causa, novo genere leti, dejectus ad caput aquæ Ferentinæ, crate superne injecta saxisque congestis, mergeretur.

LII. Revocatis deinde ad concilium Latinis, Tarquinius, collaudatisque, qui Turnum novantem res pro manifesto parricidio merita pœna affecissent, ita verba fecit: *Posse quidem se vetusto jure agere, quod, cum omnes Latini ab Alba oriundi sint, in eo fœdere teneantur, quo ab Tullo res omnis Albanæ cum colonis suis in Romanum cesserit imperium. Ceterum se utilitatis id magis omnium causa censere, ut renovetur id fœdus; secundaque potius fortuna populi Romani ut participes Latini fruantur, quam urbium excidia vastationesque agrorum, quas Anco prius, patre deinde suo regnante, perpessi sint, semper aut exspectent, aut patiantur.* Haud difficulter persuasum Latinis, quanquam in eo fœdere superior Romana res erat. ceterum & capita nominis Latini stare ac sentire cum rege videbant, & Turnus sui cuique periculi, si adversatus esset, recens erat documentum. Ita renovatum fœdus; indictumque junioribus Latinorum, ut ex fœdere die certa ad lucum Ferentinæ armati frequentes adessent. Qui ubi ad edictum Romani regis ex omnibus populis convenere; ne ducem suum, neve secretum imperium, propriave signa haberent, miscuit manipulos ex Latinis Romanisque, ut ex binis singulos faceret,

binosque ex singulis. ita geminatis manipulis centuriones imposuit.

LIII. Nec, ut injustus in pace rex, ita dux belli pravus fuit. quin ea arte æquasset superiores reges, ni degeneratum in aliis huic quoque decori officisset. Is primus Volscis bellum in ducentos amplius post suam ætatem annos movit, Sueffamque Pometiam ex his vi cepit. ubi cum dividenda præda quadringenta talenta argenti auriq̄ue refecisset; concepit animo eam amplitudinem Jovis templi, quæ digna Deûm hominumque rege, quæ Romano imperio, quæ ipsius etiam loci majestate esset. Captivam pecuniam in ædificationem ejus templi seposuit. Exceptit deinde eum lentius spe bellum, quo Gabios, propinquam urbem, nequidquam vi adortus, cum obsidendi quoque urbem spes pulso a mœnibus adempta esset, postremo minime arte Romana, fraude ac dolo, aggressus est. nam cum, velut posito bello, fundamentis templi jaciendis aliisque urbanis operibus intentum se esse simularet; Sextus filius ejus, qui minimus ex tribus erat, transfugit ex composito Gabios, patris in se sævitiam intolerabilem conquerens: *Jam ab alienis in suos vertisse superbiam: & liberorum quoque eum frequentiæ tædere; ut, quam in curia solitudinem fecerit, domi quoque faciat: ne quam stirpem, ne quem heredem regni relinquat. Se quidem, inter tela & gladios patris clapsum, nihil usquam sibi tutum, nisi apud hostes L. Tarquinii, credidisse. Nam, ne errarent, manere his bellum, quod positum simuletur; & per occasionem eum incautos invasurum. Quod si apud eos sup-*

plicibus locus non sit, pererraturum se omne Latium: Volscoſque ſe inde, & Æquos, & Hernicos petiturum; donec ad eos perveniat, qui a patrum crudelibus atque impiis ſuppliciis tegere liberos ſciant. Forſitan etiam ardoris aliquid ad bellum armaque ſe adverſus ſuperbiſſimum regem ac ferociſſimum populum inventurum. Cum, ſi nihil morarentur, inſenſus ira porro inde abiturus videretur; benigne ab Gabinis excipitur. vetant mirari, ſi, qualis in cives, qualis in focios, talis ad ultimum in liberos eſſet. In ſe ipſum poſtremo ſæviturum, ſi alia deſint. Sibi vero gratum adventum ejus eſſe: futurumque credere brevi, ut, illo adjuvante, ab portis Gabinis ſub Romana mœnia bellum transferatur.

LIV. Inde in concilia publica adhiberi. ubi, cum de aliis rebus aſſentire ſe veteribus Gabinis diceret, quibus hæ notiores eſſent; ipſe identidem belli auctor eſſe, in eo ſibi præcipuam prudentiam aſſumere, quod utriuſque populi vires noſſet, ſciretque, inviſam proſecto ſuperbiam regiam civibus eſſe, quam ferre ne liberi quidem potuiſſent. Ita cum ſenſim ad rebellandum primores Gabinorum incitaret, ipſe cum promptiſſimis juvenum prædatum atque in expeditiones iret, & dictis factiſque omnibus ad fallendum inſtructis vana accreſceret fides; dux ad ultimum belli legitur. Ibi cum, inſcia multitudine quid ageretur, prælia parva inter Romam Gabiosque fierent, quibus plerumque Gabina res ſuperior eſſet; tum certatim ſummi inſimique Gabinorum Sextum Tarquinium dono Deum ſibi miſſum ducem credere. Apud milites

vero obeundo pericula ac labores, pariter prædam munifice largiendo, tanta caritate esse, ut non pariter Tarquinius potentior Romæ, quam filius Gabiis esset. Itaque, postquam fatis virium collectum ad omnes conatus videbat; tum e suis unum sciscitatum Romam ad patrem mittit, quidnam se facere vellet, quandoquidem, ut omnia unus Gabiis posset, ei Dii dedissent. Huic nuntio, quia, credo, dubiæ fidei videbatur, nihil voce responsum est. rex, velut deliberabundus, in hortum ædium transit, sequente nuntio filii: ibi, inambulans tacitus, summa papaverum capita dicitur baculo decussisse. Interrogando expectandoque responsum nuntius fessus, ut re imperfecta, redit Gabios; quæ dixerit ipse, quæque viderit, refert. seu ira, seu odio, seu superbia insita ingenio, nullam eum vocem emisisse. Sexto ubi, quid vellet parens, quidve præciperet tacitis ambagibus, patuit; primores civitatis, criminando alios apud populum, alios sua ipsos invidia opportunos interemit. multi palam; quidam, in quibus minus speciosa criminatio erat futura, clam interfecti. Patuit quibusdam volentibus fuga, aut in exilium acti sunt, absentiumque bona juxta atque interentorum divisui fuisse. Largitionis inde prædæque & dulcedine privati commodi, sensus malorum publicorum adimi; donec, orba consilio auxilioque, Gabina res regi Romano sine ulla dimicatione in manum traditur.

LV. Gabiis receptis, Tarquinius pacem cum Æquorum gente fecit: foedus cum Tuscis renovavit. Inde ad negotia urbana animum convertit.

quorum erat primum, ut Jovis templum in monte Tarpejo, monumentum regni sui nominisque, relinqueret: Tarquinius reges ambos, patrem voluisse, filium perfecisse. Et, ut libera a ceteris religionibus area esset tota Jovis templique ejus, quod inædificaretur; exaugurare fana sacellaque statuit, quæ aliquot ibi a Tatio rege, primum in ipso discrimine adversus Romulum pugnae vota, consecrata, inaugurataque postea fuerant. Inter principia condendi hujus operis movisse numen ad indicandam tanti imperii molem traditur Deos: nam, cum omnium sacellorum exaugurationes admitterent aves, in Termini fano non addixere. Id omen auguriumque ita acceptum est: non motam Termini sedem, unumque eum Deorum non evocatum sacratis sibi finibus, firma stabiliaque cuncta portendere. Hoc perpetuitatis auspicio accepto, secutum aliud, magnitudinem imperii portendens, prodigium est. caput humanum integra facie aperientibus fundamenta templi dicitur apparuisse. Quæ visa species, haud per ambages, arcem eam imperii caputque rerum fore portendebat: idque ita cecinere vates, qui que in urbe erant, quosque ad eam rem consultandam ex Etruria acciverant. Augebatur ad impensas regis animus. Itaque Pometinæ manubiæ, quæ perducendo ad culmen operi destinatae erant, vix in fundamenta suppeditavere. eo magis Fabio, præterquam quod antiquior est, crediderim, quadringenta ea sola talenta fuisse, quam Pisoni, qui quadraginta millia pondo argenti seposita in eam rem scribit, summam pecuniæ

neque ex unius tum urbis præda sperandam, & nullius, ne horum quidem magnificentiae operum, fundamenta non exsuperaturam.

LVI. Intentus perficiendo templo, fabris undique ex Etruria accitis, non pecunia solum ad id publica est usus, sed operis etiam ex plebe. qui cum haud parvus & ipse militiae adderetur labor, minus tamen plebs gravabatur, se templa Deum exædificare manibus suis: quæ posthac & ad alia, ut specie minora, sic laboris aliquanto majoris, traducebatur opera; foros in circo faciendos, cloacamque maximam, receptaculum omnium purgamentorum urbis, sub terram agendam: quibus duobus operibus vix nova hæc magnificentia quidquam adæquare potuit. His laboribus exercita plebe, quia & urbi multitudinem, ubi usus non esset, oneri rebatur esse, & colonis mittendis occupari latius imperii fines volebat; Signiam Circeiosque colonos misit, præsidia urbi futura terra marique. Hæc agenti portentum terribile visum. anguis, ex columna lignea elapsus, cum terrorem fugamque in regiam fecisset, ipsius regis non tam subito pavore perculit pectus, quam anxiiis implevit curis. Itaque cum ad publica prodigia Etrusci tantum vates adhiberentur, hoc velut domestico exterritus visu, Delphos ad maxime inclitum in terris oraculum mittere statuit. neque responsa sortium ulli alii committere ausus, duos filios per ignotas ea tempestate terras, ignotiora maria, in Græciam misit. Titus & Aruns profecti. comes his additus L. Junius Brutus, Tarquinia sorore regis na-

tus, juvenis longe alius ingenio, quam cujus simulationem induerat. Is cum priores civitatis, in quibus fratrem suum, ab avunculo interfectum audisset; neque in animo suo quidquam regi timendum, neque in fortuna concupiscendum relinquere statuit, contemtuque tutus esse, ubi in jure parum præsidii esset. Ergo ex industria factus ad imitationem stultitiæ, cum se suaque prædæ esse regi fineret, Bruti quoque haud abnuvit cognomen: ut sub ejus obtentu cognominis liberator ille populi Romani animus latens opperiretur tempora sua. Is tum ab Tarquiniis ductus Delphos, ludibrium verius, quam comes, aureum baculum, inclusum corneo cavato ad id baculo, tulisse donum Apollini dicitur, per ambages effigiem ingenii sui. Quo postquam ventum est, perfectis patris mandatis, cupido incessit animos juvenum sciscitandi, ad quem eorum regnum Romanum esset venturum. Ex infimo specu vocem redditam ferunt: *Imperium summum Romæ habebit, qui vestrum primus, o juvenes, osculum matri tulerit.* Tarquinius, ut Sextus, qui Romæ relictus fuerat, ignarus responsi experisque imperii esset, rem summa ope taceri jubent; ipsi inter se, uter prior, cum Romam redissent, matri osculum daret, forti permittunt. Brutus, alio ratus spectare Pythicam vocem, velut si prolapsus cecidisset, terram osculo contigit: scilicet, quod ea communis mater omnium mortalium esset. Rediit inde Romam, ubi adversus Rutulos bellum summa vi parabatur.

LVII. Ardeam Rutuli habebant, gens, ut in ea

regione atque in ea ætate, divitiis præpollens. ea-
 que ipsa causa belli fuit, quod rex Romanus tum
 ipse ditari, exhaustus magnificentia publicorum ope-
 rum, tum præda delinire popularium animos stu-
 debat; præter aliam superbiam regno infestos etiam,
 quod se in fabrorum ministeriis ac servili tamdiu
 habitos opere ab rege indignabantur. Tentata res
 est, si primo impetu capi Ardea posset. ubi id pa-
 rum processit, obsidione munitionibusque cœpti
 premi hostes. In iis stativis, ut fit longo magis,
 quam acri bello, fatis liberi commeatus erant: pri-
 moribus tamen magis, quam militibus. Regii qui-
 dem juvenes interdum otium conviviiis comessa-
 tionibusque inter se terebant. forte potantibus his
 apud Sextum Tarquinium, ubi & Collatinus cœ-
 nabat Tarquinius, Egerii filius, incidit de uxori-
 bus mentio: suam quisque laudare miris modis.
 inde certamine accenso, Collatinus negat, *verbis*
opus esse; paucis id quidem horis posse sciri, quantum
ceteris præstet Lucretia sua. Quin, si vigor juventæ
inest, conscendimus equos, invisimusque præsentis no-
strarum ingenia? Id cuique spectatissimum sit, quod
nec opinato viri adventu occurrerit oculis. Incaluerant
 vino. *age sane, omnes. citatis equis avolant Ro-*
 mam. Quo cum, primis se intendentibus tenebris,
 pervenissent, pergunt inde Collatiam: ubi Lucre-
 tiam, haudquaquam ut regias nurus, quas in con-
 vivio luxuque cum æqualibus viderant tempus te-
 rentes, sed nocte fera deditam lanæ inter lucubran-
 tes ancillas in medio ædium sedentem inveniunt.
 Muliebris certaminis laus penes Lucretiam fuit. ad-

veniens vir Tarquiniique excepti benigne. victor maritus comiter invitat regios juvenes. Ibi Sextum Tarquinium mala libido Lucretiæ per vim stuprandæ capit. tum forma, tum spectata castitas incitat. Et tum quidem ab nocturno juvenili ludo in castra redeunt.

LVIII. Paucis interjectis diebus, Sextus Tarquinius, in scio Collatino, cum comite uno Collatiam venit. ubi exceptus benigne ab ignaris consilii, cum post cœnam in hospitale cubiculum deductus esset, amore ardens, postquam fatis tuta circa, sopitique omnes videbantur, stricto gladio ad dormientem Lucretiam venit, sinistraque manu mulieris pectore oppresso, *Tace Lucretia*, inquit, *Sextus Tarquinius sum: ferrum in manu est: moriere, si miseris vocem*. Cum pavida ex somno mulier nullam opem, prope mortem imminentem, videret; tum Tarquinius fateri amorem, orare, miscere precibus minas, versare in omnes partes muliebrem animum. ubi obstinatum videbat, & ne mortis quidem metu inclinari, addit ad metum dedecus: cum mortua jugulatum servum nudum positurum, ait, ut in fordido adulterio necata dicatur. Quo terrore cum vicisset obstinatum pudicitiam velut victrix libido, profectusque inde Tarquinius, ferox expugnato decore muliebri esset; Lucretia, mœsta tanto malo, nuntium Romam eundem ad patrem, Ardeamque ad virum mittit, ut cum singulis fidelibus amicis veniant: ita facto maturatoque opus esse; rem atrocem incidisse. Sp. Lucretius cum P. Valerio Volesi filio, Collatinus cum L. Junio Bru-

to venit; cum quo forte Romam rediens ab nuntio uxoris erat conventus. Lucretiam sedentem mœstam in cubiculo inveniunt. adventu suorum lacrimæ obortæ: quærentique viro, *Satin' salvæ? Minime*, inquit: *quid enim salvi est mulieri, amissa pudicitia? Vestigia viri alieni, Collatine, in lecto sunt tuo. Ceterum corpus est tantum violatum, animus infons. mors testis erit. Sed date dextras fidemque, haud impune adultero fore. Sextus est Tarquinius, qui hostis pro hospite priore nocte vi armatus mihi sibi que, si vos viri estis, pestiferum hinc abstulit gaudium. Dant ordine omnes fidem: consolantur ægram animi, avertendo noxam ab coacta in auctorem delicti. mentem peccare, non corpus: &, unde consilium afuerit, culpam abesse. Vos, inquit, videritis, quid illi debeat: ego me, etsi peccato absolvo, supplicio non libero. nec ulla deinde impudica Lucretiæ exemplo vivet. Cultrum, quem sub veste abditum habebat, eum in corde defigit: prolapsaque in vulnus, moribunda cecidit. Conclamant vir paterque.*

LIX. Brutus, illis luctu occupatis, cultrum, ex vulnere Lucretiæ extractum, manantem cruore præ se tenens, *Per hunc*, inquit, *castissimum ante regiam injuriam sanguinem juro, vosque, Dii, testes facio, me L. Tarquinium Superbum, cum scelerata conjugè & omni liberorum stirpe, ferro, igni, quacunque dehinc vi possim, exsecuturum: nec illos, nec alium quenquam regnare Romæ passurum.* Cultrum deinde Collatino tradit; inde Lucretio ac Valerio, stupentibus miraculo rei, unde novum in Bruti pectore ingenium. Ut præceptum erat, jurant: totique ab

luctu versi in iram, Brutum, jam inde ad expug-
 nandum regnum vocantem, sequuntur ducem. Ela-
 tum domo Lucretiæ corpus in forum deferunt, con-
 cientque miraculo, ut fit, rei novæ atque indigni-
 tate homines: pro se quisque scelus regium ac vim
 queruntur. Movet tum patris mœstitia, tum Brutus,
 castigatior lacrimarum atque inertium querelarum,
 auctorque, quod viros, quod Romanos deceret,
 arma capiendi adversus hostilia ausos. Ferocissimus
 quisque juvenum cum armis voluntarius adest. se-
 quitur & cetera juvenus. Inde, pari præsidio re-
 licto Collatiæ ad portas, custodibusque datis, ne
 quis eum motum regibus nuntiaret, ceteri armati,
 duce Bruto, Romam profecti. Ubi eo ventum est,
 quacunq̃ue incedit, armata multitudo pavorem ac
 tumultum facit. rursus, ubi anteire primores ci-
 vitatis vident, quidquid sit, haud temere esse ren-
 tur. Nec minorem motum animorum Romæ tam
 atrox res facit, quam Collatiæ fecerat. Ergo ex om-
 nibus locis urbis in forum curritur. Quo simul ven-
 tum est, præco ad tribunum Celerum, in quo tum
 magistratu forte Brutus erat, populum advocavit.
 Ibi oratio habita, nequaquam ejus pectoris ingenii-
 que, quod simulatum ad eam diem fuerat, de vi ac
 libidine Sexti Tarquini, de stupro infando Lucre-
 tiæ & miserabili cæde, de orbitate Tricipitini, cui
 morte filiæ causa mortis indignior ac miserabilior
 esset. addita superbia ipsius regis, miseræque &
 labores plebis, in fossas cloacasque exhauriendas
 demersæ. Romanos homines, victores omnium cir-
 ca populorum, opifices ac lapidas pro bellatori-

bus factos. Indigna Servii Tullii regis memorata cædes, & inuenta corpori patris nefando vehiculo filia; invocatique ultores parentum Dii. His atrocioribusque, credo, aliis, quæ præsens rerum indignitas haudquaquam relatu scriptoribus facilia subjicit, memoratis, incensam multitudinem perpulit, ut imperium regi abrogaret, exfulesque esse juberet L. Tarquinius cum conjuge ac liberis. Ipse, junioribus, qui ultro nomina dabant, lectis armatisque, ad concitandum inde adversus regem exercitum Ardeam in castra est profectus; imperium in urbe Lucretio, præfecto urbis jam ante ab rege instituto, relinquit. Inter hunc tumultum Tullia domo profugit, execrantibus, quacunque incedebat, invocantibusque parentum furias viris mulieribusque.

LX. Harum rerum nuntiis in castra perlatis, cum re nova trepidus rex pergeret Romam ad comprimendos motus, flexit viam Brutus, (senferat enim adventum) ne obvius fieret; eodemque fere tempore, diversis itineribus, Brutus Ardeam, Tarquinius Romam, venerunt. Tarquinio clausæ portæ, exfiliumque indictum: liberatorem urbis læta castra accepere; exactique inde liberi regis. Duo patrem secuti sunt, qui exsulatum Cære in Etruscos ierunt. Sextus Tarquinius Gabios, tanquam in suum regnum, profectus, ab ultoribus veterum simultatum, quas sibi ipse cædibus rapinisque conciverat, est interfectus. L. Tarquinius Superbus regnavit annos quinque & viginti. Regnatum Romæ ab condita urbe ad liberatam an-

nos ducentos quadraginta quatuor. Duo consules inde comitiis centuriatis a præfecto urbis ex commentariis Servii Tullii creati sunt, L. Junius Brutus & L. Tarquinius Collatinus.

TITI LIVII PATAVINI
HISTORIARUM

AB URBE CONDITA

LIBER II.

EPITOME

LIBRI SECUNDI.

Brutus jurejurando populum adstrinxit, neminem regnare Romæ passuros: Tarquinius Collatinum, collegam suum, propter affinitatem Tarquiniorum suspectum, coegit consulatu se abdicare, & civitate cedere. bona regum diripi jussit: agrum Marti consecravit, qui Campus Martius nominatus est. adolescentes nobiles, in quibus suos quoque & sororis filios, quia conjuraverant de recipiendis regibus, securi percussit. servo indici, cui Vindicio nomen fuit, libertatem dedit: ex cujus nomine vindicta est appellata. Cum adversus reges, qui, contractis Vejentium & Tarquiniensium copiis, bellum intulerant, exercitum duxisset, in acie cum Arunte, filio Superbi, commortuus est: cumque matronæ annum luxerunt. P. Valerius consul legem de provocatione ad populum tulit. Capitolium dedicatum est. Porsena, rex Clusinarum, bello pro Tarquiniis suscepto, cum ad Janiculum venisset, ne Tiberim transfret, virtute Cocclitidis Horatii prohibitus est: qui, dum alii pontem sub-

licium rescindunt, solus Etruscos sustinuit; &, ponte rupto, armatus se in flumen misit, & ad suos tranavit. Alterum accessit virtutis exemplum a Mucio: qui, cum ad ferendum Porfenam castra hostium intrasset, occiso scriba, quem regem esse putabat, comprehensus, impositam altaribus manum, in quibus sacrificatum erat, exuri passus est; dixitque, tales trecentos esse conjuratos in mortem ipsius regis. quorum admiratione coactus Porfena pacis condiciones ferre, bellum omisit, acceptis obsidibus. ex quibus virgo una Clœlia, deceptis custodibus, per Tiberim ad suos tranavit: &, cum reddita esset, a Porfena honorifice remissa, equestri statua donata est. Ap. Claudius ex Sabinis Romam transfugit: ob hoc Claudia tribus adjecta est. Numerus trium ampliatum est, ut essent viginti una. Adversus Tarquinium Superbum, cum Latinorum exercitu bellum inferentem, A. Postumius dictator prospere pugnavit apud lacum Regillum. Plebs, cum propter nexos ob æs alienum in Sacrum montem secessisset, consilio Menenii Agrippæ a seditione revocata est. Idem Agrippa, cum decessisset, propter paupertatem publico impendio elatus est. Tribuni plebis quinque creati sunt. Oppidum Volscorum Corioli captum est virtute & opera C. Marcii, qui ob hoc Coriolanus vocatus est. Ti. Atinius, vir de plebe, cum in visu admonitus esset, ut de quibusdam religionibus ad senatum perferret, & neglexisset, amisso filio, debilis factus, postquam, delatus ad senatum lectica, eadem illa indicaverat, usu pedum recepto, domum reversus est. Cum C. Marcius Coriolanus, qui in exsilium erat pulsus, dux Volscorum factus, exercitum hostium urbi Romæ admovisset, & missi ad eum primum legati, postea sacerdotes frustra deprecari essent, ne bellum patriæ inferret; Veturia mater & Volunnia uxor impetraverunt ab eo, ut recederet. Lex agraria primum lata est. Sp. Cassius consularis regni crimine damnatus est

necatufque. Oppia, virgo Vestalis, ob incestum viva defossa est. Cum vicini hostes Vejentes incommodi magis, quam graves, essent, familia Fabiorum id bellum gerendum depoposcit; misitque in id trecentos sex armatos, qui ad Cremeram ad unum ab hostibus cæsi sunt, uno impubere domi relicto. Ap. Claudius consul, cum adversus Volscos contumacia exercitus male pugnatum esset, decimum quemque militum fuste percussit. Res præterea adversum Volscos & Æquos, & Vejentes, & seditiones inter Patres plebemque continet.

I. **L**IBERI jam hinc populi Romani res, pace belloque gestas, annuos magistratus, imperiaque legum, potentiora quam hominum, peragam. Quæ libertas ut lætior esset, proximi regis superbia fecerat. nam priores ita regnarunt, ut haud immerito omnes deinceps conditores partium certe urbis, quas novas ipsi sedes ab se auctæ multitudini addiderunt, numerentur. neque ambigitur, quin Brutus idem, qui tantum gloriæ, Superbo exacto rege, meruit, pessimo publico id facturus fuerit, si libertatis immaturæ cupidine priorum regum alicui regnum extorsisset. Quid enim futurum fuit, si illa pastorum convenarumque plebs, transfuga ex suis populis, sub tutela inviolati templi aut libertatem, aut certe impunitatem adepta, soluta regio metu, agitari cœpta esset tribuniciis procellis? & in aliena urbe cum Patribus ferere certamina, priusquam pignora conjugum ac liberorum caritasque ipsius soli, cui longo tempore assuescitur, animos eorum consociasset? Dissipatæ res non-

dum adultæ discordia forent: quas fovit tranquilla moderatio imperii, eoque nutriendo perduxit, ut bonam frugem libertatis maturis jam viribus ferre possent. Libertatis autem originem inde magis, quia annum imperium consulare factum est, quam quod deminutum quidquam sit ex regia potestate, numeres. Omnia jura, omnia insignia primi consules tenere. id modo cautum est, ne, si ambo fasces haberent, duplicatus terror videretur. Brutus prior, concedente collega, fasces habuit: qui non acrior vindex libertatis fuerat, quam deinde custos fuit. Omnium primum avidum novæ libertatis populum, ne postmodum flecti precibus aut donis regiis posset, jurejurando adegit, neminem Romæ passuros regnare. Deinde, quo plus virium in senatu frequentia etiam ordinis faceret, cædibus regis deminutum Patrum numerum, primoribus equestris gradus lectis, ad trecentorum summam explevit. traditumque inde fertur, ut in senatum vocarentur, qui Patres, quique conscripti essent. conscriptos, videlicet, in novum senatum appellabant lectos. Id mirum quantum profuit ad concordiam civitatis, jungendosque Patribus plebis animos.

II. Rerum deinde divinarum habita cura. &, quia quædam publica sacra per ipsos reges factitata erant, ne ubiubi regum desiderium esset, regem sacrificulum creant. Id sacerdotium pontifici subjecere, ne additus nomini honos aliquid libertati, cujus tunc prima erat cura, officeret. ac nescio, an, nimis undique eam minimis quoque rebus muniendo, modum excefferint. Consulibus

enim alterius, cum nihil aliud offenderit, nomen invisum civitati fuit. *Nimum Tarquinius regno af-
suesse. initium a Prisco factum. Regnasse deinde Ser.
Tullium. ne intervallo quidem facto oblitum tanquam
alieni regni Superbum Tarquinium, velut hereditatem
gentis scelere ac vi repetisse. Pulso Superbo, penes
Collatinum imperium esse. Nescire Tarquinius priva-
tos vivere. non placere nomen. periculosum libertati
esse.* Hic primo sensum tentantium animos fermo, per
totam civitatem est datus; sollicitamque suspicio-
ne plebem Brutus ad concionem vocat. Ibi om-
nium primum jusjurandum populi recitat: *Nemi-
nem regnare passuros, nec esse Romæ, unde periculum
libertati foret. Id summa ope tuendum esse: neque ul-
lam rem, quæ eo pertineat, contemnendam. Invitum
se dicere hominis causa: nec dicturum fuisse, ni ca-
ritas reipublicæ vinceret. Non credere populum Ro-
manum, solidam libertatem recuperatam esse. Regium
genus, regium nomen, non solum in civitate, sed etiam
in imperio esse. Id officere, id obstare libertati. Hunc
tu, inquit, tua voluntate, L. Tarquini, remove me-
tum. Meminimus, fatemur, ejecisti reges. Absolve be-
neficiū tuum. Aufer hinc regium nomen. Res tuas
tibi non solum reddent cives tui, auctore me; sed, si
quid deest, munifice augebunt. Amicus abi. exonera
civitatem vano forsitan metu. Ita persuasum est ani-
mis, cum gente Tarquinia regnum hinc abiturum. Con-
suli primo tam novæ rei ac subitæ admiratio in-
cluserat vocem. Dicere deinde incipientem primo-
res civitatis circumfistunt, eadem multis precibus
orant. Et ceteri quidem movebant minus. post-*

quam Sp. Lucretius, major ætate ac dignitate, focer præterea ipsius, agere varie, rogando alternis suadendoque, cœpit, ut vinci se consensu civitatis pateretur; timens consul, ne postmodum privato sibi eadem illa cum bonorum amissione, additaque alia insuper ignominia, acciderent, abdicavit se consulatu: rebusque suis omnibus Lavinium translatis, civitate cessit. Brutus ex senatus-consulto ad populum tulit, ut omnes Tarquinia gentis exsules essent: collegam sibi comitiis centuriatis creavit P. Valerium, quo adjutore reges ejecerat.

III. Cum haud cuiquam in dubio esset, bellum ab Tarquiniis imminere, id quidem spe omnium ferius fuit. ceterum, id quod non timebant, per dolum ac proditionem prope libertas amissa est. Erant in Romana juventute adolescentes aliquot, nec in tenui loco orti, quorum in regno libido solutior fuerat, æquales sodalesque adolescentium Tarquiniorum, assueti more regio vivere. Eam tum, æquato jure omnium, licentiam quærentes, libertatem aliorum in suam vertisse servitatem inter se conquerebantur. *Regem hominem esse, a quo impetres, ubi jus, ubi injuria opus sit: esse gratiæ locum, esse beneficio; & irasci & ignoscere posse: inter amicum atque inimicum discrimen nosse. Leges rem surdam, inexorabilem esse, salubriorem melioremque inopi, quam potenti: nihil laxamenti nec veniæ habere, si modum excefferis. periculosum esse, in tot humanis erroribus sola innocentia vivere.* Ita, jam sua sponte ægris animis, legati ab regibus superve-

niunt, sine mentione reditus bona tantum repentes. eorum verba postquam in senatu audita sunt, per aliquot dies ea consultatio tenuit: ne non redita, belli causa; reddita, belli materia & adjuvmentum essent. Interim legati alii alia moliri, aperte bona repentes, clam recuperandi regni consilia struere: &, tanquam ad id, quod agi videbatur, ambientes nobilium adolescentium animos pertentant. a quibus placide oratio accepta est, his literas ab Tarquiniis reddant; & de accipiendis clam nocte in urbem regibus colloquantur.

IV. Vitelliis Aquilliisque fratribus primo commissa res est. Vitelliorum soror consuli nupta Bruto erat: jamque ex eo matrimonio adolescentes erant liberi, Titus Tiberiusque. eos quoque in societatem consilii avunculi assumunt. præterea & nobiles aliquot adolescentes conscii assumti, quorum vetustate memoria abiit. Interim cum in senatu vicisset sententia, quæ censebat reddenda bona; eamque ipsam causam moræ in urbe haberent legati, quod spatium ad vehicula comparanda a consulibus sumfissent, quibus regum asportarent res; omne id tempus cum conjuratis consultando absumunt, evincuntque instando, ut literæ sibi ad Tarquinos darentur: nam aliter qui credituros eos, non vana ab legatis super rebus tantis afferri? Datæ literæ, ut pignus fidei essent, manifestum facinus fecerunt. nam cum, pridie quam legati ad Tarquinos proficiscerentur, & coenatum forte apud Vitellios effet, conjuratique ibi, remotis arbitris, multa inter se de novo, ut sit, consilio egissent;

fermonem eorum ex servis unus excepit, qui jam antea id senserat agi: sed eam occasionem, ut literæ legatis darentur, quæ deprehensæ rem coarguere possent, exspectabat. postquam datas sensit, rem ad consules detulit. Consules, ad deprehendendos legatos conjuratosque profecti domo, sine tumultu rem omnem oppressere: literarum inprimis habita cura, ne interciderent. Proditoribus extemplo in vincula coniectis, de legatis paululum addubitatum est: & quanquam visi sunt commisisse, ut hostium loco essent, jus tamen gentium valuit.

V. De bonis regiis, quæ reddi ante censuerant, res integra refertur ad Patres. illi victi ira vetuere reddi, vetuere in publicum redigi. Diripienda plebi sunt data; ut, contacta regia præda, spem in perpetuum cum his pacis amitteret. Ager Tarquiniorum, qui inter urbem ac Tiberim fuit, consecratus Marti, Martius deinde campus fuit. Forte ibi tum seges farris dicitur fuisse matura messi. quem campi fructum quia religiosum erat consumere, defectam cum stramento segetem magna vis hominum simul immissa corbibus fudere in Tiberim, tenui fluentem aqua, ut mediis caloribus solet. ita in vadis hæsitantis frumenti acervos sedisse illitos limo. Insulam inde paulatim, & aliis, quæ fert temere flumen, eodem investis, factam. postea credo additas moles, manuque adjutum, ut tam eminens area, firmaque templis quoque ac porticibus sustinendis esset. Direptis bonis regum, damnati proditores, sunt unque supplicium, con-

ſpectius eo, quod poenæ capiendæ miniſterium patri de liberis conſulatus impoſuit, &, qui ſpectator erat amovendus, eum ipſum fortuna exactorem ſupplicii dedit. Stabant deligati ad palum nobiliſſimi juvenes. ſed a ceteris, velut ab ignotis capitibus, conſulis liberi omnium in ſe averterant oculos: miſerebatque non poenæ magis homines, quam ſceleris, quo poenam meriti eſſent; illos eo potiffimum anno, patriam liberatam, patrem liberatorem, conſulatum ortum ex domo Junia, Patres, plebem, quidquid Deorum hominumque Romanorum eſſet, induxiſſe in animum, ut Superbo quondam regi, tum infeſto exfuli, proderent. Conſules in ſedem proceſſere ſuam, miſſique liſtores ad ſumendum ſupplicium, nudatos virgis cædunt, ſecurique feriunt: cum inter omne tempus pater, vultusque & os ejus, ſpectaculo eſſet, eminente animo patrio inter publicæ poenæ miniſterium. Secundum poenam nocentium, ut in utramque partem arcendis ſceleribus exemplum nobile eſſet, præmium iudici, pecunia ex ærario, libertas & civitas, data. Ille primum dicitur vindicta liberatus. quidam vindictæ quoque nomen tractum ab illo putant; Vindicio ipſi nomen fuiſſe. Poſt illum obſervatum, ut, qui ita liberati eſſent, in civitatem accepti viderentur.

VI. His, ſicut acta erant, nuntiatis, incenſus Tarquinius non dolore ſolum tantæ ad irritum cadentis ſpei, ſed etiam odio iraque, poſtquam dolum obſeptam vidit, bellum aperte moliendum ratus, circumire ſupplex Etruriæ urbes; orare maxi-

me Veientes Tarquinienſeſque, *Ne ſe ortum, ejuſdem ſanguinis, extorrem, egentem, ex tanto modo regno, cum liberis adoleſcentibus ante oculos ſuos perire ſinerent. Alios peregre in regnum Romam accitos: ſe regem, augentem bello Romanum imperium, a proximis ſcelerata conjuratione pulſum, eos inter ſe, quia nemo unus ſatis dignus regno viſus ſit, partes regni rapuiſſe; bona ſua diripienda populo dediſſe, ne quis expers ſcleris eſſet. Patriam ſe regnumque ſuum repetere, & perſequi ingratos cives velle. Ferrent opem, adjuvarent; ſuas quoque veteres injurias ultum irent, toties caſas legiones, agrum ademtum.* Hæc moverunt Veientes: ac pro ſe quiſque, Romano ſaltem duce, ignominias demendas, belloque amiſſa repetenda, minaciter fremunt. Tarquinienſes nomen ac cognatio movet. pulchrum videbatur, ſuos Romæ regnare. Ita duo duarum civitatum exercitus, ad repetendum regnum belloque perſequendos Romanos, ſecuti Tarquiniū. Poſtquam in agrum Romanum ventum eſt, obviam hoſti conſules eunt. Valerius quadrato agmine peditem ducit: Brutus ad explorandum cum equitatu anteceſſit. Eodem modo primus eques hoſtium agminis fuit. Præerat Aruns Tarquinius, filius regis. Rex ipſe cum legionibus ſequebatur. Aruns, ubi ex liſtoribus procul conſulem eſſe, deinde jam propius ac certius faciæ quoque Brutum cognovit, inflammatus ira, *Ille eſt vir, inquit, qui nos extorres expulit patria. Ipſe, en, ille, noſtris decoratus inſignibus, magnifice incedit. Dii regum ultores adeſte!* Concitat calcaribus equum, atque in ipſum infeſtus conſulem

dirigit. Sensit in se iri Brutus. Decorum erat tum ipsis capeffere pugnam ducibus: avide itaque se certamini offert. adeoque infestis animis concurrerunt, neuter, dum hostem vulneraret, sui protegenti corporis memor, ut, contrario ictu per parmam uterque transfixus, duabus hærentes hastis moribundi ex equis lapsi sint. simul & cetera equestris pugna cœpit; neque ita multo post & pedites superveniunt. Ibi varia victoria, & velut æquò Marte pugnatum est. dextra utrinque cornua vincere, læva superata. Vejentes, vinci ab Romano milite assueti, fusi fugatique. Tarquiniensis, novus hostis, non stetit solum, sed etiam ab sua parte Romanum pepulit.

VII. Ita cum pugnatum esset, tantus terror Tarquinium atque Etruscos incessit, ut, omissa irritare, nocte ambo exercitus, Vejens Tarquiniensisque, suas quisque abirent domos. Adjiciunt miracula huic pugnae: silentio proximæ noctis ex silva Arfia ingentem editam vocem; Silvani vocem eam creditam; hæc dicta, *Uno plus Etruscorum cecidisse in acie: vincere bello Romanum*. Ita certe inde abiire Romani, ut victores; Etrusci pro victis. Nam, postquam illuxit, nec quisquam hostium in conspectu erat, P. Valerius consul spolia legit, triumphansque inde Romam rediit. collegæ funus, quantum potuit apparatu, fecit. sed multo majus morti decus publica fuit mœstitia, eo ante omnia insignis, quia matronæ annum, ut parentem, eum luxerunt, quod tam acer ultor violatæ pudicitiae fuisset. Consuli deinde, qui superfuerat, ut sunt

mutabiles vulgi animi, ex favore non invidia modo, sed suspicio etiam cum atroci crimine, orta. Regnum eum affectare, fama ferebat: quia nec collegam subrogaverat in locum Bruti, & ædificabat in summa Velia. ibi alto atque munito loco arcem inexpugnabilem fore. Hæc dicta vulgo creditaque cum indignitate angerent consulis animum, vocato ad concilium populo, submissis fascibus in concionem descendit. Gratum id multitudini spectaculum fuit; submissa sibi esse imperii insignia: confessionemque factam, populi, quam consulis, majestatem vimque majorem esse. Ubi audire jussi, consul laudare fortunam collegæ, *quod, liberata patria, in summo honore, pro republica dimicans, matura gloria, nec dum se vertente in invidiam, mortem occubuisse. se superstitem gloriæ sitæ ad crimen atque invidiam superesse: ex liberatore patriæ ad Aquillios se Vitelliosque recidisse. Nunquamne ergo, inquit, ulla adeo a vobis spectata virtus erit, ut suspicione violari nequeat? Ego me, illum acerrimum regum hostem, ipsum cupiditatis regni crimen subiturum timerem? Ego, si in ipsa arce Capitolioque habitarem, metui me crederem posse a civibus meis? Tam levi momento mea apud vos fama pendet? Adeone est fundata leviter fides, ut, ubi sum, quam qui sum, magis referat? Non obstabunt P. Valerii ædes libertati vestræ, Quirites: tuta erit vobis Velia. Deseram non in plenum modo ædes, sed colli etiam subjiciam: ut vos supra suspectum me civem habitetis. In Velia ædificent, quibus melius, quam P. Valerio, creditur libertas. Delata confestim materia omnis infra Veliam; &*

ubi nunc Vicæpotæ est , domus in infimo clivo ædificata.

VIII. Latæ deinde leges , non solum quæ regni suspicione consulem absolverent , sed quæ adeo in contrarium verterent , ut popularem etiam facerent. inde cognomen factum Publicolæ est. ante omnes de provocatione adversus magistratus ad populum , sacrandoque cum bonis capite ejus , qui regni occupandi consilia inisset , gratæ in vulgus leges fuere. Quas cum solus pertulisset , ut sua unius in his gratia esset , tum deinde comitia collegæ subrogando habuit. Creatus Sp. Lucretius consul , qui magno natu , non sufficientibus jam viribus ad consularia munera obeunda , intra paucos dies moritur. Suffectus in Lucretii locum M. Horatius Pulvillus. Apud quosdam veteres auctores non invenio Lucretium consulem. Bruto statim Horatium suggerunt. credo , quia nulla gesta res insignem fecerit consulatum , memoria intercidisse. Nondum dedicata erat in Capitolio Jovis ædes. Valerius Horatiusque consules sortiti , uter dedicaret. Horatio forte evenit. Publicola ad Vejentium bellum profectus. Ægrius , quam dignum erat , tulere Valerii necessarii , dedicationem tam incliti templi Horatio dari. id omnibus modis impedire conati , postquam alia frustra tentata erant , postem jam tenenti consuli fœdum inter precationem Deûm nuntium incutiunt : *Mortuum ejus filium esse , funestaque familiâ dedicare eum templum non posse.* Non crediderit factum , an tantum animo roboris fuerit , nec traditur certum , nec interpretatio est fa-

cilis. Nihil aliud ad eum nuntium a proposito aver-
sus, quam ut cadaver efferrî juberet, tenens postem,
precationem peragit, & dedicat templum. Hæc post
exactos reges domi militiæque gesta primo anno.
Inde P. Valerius iterum, T. Lucretius consules facti.

IX. Jam Tarquiniî ad Lartem Porfenam, Clu-
finum regem, perfugerant. ibi, miscendo consi-
lium precesque, nunc orabant, *Ne se, oriundos ex
Etruscis, ejusdem sanguinis nominisque, egentes ex-
sulare pateretur: nunc monebant etiam, ne orientem
morem pellendi reges inultum sineret. Satis libertatem
ipsam habere dulcedinis. Nisi, quanta vi civitates eam
expetant, tanta regna reges defendant, æquari summa
infirmis. nihil excelsum, nihil, quod supra cetera emi-
neat, in civitatibus fore. Adesse finem regnis, rei in-
ter Deos hominesque pulcherrimæ.* Porfena, tum re-
gem esse Romæ, tum Etruscæ gentis regem, am-
plum Tuscis ratus, Romam infesto exercitu venit.
Non unquam alias ante tantus terror senatum in-
vasit. Adeo valida res tum Clusina erat, magnum-
que Porfenæ nomen. nec hostes modo timebant,
sed suosinet ipsi cives, ne Romana plebs, metu
perculsa, receptis in urbem regibus, vel cum servi-
tute pacem acciperet. Multa igitur blandimenta ple-
bi per id tempus ab senatu data. annonæ inpri-
mis habita cura, & ad frumentum comparandum
missi, alii in Volscos, alii Cumas. Salis quoque
vendendi arbitrium, quia impenso pretio venibat,
in publicum omni sumtu, ademptum privatis. Por-
toriiisque & tributo plebes liberata, ut divites con-
ferrent, qui oneri ferendo essent: pauperes satis

stipendii pendere, si liberos educarent. Itaque hæc indulgentia Patrum, asperis postmodum rebus in obsidione ac fame, adeo concordem civitatem tenuit, ut regium nomen non summi magis, quam infimi, horrerent: nec quisquam unus malis artibus postea tam popularis esset, quam tum bene imperando universus senatus fuit.

X. Cum hostes aessent, pro se quisque in urbem ex agris demigrant: urbem ipsam sæpiunt præfidiis. alia muris, alia Tiberi objecto videbantur tuta. Pons sublicius iter pæne hostibus dedit, ni unus vir fuisset, Horatius Cocles: (id munimentum illo die fortuna urbis Romanæ habuit) qui, positus forte in statione pontis, cum captum repentino impetu Janiculum, atque inde citatos decurrere hostes vidisset, trepidamque turbam suorum arma ordinesque relinquere, reprehensans singulos, obsistens, obtestansque Deum & hominum fidem, testabatur: *Nequidquam deserto præsidio eos fugere. Si transitum pontem a tergo reliquissent, jam plus hostium in Palatio Capitolioque, quam in Janiculo, fore. Itaque monere, prædicere, ut pontem ferro, igni, quacunque vi possent, interrumpant. Se impetum hostium, quantum corpore uno posset obsistli, excepturum.* Vadit inde in primum aditum pontis: insignisque inter conspecta cedentium pugnae terga, obversis cominus ad ineundum proelium armis, ipso miraculo audaciæ obstupescit hostes. duos tamen cum eo pudor tenuit, Sp. Lartium ac T. Herminium, ambos claros genere factisque. Cum his primam periculi procellam, & quod tumultuosif-

simum pugnae erat, parumper sustinuit. deinde eos quoque ipsos, exigua parte pontis relicta, revocantibus, qui rescindebant, cedere in tutum coegit. Circumferens inde truces minaciter oculos ad proceres Etruscorum, nunc singulos provocare, nunc increpare omnes, *Servitia regum superborum, suae libertatis immemores, alienam oppugnatum venire.* Cunctati aliquamdiu sunt, dum alius alium, ut praelium incipiant; circumspectant. pudor deinde commovit aciem, & clamore sublato, undique in unum hostem tela conjiciunt. Quae cum in objecto cuncta scuto haesissent, neque ille minus obstinatus ingenti pontem obtineret gradu; jam impetu conabantur detrudere virum: cum simul fragor rupti pontis, simul clamor Romanorum, alacritate perfecti operis sublatus, pavore subito impetum sustinuit. Tum Cocles, *Tiberine pater, inquit, te sancte precor, haec arma & hunc militem propitio flumine accipias.* Ita sic armatus in Tiberim defiluit: multisque superincidentibus telis incolumis ad suos tranavit, rem ausus plus famae habituram ad posteros, quam fidei. Grata erga tantam virtutem civitas fuit: statua in comitio posita, agri quantum uno die circumaravit, datum. Privata quoque inter publicos honores studia eminebant. nam in magna inopia pro domesticis copiis unusquisque ei aliquid, fraudans se ipse victu suo, contulit.

XI. Porfena, primo conatu repulsus, consiliis ab oppugnanda urbe ad obsidendam versis, praesidio in Janiculo locato, ipse in plano ripisque Tiberis castra posuit; navibus undique accitis, & ad

custodiam, ne quid Romam frumenti subvehi sine-
 ret, & ut prædatum milites trans flumen per oc-
 casiones aliis atque aliis locis trajiceret: brevique
 adeo infestum omnem Romanum agrum reddidit,
 ut non cetera solum ex agris, sed pecus quoque
 omne in urbem compelleretur, neque quisquam
 extra portas propellere auderet. Hoc tantum li-
 centiæ Etruscis, non metu magis, quam consilio,
 concessum. namque Valerius consul, intentus in
 occasionem multos simul & effusos improvise ado-
 riundi, in parvis rebus negligens ultor, gravem
 se ad majora vindicem servabat. Itaque, ut elice-
 ret prædatores, edicit suis, postero die frequentes
 porta Esquilina, quæ averfissima ab hoste erat,
 expellerent pecus; scituros id hostes ratus, quod
 in obsidione & fame servitia infida transfuge-
 rent. Et sciere perfugæ indicio; multoque plures,
 ut in spem universæ prædæ, flumen trajiciunt. P.
 Valerius inde T. Herminium cum modicis copiis
 ad secundum lapidem Gabina via occultum con-
 fidere jubet: Sp. Lartium cum expedita juventute
 ad portam Collinam stare, donec hostis prætereat.
 deinde se objicere, ne sit ad flumen reditus. Con-
 sulum alter T. Lucretius porta Nævia cum aliquot
 manipulis militum egressus: ipse Valerius Cœlio
 monte cohortes delectas educit. hique primi appa-
 ruere hosti. Herminius, ubi tumultum sensit, con-
 currit ex insidiis; versisque in Valerium Etruscis
 terga cædit. dextra lævaque, hinc a porta Colli-
 na, illinc ab Nævia, redditus clamor. ita cæsi in
 medio prædatores, neque ad pugnam viribus pa-

res, & ad fugam sæptis omnibus viis. finisque ille tam effuse evagandi Etruscis fuit.

XII. Obsidio erat nihilominus & frumenti cum summa caritate inopia; sedendoque expugnaturum se urbem spem Porfena habebat: cum C. Mucius, adolescens nobilis, cui indignum videbatur, populum Romanum servientem, cum sub regibus esset, nullo bello nec ab hostibus ullis obsessum esse; liberum eundem populum ab iisdem Etruscis obsideri, quorum sæpe exercitus fuderit: itaque, magno audacique aliquo facinore eam indignitatem vindicandam ratus, primo sua sponte penetrare in hostium castra constituit. dein metuens, ne, si consulum injussu & ignaris omnibus ireret, forte deprehensus a custodibus Romanis retraheretur ut transfuga, fortuna tum urbis crimen affirmante, senatum adiit: *Transire Tiberim, inquit, Patres, & intrare, si possim, castra hostium volo; non prædo; nec populationum invicem ultor. majus, si Dii juvant, in animo est facinus!* Approbant Patres: abdito intra vestem ferro, proficiscitur. Ubi eo venit, in confertissima turba prope regium tribunal constitit. Ibi cum stipendium forte militibus daretur, & scriba, cum rege sedens pari fere ornatu, multa ageret, eum milites vulgo adirent; timens sciscitari, uter Porfena esset, ne ignorando regem semet ipse aperiret, quis esset, quo temere traxit fortuna facinus, scribam pro rege obruncat. Vudentem inde, qua per trepidam turbam cruento mucrone sibi ipse fecerat viam, cum, concursu ad clamorem facto, comprehensum regii fatellites re-

traxissent, ante tribunal regis destitutus, tum quoque, inter tantas fortunæ minas, metuendus magis, quam metuens, *Romanus sum*, inquit, *civis. C. Mucium vocant. hostis hostem occidere volui. nec ad mortem minus animi est, quam fuit ad cædem. Et facere & pati fortia, Romanum est. Nec unus in te ego hos animos gessi: longus post me ordo est idem petentium decus. Proinde in hoc discrimen, si juvat, accingere, ut in singulas horas capite dimices tuo; ferum hostemque in vestibulo habeas regiæ. Hoc tibi juvenus Romana indicimus bellum. Nullam aciem, nulum prælium timueris. Uni tibi, & cum singulis, res erit. Cum rex, simul ira infensus, periculoque conterritus, circumdari ignes minitabundus juberet, nisi expromeret propere, quas insidiarum sibi minas per ambagas jaceret: *En tibi*, inquit, *ut sentias, quam vile corpus sit iis, qui magnam gloriam vident: dextramque accenso ad sacrificium foculo injicit. quam cum velut alienato ab sensu torret animo; prope attonitus miraculo rex, cum ab sede sua profiluisset, amoverique ab altaribus juvenem jussisset, Tu vero abi*, inquit, *in te magis, quam in me, hostilia ausus. Juberem mactæ virtute esse, si pro mea patria ista virtus staret. Nunc jure belli liberum te, intactum inviolatumque hinc dimitto. Tum Mucius, quasi remunerans meritum, Quandoquidem*, inquit, *est apud te virtuti honos, ut beneficio tuleris a me, quod minis nequisti; trecenti conjuravimus principes juventutis Romanæ, ut in te hac via grassaremur. Mea prima fors fuit. ceteri, ut cuique ceciderit primo, quoad te opportunum fortuna dederit, suo quisque tempore, aderunt.**

XIII. Mucium dimissum, cui postea Scævolaë a clade dextræ manus cognomen inditum, legati a Porsena Romam secuti sunt. Adeo moverat eum & primi periculi casus, quo nihil se præter errorem insidiatoris texisset, & subeunda dimicatio toties, quot conjurati superessent, ut pacis conditiones ultro ferret Romanis. Jactatum in conditionibus nequidquam de Tarquiniis in regnum restituendis, magis quia id negare ipse nequiverat Tarquiniis, quam quod negatum iri sibi ab Romanis ignoraret. De agro Vejentibus restituendo impetratum: expressaque necessitas obsides dandi Romanis, si Janiculo præsidium deduci vellent. His conditionibus composita pace, exercitum ab Janiculo deduxit Porsena, & agro Romano excessit. Patres C. Mucio virtutis causa trans Tiberim agrum dono dedere, quæ postea sunt Mucia præta appellata. Ergo, ita honorata virtute, feminæ quoque ad publica decora excitatæ. Et Clœlia virgo, una ex obsidibus, cum castra Etruscorum forte haud procul ripa Tiberis locata essent, frustrata custodes, dux agminis virginum inter tela hostium Tiberim tranavit: sospitesque omnes Romam ad propinquos restituit. Quod ubi regi nuntiatum est, primo incensus ira, oratores Romam misit ad Clœliam obsidem deposcendam; alias haud magni facere: deinde in admirationem versus, *Supra Coclites Muciosque dicere id facinus esse, & præ se ferre, quemadmodum, si non dedatur obses, pro rupto se fœdus habiturum; sic deditam, inviolatam ad suos remissurum.* Utrunque constitit fides: & Romani pig-

nus pacis ex fœdere restituerunt: & apud regem Etruscum non tuta solum, sed honorata etiam, virtus fuit: laudatamque virginem parte obsidum se donare dixit: ipsa, quos vellet, legeret. Pro ductis omnibus, elegisse impubes dicitur: quod & virginitati decorum, & consensu obsidum ipsorum probabile erat, eam ætatem potissimum liberari ab hoste, quæ maxime opportuna injuriæ esset. Pace redintegrata, Romani novam in femina virtutem novo genere honoris, statua equestri, donavere. in summa Sacra via fuit posita virgo infidens equo.

XIV. Huic tam pacatæ profectiōni ab urbe regis Etrusci abhorrens mos, traditus ab antiquis, usque ad nostram ætatem inter cetera sollempnia manet bonis vendendis, bona Porſenæ regis vendendi. Cujus originem moris, necesse est, aut inter bellum natam esse, neque omiſſam in pace; aut a mitiore creviſſe principio, quam hic præ se ferat titulus bona hoſtiliter vendendi. Proximum vero est ex iis, quæ traduntur, Porſenam, diſcedentem ab Janiculo, caſtra opulenta, convecto ex propinquis ac fertilibus Etruriæ arvis comœatu, Romanis dono dediſſe, inopi tum urbe ab longinqua obſidione. ea deinde, ne populo immiſſo diriperentur hoſtiliter, veniſſe, bonaque Porſenæ appellata, gratiam muneris magis ſignificante titulo, quam auctiōnem fortunæ regiæ, quæ ne in poteſtatem quidem populi Romani eſſet. Omiſſo Romano bello, Porſena, ne fruſtra in ea loca exercitus adductus videretur, cum parte copiarum filium

Aruntem Ariciam oppugnatum mittit. Primo Aricinos res necopinata perculerat. arcessita deinde auxilia, & a Latinis populis, & a Cumis, tantum spei fecere, ut acie decernere auderent. Prælio inuito, adeo concitato impetu se intulerant Etrusci, ut funderent ipso incurſu Aricinos. Cumanæ cohortes, arte adverſus vim uſæ, declinavere paululum; effuſeque prælatos hoſtes converſis ſignis ab tergo adortæ ſunt. Ita in medio prope jam victores cæſi Etrusci: pars perexigua, duce amiſſo, quia nullum propius perſugium erat, Romam inermes & fortuna & ſpecie ſupplicum delati ſunt. ibi benigne excepti, diviſique in hoſpitia. Curatis vulneribus, alii proſecti domos, nuntii hoſpitalium beneficiorum. Multos Romæ hoſpitem urbiſque caritas tenuit. his locus ad habitandum datus, quem deinde Tuſcum vicum appellarunt.

XV. P. Lucretius inde & P. Valerius Publicola conſules facti. Eo anno poſtremum legati a Porſena de reducendo in regnum Tarquinio venerunt. quibus cum reſponſum eſſet, miſſurum ad regem ſenatum legatos; miſſi conſeſtim honoratiſſimus quiſque ex Patribus. *Non, quin breviter reddi reſponſum potuerit, non recipi reges, ideo potius delectos Patrum ad eum miſſos, quam legatis ejus Romæ daretur reſponſum; ſed ut in perpetuum mentio ejus rei fini-
retur, neu in tantis mutuis beneficiis invicem animi ſollicitarentur: cum ille peteret, quod contra libertatem populi Romani eſſet; Romani, niſi in perniciem ſuam faciles eſſe vellent, negarent, cui nihil negatum vellent. Non in regno populum Romanum, ſed in li-*

bertate esse. ita induxisse in animum, hostibus potius, quam regibus, portas patefacere. Eam esse voluntatem omnium, ut, qui libertati erit in illa urbe finis, idem urbi sit. Proinde, si salvam esse vellet Romam, ut patiatur liberam esse, orare. Rex, verecundia victus, Quando id certum atque obstinatum est, inquit, neque ego obtundam sæpius eadem nequidquam agendo: nec Tarquinius spe auxilii, quod nullum in me est, frustrabor. Alium hinc, seu bello opus est, seu quiete, exilio quærant locum, ne quid meam vobiscum pacem distineat. Dictis facta amiciora adjecit: obsidum quod reliquum erat, reddidit: agrum Vejentem, fœdere ad Janiculum ic̄to ademtum, restituit. Tarquinius, spe omni redivis incisa, exsulatum ad generum Mamilium Octavium Tusculum abiit. Romanis pax fida ita cum Porsena fuit.

XVI. Consules M. Valerius, P. Postumius. Eo anno bene pugnatum cum Sabinis. consules triumpharunt. Majore inde mole Sabini bellum parabant. adversus eos, & ne quid simul ab Tusculo (unde, etsi non apertum, suspectum tamen bellum erat) repentini periculi oriretur, P. Valerius quartum, T. Lucretius iterum consules facti. Seditio, inter belli pacisque auctores orta in Sabinis, aliquantum inde virium transtulit ad Romanos. namque Attus Clausus, cui postea Ap. Claudio fuit Romæ nomen, cum pacis ipse auctor a turbatoribus belli premeretur, nec par factioni esset, ab Regillo, magna clientium comitatus manu, Romam transfugit. His civitas data, agerque trans Anienem. vetus Claudia tribus, additis postea novis tribu-

libus, qui ex eo venirent agro, appellata. Appius, inter Patres lectus, haud ita multo post in principum dignationem pervenit. Consules, infesto exercitu in agrum Sabinum profecti, cum ita vastatione, dein proelio, afflixissent opes hostium, ut diu nihil inde rebellionis timere possent, triumphantes Romam redierunt. P. Valerius, omnium consensu princeps belli pacisque artibus, anno post, Agrippa Menenio, P. Postumio consulibus, moritur, gloria ingenti, copiis familiaribus adeo exiguis, ut funeri sumtus deesset: de publico est elatus. Luxere matronæ, ut Brutum. Eodem anno duæ coloniæ Latinæ, Pometia & Cora, ad Auruncos deficiunt. cum Auruncis bellum initum: fusoque ingenti exercitu, qui se ingredientibus fines consulibus ferociter obtulerat, omne Auruncum bellum Pometiam compulsus est. Nec magis post proelium, quam in proelio, cædibus temperatum est. & cæsi aliquanto plures erant, quam capti; & captos passim trucidaverunt. ne ab obsidibus quidem, qui trecenti accepti numero erant, iram belli hostis abstinuit. Et hoc anno Romæ triumphatum.

XVII. Secuti consules, Opiter Virginius & Sp. Cassius, Pometiam primo vi, deinde vineis aliisque operibus, oppugnaverunt. in quos Aurunci, magis jam inexpiabili odio, quam spe aliqua aut occasione, coorti, cum plures igni, quam ferro, armati excucurrissent, cæde incendioque cuncta complent. vineis incensis, multis hostium vulneratis & occisis, consulum quoque alterum, (sed utrum, no-

men auctores non adjiciunt) gravi vulnere ex equo dejectum, prope interfecerunt. Romam inde, male gesta re, reditum. inter multos faucios consul spe incerta vitæ relictus. Interjecto deinde haud magno spatio, quod vulneribus curandis supplendoque exercitui satis esset, tum ira majore belli, tum viribus etiam auctis, Pometiæ arma illata. & cum, vineis relictis aliaque mole belli, jam in eo esset, ut in muros evaderet miles, deditio est facta. ceterum nihilo minus fœde, dedita urbe, quam si capta foret, Aurunci passim principes securi percussi, sub corona venierunt coloni alii; oppidum dirutum, ager venit. Consules, magis ob iras graviter ultas, quam ob magnitudinem perfecti belli, triumpharunt.

XVIII. Insequens annus Postumum Cominium & T. Lartium consules habuit. Eo anno Romæ, cum per ludos ab Sabinorum juventute per lasciviam scorta raperentur, concursu hominum rixa ac prope prælium fuit; parvaque ex re ad rebellionem spectare res videbatur. Supra belli Latini metum id quoque accesserat, quod triginta jam conjurasse populos, concitante Octavio Mamilio, satis constabat. In hac tantarum expectatione rerum sollicita civitate, dictatoris primum creandi mentio orta. sed nec quo anno, nec quibus consilibus, quia ex factione Tarquinia essent, (id quoque enim traditur) parum creditum sit, nec quis primum dictator creatus sit; satis constat. apud veterimos tamen auctores T. Lartium dictatorem primum, Sp. Cassium magistrum equitum, creatos

invenio. Consulares legere: ita lex jubebat, de dictatore creando lata. Eo magis adducor, ut credam, Lartium, qui consularis erat, potius, quam Manium Valerium, M. filium, Volesi nepotem, qui nondum consul fuerat, moderatorem & magistrum consulibus appositum. qui, si maxime ex ea familia legi dictatorem vellent, patrem multo potius M. Valerium, spectatæ virtutis & consularem virum, legissent. Creato dictatore primum Romæ, postquam præferri secures viderunt, magnus plebem metus incessit, ut intentiores essent ad dicto parendum. neque enim, ut in consulibus, qui pari potestate essent, alterius auxilium, neque provocatio erat; neque ullum usquam, nisi in cura parendi, auxilium. Sabinis etiam creatus Romæ dictator (eo magis quod propter se creatum crediderant) metum incussit. itaque legatos de pace mittunt. quibus orantibus dictatorem senatumque, ut veniam erroris hominibus adolescentibus darent, responsum: *ignosci adolescentibus posse, senibus non posse, qui bella ex bellis sererent.* actum tamen est de pace: impetrataque foret, si, quod impensæ factum in bellum erat, præstare Sabini (id enim postulatum erat) in animum induxissent. Bellum indictum. tacitæ induciæ quietum annum tenuere.

XIX. Consules Ser. Sulpicius, Manius Tullius. nihil dignum memoria actum. T. Æbutius deinde & C. Vetustus. His consulibus Fidenæ obsessæ, Crustumeria capta, Præneste ab Latinis ad Romanos descivit. nec ultra bellum Latinum, gliscens jam per aliquot annos, dilatatum. A. Postumius dic-

tator, T. Æbutius magister equitum, magnis copiis peditum equitumque profecti, ad lacum Regillum in agro Tusculano agmini hostium occurrerunt. &, quia Tarquinius esse in exercitu Latinorum auditum est, sustineri ira non potuit, quin extemplo confligerent. Ergo etiam prælium aliquanto, quam cetera, gravius atque atrocius fuit. non enim duces ad regendam modo consilio rem affuere, sed, suismetipsis corporibus dimicantes, miscuere certamina. nec quisquam procerum ferme hac aut illa ex acie sine vulnere, præter dictatorem Romanum, excessit. In Postumium, prima in acie suos adhortantem instruentemque, Tarquinius Superbus, quanquam jam ætate & viribus erat gravior, equum infestus admisit: ictusque ab latere, concursu suorum receptus in tutum est. Et ad alterum cornu Æbutius magister equitum in Octavium Mamilium impetum dederat. nec fefellit veniens Tusculanum ducem: contra quem & ille concitat equum: tantaque vis infestis venientium hastis fuit; ut brachium Æbutio trajectum sit, Mamilio pectus percussum. Hunc quidem in secundam aciem Latini recepere. Æbutius, cum faucio brachio tenere telum non posset, pugna excessit. Latinus dux, nihil deterritus vulnere, prælium ciet; &, quia suos percussos videbat, arcessit cohortem exfulum Romanorum, cui L. Tarquinius filius præerat. ea, quod majore pugnabat ira ob erepta bona patriamque ademptam, pugnam parumper restituit.

XX. Referentibus jam pedem ab ea parte Romanis, M. Valerius, Publicolæ frater, conspicua-

tus ferocem juvenem Tarquinium, ostentantem se in prima exfulum acie, domestica etiam gloria accensus, ut, cujus familiæ decus ejecti reges erant, ejusdem interfecti forent, subdit calcaria equo, & Tarquinium infesto spiculo petit. Tarquinius retro in agmen suorum infero cessit hosti. Valerium, temere inVectum in exfulum aciem, ex transverso quidam adortus transfigit: nec quidquam equitis vulnere equo retardato, moribundus Romanus, labentibus super corpus armis, ad terram defluxit. Dictator Postumius, postquam cecidisse talem virum, exfoles ferociter citato agmine invehi, suos percussos cedere animadvertit; cohorti suæ, quam delectam manum præsidii causa circa se habebat; dat signum, ut, quem suorum fugientem viderint, pro hoste habeant. ita metu anticipati versi a fuga Romani in hostem, & restituta acies. Cohors dictatoris tum primum prælium iniit. integris corporibus animisque fessos adorti exfoles cædunt. Ibi alia inter proceres coorta pugna. Imperator Latinus, ubi cohortem exfulum a dictatore Romano prope circumventam vidit, ex subsidiariis manipulos aliquot in primam aciem secum rapit. hos agmine venientes T. Herminius legatus conspicatus, interque eos insignem veste armisque Mamiliam noscicans, tanto vi majore, quam paulo ante magister equitum, cum hostium duce prælium iniit, ut & uno ictu transfixum per latus occiderit Mamiliam, & ipse inter spoliandum corpus hostis veruto percussus, cum victor in castra esset relatus, inter primam curationem exspirave-

rit. Tum ad equites dictator advolat, obtestans, ut, fesso jam pedite, descendant ex equis, & pugnam capebant. Dicto parvire: defiliunt ex equis, provolant in primum, & pro antesignanis parmas objiciunt. Recipit extemplo animum pedestris acies, postquam juventutis proceres æquato genere pugnae secum partem periculi sustinentes vidit. Tum demum impulsæ Latini, percussa que inclinavit acies. Equiti admoti equi, ut persequi hostem posset. secuta & pedestris acies. Ibi, nihil nec divinæ nec humanæ opis. Dictator prætermittens, ædem Castori vovisse fertur: ac pronuntiasse militi præmia, qui primus, qui secundus, castra hostium intrasset. tantusque ardor fuit, ut eodem impetu, quo fuderant hostem, Romani castra caperent. Hoc modo ad lacum Regillum pugnatum est. Dictator & magister equitum triumphantes in urbem rediere.

XXI. Triennio deinde nec certa pax, nec bellum fuit. Consules Q. Clælius & T. Lartius. Inde A. Sempronius & M. Minucius. His consulibus ædes Saturno dedicata: Saturnalia institutus festus dies. A. deinde Postumius & T. Virginius consules facti. Hoc demum anno ad Regillum lacum pugnatum, apud quosdam invenio: A. Postumium, quia collega dubiæ fidei fuerit, se consulatu abdicasse: dictatorem inde factum. Tanti errores implicent temporum, aliter apud alios ordinatis magistratibus, ut, nec qui consules secundum quosdam, nec quid quoque anno actum sit, in tanta vetustate, non rerum modo, sed etiam auctorum, digerere.

possis. Ap. Claudius deinde & P. Servilius consules facti. Insignis hic annus est nuntio Tarquinii mortis. Mortuus est Cunnis, quo se post fractas opes Latinorum ad Aristodemum tyrannum contulerat. Eo nuntio erecti Patres, erecta plebes. sed Patribus nimis luxuriosa ea fuit lætitia: plebi, cui ad eam diem summa ope inservitum erat, injuriæ a primoribus fieri cœpere. Eodem anno Signia colonia, quam rex Tarquinius deduxerat, suppleto numero colonorum, iterum deducta est. Romæ tribus una & viginti factæ. Ædes Mercurii dedicata est idibus Majis.

XXII. Cum Volscorum gente Latino bello neque pax, neque bellum fuerat. nam & Volsci comparaverant auxilia, quæ mitterent Latinis, ni maturatum ab dictatore Romano esset: & maturavit Romanus, ne prælio uno cum Latino Volscoque contenderet. Hac ira consules in Volscum agrum legiones duxere. Volscos, consilii pœnam non metuentes, necopinata res perculit. Armorum immemores obsides dant trecentos principum a Cora atque Pometia liberos. ita sine certamine inde abductæ legiones. Nec ita multo post Volscis levatis metu suum rediit ingenium: rursus occultum parant bellum, Hernicis in societatem armorum assumtis. Legatos quoque ad sollicitandum Latium passim dimittunt. Sed recens ad Regillum lacum accepta clades Latinos ira odioque ejus, quicumque arma suaderet, ne ab legatis quidem violandis abstinuit. Comprehensos Volscos Romam duxere. Ibi traditi consulibus, indicatumque est, Volscos Her-

nicosque parare bellum Romanis. Relata re ad senatum, adeo fuit gratum Patribus, ut & captivorum sex millia Latinis remitterent, & de fœdere, quod prope in perpetuum negatum fuerat, rem ad novos magistratus rejicerent. Enimvero tum Latini gaudere factò, pacis auctores in ingenti gloria esse. Coronam auream Jovi donum in Capitolium mittunt. cum legatis donoque, qui captivorum remissi ad suos fuerant, magna circumfusa multitudo venit. Pergunt domos eorum, apud quem quisque servierant: gratias agunt, liberaliter habitum cultique in calamitate sua. inde hospitia jungunt. Nunquam alias ante publice privatimque Latinum nomen Romano imperio conjunctius fuit.

XXIII. Sed & bellum Volscum imminebat, & civitas, secum ipsa discors, intestino inter Patres plebemque flagrabat odio, maxime propter nexos ob æs alienum. Fremebant, *se, foris pro libertate & imperio dimicantes, domi a civibus captos & oppressos esse; tutioremque in bello, quam in pace, inter hostes, quam inter cives, libertatem plebis esse.* invidiamque eam, sua sponte gliscentem, insignis unius calamitas accendit. Magno natu quidam cum omnium malorum suorum insignibus se in forum projecit. obsita erat squalore vestis, fœdior corporis habitus pallore ac macie perempti. Ad hoc, promissa barba & capilli efferaverant speciem oris. Noscitabatur tamen in tanta deformitate, & ordines duxisse aiebant, aliaque militiæ decora vulgo, miserantes eum, jactabant. ipse, testes honestarum aliquot locis pugnarum, cicatrices adverso pectore osten-

tabat. Sciscitantibus *unde ille habitus? unde deformitas?* cum circumfusa turba esset prope in concionis modum, *Sabino bello*, ait, *se militantem, quia propter populationes agri non fructu modo caruerit, sed villa incensa fuerit, direpta omnia, pecora abacta, tributum iniquo suo tempore imperatum, æs alienum fecisse: id cumlatum usuris, primo se agro paterno avitoque exuisse, deinde fortunis aliis: postremo, velut tabem, pervenisse ad corpus. Ductum se ab creditore, non in servitium, sed in ergastulum & carnificinam esse.* Inde ostentare tergum, foedum recentibus vestigiis verberum. Ad hæc visa auditaque clamor ingens oritur. Non jam foro se tumultus continet, sed passim totam urbem pervadit. Nexu vincti solutique se undique in publicum proripiunt; implorant Quiritium fidem. Nullo loco deest seditionis voluntarius comes. multis passim agminibus per omnes vias cum clamore in forum curritur. Magno cum periculo suo, qui forte Patrum in foro erant, in eam turbam inciderunt. nec temperatum manibus foret, ni propere consules, P. Servilius & Ap. Claudius, ad comprimendam seditionem intervenissent. In eos multitudo versa, ostentare vincula sua deformitatemque aliam. Hæc se meritos dicere, exprobrantes suam quisque alius alibi militiam. Postulare multo minaciter magis, quam suppliciter, ut senatum vocarent: curiamque ipsi, futuri arbitri moderatoresque publici consilii, circumstant. Pauci admodum Patrum, quos casus obtulerat, contracti ad consules: ceteros metus non curia modo, sed etiam foro arcebat. nec

agi quidquam per infrequentiam poterat fenatus. Tum vero eludi atque extrahi se multitudo putare; & Patrum qui abessent, non casu, non metu, sed impediendæ rei causa abesse, & consules ipsos tergiversari; nec dubie ludibrio esse miseras suas. Jam prope erat, ut ne consulum quidem majestas coerceret iras hominum: cum, incerti, morando, an veniendo, plus periculi contraherent, tandem in senatum veniunt: frequentique tandem curia, non modo inter Patres, sed ne inter consules quidem ipsos, satis conveniebat. Appius, vehementis ingenii vir; imperio consulari rem agendam censebat: uno aut altero arrepto, quieturos alios. Servilius, lenibus remediis aptior, concitatos animos flecti, quam frangi, putabat cum tutius, tum facilius esse. †

XXIV. Inter hæc major alius terror. Latini equites cum tumultuoso advolant nuntio: *Volsco infesto exercitu ad urbem oppugnandam venire.* quæ audita (adeo duas ex una civitate discordia fecerat) longe aliter Patres ac plebem affecere. Exultare gaudio plebes; *ultores superbiæ Patrum adesse dicere Deos.* alius alium confirmare, *ne nomina darent: cum omnibus potius, quam solos perituros. Patres militarent, Patres arma caperent, ut penes eosdem pericula belli, penes quos præmia, essent.* At vero curia, mœsta ac trepida ancipiti metu & ab cive & ab hoste, Servilium consulem, cui ingenium magis populare erat, orare, ut tantis circumventam terroribus expediret rempublicam. Tum consul, misso senatu, in concionem prodit. ibi curæ esse Pa-

tribus ostendit, ut consulatur plebi. ceterum deliberationi de maxima quidem illa, sed tamen parte civitatis, metum pro universa republica intervenisse. nec posse, cum hostes prope ad portas essent, bello prævertisse quidquam: nec, si sit laxamenti aliquid, aut plebi honestum esse, nisi mercede prius accepta, arma pro patria non cepisse; neque Patribus factis decorum, per metum potius, quam postmodo voluntate, afflictis civium suorum fortunis consuluisset. Concioni deinde edicto addidit fidem, quo edixit, *Ne quis civem Romanum vincitum aut clausum teneret, quo minus ei nominis edendi apud consules potestas fieret. Ne quis militis, donec in castris esset, bona possideret, aut venderet: liberos nepotesve ejus morarentur.* Hoc proposito edicto, & qui aderant nexi, profiteri extemplo nomina; & undique ex tota urbe proripientium se ex privato, cum retinendi jus creditori non esset, concursus in forum, ut sacramento dicerent, fieri. Magna ea manus fuit; neque aliorum magis in Volscis bello virtus atque opera enituit. Consul copias contra hostem educit: parvo dirimente intervallo castra ponit.

XXV. Proxima inde nocte Volsci, discordia Romana freti, si qua nocturna transitio proditiive fieri possit, tentant castra. Sensere vigiles: excitatus exercitus: signo dato concursus est ad arma. Ita frustra id inceptum Volscis fuit. reliquum noctis utrinque quieti datum. Postero die prima luce Volsci, fossis repletis, vallum invadunt. Jamque ab omni parte munimenta vellebantur, cum consul, quanquam cuncti undique, &

nexi ante omnes, ut signum daret, clamabant, experiendi animos militum causa parumper moratus, postquam satis apparebat ingens ardor, dato tandem ad erumpendum signo, militem avidum certaminis emittit. Primo statim incursum pulsi hostes: fugientibus, quoad insequi pedes potuit, terga cæsa: eques usque ad castra pavidos egit. mox ipsa castra, legionibus circumdatis, cum Volscos inde etiam pavor expulisset, capta direptaque. Postero die ad Sueffam Pometiam, quo confugerant hostes, legionibus ductis, intra paucos dies oppidum capitur: captum prædæ datum. inde paulum recreatus egens miles. Consul cum maxima gloria sua victorem exercitum Romam reducit. decedentem Romam Ecetranorum Volscorum legati, rebus suis timentes post Pometiam captam, adeunt. His ex senatusconsulto data pax, ager ademptus.

XXVI. Confestim & Sabini Romanos territaverunt. tumultus enim fuit verius, quam bellum. Nocte in urbe nuntiatum est, exercitum Sabinum prædandum ad Anienem amnem pervenisse. ibi passim diripi atque incendi villas. Missus extemplo eo cum omnibus copiis equitum A. Postumius, qui dictator bello Latino fuerat. secutus consul Servilius cum delecta peditum manu. Plerosque palantes eques circumvenit. nec advenienti peditum agmini resistit Sabina legio. Fessi, tum itinere, tum populatione nocturna, magna pars in villis repleti cibo vinoque, vix fugæ quod satis esset virium habuere. Nocte una audito perfectoque bello Sabino, postero die, in magna jam spe undique

partæ pacis, legati Aurunci senatum adeunt, ni decedatur Volſco agro, bellum indicentes. Cum legatis ſimul exercitus Auruncorum domo profectus erat. cujus fama, haud procul jam ab Aricia viſi, tanto tumultu concivit Romanos, ut nec conſuli ordine Patres, nec pacatum reſponſum arma inferentibus arma ipſi capientes dare poſſent. Ariciam infeſto agmine itur: nec procul inde cum Auruncis ſigna collata, prælioque uno debellatum eſt.

XXVII. Fuſis Auruncis, victor tot intra paucos dies bellis Romanus promiſſa conſulis fidemque ſenatus exſpectabat: cum Appius, & inſita ſuperbia animo, & ut collegæ vanam faceret fidem, quam aſperrime poterat, juſ de creditis pecuniis dicere. deinceps &, qui ante nexi fuerant, creditoribus tradebantur, & neſcebantur alii. Quod ubi cui militi inciderat, collegam appellabat: concurſus ad Servilium fiebat; illius promiſſa jaſtabant, illi exprobrabant ſua quiſque belli merita cicatricesque acceptas. poſtulabant, ut aut referret ad ſenatum, aut ut auxilio eſſet conſul civibus ſuis, imperator militibus. Movebant conſulem hæc; ſed tergiverſari res cogebat. adeo in alteram cauſam non collega ſolum præceps ierat, ſed omnis factio nobilium. ita, medium ſe gerendo, nec plebis vitavit odium, nec apud Patres gratiam iniit. Patres mollem conſulem & ambitioſum rati; plebes fallacem. breviſſime apparuit, æquaffe eum Appii odium. Certamen conſulibus inciderat, uter dedicaret Mercurii ædem. Senatus a ſe rem ad populum rejecit:

utri eorum dedicatio jussu populi data esset, eum præesse annonæ, mercatorum collegium institueret, sollemnia pro pontifice jussit suscipere. Populus dedicationem ædis dat M. Lætorio, primi pilii centurioni: quod facile appareret, non tam ad honorem ejus, cui curatio altior fastigio suo data esset, factum, quam ad consulum ignominiam. Sævire inde utique consulum alter Patresque. seu plebi creverant animi; & longe alia, quam primo instituerant, via grassabantur. Desperato enim consulum senatusque auxilio, cum in jus duci debitorem vidissent, undique convolabant. neque decretum exaudiri consulis præ strepitu & clamore poterat: neque, cum decreffet, quisquam obtemperabat. Vi agebatur, metusque omnis & periculum libertatis, cum in conspectu consulis singuli a pluribus violarentur, in creditores a debitoribus verterat. Super hæc timor incessit Sabini belli; delectuque decreto, nemo nomen dedit, furente Appio, & insectante ambitionem collegæ, qui populari silentio rempublicam proderet, & ad id, quod de credita pecunia jus non dixisset, adjiceret, ut ne delectum quidem ex senatusconsulto haberet. *Non esse tamen desertam omnino rempublicam, neque projectum consulare imperium. Se unum & suæ & Patrum majestatis vindicem fore.* Cum circumstaret quotidiana multitudo licentia accensa, arripi unum insignem ducem seditionum jussit. Ille, cum a licitoribus jam traheretur, provocavit: nec cessisset provocationi consul, quia non dubium erat populi iudicium, nisi ægre victa pertinacia foret, consilio

magis & auctoritate principum, quam populi clamore. adeo supererant animi ad sustinendam invidiam. Crescere inde malum in dies, non clamoribus modo apertis, sed, quod multo perniciosius erat, secessione occultisque colloquiis. Tandem inuisi plebi consules magistratu abeunt, Servilius neutris, Appius Patribus mire gratus.

XXVIII. A. Virginius inde & T. Vetufius consulatum ineunt. Tum vero plebes, incerta quales habitura consules esset, cœtus nocturnos, pars in Esquilis, pars in Aventino, facere; ne in foro subitis trepidaret consiliis, & omnia temere ac fortuito ageret. Eam rem consules rati, ut erat, perniciosam, ad Patres deferunt: sed delatam consulere ordine non licuit. adeo tumultuose excepta est clamoribus undique & indignatione Patrum, si, quod imperio consulari exsequendum esset, invidiam ejus consules ad senatum rejicerent. *Profecto si essent in republica magistratus, nullum futurum fuisse Romæ, nisi publicum, concilium. Nunc in mille curias concionesque (cum alia in Esquilis, alia in Aventino fiant concilia) dispersam & dissipatam esse rempublicam. Unum, Hercule, virum, (id enim plus esse, quam consulem) qualis Appius Claudius fuerit, momento temporis discussurum illos cœtus fuisse.* Correpti consules cum, quid ergo se facere vellent, (nihil enim segnius molliusve, quam Patribus placeat, acturos) percontarentur; decernunt, ut delectum quam acerrimum habeant. otio lascivire plebem. Dimisso senatu, consules in tribunal ascendunt. citant nominatim juniores. Cum ad nomen nemo responde-

ret, circumfusa multitudo in concionis modum negare, *Ultra decipi plebem posse. Nunquam unum militem habituros, ni præstaretur fides publica. libertatem unicuique prius reddendam esse, quam arma danda: ut pro patria civibusque, non pro dominis, pugnent.* Consules, quid mandatum esset a senatu, videbant: sed eorum, qui intra parietes curiæ ferociter loquerentur, neminem adesse invidiæ suæ participem: & apparebat atrox cum plebe certamen. Prius itaque, quam ultima experirentur, senatum iterum consulere placuit. tum vero ad sellas consulum prope convolavere minimus quisque natu Patrum, abdicare consulatum jubentes, & deponere imperium, ad quod tuendum animus deesset.

XXIX. Utraque re satis experta, tum demum consules: *Ne prædictum negetis, Patres conscripti, adest ingens seditio. Postulamus, ut ii, qui maxime ignaviam increpant, adsint nobis habentibus delectum. Acerrimi cujusque arbitrio, quando ita placet, rem agemus.* Redeunt in tribunal: citari nominatim unum ex iis, qui in conspectu erant, dedita opera jubent. Cum staret tacitus, & circa eum aliquot hominum, ne forte violaretur, constitisset globus, lictorem ad eum consules mittunt. quo repulso, tum vero, indignum facinus esse, clamitantes, qui Patrum consulibus aderant, devolant de tribunali, ut lictori auxilio essent. Sed ab lictore, nihil aliud quamprehendere prohibito, cum conversus in Patres impetus esset, consulum intercursum rixa sedata est: in qua tamen, sine lapide, sine telo, plus clamoris atque irarum, quam injuriæ,

fuerat. Senatus, tumultuose vocatus, tumultuosius consulitur, quæstionem postulantibus iis, qui pulsati fuerant, decernente ferocissimo quoque, non sententiis magis, quam clamore & strepitu. Tandem, cum iræ resedissent, exprobrantibus consulis, nihilo plus sanitatis in curia, quam in foro, esse, ordine consuii cœpit. Tres fuere sententiæ. P. Virginius rem non vulgabat: *De iis tantum, qui, fidem secuti P. Servilii consulis, Volusco, Aurunco, Sabinoque militassent bello, agendum censebat.* T. Lartius, *Non id tempus esse, ut merita tantummodo exsolverentur. totam plebem ære alieno demersam esse: nec sisti posse, ni omnibus consulatur. quin, si alia aliorum sit conditio, accendi magis discordiam, quam sedari.* Ap. Claudius, & natura immitis, & efferatus hinc plebis odio, illinc Patrum laudibus, *Non miseriis, ait, sed licentia, tantum concitum turbarum; & lascivire magis plebem, quam scivire. Id adeo malum ex provocatione natum. quippe minas esse consulum, non imperium; ubi ad eos, qui una peccaverint, provocare liceat. Agedum, inquit, dictatorem, a quo provocatio non est, creemus. Jam hic, quo nunc omnia ardent, conticescet furor. Pulsset tum mihi licitorem, qui sciet, jus de tergo vitæque sua penes unum illum esse, cujus majestatem violavit.*

XXX: Multis, ut erat, horrida & atrox videbatur Appii sententia: rursus Virginii Lartique exemplo haud salubres; utique Lartii putabant sententiam, quæ totam fidem tolleret. medium maxime & moderatum utroque consilium Virginii habebatur. Sed factione respectuque rerum privata-

rum, quæ semper officere officentque publicis consiliis, Appius vicit: ac prope fuit, ut dictator ille idem crearetur. quæ res atque alienasset plebem periculosissimo tempore, cum Volsci Æquique & Sabini forte una omnes in armis essent. Sed curæ fuit consulibus & senioribus Patrum, ut imperium, suo vehemens, mansueto permetteretur ingenio. Manium Valerium dictatorem Volesi filium creant, Plebes, etsi adversus se creatum dictatorem videbat, tamen, cum provocationem fratris lege haberet, nihil ex ea familia triste nec superbum timebat. Edictum deinde, a dictatore propositum, confirmavit animos, Servilii fere consulis edicto conveniens. sed & homini & potestati melius rati credi, omisso certamine nomina dedere. Quantus nunquam ante exercitus, legiones decem effectæ. ternæ inde datæ consulibus: quatuor dictator usus. Nec poterat jam bellum differri. Æqui Latinum agrum invaserant. oratores Latinorum a senatu petebant, ut aut mitterent subsidium, aut se ipsos tuendorum finium causa capere arma sinerent. Tutius visum est, defendi inermes Latinos, quam pati, retractare arma. Vetusius consul missus est. is finis populationibus fuit. Cessere Æqui campis: locoque magis, quam armis, freti, summis se jugis montium tutabantur. Alter consul, in Volscos profectus, ne & ipse tereret tempus, vastandis maxime agris hostem ad conferenda propius castra dimicandumque acie excivit. Medio inter castra campo, ante suum quisque vallum, infestis signis constitere. multitudine aliquantum Volsci superabant. Itaque effusi & contemptim pugnam

inire. Consul Romanus nec promovit aciem, nec clamorem reddi passus, defixis pilis stare suos iussit: ubi ad manum venisset hostis, tum coortos tota vi gladiis rem gerere. Volsci, cursu & clamore fessi, cum se velut stupentibus metu intulissent Romanis, postquam impressionem sensere ex adverso factam, & ante oculos micare gladios, haud secus, quam si in insidias incidissent, turbati vertunt terga; & ne ad fugam quidem satis virium fuit, quia cursu in proelium ierant. Romani contra, quia principio pugnae quieti steterant, vigentes corporibus, facile adepti fessos, & castra impetu ceperunt, & castris exutum hostem Velitras persecuti, uno agmine victores cum victis in urbem irrupere. plusque ibi sanguinis, promiscua omnium generum caede, quam in ipsa dimicatione, factum. paucis data venia, qui inermes in deditionem venerunt.

XXXI. Dum haec in Volscis geruntur, dictator Sabinos, ubi longe plurimum belli fuerat, fundit fugatque, exiitque castris. Equitatu immisso mediam turbaverat hostium aciem, qua, dum se cornua latius pandunt, parum apte introrsum ordinibus aciem firmaverant. turbatos pedes invasit. eodem impetu castra capta, debellatumque est. Post pugnam ad Regillum lacum non alia illis annis pugna clarior fuit. dictator triumphans urbem invehitur. Super solitos honores locus in circo ipsi posterisque ad spectaculum datus: sella in eo loco curulis posita. Volscis devictis Veliternus ager ademptus: Velitras coloni ab urbe missi & colonia de-

ducta. Cum Æquis post aliquanto pugnatum est, invito quidem consule, quia loco iniquo subeundum erat ad hostes: sed milites, extrahi rem criminantes, ut dictator, priusquam ipsi redirent in urbem, magistratu abiret, irritaque, sicut ante consulis, promissa ejus caderent, perpulere, ut forte temere in adversos montes agmen erigeret. Id male commissum, ignavia hostium in bonum vertit: qui, priusquam ad conjectum teli veniretur, obstupefacti audacia Romanorum, relictis castris, quæ munitissimis tenuerant locis, in adversas valles desiluere: ubi fatis prædæ & victoria incruenta fuit. Ita trifariam re bello bene gesta, de domesticarum rerum eventu nec Patribus nec plebi cura decesserat. tanta cum gratia, tum arte præparaverant fœneratores, quæ non modo plebem, sed ipsum etiam dictatorem frustrarentur. | Namque Valerius, post Vetufii consulis reditum, omnium actionum in senatu primam habuit pro victore populo, retulitque, quid nexis fieri placeret. quæ cum rejecta relatio esset, *Non placeo, inquit, concordiaë auctor. optabitis, me Dius fidius, propediem, ut mei similes Romana plebes patronos habeat. Quod ad me attinet, neque frustrabor ultra cives meos, neque ipse frustra dictator ero. Discordiaë intestinaë, bellum externum, fecere, ut hoc magistratu egeret respublica. Pax foris parva est, domi impeditur. privatus potius, quam dictator, seditioni interero.* ita, curia egressus, dictatura se abdicavit. Apparuit causa plebi, suam vicem indignantem magistratu abisse. itaque, velut persoluta fide, quoniam per eum non stetisset, quin præ-

staretur, decedentem domum cum favore ac laudibus profecuti sunt.

XXXII. Timor inde Patres incessit, ne, si dimissus exercitus foret, rursus cœtus occulti conjurationesque fierent. itaque, quanquam per dictatorem delectus habitus esset, tamen, quoniam in consulum verba jurassent, sacramento teneri militem rati, per causam renovati ab Æquis belli, educi ex urbe legiones jussere. quo factò maturata est seditio. Et primo agitatum dicitur de consulum cæde, ut solverentur sacramento: doctos deinde, nullam scelere religionem exsolvi, Sicinio quodam auctore, injussu consulum in Sacrum montem secessisse (trans Anienem amnem est) tria ab urbe millia passuum. ea frequentior fama est, quam, cujus Piso auctor est, in Aventinum secessionem factam esse. Ibi sine ullo duce, vallo fossaque communis castris, quieti, rem nullam nisi necessariam ad victum fumendo, per aliquot dies neque laceffiti, neque laceffentes, sese tenuere. Pavor ingens in urbe, metuque mutuo suspensa erant omnia. Timere relicta ab suis plebes violentiam Patrum, timere Patres residem in urbe plebem, incerti, manere eam, an abire mallent. quam diu autem tranquillam, quæ secesserit, multitudinem fore? quid futurum deinde, si quod externum interim bellum existat? nullam profecto, nisi in concordia civium, spem reliquam ducere. eam per æqua, per iniqua, reconciliandam civitati esse. Placuit igitur oratorem ad plebem mitti Menenium Agrippam, facundum virum, & quod inde oriundus erat, plebi carum. Is, intro-

missus in castra, prisco illo dicendi & horrido modo nihil aliud, quam hoc, narraſſe fertur: *Tempore, quo in homine non, ut nunc, omnia in unum conſentiebant, ſed ſingulis membris ſuum cuique conſilium, ſuus ſermo fuerat, indignatas reliquas partes, ſua cura, ſuo labore ac miniſterio ventri omnia quæri: ventrem, in medio quietum, nihil aliud, quam datis voluptatibus frui. conſpiraffe inde, ne manus ad os cibum ferrent, nec os acciperet datum, nec dentes conſcicerent. hac ira, dum ventrem fame domare vellent, ipſa una membra totumque corpus ad extremam tabem veniſſe. Inde apparuiſſe, ventris quoque haud ſegne miniſterium eſſe: nec magis ali, quam alere eum, reddentem in omnes corporis partes hunc, quo vivimus vigemusque, diviſum pariter in venas maturum, conſectò cibo, ſanguinem.* Comparando hinc, quam inteſtina corporis ſeditio ſimilis eſſet iræ plebis in Patres, flexiſſe mentes hominum.

XXXIII. Agi deinde de concordia cœptum, conſeſſumque in conditiones, ut plebi ſui magiſtratus eſſent ſacroſancti, quibus auxilii latio adverſus conſules eſſet: neve cui Patrum capere eum magiſtratum liceret. Ita tribuni plebei creati duo, C. Licinius & L. Albinus. Hi tres collegas ſibi creaverunt. in his Sicinium fuiſſe, ſeditionis auctorem; de duobus, qui fuerint, minus convenit. Sunt, qui duos tantum in Sacro monte creatos tribunos eſſe dicant, ibique ſacratam legem latam. Per ſeſſionem plebis Sp. Caſſius & Poſtumus Cominius conſulatum inierunt. hiſ conſulibus cum Latinis populis iſtum fœdus. ad id feriendum conſul alter Ro-

mæ manfit; alter, ad Volſcum bellum miſſus, Antiates Volſcos fundit fugatque: compulſos in oppidum Longulam perſecutus, mœnibus potitur. Inde Poluſcam, item Volſcorum, cepit: tum magna vi adortus eſt Coriolos. Erat tum in caſtris inter primores juvenum C. Marcius, adoleſcens & conſilio & manu promptus, cui cognomen poſtea Coriolano fuit. Cum ſubito exercitum Romanum, Coriolos obſidentem, atque in oppidanos, quos intus clauſos habebat, intentum ſine ullo metu extrinſecus imminentis belli, Volſcæ legiones profectæ ab Antio invaſiſſent, eodemque tempore ex oppido erupiſſent hoſtes; forte in ſtatione Marcius fuit. Is cum delecta militum manu, non modo impetum erumpentium retudit, ſed per patentem portam ferro irrupit: cædeque in proxima urbis facta, ignem temere arreptum, imminentibus muro ædificiis injecit. Clamor inde oppidanorum, mixtus muliebri puerilique ploratu, ad terrorem, ut ſolet, primo ortu & Romanis auxit animum, & turbavit Volſcos, utpote capta urbe, cui ad ferendam opem venerant. Ita fuſi Volſci Antiates, Corioli oppidum captum. tantumque ſua laude obſtitit famæ conſulis Marcius, ut, niſi fœdus cum Latinis, columna ænea inſculptum, monumento eſſet, ab Sp. Caſſio uno, quia collega afuerat, iſtum; Poſtumum Cominium bellum geſſiſſe cum Volſcis, memoria ceſſiſſet. Eodem anno Agrippa Menenius moritur, vir omni vita pariter Patribus ac plebi carus; poſt ſeceſſionem carior plebi factus. Huic interpreti arbitroque concordiæ civium, legato Patrum ad

plebem, reductori plebis Romanæ in urbem, sumtus funeri defuit. extulit eum plebs sextantibus collatis in capita.

XXXIV. Consules deinde T. Geganius, P. Minucius facti. Eo anno, cum & foris quieta omnia a bello essent, & domi fanata discordia, aliud multo gravius malum civitatem invasit: caritas primum annonæ, ex incultis per secessionem plebis agris; fames deinde, qualis clausis solet. ventumque ad interitum servitorum utique & plebis esset, ni consules providissent, dimissis passim ad frumentum coemendum, non in Etruriam modo dextris ab Ostia litoribus, lævoque per Volscos mari usque ad Cumas, sed quæsitum in Siciliam quoque. adeo finitimorum odia longinquis coegerant indigere auxiliis. Frumentum Cumis cum coemtum esset, naves pro bonis Tarquiniorum ab Aristodemo tyranno, qui heres erat, retentæ sunt. in Volscis Pomptinoque ne emi quidem potuit: periculum quoque ab impetu hominum ipsis frumentatoribus fuit. Ex Tuscis frumentum Tiberi venit: eo sustentata est plebs. Incommodo bello in tam artis commeatibus vexati forent, ni Volscos, jam moventes arma, pestilentia ingens invasisset. ea clade conterritis hostium animis, ut etiam, ubi ea remississet, terrore aliquo tenerentur, & Velitris auxere numerum colonorum Romani, & Norbæ in montes novam coloniam, quæ arx in Pomptino esset, miserunt. M. Minucio deinde & A. Sempronio consulibus, magna vis frumenti ex Sicilia advecta: agitatumque in senatu, quanti plebi daretur. Multi ve-

niffe tempus premendæ plebis putabant, recuperandique jura, quæ extorta secessione ac vi Patribus essent: in primis Marcus Coriolanus, hostis tribuniciæ potestatis, *Si annonam, inquit, veterem volunt, jus pristinum reddant Patribus. Cur ego plebejos magistratus, cur Sicinium potentem video, sub jugum missus, tanquam a latronibus redemptus? Egone has indignitates diutius patiar, quam necesse est? Tarquinium regem qui non tulerim, Sicinium feram? Sece-dat nunc, avocet plebem; patet via in Sacrum montem aliosque colles. Rapiant frumenta ex agris nostris, quemadmodum tertio anno rapuere. Utantur annonam, quam furore suo fecere. Audeo dicere, hoc malo domitos ipsos potius cultores agrorum fore, quam ut armati per secessionem coli prohibeant.* Haud tam facile dictu est, faciendumne fuerit, quam potuisse arbitror fieri, ut, conditionibus laxandi annonam, & tribuniciam potestatem, & omnia invitis jura imposita Patres demerent sibi.

XXXV. Et senatui nimis atrox visa sententia est, & plebem ira prope armavit. *Fame se jam, sicut hostes, peti: cibo victuque fraudari: peregrinum frumentum, quæ sola alimenta ex insperato fortuna dederit, ab ore rapi, nisi C. Marcio vinciti dedantur tribuni, nisi de tergo plebis Romanæ satisfiat. Eum sibi carnificem novum exortum, qui aut mori, aut servire jubeat.* In exeuntem e curia impetus factus esset, ni peropportune tribuni diem dixissent. Ibi ira est suppressa. se judicem quisque, se dominum vitæ necisque inimici factum videbat. Contentim primo Marcus audiebat minas tribunicias: auxilii, non pœ-

næ, jus datum illi potestati; plebisque, non Patrum, tribunos esse. sed adeo infensa erat coorta plebs, ut unius pœna defungendum esset Patribus. Restiterunt tamen adversa invidia, usque sunt, qua suis quisque, qua totius ordinis viribus. Ac primo tentata res est, si, dispositis clientibus, absterrendo singulos a coitionibus conciliisque, disjicere rem possent. Universi deinde processere, (quidquid erat Patrum, reos diceres) precibus plebem exposcentes: *Unum sibi civem, unum senatorem, si innocentem absolvere nollent, pro nocente donarent.* Ipse cum die dicta non adesset, perseveratum in ira est. Damnatus absens in Volscos exsulatum abiit, minitans patriæ, hostilesque jam tum spiritus gerens. Venientem Volsci benigne excepere; benigniusque in dies colebant, quo major ira in suos eminebat, crebræque nunc querelæ, nunc minæ percipiebantur. Hospitio utebatur Attii Tulli. Longe is tum princeps Volsci nominis erat, Romanisque semper infestus. ita cum alterum vetus odium, alterum ira recens stimulare, consilia conferunt de Romano bello. Haud facile credebant, plebem suam impelli posse, ut toties infeliciter tentata arma caperent. Multis sæpe bellis, pestilentia postremo amissa juventute, fractos spiritus esse: arte agendum in exoleta jam vetustate odio, ut recenti aliqua ira exacerbarentur animi.

XXXVI. Ludi forte ex instauratione magni Romæ parabantur. instaurandi hæc causa fuerat. Ludis mane servum quidam paterfamilix, nondum commisso spectaculo, sub furca cæsum medio ege-

rat circo. cœpti inde ludi, velut ea res nihil ad religionem pertinuisset. Haud ita multo post Ti. Atinio, de plebe homini, somnium fuit. Visus Jupiter dicere, *Sibi ludis præfultatorem displicuisse: nisi magnifice instaurarentur hi ludi, periculum urbi fore. iret, ea consulibus nuntiaret.* Quanquam haud sane liber erat religione animus, verecundia tamen majestatis magistratuum timorem vicit, ne in ora hominum pro ludibrio abiret. Magno illi ea cunctatio stetit. filium namque intra paucos dies amisit. cujus repentinæ cladis ne causa dubia esset, ægro animi eadem illa in somnis obversata species visa est rogitare, *Satin' magnam spreti numinis haberet mercedem? majorem instare, ni eat propere, ac nuntiet consulibus.* Jam præsentior res erat: cunctantem tamen ac prolatantem ingens vis morbi adorta est debilitate subita. Tum enimvero Deorum ira admonuit. fessus igitur malis præteritis instantibusque, consilio propinquorum adhibito, cum visa atque audita, & obversatum toties somno Jovem, minas irasque cœlestes, repræsentatas casibus suis, exposuisset; consensu inde haud dubio omnium, qui aderant, in forum ad consules lectica defertur. inde in curiam jussu consulum delatus, eadem illa cum Patribus ingenti omnium admiratione enarrasset; ecce aliud miraculum: qui captus omnibus membris delatus in curiam esset, eum functum officio pedibus suis domum rediisse, traditum memoriæ est.

XXXVII. Ludi quam amplissimi ut fierent, fenatus decrevit. Ad eos ludos, auctore Attio Tul-

lo, vis magna Volscorum venit. Priusquam committerentur ludi, Tullius, ut domi compositum cum Marcio fuerat, ad consules venit. dicit esse, quæ secreto agere de republica velit. Arbitris remotis, *Invitus*, inquit, *quod sequius sit, de meis civibus loquor. Non tamen admissum quidquam ab iis criminatum venio, sed cautum, ne admittant. Nimio plus, quam velim, nostrorum ingenia sunt mobilia. Multis id cladibus sensimus. quippe qui non nostro merito, sed vestra patientia, incolumes simus. Magna hic nunc Volscorum multitudo est. ludi sunt. spectaculo intenta civitas erit. Memini, quid per eandem occasionem ab Sabinorum juventute in hac urbe commissum sit. horret animus, ne quid inconsulte ac temere fiat. Hæc, nostra vestraque causa, prius dicenda vobis, consules, ratus sum. Quod ad me attinet, extemplo hinc domum abire in animo est, ne cuius facti dictive contagione præsens violer.* Hæc locutus abiit. Consules cum ad Patres rem dubiam sub auctore certo detulissent, auctor magis, ut fit, quam res, ad præcavendum vel ex supervacuo movit. factoque senatusconsulto, ut urbem excederent Volsci, præcones dimittuntur, qui omnes eos proficisci ante noctem juberent. Ingens pavor primo discurrentes ad suas res tollendas in hospitia perculit. Proficiscentibus deinde indignatio oborta: *Se, ut consceleros contaminatosque, ab ludis, festis diebus, cætu quodammodo hominum Deorumque, abactos esse.*

XXXVIII. Cum prope continuato agmine irent, prægressus Tullus ad caput Ferentinum, ut quisque veniret, primores eorum excipiens, querendo

indignandoque, & eos ipsos fedulo audientes fecunda iræ verba, & per eos multitudinem aliam in subiectum viæ campum deduxit. Ibi in concionis modum orationem exorsus, *Veteres populi Romani injurias, cladesque gentis Volscorum, ut omnia, inquit, obliviscamini alia, hodiernam hanc contumeliam quo tandem animo fertis, qua per nostram ignominiam ludos commisere? An non sensistis, triumphatum hodie de vobis esse? vos omnibus, civibus, peregrinis, tot finitimis populis, spectaculo abeuntes fuisset? vestras conjuges, vestros liberos traductos per ora hominum? Quid eos, qui audivere vocem præconis? quid, qui vos videre abeuntes? quid eos, qui huic ignominioso agmini fuerunt obvii, existimasse putatis? nisi aliquod profecto nefas esse, quo, si intersimus spectaculo, violaturi simus ludos, piaculumque meritori: ideo nos ab sede piorum, cætu, concilioque abigi. Quid, deinde? illud non succurrit, vivere nos, quod maturarimus proficisci? si hoc profectio, & non fuga est. Et hanc urbem vos non hostium ducitis, ubi, si unum diem morati essetis, moriendum omnibus fuit? Bellum vobis indictum est; magno eorum malo, qui indixere, si viri estis. Ita & sua sponte irarum pleni, & incitati, domos inde digressi sunt; instigandoque suos quisque populos effecere, ut omne Volscum nomen deficeret.*

XXXIX. Imperatores ad id bellum de omnium populorum sententia lecti Attius Tullus & C. Marcius exsul Romanus, in quo aliquanto plus spei repositum. Quam spem nequaquam fefellit: ut facile appareret, ducibus validiorem, quam exercitu, rem

Romanam esse. Circejos profectus, primum colonos inde Romanos expulit, liberamque eam urbem Volscis tradidit. Inde, in Latinam viam transversis tramitibus transgressus, Satricum, Longulam, Poluscam, Coriolos, novella hæc Romanis oppida ademit. Inde Lavinium recepit: tunc deinceps Corbionem, Vitelliam, Trebiam, Lavicos, Pedum cepit. Postremum ad urbem a Peto ducit; &, ad fossas Cluilias quinque ab urbe millia passuum castris positis, populatur inde agrum Romanum; custodibus inter populatores missis, qui patriciorum agros intactos servarent: sive infensus plebi magis, sive ut discordia inde inter Patres plebemque oriretur. Quæ profecto orta esset; adeo tribuni jam ferocem per se plebem criminando in primores civitatis instigabant. sed externus timor, maximum concordiae vinculum, quamvis suspectos infensosque inter se jungebat animos. Id modo non conveniebat; quod senatus consulesque nusquam alibi spem, quam in armis, ponebant: plebes omnia, quam bellum, malebat. Sp. Nautius jam & Sex. Furius consules erant. Eos, recensentes legiones, præsidia per muros aliaque, in quibus stationes vigiliasque esse placuerat, loca distribuentes, multitudo ingens pacem poscentium primum seditioso clamore conterruit. deinde vocare senatum, referre de legatis ad C. Marcium mittendis coegit. Acceperunt relationem Patres, postquam apparuit, labare plebis animos; missique de pace ad Marcium oratores atrox responsum retulerunt: *Si Volscis ager redderetur, posse agi*

de pace: si præda belli per otium frui velint, memorem se & civium injuriæ, & hospitem beneficii, annisurum, ut appareat, exsilio sibi irritatos, non fractos animos esse. Iterum deinde iidem missi non recipiuntur in castra. Sacerdotes quoque, suis insignibus velatos, isse supplices ad castra hostium, traditum est, nihilo magis quam legatos flexisse animum.

XL. Tum matronæ ad Veturiam, matrem Coriolani, Volumniamque uxorem frequentes coeunt. id publicum consilium, an muliebris timor fuerit, parum invenio. Pervicere certe, ut & Veturia, magno natu mulier, & Volumnia, duos parvos ex Marcio ferens filios, secum in castra hostium irent: &, quam armis viri defendere urbem non possent, mulieres precibus lacrimisque defenderent. Ubi ad castra ventum est, nuntiatumque Coriolano, adesse ingens mulierum agmen; in primo (ut qui nec publica majestate in legatis, nec in sacerdotibus tanta offusa oculis animoque religione motus esset) multo obstinatio adversus lacrimas muliebres erat. Dein familiarium quidam, qui insignem mœstitia inter ceteras cognoverat Veturiam, inter nurum nepotesque stantem, *Nisi me frustrantur, inquit, oculi, mater tibi conjuxque & liberi adjunt.* Coriolanus, prope ut amens, consternatus, ab sede sua cum ferret matri obviæ complexum; mulier in iram ex precibus versa, *Sine, priusquam complexum accipio, sciam, inquit, ad hostem, an ad filium, venerim: captiva materne in castris tuis sum? In hoc me longa vita & infelix senectâ traxit, ut exsulem te, deinde hostem viderem? Potuisti*

*populari hanc terram, quæ te genuit atque aluit? Non tibi, quamvis infesto animo & minaci perveneras, ingredienti fines ira cecidit? non, cum in conspectu Roma fuit, succurrit, intra illa mœnia domus ac penates mei sunt, mater, conjux, liberique? Ergo ego nisi peperissem, Roma non oppugnaretur; nisi filium haberem, libera in libera patria mortua essem. Sed ego nihil jam pati, nec tibi turpius quam mihi miserius, possum: nec, ut sim miserrima, diu futura sum. De his videris: quos, si pergis, aut immatura mors, aut longa servitus manet. Uxor deinde ac liberi amplexi: fletusque ab omni turba mulierum ortus, & comploratio sui patriæque, fregere tandem virum. complexus inde suos dimittit: ipse retro ab urbe castra movit. Abductis deinde legionibus ex agro Romano, invidia rei oppressum periisse tradunt; alii alio leto. apud Fabium, longe antiquissimum auctorem, usque ad senectutem vixisse eundem invenio. Refert certe, hanc sæpe eum exacta ætate usurpasse vocem, *Multo miserius seni exsilium esse.* Non inviderunt laudes suas mulieribus viri Romani. adeo sine obtreptione gloriæ alienæ vivebatur. Monumento quoque quod esset, templum Fortunæ Muliebri ædificatum dedicatumque est. Rediere deinde Volsci, adjunctis Æquis, in agrum Romanum. sed Æqui Attium Tullum haud ultra tulere ducem. Hinc ex certamine, Volsci Æquine imperatorem conjuncto exercitui darent, seditio, deinde atrox prælium ortum. Ibi fortuna populi Romani duos hostium exercitus, haud minus pernicioso quam pertinaci certamine, confecit. Consules T. Sicinius &*

C. Aquilius. Sicinio Volsci, Aquillio Hernici (nam ii quoque in armis erant) provincia evenit. Eo anno Hernici devicti: cum Volscis æquo Marte discessum est.

XLI. Sp. Cassius deinde & Proculus Virginius consules facti. cum Hernicis foedus ictum: agri partes duæ ademtæ. inde dimidium Latinis, dimidium plebi divisurus consul Cassius erat. Adjiciebat huic muneri agri aliquantum, quem publicum possideri a privatis criminabatur. Id multos quidem Patrum, ipsos possessores, periculo rerum suarum terrebat. sed & publica Patribus sollicitudo inerat, largitione consulem periculosas libertati opes struere. Tum primum lex agraria promulgata est; nunquam deinde usque ad hanc memoriam sine maximis motibus rerum agitata. Consul alter largitioni resistebat, auctoribus Patribus, nec omni plebe adversante. quæ primo cœperat fastidire, munus vulgatum a civibus isse in focios. sæpe deinde & Virginium consulem in concionibus velut vaticinantem audiebat, *Pestilens collegæ munus esse. Agros illos servitutum iis, qui acceperint, luros. regno viam fieri. Quid ita enim assumi focios & nomen Latinum? Quid atinuisse, Hernicis, paulo ante hostibus, capti agri partem tertiam reddi, nisi ut hæ gentes pro Coriolano duce Cassium habeant?* Popularis jam esse dissuasor & intercessor legis agrariæ cœperat. uterque deinde consul certatim plebi indulgere. Virginius dicere, passurum se assignari agros, dum ne cui, nisi civi Romano, assignentur. Cassius, quia in agraria largitione ambitiosus in focios, eoque

civibus vilior erat, ut alio munere sibi reconciliaret civium animos, jubere pro Siculo frumento pecuniam acceptam retribui populo. Id vero haud iecus, quam præsentem mercedem regni, aspernata plebes. adeo propter suspicionem insitam regni, velut abundarent omnia, munera ejus in animis hominum respuebantur. Quem, ubi primum magistratu abiit, damnatum necatumque constat. Sunt, qui patrem auctorem ejus supplicii ferant. eum, cognita domi causa, verberasse ac necasse, peculiumque filii Cereri consecravisse. signum inde factum esse, & inscriptum, EX CASSIA FAMILIA DATUM. Invenio apud quosdam, idque propius fidem est, a quæstoribus Cæsone Fabio & L. Valerio diem dictam perduellionis, damnatumque populi judicio: dirutas publice ædes. ea est area ante Telluris ædem. Ceterum sive illud domesticum, sive publicum fuit judicium, damnatur Ser. Cornelio, Q. Fabio consulibus.

XLII. Haud diuturna ira populi in Cassium fuit. Dulcedo agrariæ legis ipsa per se, demto auctore, subibat animos: accensaque ea cupiditas est malignitate Patrum; qui, devictis eo anno Volscis Æquisque, militem præda fraudavere. quidquid captum ex hostibus est, vendidit Fabius consul, ac redegit in publicum. Invisum erat Fabium nomen plebi propter novissimum consulem: tenuere tamen Patres, ut cum L. Æmilio Cæso Fabius consul crearetur. Eo infestior facta plebes seditione domestica bellum externum excivit: bello deinde civiles discordiæ intermissæ. uno animo Patres ac plebes

rebellantes Volscos & Æquos, duce Æmilio, prospera pugna vicere. Plus tamen hostium fuga, quam proelium, absumsit. adeo pertinaciter fusos infecuti sunt equites. Castoris ædes eodem anno Idibus Quincilibus dedicata est. vota erat Latino bello; Postumio dictatore. filius ejus, duumvir ad id ipsum creatus, dedicavit. Sollicitati & eo anno sunt dulcedine agrariæ legis animi plebis. Tribuni plebis popularem potestatem lege populari celebrabant. Patres, satis superque gratuiti furoris in multitudine credentes esse, largitiones temeritatique invitamenta horrebant. acerrimi Patribus duces ad resistendum consules fuere. Ea igitur pars reipublicæ vicit. nec in præsens modo, sed in venientem etiam annum M. Fabium Cæsonis fratrem, & magis invisum alterum plebi accusatione Sp. Cassii, L. Valerium consules dedit. Certatum eo quoque anno cum tribunis est. vana lex, vanique legis auctores, jactando irritum munus, facti. Fabium inde nomen ingens post tres continuos consulatus, unoque velut tenore omnes expertos tribuniciis certaminibus, habitum. itaque, ut bene locatus, mansit in ea familia aliquamdiu honos. Bellum inde Vejens initum; & Volsci rebellarunt. sed ad bella externa prope supererant vires: abutebanturque iis inter semetipsos certando. Accessere ad ægras jam omnium mentes prodigia cœlestia, prope quotidianas in urbe agrisque ostentantia minas. motique ira numinis causam nullam aliam vates canebant, publice privatimque nunc extis, nunc per aves consulti, quam haud rite sacra fieri. qui

terrores tamen eo evasere, ut Oppia, virgo Vestalis, damnata incesti poenas dederit.

XLIII. Q. Fabius inde & C. Julius consules facti. Eo anno non segnior discordia domi, & bellum foris atrocius fuit. Ab Æquis arma sumta. Vejentes agrum quoque Romanorum populantes inierunt. quorum bellorum crescente cura, Cæso Fabius & Sp. Furius consules fiunt. Ortonam, Latinam urbem, Æqui oppugnabant. Vejentes, pleni jam populationum, Romam ipsam se oppugnatos minabantur. Qui terrores, cum compefcere deberent, auxere insuper animos plebis: redibatque non sua sponte plebi mos detrectandi militiam. sed Sp. Licinius tribunus plebis, venisse tempus ratus per ultimam necessitatem legis agrariæ Patribus injungendæ, susceperat rem militarem impediendam. Ceterum tota invidia tribuniciaë potestatis versa in auctorem est: nec in eum consules acrius, quam ipsius ejus collegæ, coorti sunt: auxilioque eorum delectum consules habent. Ad duo simul bella exercitus scribitur. ducendus Fabio in Æquos, in Vejentes Furio datur. Et in Vejentibus quidem nihil dignum memoria gestum est. Fabio aliquanto plus negotii cum civibus, quam cum hostibus, fuit. unus ille vir ipse consul rempublicam sustinuit, quam exercitus odio consulis, quantum in se fuit, prodebat. Nam cum consul, præter ceteras imperatorias artes, quas parando gerendoque bello edidit plurimas, ita instruxisset aciem, ut, solo equitatu emissio, exercitum hostium funderet, insequi fusos pedes noluit. nec il-

los, etsi non adhortatio invisi ducis, suum saltem flagitium & publicum in præsentia dedecus, postmodo periculum, si animus hosti redisset, cogere potuit gradum accelerare; aut, si aliud nihil, instare instructos. Injussu signa referunt, mœstique, (crederes victos) execrantes nunc imperatorem, nunc navatam ab equite operam, redeunt in castra. Nec huic tam pestilenti exemplo remedia ulla ab imperatore quæsitæ sunt. adeo excellentibus ingeniis citius defuerit ars, qua civem regant, quam qua hostem superent. Consul Romam rediit, non tam belli gloria aucta, quam irritato exacerbatoque in se militum odio. Obtinere tamen Patres, ut in Fabia gente consulatus maneret. M. Fabium consulem creant: Fabio collega Cn. Manlius datur.

XLIV. Et hic annus tribunum auctorem legis agrariæ habuit. Ti. Pontificius fuit. is, eandem viam, velut processisset Sp. Licinio, ingressus, delectum paulisper impediit. Perturbatis iterum Patribus, Appius Claudius, *Victam tribuniciam potestatem*, dicere, *priore anno; in præsentia re ipsa, exemplo in perpetuum: quando inventum sit, suis ipsam viribus dissolvi. Neque enim unquam defuturum, qui & ex collega victoriam sibi, & gratiam melioris partis bono publico velit quæsitam. Et plures, si pluribus opus sit, tribunos ad auxilium consulum paratos fore; & unum vel adversus omnes satis esse. Darent modo & consules & primores Patrum operam, ut, si minus omnes, aliquos tamen ex tribunis reipublicæ ac senatui conciliarent.* Præceptis Appii moniti Patres, & universi comiter ac benigne tribunos appellare; &

consulares, ut cuique privatim aliquid juris ad-
 versus singulos erat, partim gratia, partim auctorita-
 te, obtinere, ut tribuniciæ potestatis vires salu-
 bres vellent reipublicæ esse. quatuorque tribuno-
 rum adversus unum moratorem publici commodi
 auxilio delectum consules habent. Inde ad Vejens
 bellum profecti; quo undique ex Etruria auxilia
 convenerant, non tam Vejentium gratia concitata,
 quam quod in spem ventum erat, discordia inte-
 stina dissolvi rem Romanam posse. Principesque in
 omnium Etruriæ populorum conciliis fremebant,
*Æternas opes esse Romanas, nisi inter semet ipsi se-
 ditionibus sæviant. id unum venenum, eam labem ci-
 vitatibus opulentis repertam, ut magna imperia mor-
 talia essent. Diu sustentatum id malum, partim Pa-
 trum consiliis, partim patientia plebis, jam ad extre-
 ma venisse. Duas civitates ex una factas: suos cui-
 que parti magistratus, suas leges esse. Primum in de-
 lectibus sævire solitos: eosdem in bello tamen paruis-
 se ducibus. qualicunque urbis statu, manente disci-
 plina militari, sisti potuisse. jam non parendi magi-
 stratibus morem in castra quoque Romanum militem
 sequi. Proximo bello in ipsa acie, in ipso certami-
 ne, consensu exercitus traditam ultro victoriam victis
 Equis: signa deserta, imperatorem in acie relictum,
 injussu in castra reditum. Profecto, si instetur, suo
 milite vinci Romam posse. Nihil aliud opus esse, quam
 indici ostendique bellum: cetera sua sponte fata &
 Deos gesturos. Ea spes Etruscos armaverat, multis
 invicem casibus victos victoresque.*

XLV. Consules quoque Romani nihil præterea

aliud, quam suas vires, sua arma, horrebant: memoria pessimi proximo bello exempli terrebat, ne rem committerent eo, ubi duæ simul acies timendæ essent. Itaque castris se tenebant, tam ancipiti periculo averſi. diem tempusque forsitan ipsum leniturum iras, sanitatemque animis allaturum. Vemens hostis Etruscique eo magis præpropere agere: laceffere ad pugnam: primo obequitando castris provocandoque; postremo, ut nihil movebant, qua consules ipsos, qua exercitum increpando: *Simulationem intestinæ discordiæ remedium timoris inventum: & consules magis non confidere, quam non credere suis militibus. Novum seditionis genus, silentium otiumque inter armatos.* ad hæc in novitatem generis originisque, qua falsa, qua vera, jacere. Hæc, cum sub ipso vallo portisque streperent, haud ægre consules pati. at imperitæ multitudinis nunc indignatio, nunc pudor, pectora versare, & ab intestinis avertere malis: nolle inultos hostes, nolle successum, non Patribus, non consulibus: externa & domestica odia certare in animis. Tandem superant externa. adeo superbe insolenterque hostis eludebat. frequentes in prætorium conveniunt, poscunt pugnam, postulant, ut signum detur. Consules, velut deliberabundi, capita conferunt, diu colloquuntur. pugnare cupiebant; sed retro revocanda & abdenda cupiditas erat, ut adversando remorandoque incitato semel militi adderent impetum. Redditur responsum, *immaturam rem agi, nondum tempus pugnae esse: castris se tenerent.* Edicunt inde, *ut abstineant pugna. si quis injussu pug-*

naverit, ut in hostem animadversuros. Ita dimissis, quo minus consules velle credunt, crescit ardor pugnandi. accedunt insuper hostes ferocius multo, ut statuisse non pugnare consules cognitum est. Quippe impune se insultaturos, non credi militi arma. rem ad ultimum seditionis erupturam, finemque venisse Romano imperio. His freti occursant portis, ingerunt probra, ægre abstinent, quin castra oppugnent. Enimvero non ultra contumeliam pati Romanus posse: totis castris undique ad consules curritur. non jam sensim, ut ante, per centurionum principes postulant; sed passim omnes clamoribus agunt. Matura res erat; tergiversantur tamen. Fabius deinde, ad crescentem tumultu jam metum seditionis collega concedente, cum silentium classico fecisset: *Ego istos, Cn. Manli, posse vincere scio; velle ne scirem, ipsi fecerunt. Itaque certum atque decretum est, non dare signum, nisi, victores se redituros ex hac pugna, jurant. Consulem Romanum miles semel in acie fefellit; Deos nunquam fallit.* Centurio erat M. Flavolejus, inter primores pugnae flagitator. *Victor, inquit, M. Fabi, revertar ex acie.* Si fallat, Jovem patrem, Gradivumque Martem, aliosque iratos invocat Deos. Idem deinceps omnis exercitus in se quisque jurat. Juratis datur signum, arma capiunt, eunt in pugnam, irarum speique pleni. Nunc jubent Etruscos probra jacere, nunc armatis sibi quisque lingua promptum hostem offerri. Omnium illo die, qua plebis, qua Patrum, eximia virtus fuit. Fabium nomen, Fabia gens maxime enituit. multis civilibus certaminibus insen-

fos plebis animos illa pugna sibi reconciliare statuunt. Instruitur acies : nec Vejens hostis Etruscæque legiones detrectant. 7

XLVI. Prope certa spes erat , non magis secum pugnatos , quam pugnaverint cum Æquis. majus quoque aliquod , in tam irritatis animis & occasione ancipiti , haud desperandum esse facinus. Res aliter longe evenit. nam non alio ante bello infestior Romanus (adeo hinc contumeliis hostes , hinc confules mora exacerbaverant) prælium iniit. Vix explicandi ordinis spatium Etruscis fuit , cum , pilis inter primam trepidationem abjectis temere magis , quam emissis , pugna jam in manus , jam ad gladios , ubi Mars est atrocissimus , venerat. Inter primos genus Fabium insigne spectaculo exemploque civibus erat. ex his Q. Fabium , (tertio hic anno ante consul fuerat) principem in confertos Veientes euntem , ferox viribus & armorum arte Tuscus , incautum inter multas versantem hostium manus , gladio per pectus transfigit. telo extracto , præceps Fabius in vulnus abiit. Sensit utraque acies unius viri casum , cedebatque inde Romanus : cum M. Fabius consul tranfiluit jacentis corpus , objectaque parma , *Hoc jurastis* , inquit , *milites* , *fugientes vos in castra redituros ? adeo ignavissimos hostes magis timetis , quam Jovem Martemque , per quos jurastis ? At ego injuratus aut victor revertar , aut prope te hic , Q. Fabi , dimicans cadam.* Consuli tum Cæso Fabius prioris anni consul , *Verbisne istis , frater , ut pugnent , te impetraturum credis ? Dii impetrabunt , per quos juravere. Et nos , ut decet procures ,*

ut Fabio nomine est dignum, pugnando potius, quam adhortando, accendamus militum animos. Sic in primum infestis hastis provolant duo Fabii, totamque moverunt secum aciem.

XLVII. Proelio ex parte una restituto, nihilo segnius in altero cornu Cn. Manlius consul pugnam ciebat: ubi prope similis fortuna est versata. nam ut altero in cornu Q. Fabium, sic in hoc ipsum consulem Manlium, jam velut fusos agentem hostes, & impigre milites secuti sunt; &, ut ille gravi vulnere ictus ex acie cessit, interfectum rati, gradum retulere. cessissentque loco, ni consul alter, cum aliquot turmis equitum in eam partem citato equo advectus, vivere clamitans collegam, se victorem fuso altero cornu adesse, rem inclinatam sustinisset. Manlius quoque ad restituendam aciem se ipse coram offert. Duorum consulum cognita ora accendunt militum animos. simul & vanior jam erat hostium acies, dum, abundante multitudine freti, subtracta subsidia mittunt ad castra oppugnanda. In quæ haud magno certamine impetu facto, dum prædæ magis, quam pugnæ, memores terunt tempus; triarii Romani, qui primam irruptionem sustinere non potuerant, missis ad consules nuntiis, quo loco res essent, conglobati ad prætorium redeunt, & sua sponte ipsi prælium renovant: & Manlius consul, revectus in castra, ad omnes portas milite opposito, hostibus viam clauserat. Ea desperatio Tuscis rabiem magis, quam audaciam, accendit. nam cum incurfantes, quacunque exitum ostenderet spes, vano aliquoties im-

petuissent; globus juvenum unus in ipsum consulem insignem armis invadit. Prima excepta a circumstantibus tela. sustineri deinde vis nequit. Consul mortifero vulnere ictus cadit, fusique circa omnes. Tuscis crescit audacia. Romanos terror per tota castra trepidos agit. & ad extrema ventum foret, ni legati, rapti consulis corpore, patefecissent una porta hostibus viam. Ea erumpunt; consternatoque agmine abeuntes in victorem alterum incidunt consulem. ibi iterum cæsi fusique passim. Victoria egregia parta, tristis tamen duobus tam claris funeribus. Itaque consul, decernente senatu triumphum, *Si exercitus sine imperatore triumphare possit, pro eximia eo bello opera facile passurum*, respondit: *se, familia funesta Q. Fabii fratris morte, republica ex parte orba consule altero amisso, publico privatoque deformem luctu lauream non accepturum*. Omni acto triumpho depositus triumphus clarior fuit. adeo spreta in tempore gloria interdum cumulatio redit. Funera deinde duo deinceps collegæ fratrisque ducit: idem in utroque laudator, cum, concedendo illis suas laudes, ipse maximam partem earum ferret. Neque immemor ejus, quod initio consulatus imbiberat, reconciliandi animos plebis, faucios milites curandos dividit Patribus. Fabiis plurimi dati: nec alibi majore cura habiti. Inde populares jam esse Fabii: nec hoc ulla, nisi salubri reipublicæ, arte.

XLVIII. Igitur non Patrum magis, quam plebis, studiis Cæso Fabius cum T. Virginio consul factus, neque bella, neque delectus, neque ullam aliam priorem curam agere, quam ut, jam aliqua

ex parte inchoata concordiae spe, primo quoque tempore cum Patribus coalescerent animi plebis. Itaque principio anni censuit, priusquam quisquam agrariae legis auctor tribunus existeret, occuparent Patres ipsi suum munus facere: captivum agrum plebi quam maxime aequaliter darent. verum esse, habere eos, quorum sanguine ac sudore partus sit. Aspernati Patres sunt: questi quoque quidam, nimia gloria luxuriare & evanescere vividum quondam illud Cæsonis ingenium. Nullæ deinde urbanæ factiones fuere. Vexabantur incursionibus Æquorum Latini. eo cum exercitu Cæso missus, in ipsorum Æquorum agrum depopulandum transit. Æqui se in oppida receperunt, murisque se tenebant: eo nulla pugna memorabilis fuit. At a Veiente hoste clades accepta temeritate alterius consulis. actumque de exercitu foret, ni Cæso Fabius in tempore subsidio venisset. Ex eo tempore neque pax neque bellum cum Veientibus fuit; res proxime formam latrocinii venerat. Legionibus Romanis cedebant in urbem. ubi abductas senserant legiones, agros incurfabant; bellum quiete, quietem bello invicem eludentes. Ita neque omitti tota res, nec perfici poterat. & alia bella aut præsentia instabant, ut ab Æquis Volscisque, non diutius, quam recens dolor proximæ cladis transfiret, quiescentibus: aut mox moturos se apparebat Sabinos semper infestos, Etruriamque omnem. sed Veiens hostis, asfiduus magis, quam gravis, contumeliis sæpius, quam periculo, animos agitabat: quod nullo tempore negligi poterat, aut averti alio sinebat. Tum

Fabia gens senatum adiit. consul pro gente loquitur: *Affiduo magis, quam magno, præsidio, ut scitis, Patres conscripti, bellum Vejens eget. Vos alia bella curate: Fabios hostes Vejentibus date. Auctores sumus, tutam ibi majestatem Romani nominis fore. Nostrium id nobis velut familiare bellum, privato sumtu gerere in animo est. Respublica & milite illic & pecunia vacet. Gratia ingentes actæ.* Consul e curia egressus, comitante Fabiorum agmine, qui in vestibulo curiæ, senatusconsultum expectantes, steterant, domum rediit. Jussi armati postero die ad limen consulis adeste, domos inde discedunt.

XLIX. Manat tota urbe rumor: Fabios ad cœlum laudibus ferunt. Familiam unam subisse civitatis onus: Vejens bellum in privatam curam, in privata arma versum. Si sint duæ roboris ejusdem in urbe gentes; deposcant, hæc Volscos sibi, illa Æquos: populo Romano tranquillam pacem agente, omnes finitimos subigi populos posse. Fabii postero die arma capiunt: quo jussi erant, conveniunt. Consul, paludatus egrediens, in vestibulo gentem omnem suam instructo agmine videt. acceptus in medium, signa ferri jubet. Nunquam exercitus neque minor numero, neque clarior fama & admiratione hominum, per urbem incessit. Sex & trecenti milites, omnes patricii, omnes unius gentis, quorum neminem ducem sperneret egregius quibuslibet temporibus senatus, ibant, unius familiæ viribus Vejenti populo pestem minitantes. Sequebatur turba, propria alia cognatorum sodaliumque, nihil medium, nec spem, nec curam, sed im-

mensa omnia volventium animo; alia publica sollicitudine excitata, favore & admiratione stupens: *Ire fortes, ire felices jubent, inceptis eventus pares reddere: consulatus inde ac triumphos, omnia præmia ab se, omnes honores sperare.* Prætereuntibus Capitolium arcemque & alia templa, quidquid Deorum oculis, quidquid animo occurrit, precantur, ut illud agmen faustum atque felix mittant, sospites brevi in patriam ad parentes restituant. Incassum missæ preces. Infelici via dextro Jano portæ Carmentalis profecti, ad Cremeram flumen perveniunt. is opportunus visus locus communiendo præsidio. L. Æmilius inde & C. Servilius cōsules facti. & donec nihil aliud quam in populationibus res fuit, non ad præsidium modo tutandum Fabii fatis erant, sed tota regione, qua Tuscus ager Romano adjacet, sua tuta omnia, infesta hostium, vagantes per utrumque finem, fecere. Intervallum deinde haud magnum populationibus fuit: dum & Vejentes, accito ex Etruria exercitu, præsidium Cremeræ oppugnant; & Romanæ legiones, ab L. Æmilio Consule adductæ, cominus cum Etruscis dimicant acie. quanquam vix dirigendi aciem spatium Vejentibus fuit. adeo inter primam trepidationem, dum post signa ordines introeunt, subsidiaque locant, invecra subito ab latere Romana equitum ala, non pugnae modo incipiendæ, sed consistendi, ademit locum. Ita, fusi retro ad saxa Rubra, (ibi castra habebant) pacem supplices petunt. cujus impetratæ, ab insita animis levitate, ante deductum Cremera Romanum præsidium, pœnituit.

L. Rurfus cum Fabiis erat Vejenti populo, sine ullo majoris belli apparatu, certamen: nec erant incursiones modo in agros, aut subiti impetus incurfantium, sed aliquoties æquo campo collatisque signis certatum. gensque una populi Romani sæpe ex opulentissima, ut tum res erant, Etrusca civitate victoriam tulit. Id primo acerbum indignumque Vejentibus visum. inde consilium ex re natum, insidiis ferocem hostem captandi: gaudere etiam, multo successu Fabiis audaciam crescere. Itaque & pecora prædantibus aliquoties, velut casu incidissent, obviam acta: & agrestium fuga vasti relictæ agri: & subsidia armatorum, ad arcendas populationes missa, sæpius simulato, quam vero, pavore refugerunt. Jamque Fabii adeo contemserant hostem, ut sua invicta arma neque loco neque tempore ullo crederent sustineri posse. hæc spes prorexit, ut ad conspecta procul a Cremera magno campi intervallo pecora (quanquam rara hostium apparebant arma) decurrerent. & cum improvidi effuso cursu insidias circa ipsum iter locatas superassent, palatique passim vaga, ut fit pavore injecto, raperent pecora; subito ex insidiis consurgitur, & adversi & undique hostes erant. Primo clamor circumlatus exterruit: dein tela ab omni parte accidebant. coeuntibusque Etruscis, jam continenti agmine armatorum septi, quo magis se hostis inferebat, cogebantur breviori spatium & ipsi orbem colligere. quæ res & paucitatem eorum insignem, & multitudinem Etruscorum, multiplicatis in arto ordinibus, faciebat. Tum, ommissa pu-

gna, quam in omnes partes parem intenderant, in unum locum se omnes inclinant. eo, nisi corporibus armisque, rupere cuneo viam. Duxit via in editum leniter collem. inde primo resistere. mox, ut respirandi superior locus spatium dedit, recipiendique a pavore tanto animum, pepulere etiam subeuntes: vincebatque auxilio loci paucitas, ni jugo circummissus Vejens in verticem collis evassisset. ita superior rursus hostis factus. Fabii cæsi ad unum omnes, præsidiumque expugnatum. trecentos sex perisse fatis convenit: unum prope puerem ætate relictum, stirpem genti Fabiæ, dubiisque rebus populi Romani sæpe domi bellicue vel maximum futurum auxilium.

LI. Cum hæc accepta clades esset, jam C. Horatius & T. Menenius consules erant. Menenius adversus Tuscos victoria elatos confestim missus. Tum quoque male pugnatum est, & Janiculum hostes occupavere: obsessaque urbs foret, super bellum annona premente, (transierant enim Etrusci Tiberim) ni Horatius consul ex Volscis esset revocatus: adeoque id bellum ipsis institit mœnibus, ut primo pugnatum ad Spei sit æquo Marte, iterum ad portam Collinam. Ibi quanquam parvo momento superior Romana res fuit, meliorem tamen militem, recepto pristino animo, in futura prælia id certamen fecit. A. Virginius & Sp. Servilius consules fiunt. post acceptam proximam pugnae cladem Veientes abstinere acie. populationes erant, & velut ab arce Janiculi passim in Romanum agrum impetus dabant. non usquam pecora tuta, non

agrestes erant. Capti deinde eadem arte sunt, qua ceperant Fabios. secuti dedita opera passim ad illecebras propulsa pecora, præcipitavere in insidias. quo plures erant, major cædes fuit. Ex hac clade atrox ira majoris cladis causa atque initium fuit. trajecto enim nocte Tiberi, castra Servilii consulis adorti sunt oppugnare. inde fusi magna cæde in Janiculum se ægre recepere. Confestim consul & ipse transit Tiberim, castra sub Janiculo communit. postero die, luce orta, nonnihil & hesternæ felicitate pugnae ferox, magis tamen, quod inopia frumenti, quamvis in præcipitia, dum celeriora essent, agebat consilia, temere adverso Janiculo ad castra hostium aciem erexit; foediisque inde pulsus, quam pridie pepulerat, interventu collegæ ipse exercitusque ejus est servatus. inter duas acies Etrusci, cum invicem his atque illis terga darent, occisione occisi. Ita oppressum temeritate felici Vejens bellum.

LII. Urbi cum pace laxior etiam annona rediit, & advecto ex Campania frumento, &, postquam timor sibi cuique futuræ inopiæ abiit, eo, quod abditum fuerat, prolato. Ex copia deinde otioque lascivire rursus animi; & pristina mala, postquam foris deerant, domi quærere. tribuni plebem agitare suo veneno, agraria lege; in resistentes incitare Patres, nec in universos modo, sed in singulos. Q. Confidius & T. Genucius, auctores agrariæ legis, T. Menenio diem dicunt. invidiæ erat amissum Cremeræ præsidium, cum haud procul inde stativa consul habuisset. Eum oppres-

ferunt. Cum & Patres haud minus, quam pro Coriolano, amissi essent, & patris Agrippæ favor haud dum exolevisset; in multa temperarunt tribuni. cum capitis anquississent, duo millia æris damnato multam dixerunt. ea in caput vertit. Negant tulisse ignominiam ægritudinemque: inde morbo absumtum esse. Alius deinde reus Sp. Servilius, ut consulatu abiit, C. Nautio & P. Valerio consulibus, initio statim anni, ab L. Cædicio & T. Statio tribunis die dicta, non, ut Menenius, precibus suis aut Patrum, sed cum multa fiducia innocentiae gratiæque, tribunicios impetus tulit. Et huic prælium cum Tuscis ad Janiculum erat crimini. sed fervidi animi vir, ut in publico periculo ante, sic tum in suo, non tribunos modo, sed plebem, oratione feroci refutando, exprobrandoque T. Menenii damnationem mortemque, (cujus patris munere restituta quondam plebs eos ipsos, quibus tum sæviret, magistratus, eas leges haberet) periculum audacia discussit. juvit & Virginius collega, testis productus, participando laudes: magis tamen Menenianum (adeo mutaverant animum) profuit iudicium.

LIII. Certamina domi finita. Vejens bellum exortum; quibus Sabini arma conjunxerant. P. Valerius consul, accitis Latinorum Hernicorumque auxiliis, cum exercitu Vejos missus, castra Sabina, quæ pro mœnibus sociorum locata erant, confestim aggreditur; tantamque trepidationem iniecit, ut, dum dispersi alii alia manipulatim excurrunt ad arcendam hostium vim, ea porta, cui signa primum intulerat, caperetur. intra vallum deinde cædes ma-

gis, quam proelium, esse. tumultus e castris & in urbem penetrat: tanquam Vejis captis, ita pavidi Vejentes ad arma currunt. pars Sabinis eunt subsidio; pars Romanos, toto impetu intentos in castra, adoriuntur. Paulisper averfi turbatique sunt. deinde & ipsi utroque versis signis resistunt: & eques, ab consule immissus, Tuscos fundit fugatque. eademque hora duo exercitus, duæ potentissimæ & maximæ finitimæ gentes superatæ sunt. Dum hæc ad Vejos geruntur, Volsci Æquique in Latino agro posuerant castra, populatique fines erant. eos per se ipsi Latini, assumtis Hernicis, sine Romano aut duce aut auxilio, castris exuerunt. Ingenti præda, præter suas recuperatas res, potiti sunt. missus tamen ab Roma consul in Volscos C. Nautius. Mos, credo, non placebat, sine Romano duce exercituque socios propriis viribus consiliisque bella gerere. nullum genus calamitatis contumeliæque non editum in Volscos est: nec tamen perPELLI potuere, ut acie dimicarent.

LIV. L. Furius inde & C. Manlius consules. Manlio Vejentes provincia evenit. non tamen bellatum. induciæ in annos quadraginta petentibus datæ, frumento stipendioque imperato. Paci externæ confestim continuatur discordia domi. agrariæ legis tribuniciis stimulis plebs furebat. Consules, nihil Menenii damnatione, nihil periculo deterriti Servilii, summa vi resistunt. abeuntes magistratu Cn. Genucius tribunus plebis arripuit. L. Æmilius & Opiter Virginius consulatum ineunt. Vopiscum Julium pro Virginio in quibusdam an-

nalibus consulem invenio. Hoc anno (quoscunque consules habuit) rei ad populum Furius & Manlius circumeunt fordidati non plebem magis, quam juniores Patrum. suadent, monent, *Honoribus & administratione reipublicæ abstineant; consulares vero fasces, prætextam, curulemque sellam, nihil aliud, quam pompam funeris, putent. claris insignibus velut infulis velatos ad mortem destinari. Quod si consulatus tanta dulcedo sit, jam nunc ita in animum inducant, consulatum captum & oppressum ab tribunicia potestate esse; consuli, velut apparitori tribunicio, omnia ad nutum imperiumque tribuni agenda esse. Si se commoverit, si respexerit Patres, si aliud, quam plebem, esse in republica crediderit; exsilium C. Marcii, Menerii damnationem & mortem, sibi proponat ante oculos.* His accensi vocibus Patres, consilia inde, non publica, sed in privato, seductaque a plurium conscientia, habere. ubi cum id modo constaret, jure an injuria eripiendos esse reos, atrocissima quæque maxime placebat sententia. nec auctor quamvis audaci facinori deerat. Igitur judicii die, cum plebs in foro erecta expectatione staret, mirari primo, quod non descenderet tribunus: deinde, cum jam mora suspectior fieret, deterritum a primoribus credere, & desertam ac proditam causam publicam queri. Tandem, qui obversati vestibulo tribuni fuerant, nuntiant, domi mortuum esse inventum. quod ubi in totam concionem per tulit rumor; sicut acies funditur duce occiso, ita dilapsi passim alii alio. Præcipuus pavor tribunos invaserat, quam nihil auxilii sacratæ leges habe-

rent, morte collegæ monitos. Nec Patres fatis moderate ferre lætitiā. adeoque neminem noxæ pœnitebat, ut etiam infontes fecisse videri vellent, palamque ferretur, malo domandam tribuniciam potestatem.

LV. Sub hac pessimi exempli victoria delectus edicitur: paventibusque tribunis, sine intercessione ulla consules rem peragunt. Tum vero irasci plebes, tribunorum magis silentio, quam consulum imperio, & dicere, *Actum esse de libertate sua; rursus ad antiqua reditum; cum Genucio una mortuam ac sepultam tribuniciam potestatem. aliud agendum, ac cogitandum, quomodo resistatur Patribus. Id autem unum consilium esse, ut se ipsa plebs, quando aliud nihil auxilii habeat, defendat. Quatuor & viginti lictores apparere consulibus, & eos ipsos plebis homines. Nihil contemptius, neque infirmius, si sint, qui contemnant. Sibi quemque ea magna atque horrenda facere.* His vocibus alii alios cum incitassent, ad Voleronem Publilium, de plebe hominem, quia, quod ordines duxisset, negaret, se militem fieri debere, licitor missus est a consulibus. Volero appellat tribunos. Cum auxilio nemo esset, consules spoliari hominem, & virgas expediri jubent. *Provoco, inquit, ad populum, Volero, quoniam tribuni civem Romanum in conspectu suo virgis cædi malunt, quam ipsi in lecto suo a vobis trucidari.* quo ferocius clamitabat, eo infestius circumscindere & spoliare licitor. Tum Volero, & prævalens ipse, & adjuvantibus advocatis, repulso licitore, ubi indignantium pro se acerrimus erat clamor, eo se in turbam con-

fertissimam recipit, clamitans, *Provoco, & fidem plebis imploro. adeste cives! adeste commitiones! nihil est, quod exspectetis tribunos, quibus ipsis vestro auxilio opus est.* Concitati homines, veluti ad prælium, se expediunt: apparebatque, omne discrimen adeste; nihil cuiquam sanctum, non publici fore, non privati juris. Huic tantæ tempestatum cum se consules obtulissent, facile experti sunt, parum tutam majestatem sine viribus esse. violatis licioribus, fascibus fractis, e foro in curiam compelluntur, incerti, quatenus Volero exerceret victoriam. Conticescente deinde tumultu, cum in senatum vocari jussissent, queruntur injurias suas, vim plebis, Voleronis audaciam. Multis ferociter dictis sententiis, vicere seniores, quibus, ira Patrum adversus temeritatem plebis certari, non placuit.

LVI. Voleronem amplexa favore plebs proximi comitiis tribunum plebi creat in eum annum, qui L. Pinarium, P. Furium consules habuit. contraque omnium opinionem, qui eum vexandis prioris anni consulibus permitturum tribunatum credebant, post publicam causam privato dolore habito, ne verbo quidem violatis consulibus, rogationem tulit ad populum, ut plebeji magistratus tributis comitiis fierent. Haud parva res sub titulo prima specie minime atroci ferebatur; sed quæ patriciis omnem potestatem per clientium suffragia creandi, quos vellent, tribunos auferret. Huic actioni, gratissimæ plebi, cum summa vi resisterent Patres; nec, quæ una vis ad resistendum erat, ut

intercederet aliquis ex collegio, auctoritate aut consulum aut principum adduci posset; res tamen, suo ipsa molimine gravis, certaminibus in annum extrahitur. Plebs Voleronei tribunum reficit. Patres, ad ultimum dimicationis rati rem venturam, Ap. Claudium, Appii filium, jam inde a paternis certaminibus invisum infestumque plebi, consulem faciunt. Collega ei T. Quinctius datur. Principio statim anni nihil prius, quam de lege, agebatur. sed ut inventor legis Volero, sic Lætorius, collega ejus, auctor cum recentior, tum acrior erat. Ferocem faciebat belli gloria ingens; quod ætatis ejus haud quisquam manu promptior erat. Is, cum Volero nihil, præterquam de lege, loqueretur, infestatione abstinens consulum, ipse in accusationem Appii, familiæque superbissimæ ac crudelissimæ in plebem Romanam, exorsus, cum a Patribus non consulem, sed carnificem ad vexandam & lacerandam plebem, creatum esse contenderet; rudis in militari homine lingua non suppetebat libertati animoque. Itaque, deficiente oratione, *Quandoquidem non facile loquor, inquit, Quirites, quam, quod locutus sum, præsto; crastino die adeste. Ego hic aut in conspectu vestro moriar, aut perferam legem.* Occupant tribuni templum postero die. consules nobilitasque ad impediendam legem in concione consistunt. Submoveri Lætorius jubet, præterquam qui suffragium ineant. Adolescentes nobiles stabant, nihil cedentes viatori. tum ex his prehendi quosdam Lætorius jubet. Consul Appius negare, jus esse tribuno in quenquam, nisi in plebejum. Non enim

populi, sed plebis, eum magistratum esse. nec illum ipsum submovere pro imperio posse more majorum; quia ita dicatur: *Si vobis videtur, discedite, Quirites.* Facile & contemptim de jure differendo perturbare Lætorium poterat. Ardens igitur ira tribunus viatorem mittit ad consulem: consul lictorem ad tribunum, privatum esse clamitans, sine imperio, sine magistratu; violatusque esset tribunus, ni & concio omnis atrox coorta pro tribuno in consulem esset, & concursus hominum in forum ex tota urbe concitatae multitudinis fieret. Sustinebat tamen Appius pertinacia tantam tempestatem: certatumque haud incruento prælio foret, ni Quinctius, consul alter, consularibus negotio dato, ut collegam vi, si aliter non possent, de foro abducerent, ipse nunc plebem sævientem precibus lenisset, nunc orasset tribunos, ut concilium dimitterent. *Darent iræ spatium. non vim suam illis tempus ademturum; sed consilium viribus additurum. & Patres in populi, & consulem in Patrum fore potestate.*

LVII. Ægre sedata ab Quinctio plebs, multo ægrius consul alter a Patribus. Dimisso tandem concilio plebis, senatum consules habent. ubi cum timor atque ira invicem sententias variassent; quo magis, spatio interposito, ab impetu ad consultandum advocabantur, eo plus abhorrebant a certatione animi: adeo ut Quinctio gratias agerent, quod ejus opera mitigata discordia esset. Ab Appio petitur, *Ut tantam consularem majestatem esse vellet, quanta esse in concordi civitate posset. Dum tribuni consulesque ad se quisque omnia trahant, nihil relictum esse*

virium in medio: distractam laceratamque rempublicam magis, quorum in manu sit, quam ut incolumis sit, quæri. Appius contra, testari Deos atque homines, *rempublicam prodi per metum ac deserere. non consulem senatui, sed senatum consuli deesse. graviores accipi leges, quam in Sacro monte acceptæ sint.* Victus tamen Patrum consensu quievit. lex silentio perfertur. ✕

LVIII. Tum primum tributis comitiis creati tribuni sunt: numero etiam addito, tres, perinde ac duo antea fuerint, Piso auctor est. Nominat quoque tribunos, C. Sicinium, L. Numitorium, M. Duilium, Sp. Icilium, L. Mæcilium. Volscum Æquicumque inter seditionem Romanam est bellum coortum. vastaverant agros, ut, si qua secessio plebis fieret, ad se receptum haberet. Compositis deinde rebus, castra retro movere. Ap. Claudius in Volscos missus. Quinctio Æqui provincia evenit. Eadem in militia sævitia Appii, quæ domi, esse liberior, quod sine tribuniciis vinculis erat. Odisse plebem plus quam paterno odio: se victum ab ea: se unico consule objecto adversus tribuniciam potestatem, perlatam legem esse; quam minore conatu, nequaquam tanta Patrum spe, priores impedierint consules. Hæc ira indignatioque ferocem animum ad vexandum sævo imperio exercitum stimulabat. nec ulla vi domari poterat. tantum certamen animis imbiberant. Segniter, otiose, negligenter, contumaciter omnia agere. nec pudor, nec metus coercebat. Si citius agi vellet agmen, tardius sedulo incedere: si adhortator operis adesset,

omnes sua sponte motam remittere industriam. præfenti vultus demittere, tacite prætereuntem execrari: ut invictus ille odio plebejo animus interdum moveretur. Omni nequidquam acerbitate promta, nihil jam cum militibus agere: a centurionibus corruptum exercitum dicere: tribunos plebei cavillans interdum & Volerones vocare.

LIX. Nihil eorum Volsci nesciebant, instabantque eo magis, sperantes, idem certamen animorum adversus Appiam habiturum exercitum Romanum, quod adversus Fabium consulem habuisset. Ceterum multo Appio, quam Fabio, violentior fuit. Non enim vincere tantum noluit, ut Fabianus exercitus, sed vinci voluit. Productus in aciem turpi fuga petit castra; nec ante restitit, quam signa inferentem Volscum munimentis vidit, tædamque extremi agminis cædem. Tum expressa vis ad pugnandum, ut victor jam a vallo submoveretur hostis: satis tamen appareret, capi tantum castra militem Romanum noluisse. alii gaudere sua clade atque ignominia. Quibus nihil infractus ferrox Appii animus, cum insuper sævire vellet, concionemque advocaret; concurrunt ad eum legati tribunique, monentes, ne utique experiri vellet imperium, cuius vis omnis in consensu obedientium esset. Negare vulgo milites, se ad concionem ituros; passimque exaudiri voces postulantium, ut castra ex Volscio agro moveantur. Hostem victorem paulo ante prope in portis ac vallo fuisse; ingentisque mali non suspicionem modo, sed apertam speciem obversari ante oculos. Victus tan-

dem, (quandoquidem nihil præter tempus noxæ lucrarentur) remissa concione, iter in sequentem diem pronuntiari cum jussisset, prima luce classico signum profectionis dedit. Cum maxime agmen e castris explicaretur, Volsci, ut eodem signo excitati, novissimos adoriuntur. A quibus perlatus ad primos tumultus, eo pavore signaque & ordines turbavit, ut neque imperia exaudiri, neque instrui acies possent. nemo ullius, nisi fugæ, memor. Ita effuso agmine per stragem corporum armorumque evasere, ut prius hostis desisteret sequi, quam Romanus fugere. Tandem, collectis ex dissipato cursu militibus, consul, cum revocando nequidquam suos persecutus esset, in pacato agro castra posuit; advocataque concione, in vectus haud falso in proditorem exercitum militaris disciplinæ, desertorem signorum; ubi signa, ubi arma essent, singulos rogitans, inermes milites, signo amisso signiferos; ad hoc centuriones duplicariosque, qui reliquerant ordines, virgis cæsos securi percussit. cetera multitudo forte decimus quisque ad supplicium lecti.

LX. Contra ea in Æquis inter consulem ac militem comitate ac beneficiis certatum est. & natura Quinctius erat lenior, & sævitia infelix collegæ, quo is magis gauderet ingenio suo, effecerat. Huic tantæ concordiæ ducis exercitusque non ausi offerre se, Æqui vagari populabundum hostem per agros passi. Nec ullo ante bello latius inde actæ prædæ. omnis militi data est. Addebantur & laudes, quibus, haud minus quam præmio, gau-

dent militum animi. Tum duci, tum propter ducem Patribus quoque placatior exercitus rediit; sibi parentem, alteri exercitui dominum datum ab senatu, memorans. Varia fortuna belli, atroci discordia domi forisque annum exactum, insignem maxime comitia tributa efficiunt: res major victoria suscepti certaminis, quam usu; plus enim dignitatis comitiis ipsis detractum est, Patribus ex concilio submovendis, quam virium aut plebi additum est, aut demtum Patribus.

LXI. Turbulentior inde annus excepit, L. Valerio, Tiberio Æmilio consulibus, cum propter certamina ordinum de lege agraria, tum propter iudicium Ap. Claudii: cui, acerrimo adversario legis, causamque possessorum publici agri, tanquam tertio consuli, sustinenti, M. Duilius & C. Sicinius diem dixere. Nunquam ante tam invisus plebi reus ad iudicium vocatus populi est, plenus suarum, plenus paternarum irarum. Patres quoque non temere pro ullo æque annisi sunt: propugnatorem senatus, majestatisque vindicem suæ, ad omnes tribunicios plebejosque oppositum tumultus, modum dumtaxat in certamine egressum, iratæ objici plebi. Unus e Patribus, ipse Ap. Claudius, & tribunos, & plebem, & suum iudicium pro nihilo habebat. Illum non minæ plebis, non senatus preces percellere unquam potuere, non modo ut vestem mutaret, aut supplex prensaret homines; sed ne ut ex consueta quidem asperitate orationis, cum ad populum agenda causa esset, aliquid leniret atque submitteret. Idem habitus oris, eadem contu-

macia in vultu, idem in oratione spiritus erat: adeo ut magna pars plebis Appium non minus reum timeret, quam consulem timuerat. Semel causam dixit, quo semper agere omnia solitus erat, accusatorio spiritu. adeoque constantia sua & tribunos obstupescit & plebem, ut diem ipsi sua voluntate prodicerent: trahi deinde rem sinerent. Haud ita multum interim temporis fuit. ante tamen, quam predicta dies veniret, morbo moritur. cuius cum laudationem tribuni plebis impedire conarentur, plebs fraudari sollempni honore supremum diem tanti viri noluit; & laudationem tam æquis auribus mortui audivit, quam vivi accusationem audierat; & exsequias frequens celebravit.

LXII. Eodem anno Valerius consul, cum exercitus in Æquos profectus, cum hostem ad prælium elicere non posset, castra oppugnare est adortus. Prohibuit foeda tempestas, cum grandine ac tonitribus cælo dejecta. Admirationem deinde auxit, signo receptui dato, adeo tranquilla serenitas reddita: ut, velut numine aliquo defensa castra oppugnare iterum, religio fuerit. omnis ira belli ad populationem agri vertit. Alter consul Æmilius in Sabini bellum gessit. & ibi, quia hostis mœnibus se tenebat, vastati agri sunt. Incendiis deinde, non villarum modo, sed etiam vicorum, quibus frequenter habitabatur, Sabini exciti, cum prædatoribus occurrissent, ancipiti prælio digressi, postero die retulere castra in tutiora loca. Id satis consuli visum, cur pro victo relinqueret hostem, integro inde decedens bello.

LXIII. Inter hæc bella, manente discordia domi, T. Numicius Priscus, A. Virginius consules facti. Non ultra videbatur latura plebes dilationem agrariæ legis, ultimaque vis parabatur, cum, Volscos adesse, fumo ex incendiis villarum fugaque agræstium cognitum est. ea res maturam jam seditionem ac prope erumpentem repressit. Consules, coacti extemplo ab senatu ad bellum,educta ex urbe juventute, tranquilliores ceteram plebem fecerunt. Et hostes quidem, nihil aliud quam perfusis vano timore Romanis, citato agmine abeunt. Numicius Antium adversus Volscos, Virginius contra Æquos profectus. ibi ex insidiis prope magna accepta clade, virtus militum rem, prolapsam negligentia consulis, restituit. Melius in Volscis imperatum est. Fusi primo prælio hostes, fugaque in urbem Antium, ut tum res erant, opulentissimam acti. quam consul oppugnare non ausus, Cenonem, aliud oppidum, nequaquam tam opulentum, ab Antiatibus cepit. Dum Æqui Volscique Romanos exercitus tenent, Sabini usque ad portas urbis populantes incessere. deinde ipsi paucis post diebus ab duobus exercitibus, utroque per iram consule ingresso in fines, plus cladum, quam intulerant, acceperunt.

LXIV. Extremo anno pacis aliquid fuit; sed, ut semper alias, sollicitæ certamine Patrum & plebis. Irata plebs interesse consularibus comitiis noluit. Per Patres clientesque Patrum consules creati T. Quinctius, Q. Servilius. similem annum priori consules habent, seditiosa initia, bello deinde ex-

terno tranquilla. Sabini, Crustuminos campos citato agmine transgressi, cum cædes & incendia circum Anienem flumen fecissent, a porta prope Collina mœnibusque pulsî, ingentes tamen prædas hominum pecorumque egere. quos Servilius consul infesto exercitu infecutus, ipsum quidem agmen adipisci æquis locis non potuit; populationem adeo effuse fecit, ut nihil bello intactum relinqueret, multiplicique capta præda rediret. Et in Volscis republica egregie gesta, cum ducis, tum militum opera. Primum æquo campo signis collatis pugnatum, ingenti cæde utrinque, plurimo sanguine. & Romani, quia paucitas damno sentiendo propior erat, gradum retulissent; ni salubri mendacio consul, fugere hostes ab cornu altero clamitans, concitasset aciem. impetu factò, dum se putant vincere, vicere. Consul, metuens ne nimis instando renovaret certamen, signum receptui dedit. Intercessere pauci dies, velut tacitis induciis utrinque quiete sumta: per quos ingens vis hominum ex omnibus Volscis Æquisque populis in castra venit, haud dubitans, si senserint, Romanos nocte abituros. Itaque tertia fere vigilia ad castra oppugnanda veniunt. Quinctius, sedato tumultu, quem terror subitus exciverat, cum manere in tentoriis quietum militem iussisset, Hernicorum cohortem in stationem educit; cornicines tubicinesque, in equos impositos, canere ante vallum jubet, sollicitumque hostem ad lucem tenere. reliquum noctis adeo tranquilla omnia in castris fuere, ut somni quoque Romanis copia esset. Volscos species armatorum peditum, quos

& plures esse, & Romanos putabant, fremitus hinnitufque equorum, qui, & infueto sedente equite, & infuper aures agitante fonitu, sæviebant, intentos velut ad inæpetum hostium tenuit.

LXV. Ubi illuxit, Romanus, integer fatiatusque somno productus in aciem, fessum stando & vigiliis Volscum primo impetu perculit. quanquam cessere magis, quam pulsi hostes sunt: quia ab tergo erant clivi, in quos post principia integris ordinibus tutus receptus fuit. Consul, ubi ad iniquum locum ventum est, sistit aciem. miles ægre teneri, clamare & poscere, ut perculsis instare liceat. Ferocius agunt equites: circumfusi duci vociferantur se ante signa ituros. Dum cunctatur consul, virtute militum fretus, loco parum fidens, conclamant, se ituros: clamoremque res est secuta. Fixis in terram pilis, quo leviores in ardua evaderent, cursu subeunt. Volscus, effusis ad primum impetum missilibus telis, saxa objacentia pedibus ingerit in subeuntes, turbatosque ictibus crebris urget ex superiore loco. sic prope oneratum est sinistrum Romanis cornu, ni referentibus jam gradum consul, increpando simul temeritatem, simul ignaviam, pudore metum excussisset. Restitere primo obstinatis animis: deinde, ut in obtinentes locum vires ferebant, audent ultro gradum inferre; & clamore renovato, commovent aciem. tum rursus, impetu capto, enituntur, atque exsuperant iniquitatem loci. Jam prope erat, ut in summum clivi jugum evaderent, cum terga hostes dedere: effusaque cursu pane agmine uno fugientes sequentes.

que castris incidere. In eo pavore castra capiuntur. qui Vollicorum effugere potuerunt, Antium petunt. Antium & Romanus exercitus ductus : paucos circumfessum dies deditur, nulla oppugnantium nova vi; sed quod jam inde ab infelici pugna castrisque amissis ceciderant animi.

TITI LIVII PATAVINI
HISTORIARUM

AB URBE CONDITA

LIBER III.

EPITOME

LIBRI TERTII.

Seditiones de agrariis legibus factæ. Capitolium, ab exsulibus & servis occupatum, cæsis iis receptum est. Censu bis actus est. priore lustro censa sunt civium capita centum quatuor millia & ducenta quatuordecim, præter orbos orbasque. sequenti, centum septemdecim millia ducenta novemdecim. Cum adversus Æquos res male gesta esset, L. Quinctius Cincinnatus dictator factus, cum rure intentus rustico operi esset, ad id bellum gerendum accessit. Is victos hostes sub jugum milit. Tribunorum plebis numerus ampliatus est, ut essent decem, trigesimo sexto anno a primis tribunis plebis. Petitis per legatos, & allatis Atticis legibus, ad constituendas eas proponendasque decemviri pro consulibus sine ullis aliis magistratibus creati, altero & trecentesimo anno, quam Roma condita erat: &, ut a regibus ad consules, ita a consulibus ad decemviros translatum imperium. Hi, decem tabulis legum positis, cum modeste se in eo honore gessissent, & ob id in alterum quoque annum eun-

dem esse magistratum placuisset, duabus tabulis ad decem adjectis, cum complura impotenter fecissent, magistratum noluerunt deponere, & in tertium annum retinuerunt: donec invito eorum imperio finem attulit libido Ap. Claudii. Qui, cum in amorem virginis incidisset, submisso, qui eam in servitutem peteret, necessitatem patri ejus Virginio imposuit, rapto ex taberna proxima cultro, ut filiam interimeret; cum aliter eam tueri non posset, ne in potestatem stuprum illaturi veniret. Hoc tam magnæ luxuriæ exemplo plebs incitata montem Aventinum occupavit, coegitque decemviros abdicare se magistratu. ex quibus Appius & unus collegarum, qui præcipue pœnam meruerant, in carcerem conjecti; ceteri in exsiliura acti. Res præterea contra Sabinos, & Volscos, & Æquos prospere gestas continet, & parum honestum populi Romani judicium: qui, judex inter Ardeates & Aricinos sumtus, agrum, de quo ambigebatur, sibi adjudicavit.

I. **A**NTIO capto, Ti. Æmilius & Q. Fabius consules fiunt. Hic erat Fabius Quintus, qui unus exstinctæ ad Cremeram genti superfuerat. Jam priorè consulatu Æmilius dandi agri plebi fuerat auctor. Itaque secundo quoque consulatu ejus & agrarii se in spem legis erexerant, & tribuni rem, contra consules sæpe tentatam, adjutore utique consule, obtineri posse rati, suscipiunt; & consul manebat in sententia sua. Possessores & magna pars Patrum, tribuniciis se jactare actionibus principem civitatis, & largiendo de alieno popularem fieri querentes, totius invidiam rei a tribunis in consulem averterant. Atrox certamen aderat, ni Fabius consilio neutri parti acerbo rem expedisset. T. Quinctii duc-

tu & auspicio agri capti priore anno aliquantum a Volscis esse : Antium, propinquam, opportunam, & maritimam urbem, coloniam deduci posse : ita sine querelis possessorum plebem in agros ituram, civitatem in concordia fore. Hæc sententia accepta est. Triumviros agro dando creat T. Quinctium, A. Virginium, P. Furium. iussi nomina dare, qui agrum accipere vellent. Fecit statim (ut fit) fastidium copia : adeoque pauci nomina dedere ; ut ad explendum numerum coloni Volsci adderentur : cetera multitudo poscere Romæ agrum malle, quam alibi accipere. Æqui a Q. Fabio (is eo cum exercitu venerat) pacem petiere, irritamque eam ipsi subita incursione in agrum Latinum fecere.

II. Q. Servilius insequenti anno (is enim cum Sp. Postumio consul fuit) in Æquos missus, in Latino agro stativa habuit. intra castra quies necessaria morbo implicitum exercitum tenuit. Extractum in tertium annum bellum est, Q. Fabio & T. Quinctio consulibus. Fabio extra ordinem, quia is victor pacem Æquis dederat, ea provincia data. qui, haud dubia spe profectus, famam nominis sui pacaturam Æquos, legatos in concilium gentis missos nuntiare iussit : *Q. Fabium consulem dicere, se ex Æquis pacem Romam tulisse, ab Roma Æquis bellum afferre, eadem dextra armata, quam pacatam illis antea dederat. quorum id perfidia & perjurio fiat, Deos nunc testes esse, mox fore ultores. Se tamen, utcumque sit, etiam nunc, pœnitere sua sponte Æquos, quam pati hostilia, malle. Si pœniteat, tutum receptum ad expertam clementiam fore : sin perjurio gau-*

deant, *Diis magis iratis, quam hostibus, gesturos bellum.* Hæc dicta adeo nihil moverunt quenquam, ut legati prope violati sint; exercitusque in Algidum adversus Romanos missus. Quæ ubi Romam sunt nuntiata, indignitas rei, magis quam periculum, consulem alterum ab urbe excivit. ita duo consulares exercitus ad hostem accedere acie instructa, ut confestim dimicarent. Sed cum forte haud multum diei superesset, unus ab statione hostium exclamat: *Ostentare hoc est, Romani, non gerere bellum. in noctem imminentem aciem instruitis. longiore luce ad id certamen, quod instat, nobis opus est. Crastino die oriente sole redite in aciem: erit copia pugnandi, ne timete.* His vocibus irritatus miles in diem posterum in castra reducitur, longam venire noctem ratus, quæ moram certamini faceret. Tum quidem corpora cibo somnoque curant. ubi illuxit postero die, prior aliquanto constitit Romana acies; tandem & Æqui processere. Proelium fuit utrinque vehemens; quod & Romanus ira odioque pugnabat, & Æquos conscientia contracti culpa periculi, & desperatio futuræ sibi postea fidei, ultima audere & experiri cogebat. Non tamen sustinere aciem Romanam Æqui: pulsique cum in fines suos se recepissent, nihilo inclinioribus ad pacem animis ferox multitudo increpare duces, quod in aciem, qua pugnandi arte Romanus excellat, commissa res sit. Æquos populationibus incursionibusque meliores esse; & multas passim manus, quam magnam molem unius exercitus, rectius bella gerere.

III. Relicto itaque castris praesidio, egressi tanto cum tumultu invasere fines Romanos, ut ad urbem quoque terrorem pertulerint. necopinata etiam res plus trepidationis fecit, quod nihil minus, quam ne victus ac prope in castris obsessus hostis memor populationis esset, timeri poterat. agrestesque, pavidi incidentes portis, non populationem, nec praedonum parvas manus, sed, omnia vano augentes timore, exercitus & legiones aesse hostium, & infesto agmine ruere ad urbem, clamabant. Ab his proximi audita incerta, eoque vaniora, ferre ad alios. cursus clamorque vocantium ad arma haud multum a pavore captæ urbis abesse. Forte ab Alcido Quintius consul redierat Romam, (id remedium timori fuit) tumultuque sedato, victos timeri increpans hostes, praesidia portis imposuit. Vocato dein senatu, cum, ex auctoritate Patrum iustitio indicto, profectus ad tutandos fines esset, Q. Servilio praefecto urbis relicto, hostem in agris non invenit. Ab altero consule res gesta egregie est. qui, qua venturum hostem sciebat, gravem praeda, eoque impeditiore agmine incedentem aggressus, funestam ei populationem fecit. Pauci hostium evasere ex insidiis: praeda omnis recepta est. sic finem iustitio, quod quadriduum fuit, reditus Quintii consulis in urbem fecit. Census deinde actus, & conditum ab Quintio lustrum. censa civium capita centum quatuor millia & ducenta quatuordecim dicuntur, praeter orbos orbasque. In Aequis nihil deinde memorabile actum. in oppida sua se recipere, uri sua popularique passi. Consul, cum ali-

quoties per omnem hostium agrum infesto agmine populabundus isset, cum ingenti laude prædaque Romam rediit.

IV. Consules inde A. Postumius Albus, Sp. Furius Fusus. Furios Fusios scripsere quidam. id admoneo, ne quis immutationem virorum ipsorum esse, quæ nominum est, putet. Haud dubium erat, quin cum Æquis alter consulum bellum gereret. Itaque Æqui ab Ecetranis Volscis præsidium petiere. quo cupide oblato, (adeo civitates hæ perpetuo in Romanos odio certavere) bellum summa vi parabatur. Sentiunt Hernici, & prædicunt Romanis, Ecetranum ad Æquos descisse. suspecta & colonia Antium fuit, quod magna vis hominum inde, cum oppidum captum esset, confugisset ad Æquos. isque miles per bellum Æquicum vel acerrimus fuit. Compulsis deinde in oppida Æquis, ea multitudo dilapsa cum Antium redisset, sua sponte jam infidos colonos Romanis abalienavit. Necdum matura re, cum defectionem parari delatum ad senatum esset, datum negotium est consulibus, ut, principibus coloniarum Romam excitis, quærerent, quidnam rei esset. qui cum haud gravati venissent, introducti a consulibus ad senatum ita responderunt ad interrogata, ut magis suspecti, quam venerant, dimitterentur. Bellum inde haud dubium haberi. Sp. Furius, consulum alter, cui ea provincia evenerat, profectus in Æquos, Hernicorum in agro populabundum hostem invenit; ignarusque multitudinis, quia nusquam universa conspecta fuerat, imparem copiis exercitum temere pugnae commisit.

primo concursu pulsus se in castra recepit. neque is finis periculi fuit. namque & proxima nocte & postero die tanta vi castra sunt circumfessa atque oppugnata, ut ne nuntius quidem inde mitti Romam posset. Hernici, & male pugnatum, & consulem exercitumque obsideri, nuntiaverunt. tantumque terrorem incussere Patribus, ut (quæ forma senatus-consulti ultimæ semper necessitatis habita est) Postumio alteri consulum negotium daretur, *Videret ne quid respublica detrimenti caperet.* Ipsum consulem Romæ manere ad conscribendos omnes, qui arma ferre possent, optimum visum est; pro consule T. Quinctiam subsidio castris cum sociali exercitu mitti. ad eum explendum Latini, Hernicique, & colonia Antium dare Quinctio subitarios milites (ita tum repentina auxilia appellabant) iussi.

V. Multi per eos dies motus multique impetus hinc atque illinc facti, quia, superante multitudine, hostes carpere multifariam vires Romanas, ut non suffecturas ad omnia, aggressi sunt. simul castra oppugnabantur, simul pars exercitus ad populandum agrum Romanum missa, urbemque ipsam, si qua fortuna daret, tentandam. L. Valerius ad præsidium urbis relictus; consul Postumius ad arcendas populationes finium missus. Nihil remissum ab ulla parte curæ aut laboris. vigiliæ in urbe, stationes ante portas, præsidiaque in muris disposita, &, quod necesse erat in tanto tumultu, iustitium per aliquot dies servatum. Interim in castris Furius consul, cum primo quietus obsidionem passus esset, in incautum hostem decumana porta

erupit; &, cum persequi posset, metu substitit, ne qua, ex parte altera, in castra vis fieret. Furium legatum (frater idem consulis erat) longius extulit cursus: nec suos ille redeuntes, persequendi studio, neque hostium ab tergo incursum vidit. ita exclusus, multis sæpe frustra conatibus captis, ut viam sibi ad castra faceret, acriter dimicans cecidit. Et consul, nuntio circumventi fratris conversus ad pugnam, dum se temere magis, quam satis caute, in mediam dimicationem infert, vulnere accepto, ægre ab circumstantibus ereptus, & suorum animos turbavit, & ferocios hostes fecit. qui, cæde legati & consulis vulnere accensi, nulla deinde vi sustineri potuere, cum compulsi in castra Romani rursus obsiderentur, nec spe, nec viribus pares. venissetque in periculum summa rerum, ni T. Quinctius peregrinis copiis cum Latino Hernicoque exercitu subvenisset. Is, intentos in castra Romana Æquos legatique caput ferociter ostentantes ab tergo adortus, simul ad signum a se procul editum ex castris eruptione facta, magnam vim hostium circumvenit. Minor cædes, fuga effusior Æquorum in agro fuit Romano. in quos palatos, prædam agentes, Postumius aliquot locis, quibus opportuna imposuerat præsidia, impetum dedit. ii vagi, dissipato agmine fugientes, in Quinctium victorem, cum saucio consule revertentem, incidere. Tum consularis exercitus egregia pugna consulis vulnus, legati & cohortium ultus est cædem. magnæ clades ultro citroque illis diebus & illatæ & acceptæ. Difficile ad fidem est in tam antiqua re,

quot pugnaverint ceciderintve, exacto affirmare numero. audet tamen Antias Valerius concipere summas: Romanos cecidisse in Hernico agro quinque millia ac trecentos: ex prædatoribus Æquorum, qui populabundi in finibus Romanis vagabantur, ab A. Postumio consule duo millia & quadringentos cæfos: ceteram multitudinem, prædam agentem, quæ inciderit in Quinctium, nequaquam pari defunctam esse cæde. interfecta inde quatuor millia, &, exsequendo subtiliter numerum, ducentos, ait, & triginta. Ut Romam reditum & iustitium remissum est, cælum visum est ardere plurimo igni; portentaque alia aut obversata oculis, aut vanas exterritis ostentavere species. His avertendis terroribus in triduum feriæ indictæ, per quas omnia delubra pacem Deum exposcentium viro- rum mulierumque turba implebantur. Cohortes inde Latinæ Hernicæque ab senatu, gratiis ob impigram militiam actis, remissæ domos. Antiates mille milites, quia serum auxilium post prælium venerant, prope cum ignominia dimissi.

VI. Comitia inde habita. creati consules L. Æbutius, P. Servilius Kalendis Sextilibus, ut tunc principium anni agebatur, consulatum ineunt. Grave tempus & forte annus pestilens erat urbi agrisque, nec hominibus magis, quam pecori; & auxere vini morbi, terrore populationis pecoribus agrestibusque in urbem acceptis. Ea colluvio mixtorum omnis generis animantium & odore insolito urbanos, & agrestem, confertum in arcta tecta, æstu ac vigiliis angebat, ministeriaque invicem ac contagio

ipsa vulgabant morbos. Vix instantes sustinentibus clades repente legati Hernici nuntiant, in agro suo Æquos Volcosque conjunctis copiis castra posuisse. inde exercitu ingenti fines suos depopulari. Præterquam quod infrequens senatus indicio erat sociis, afflictam civitatem pestilentia esse, mœstum etiam responsum tulere: *ut per se ipsi Hernici cum Latinis res suas tutarentur. Urbem Romanam subita Deum ira morbo populari. Si qua ejus mali quies veniat, ut anno ante, ut semper alias, sociis open lauros.* Discessere socii, pro tristi nuntio tristiores domum referentes; quippe quibus per se sustinendum bellum erat, quod vix Romanis fulti viribus sustinissent. Non diutius se in Hernico hostis continuit. pergit inde infestus in agros Romanos, etiam sine belli injuria vastatos. Ubi cum obvius nemo, ne inermis quidem, fieret, perque omnia non præfidiis modo deserta, sed etiam cultu agresti, transirent; pervenere ad tertium lapidem Gabina via. Mortuus Æbutius erat Romanus consul. collega ejus Servilius exigua in spe trahebat animam. affecti plerique principum, Patrum major pars, militaris fere ætas omnis: ut non modo ad expeditiones, quas in tanto tumultu res poscebat, sed vix ad quietas stationes viribus sufficerent. Munus vigiliarum senatores, qui per ætatem ac valetudinem poterant, per se ipsi obibant: circuitio ac cura ædilium plebei erat. ad eos summa rerum ac majestas consularis imperii venerat.

VII. Deserta omnia, sine capite, sine viribus, Dii præfides ac fortuna urbis tutata est, quæ Volscis

Æquisque, prædonum potius mentem, quam hostium, dedit. adeo enim nulla spes non potiundi modo, sed ne adeundi quidem Romana moenia, animos eorum cepit, tectaue procul visa atque imminentes tumuli avertere mentes eorum; ut, totis passim castris fremitu orto, *quid in vasto ac deserto agro inter tabem pecorum hominumque defides sine præda tempus tererent, cum integra loca, Tusculanum agrum, opimum copiis, petere possent?* signa repente convellerent, transversisque itineribus per Lavicanos agros in Tusculanos colles transfirent. eo vis omnis tempestatque belli conversa est. Interim Hernici Latinique, pudore etiam, non misericordia solum, moti, si nec obstitissent communibus hostibus, infesto agmine Romanam urbem petentibus, nec opem ullam obsessis sociis ferrent, conjuncto exercitu Romam pergunt. Ubi cum hostes non invenissent, secuti famam ac vestigia, obvii fiunt descendentibus ab Tusculano in Albanam vallem. ibi haudquaquam æquo prælio pugnatum est, fidesque sua sociis parum felix in præsentia fuit. Haud minor Romæ fit morbo strages, quam quanta ferro sociorum facta erat. consul, qui unus supererat, moritur. mortui & alii clari viri, M. Valerius, T. Virginius Rutilus, augures; Ser. Sulpicius, curio maximus. & per ignota capita late evagata est vis morbi: inopsque senatus auxilii humani, ad Deos populum ac vota vertit. iussi cum conjugibus ac liberis supplicatum ire, pacemque exposcere Deum. Ad id, quod sua quemque mala cogebant, auctoritate publica evocati, omnia de-

lubra implent. stratae passim matres, crinibus templa verrentes, veniam irarum caelestium, finemque pesti exposcunt.

VIII. Inde paulatim, seu pace Deum impetrata, seu graviore tempore anni jam circumacto, defuncta morbis corpora salubriora esse incipere: verisq;ue animis jam ad publicam curam, cum aliquot interregna exissent, P. Valerius Publicola tertio die, quam interregnum inierat, consules creat L. Lucretium Tricipitinum & T. Veturium Geminum; sive ille Vetustus fuit. Ante diem tertium Idus Sexiles consulatum ineunt, jam satis valida civitate, ut non solum arcere bellum, sed ultro etiam inferre posset. Igitur nuntiantibus Hernicis, in fines suos transcendisse hostes, impigre promissum auxilium. duo consulares exercitus scripti. Veturius missus in Volscos ad bellum ultro inferendum. Tricipitinus, populationibus arcendis sociorum agro oppositus, non ultra, quam in Hernicos, procedit. Veturius primo proelio hostes fundit fugatque. Lucretium, dum in Hernicis sedet, praedonum agmen fefellit, supra montes Praenestinos ductum, inde demissum in campos. Vastavere agros Praenestinum Gabinumque: ex Gabino in Tusculanos flexere colles. urbi quoque Romae ingens praebitus terror, magis in re subita, quam quod ad arcendam vim parum virium esset. Q. Fabius praerat urbi. is, armata juventute, dispositisque praesidiis, tuta omnia ac tranquilla fecit. Itaque hostes, praeda ex proximis locis rapta, appropinquare urbi non aucti, cum circumacto agmine redirent, quanto lon-

gius ab urbe hostium abscederent, eo solutiore cura in Lucretium incidunt consulem, jam ante exploratis itineribus suis instructum, & ad certamen intentum. Igitur, præparatis animis, repentino pavore percussos adorti, aliquanto pauciores multitudinem ingentem fundunt fugantque; & compulso in cavas valles, cum exitus haud in facili essent, circumveniunt. Ibi Volscum nomen prope deletum est. tredecim millia quadringentos septuaginta cecidisse in acie ac fuga, mille ducentos quinquaginta vivos captos, signa viginti septem militaria relata, in quibusdam annalibus invenio. ubi etsi adjectum aliquid numero sit, magna certe cædes fuit. Victor consul, ingenti præda potitus, eadem in stativa rediit. Tum consules castra conjungunt: & Volsci Æquique afflictas vires suas in unum contulere. Tertia illa pugna eo anno fuit. eadem fortuna victoriam dedit. fufis hostibus, etiam castra capta.

IX. Sic res Romana in antiquum statum rediit: secundæque belli res extemplo urbanos motus excitaverunt. C. Terentillus Arsa tribunus plebis eo anno fuit. is, consulibus absentibus, ratus locum tribuniciis actionibus datum, per aliquot dies Patrum superbiam ad plebem criminatus, maxime in consulare imperium, tanquam nimium, nec tolerabile liberæ civitati, invehebatur: *Nomine enim tantum minus invidiosum, re ipsa prope atrocius, quam regium, esse. Quippe duos pro uno domino acceptos, immoderata, infinita potestate: qui, soluti atque effrenati ipsi, omnes metus legum omniaque supplicia*

verterent in plebem. Quæ ne æterna illis licentia sit, legem se promulgaturum, ut quinque viri creentur legibus de imperio consulari scribendis. Quod populus in se jus dederit, eo consulem usurum: non ipsos libidinem ac licentiam suam pro lege habituros. Qua promulgata lege, cum timerent Patres, ne, absentibus consulibus, jugum acciperent, senatus a præfecto urbis Q. Fabio vocatur: qui adeo atrociter in rogationem latoremque ipsum est invehctus, ut nihil, si ambo consules infesti circumstarent tribunum, relictum minarum atque terroris sit: *Insidiatum eum, & tempore capto adortum rempublicam. Si quem similem ejus priore anno, inter morbum bellumque, irati Dii tribunum dedissent, non potuisse sisti. Mortuis duobus consulibus, jacente ægra civitate in colluvione omnium rerum, ad tollendum e republica consulare imperium laturum leges fuisse; ducem Volscis Æquisque ad oppugnandam urbem futurum. Quid tandem? illi non licere, si quid consules superbe in aliquem civium aut crudeliter fecerint, diem dicere? accusare his ipsis iudicibus, quorum in aliquem scæviturum sit? Non illud consulare imperium, sed tribuniciam potestatem invisam intolerandamque facere: quam pacatam reconciliatamque Patribus de integro in antiqua redigi mala. neque illum se deprecari, quo minus pergat, ut cœperit. Vos, inquit Fabius, ceteri tribuni, oramus, ut primum omnium cogitetis, potestatem istam ad singulorum auxilium, non ad perniciem universorum, comparatam esse. tribunos plebis vos creatos, non hostes Patribus. Nobis miserum, invidiosum vobis est, desertam rempublicam invadi. non jus vestrum, sed*

invidiam, minueritis, Agite cum collega, ut rem integram in adventum consulum differat. ne Æqui quidem ac Volsci, morbo absuntis priore anno consulibus, crudeli superboque nobis bello insliteret. Agunt cum Terentillo tribuni: dilataque in speciem actione, re ipsa sublata, consules extemplo arcessiti.

X. Lucretius cum ingenti præda, majore multo gloria rediit. & auget gloriam adveniens, exposita omni in campo Martio præda, ut suum quisque per triduum cognitum abduceret. reliqua vendita, quibus domini non exstiteret. Debebatur omnium consensu consuli triumphus: sed dilata res est, tribuno de lege agente. id antiquius consuli fuit. Jactata per aliquot dies cum in senatu res, tum ad populum est. cessit ad ultimum majestati consulis tribunus, & destitit. tum imperatori exercituique honos suus redditus. Triumphavit de Volscis Æquisque: triumphantem secutæ suæ legiones. alteri consuli datum, ut ovans sine militibus urbem iniret. Anno deinde insequenti lex Terentilla, ab toto relata collegio, novos aggressa consules est. erant consules P. Volumnius, Ser. Sulpicius. Eo anno cælum ardere visum; terra ingenti concussa motu est. bovem locutam, cui rei priore anno fides non fuerat, creditum. Inter alia prodigia & carnem pluit: quem imbrem ingens numerus avium intervolutando rapuisse fertur: quod intercudit, sparsum ita jacuisse per aliquot dies, ut nihil odor mutaret. Libri per duumviros sacrorum aditi: pericula a conventu alienigenarum prædicta, ne qui in loca summa urbis impetus, cædesque inde fierent. inter ce-

tera monitum, ut seditionibus abstineretur. Id factum ad impediendam legem, tribuni criminabantur, ingensque aderat certamen. Ecce (ut idem in singulos annos orbis volveretur) Hernici nuntiant, Volscos & Æquos, etsi accisæ res sint, reficere exercitus: Antii summam rei positam: Ecetræ Antiates colonos palam concilia facere: id caput, eas vires belli esse. Ut hæc dicta in senatu sunt, delectus edicitur: consules belli administrationem inter se dispartiri iussi, alteri ut Volsci, alteri ut Æqui provincia esset. Tribuni coram in foro personare, *Fabulam compositam Volsci belli, Hernicos ad partes paratos. jam ne virtute quidem premi libertatem populi Romani, sed arte eludi. quia, coccidione prope occisos Volscos & Æquos movere sua sponte arma posse, jam fides abierit, novos hostes quæri. coloniam fidam, propinquam, infamem fieri. bellum innoxiiis Antiatibus indici, geri cum plebe Romana. quam, oneratam armis, ex urbe præcipiti agmine acturi essent, exsilio & relegatione civium ulciscentes tribunos. Sic, ne quid aliud actum putent, victam legem esse; nisi, dum in integro res sit, dum domi, dum togati sint, caveant, ne possessione urbis pellantur, ne jugum accipiant. Si animus sit, non defore auxilium. consentire omnes tribunos. nullum terrorem externum, nullum periculum esse. Cavisse Deos priore anno, ut tuto libertas defendi posset. Hæc tribuni.*

XI. At ex parte altera consules in conspectu eorum, positis fellis, delectum habebant. eo decurrunt tribuni, concionemque secum trahunt. citati pauci, velut rei experiundæ causa: & statim

vis coorta. Quemcunque licitor jussu consulisprehendisset, tribunus mitti jubebat. neque suum cuique jus modum faciebat, sed virium spe & manu obtinendum erat, quod intenderes. Quemadmodum se tribuni gessissent in prohibendo delectu, sic Patres in lege, quæ per omnes comitiales dies ferebatur, impedienda gerebant. Initium erat rixæ; cum discedere populum jussissent tribuni, quod Patres se submoveri haud sinebant. nec fere seniores rei intererant; quippe quæ non consilio regenda, sed permessa temeritati audaciæque esset. Multum & consules se abstinebant, ne cui in collusione rerum majestatem suam contumeliæ offerrent. Cæso erat Quinctius, ferox juvenis, qua nobilitate gentis, qua corporis magnitudine & viribus. ad ea munera, data a Diis, & ipse addiderat multa belli decora, facundiamque in foro; ut nemo, non lingua, non manu, promptior in civitate haberetur. Hic, cum in medio Patrum agmine constitisset, cernens inter alios, velut omnes dictaturas consulatusque gerens in voce ac viribus suis, unus impetus tribunicios popularesque procellas sustinebat. Hoc duce, sæpe pulsi foro tribuni, fusa ac fugata plebs est. qui obvius fuerat, multatus nudatusque abibat: ut satis appareret, si sic agi liceret, victam legem esse. Tum, prope jam perculsis aliis tribunis, A. Virginius, ex collegio unus, Cæsoni capitis diem dicit. atrox ingenium accenderat eo factio magis, quam conterruerat: eo acrius obstare legi, agitare plebem, tribunos velut justo persequi bello. Accusator pati reum ruere,

invidiæque flammam ac materiam criminibus suis fuggerere: legem interim, non tam ad spem perferendi, quam ad laceffendam Cæsonis temeritatem, ferre. Ibi multa, sæpe ab juventute inconfulte dicta factaque, in unius Cæsonis suspectum incidunt ingenium: tamen legi resistebatur. Et A. Virginius identidem plebi: *Ecquid sentitis jam, vos, Quirites, Cæsonem simul civem & legem, quam cupitis, habere non posse? Quanquam quid ego legem loquor? libertati obstat: omnes Tarquinius superbia exsuperat. Exspectate, dum consul aut dictator fiat, quem privatum viribus & audacia regnantem videtis.* Assentiebantur multi, pulsatos se querentes, & tribunum ad rem peragendam ultro incitabant.

XII. Jam aderat iudicio dies, apparebatque, vulgo homines in damnatione Cæsonis libertatem agere credere. tum demum coactus cum multa indignitate prensabat singulos. sequebantur necessarii, principes civitatis. T. Quinctius Capitolinus, qui ter consul fuerat, cum multa referret sua familiæque decora, affirmabat: *Neque in Quinctia gente, neque in civitate Romana tantam indolem tam maturæ virtutis unquam exstitisse. Suum primum militem fuisse; se sæpe vidente pugnas in hostem.* Sp. Furius, missum ab Quinctio Capitolino sibi eum in dubiis suis rebus venisse subsidio. *neminem unum esse, cuius magis opera putet rem restitutam.* L. Lucretius, consul anni prioris, recenti gloria nitens, suas laudes participare cum Cæsonem, memorare pugnas, referre egregia facinora, nunc in expeditionibus, nunc in acie: suadere & monere, *juvenem egregium, instruc-*

tum naturæ fortunæque omnibus bonis, maximum momentum rerum ejus civitatis, in quamcunque verisset, suum, quam alienum, mallent civem esse. Quod offendat in eo, fervorem & audaciam, ætatem quotidie auferre; quod desideretur consilium, id in dies crescere. Senescentibus vitiis, maturescente virtute, sinerent tantum virum senem in civitate fieri. Pater inter hos L. Quinctius, cui Cincinnato cognomen erat, non iterando laudes, ne cumlaret invidiam, sed veniam errori atque adolescentiæ petendo, sibi, qui non dicto, non facto quenquam offendisset, ut condonarent filium, orabat. Sed alii averfabantur preces, aut verecundia, aut metu: alii, se suosque mulcatos querentes, atroci responso judicium suum præferebant.

XIII. Premebat reum, præter vulgatam invidiam; crimen unum; quod M. Volscius Fictor, qui ante aliquot annos tribunus plebis fuerat, testis extiterat, *Se haud multo post, quam pestilentia in urbe fuerat, in juventutem, grassantem in Subura, incidisse. ibi rixam natam esse, fratremque suum majorem natu, necdum ex morbo satis validum, pugno ictum ab Cæsone cecidisse senianimem. Inter manus domum ablatum, mortuumque inde arbitrari: nec sibi rem exsequi tam atrocem per consules superiorum annorum tuncuisse.* Hæc Volscio clamitante, adeo concitati homines sunt, ut haud multum abfuerit, quin impetu populi Cæso interiret. Virginius arripi jubet hominem, & in vincula duci. patricii contra vi resistunt. T. Quinctius clamitat, *Cui rei capitalis dies dicta sit, & de quo futurum propediem judicium, eum*

indemnatum indicta causa non debere violari. Tribunus supplicium negat sumturum se de indemnato; servaturum tamen in vinculis esse ad iudicii diem: ut, qui hominem necaverit, de eo supplicii sumendi copia populo Romano fiat. Appellati tribuni medio decreto jus auxilii sui expediunt: in vincula conjici vetant: sisti reum, pecuniamque, nisi sistatur, populo promitti, placere pronuntiant. Summam pecuniæ quantam æquum esset promitti, veniebat in dubium: id ad senatum rejicitur. Reus, dum consulerentur Patres, retentus in publico est. vades dare placuit. unum vadem tribus millibus æris obligarunt. quot darentur, permissum tribunis est. decem finierunt. tot vadibus accusator vadatus est reum. Hic primus vades publicos dedit. dimissus e foro nocte proxima in Tuscos in exsilium abiit. Iudicii die cum excusaretur solum vertisse exsilii causa, nihilominus Virginio comitia habente, collegæ appellati dimisere concilium: pecunia a patre exacta crudeliter, ut, divenditis omnibus bonis, aliquamdiu trans Tiberim, veluti relegatus, in devio quodam tugurio viveret.

XIV. Hoc iudicium & promulgata lex exercuit civitatem: ab externis armis otium fuit. Cum, velut victores, tribuni, perculsis Patribus Cæsonis exsilio, prope perlatam esse crederent legem, & quod ad seniores Patrum pertineret, cessissent possessione reipublicæ; juniores, id maxime quod Cæsonis sodalium fuit, auxere iras in plebem, non minuerunt animos. sed ibi plurimum profectum est, quod modo quodam temperavere impetus suos.

Cum primo post Cæsonis exsilium lex cœpta ferri est; instructi paratique cum ingenti clientium exercitu sic tribunos, ubi primum subinoventes præbuere causam, adorti sunt, ut nemo unus inde præcipuum quidquam gloriæ domum invidiæve ferret; mille pro uno Cæsones exstitisse, plebes quereretur. Mediis diebus, quibus tribuni de lege non agerent, nihil eisdem illis placidius aut quietius erat. benigne salutare, alloqui plebis homines, domum invitare, adesse in foro, tribunos ipsos cetera pati sine interpellatione concilia habere: nunquam ulli, neque publice, neque privatim, truces esse, nisi cum de lege agi cœptum esset. Alibi popularis juvenus erat. nec cetera modo tribuni tranquillo peregere; sed refecti quoque in insequentem annum, ne voce quidem incommoda, nedum ut ulla vis fieret, paulatim permulcendo tractandoque mansuefecerant plebem. His per totum annum artibus lex elusa est.

XV. Accipiunt civitatem placidiorem consules C. Claudius, Appii filius, & P. Valerius Publicola. Nihil novi novus annus attulerat. legis ferendæ aut accipiendæ cura civitatem tenebat. Quantum juniores Patrum plebi se magis insinuabant; eo acrius contra tribuni tendebant, ut plebi suspectos eos criminando facerent. *Conjunctionem factam, Cæsonem Romæ esse: interficiendorum tribunorum, trucidandæ plebis consilia inita. Id negotii datum ab senioribus Patrum, ut juvenus tribuniciam potestatem e republica tolleret, formaque eadem civitatis esset, quæ ante Sacrum montem occupatum fuerat.*

Et ab Volscis & Æquis statum jam ac prope sollemne in singulos annos bellum timebatur: propiusque aliud novum malum, necopinato exortum. Exfules servique, ad quatuor millia hominum & quingenti, duce Ap. Herdonio Sabino, nocte Capitolium atque arcem occupavere. Confestim in arce facta cædes eorum, qui conjurare & simul capere arma noluerant. alii inter tumultum præcipientes pavore in forum devolant. alternæ voces, *Ad arma, & Hostes in urbe sunt*, audiebantur. Consules & armare plebem, & inermem pati timebant. Incerti, quod malum repentinum, externum an intestinum, ab odio plebis, an ab servili fraude, urbem invasisset, sedabant tumultus, sedando interdum movebant. nec enim poterat pavida & consternata multitudo regi imperio. Dant tamen arma, non vulgo; tantum ut, incerto hoste, præsidium satis fidum ad omnia esset. Solliciti reliquum noctis, incertique, qui homines, quantus numerus hostium esset, in stationibus disponendis ad opportuna omnis urbis loca, egere. Lux deinde aperuit bellum ducemque belli. Servos ad libertatem Ap. Herdonius ex Capitolio vocabat: *Se miserrimi cujusque suscepisse causam, ut exfules injuria pulsos in patriam reduceret, & servitiis grave jugum demeret. id male populo Romano auctore fieri. Si ibi spes non sit, se Volscos, & Æquos, & omnia extrema tentaturum & concitaturum.*

XVI. Dilucere res magis Patribus atque consulis. præter ea tamen, quæ denuntiabantur, ne Vejentium, neu Sabinorum id consilium esset, ti-

mere : & , cum tantum in urbe hostium esset , mox Sabinæ Etruscæque legiones ex composito adessent ; tum æterni hostes Volsci & Æqui , non ad populandos , ut ante , fines , sed ad urbem , ut ex parte captam , venirent. Multi & varii timores. inter ceteros eminebat terror servilis , ne suus cuique domi hostis esset : cui nec credere , nec , non credendo , ne infestior fieret , fidem abrogare , satis erat tutum. Vixque concordia fisci videbatur posse. tantum superantibus aliis ac emergentibus malis , nemo tribunos aut plebem timebat. mansuetum id malum , & per aliorum quietem malorum semper exoriens ; tumque esse peregrino terrore sopitum videbatur. At id prope unum maxime inclinatis rebus incubuit. tantus enim tribunos furor tenuit , ut non bellum , sed vanam imaginem belli , ad avertendos ab legis cura plebis animos , Capitolium infedisse contenderent : patriciorum hospites clientesque , si perlata lege frustra tumultuatos esse se sentiant , majore , quam venerint , silentio abituros. Concilium inde legi perferendæ habere , avocato populo ab armis. Senatum interim consules habent , alio se majore ab tribunis metu ostendente , quam quem nocturnus hostis intulerat.

XVII. Postquam arma poni , & discedere homines ab stationibus nuntiatum est , P. Valerius , collega senatum retinente , se ex curia proripit , inde in templum ad tribunos venit : *Quid hoc rei est , inquit , tribuni ? Ap. Herdonii ductu & auspicio rempublicam everfuri estis ? Tam felix vobis corrumpendis fuit , qui servitia vestra non commovit auctor ?* Cuius

hostes supra caput sint, disce ti ab armis, legesque ferri placet? Inde ad multitudinem oratione versa: Si vos urbis, Quirites, si vestri nu'la cura tangit; at vos veremini Deos vestros ab hostibus captos. Jupiter optimus maximus, Juno regina, & Minerva, alii Diu Deaque obsidentur. castra fervorum publicos vestros penates tenent. Hæc vobis forma sanæ civitatis videtur? Tantum hostium non solum intra muros est, sed in arce supra forum curiamque: comitia interim in foro sunt: senatus in curia est: velut cum otium superat, senator sententiam dicit: alii Quirites suffragium inuunt. Non, quidquid Patrum plebisque est, consules, tribunos, Deos, hominesque omnes armatos opem ferre, in Capitolium currere, liberare ac pacare augustissimam illam domum Jovis optimi maximi decuit? Romule pater, tu mentem tuam, qua quondam arcem, ab his iisdem Sabinis auro captam, recepisti, da stirpi tuæ. jube hanc ingredi viam, quam tu dux, quam tuus ingressus exercitus est, Primus, en, ego consul, quantum mortalis Deum possum, te, ac tua vestigia sequar. Ultimum orationis fuit, Se arma capere, vocare omnes Quirites ad arma. si quis impediatur, jam se consularis imperii, jam tribuniciæ potestatis sacratarumque legum oblitum, quisquis ille sit, ubicunque sit, in Capitolio, in foro, pro hoste habiturum. Juberent tribuni, quoniam in Ap. Herdonium vetarent, in P. Valerium consulem sumi arma. ausurum se in tribunis, quod princeps familiæ suæ ausus in regibus esset. Vim ultimam apparebat futuram, spectaculoque seditionem Romanam hostibus fore. nec lex tamen ferri, nec ire in Capitolium consul potuit. nox

certamina cœpta oppressit: tribuni cessere nocti; timentes consulum arma. Amotis inde seditionis auctoribus, Patres circumire plebem, inferentesque se in circulos, sermones temporis aptos ferere: admonere, *Ut viderent, in quod discrimen rempublicam adducerent. Non inter Patres ac plebem certamen esse; sed simul Patres plebemque, arcem urbis, templa Deorum, penates publicos privatosque hostibus dedi.* Dum hæc in foro sedandæ discordiæ causa aguntur, consules interim, ne Sabini, ne Veiens hostis moveretur, circa portas murosque discesserant.

XVIII. Eadem nocte & Tusculum de arce capta, Capitolioque occupato, & alio turbatæ urbis statu nuntii veniunt. L. Mamilius Tusculi tum dictator erat. is, confestim convocato senatu, atque introductis nuntiis, magnopere censet, *Ne expectent, dum ab Roma legati, auxilium petentes, veniant: periculum ipsum, discrimenque, ac sociales Deos, fidemque fœderum id poscere. Demerendi beneficio tam potentem, tam propinquam civitatem, nunquam parem occasionem duros Deos.* Placet ferri auxilium: juvenus conscribitur, arma dantur. Romam prima luce venientes, procul speciem hostium præbuere. Æqui aut Volsci venire visi sunt. deinde, ubi vanus terror abiit, accepti in urbem, agmine in forum descendunt. ibi jam P. Valerius, relicto ad portarum præsidia collega, instruebat aciem. Auctoritas viri moverat, affirmantis, *Capitolio recuperato, & urbe pacata, si edoceri se sissent, quæ fraus ab tribunis occulta in lege ferretur, memorem se majorum suorum, memorem cognominis, quod populi*

colendi velut hereditaria cura sibi a majoribus tradita esset, concilium plebis non impedituram. Hunc ducem secuti, nequidquam reclamantibus tribunis, in cli-
vum Capitolinum erigunt aciem. adjungitur & Tu-
sculana legio. certare focii civesque, utri recupe-
ratae arcis suum decus facerent. dux uterque suos
adhortatur. Trepidare tum hostes; nec ulli satis
rei, praeterquam loco, fidere. trepidantibus infe-
runt signa Romani fociique. Jam in vestibulum per-
ruperant templi, cum P. Valerius, inter primores
pugnam ciens, interficitur. P. Volumnius consula-
ris vidit cadentem. is, dato negotio suis, ut corpus
obtegerent, ipse in locum vicemque consulis pro-
volat. Prae ardore impetuque tantae rei sensus non
pervenit ad militem: prius vicit, quam se pugna-
re sine duce sentiret. Multi exfulum caede sua foed-
davere templum; multi vivi capti; Herdonius in-
terfectus. Ita Capitolium recuperatum. De capti-
vis, ut quisque liber aut servus esset, suae fortu-
nae a quoque sumtum supplicium est. Tusculanis
gratiae actae: Capitolium purgatum atque lustratum.
In consulis domum plebes quadrantes, ut funere
ampliore efferretur, jactasse fertur.

XIX. Pace parta, instare tum tribuni Patribus,
*ut P. Valerii fidem exsolverent: instare Claudio, ut
collegae Deos manes fraude liberaret, agi de lege sine-
ret.* Consul, *antequam collegam sibi subrogasset, ne-
gare, passurum agi de lege.* Haec tenuere contentiones
usque ad comitia consulis subrogandi. Decembri
mense, summo Patrum studio, L. Quinctius Cin-
cinnatus, pater Caesonis, consul creatur, qui ma-

gistratum statim occiperet. Perculsa erat plebes, consulem habitura iratum, potentem favore Patrum, virtute sua, tribus liberis, quorum nemo Cæsoni cedebat magnitudine animi; consilium & modum adhibendo, ubi res posceret, priores erant. Is, ut magistratum iniit, assiduis concionibus pro tribunali, non in plebe coercenda, quam fenatu castigando, vehementior fuit: *cujus ordinis languore perpetui jam tribuni plebis, non ut in republica populi Romani, sed ut in perdita domo, lingua criminibusque regnarent. Cum Cæsone filio suo virtutem, constantiam, omnia juventutis belli domique decora pulsa ex urbe Romana & fugata esse. loquaces, seditiosos, semina discordiarum, iterum ac tertium tribunos pessimis artibus regia licentia vivere. Aulus, inquit, ille Virginius, quia in Capitolio non fuit, minus supplicii, quam Ap. Herdonius, meruit? plus hercule aliquanto, qui vere rem aestimare velit. Herdonius, si nihil aliud, hostem se fatendo prope denunciavit, ut arma caperetis: hic, negando bella esse, arma vobis ademit, nudosque servis vestris & exsulibus objecit. Et vos (C. Claudii pace, & P. Valerii mortui loquar) prius in clivum Capitolinum signa intulistis, quam hos hostes de foro tolleretis? Pudet Deorum hominumque. cum hostes in arce, in Capitolio essent, exsulum & servorum dux, profanatis omnibus, in cella Jovis optimi maximi habitaret, Tusculi ante, quam Romæ, sumta sunt arma. In dubio fuit, utrum L. Memilius Tusculanus dux, an P. Valerius & C. Claudius consules Romanam arcem liberarent: & qui ante Latinos, ne pro se quidem ipsis, cum in sinibus hostem haberent, attingere ar-*

ma passi sumus; nunc, nisi Latini sua sponte arma sumissent, capti & deleti eramus. Hoc est, tribuni, auxilium plebi ferre, inermem eam hosti trucidandam objicere? Scilicet, si quis vobis humillimus homo de vestra plebe, (quam partem, velut abruptam a cetero populo, vestram patriam peculiaremque rempublicam fecistis) si quis ex his domum suam obsessam a familia armata nuntiaret, ferendum auxilium putaretis. Jupiter optimus maximus, exsulum atque servorum septus armis, nulla humana ope dignus erat? & hi postulant, ut sacrosancti habeantur, quibus ipsi Dii neque sacri, neque sancti sunt? At enim, divinis humanisque obruti sceleribus, legem vos hoc anno perlaturus diclittatis? Tum hercule illo die, quo ego consul sum creatus, male gesta respublica est, pejus multo, quam cum P. Valerius consul periit, si tuleritis. Jam primum omnium, inquit, Quirites, in Volscos & Æquos mihi atque collegæ legiones ducere in animo est. Nescio quo fato magis bellantes, quam pacati, propitios habemus Deos. quantum periculum ab illis populis fuerit, si Capitolium ab exsulibus obsessum scissent, suspicari de præterito, quam re ipsa experiri, est melius.

XX. Moverat plebem oratio consulis: erecti Patres restitutam credebant rempublicam: consul alter, comes animosior, quam auctor, suscepisse collegam priorem actionem tam gravis rei facile passus, in peragendis consularis officii partem ad se vindicabat. Tum tribuni, eludentes velut vana dicta, persequi quærendo, quonam modo exercitum educaturi consules essent, quos delectum habere nemo passurus esset? Nobis vero, inquit Quinctius, nihil delectu opus

est; cum, quo tempore P. Valerius ad recipiendum Capitolium arma plebi dedit, omnes in verba juraverint, conventuros se jussu consulis, nec injussu abituros. Edicimus itaque, omnes, qui in verba jurastis, crastina die armati ad lacum Regillum adfitis. Cavillari tum tribuni, & populum exsolvere religione velle: privatum eo tempore Quinctium fuisse, cum sacramento adacli sint. Sed nondum hæc, quæ nunc tenet seculum, negligentia Deum venerat: nec interpretrando sibi quisque jusjurandum & leges aptas faciebat, sed suos potius mores ad ea accommodabat. Igitur tribuni, ut impediendæ rei nulla spes erat, de proferendo exercitu agere: eo magis, quod, & augures jussos adesse ad Regillum lacum, fama exierat, locumque inaugurari, ubi auspiciato cum populo agi posset; ut, quidquid Romæ vi tribunicia rogatum esset, id comitiis ibi abrogaretur. Omnes id jussuros, quod consules vellent. neque enim provocacionem esse longius ab urbe mille passuum: & tribunos, si eo adveniant, in alia turba Quiritium subiectos fore consulari imperio. Terrebant hæc: sed ille maximus terror animos agitabat, quod sæpius Quinctius dicitabat, Se consulum comitia non habiturum. Non ita civitatem ægram esse, ut consuetis remediis fisci possit. dictatore opus esse reipublicæ, ut, qui se moverit ad sollicitandum statum civitatis, sentiat, sine provocacione dictaturam esse.

XXI. Senatus in Capitolio erat. eo tribuni cum perturbata plebe veniunt. multitudo clamore ingenti, nunc consulum, nunc Patrum, fidem implorant. nec ante moverunt de sententia consu-

lem, quam tribuni, se in auctoritate Patrum futuros esse, polliciti sunt. Tunc, referente consule de tribunorum & plebis postulatis, senatusconsultata fiunt, *Neque tribuni legem eo anno ferrent, neque consules ab urbe exercitum educerent. In reliquum magistratus continuari, & eosdem tribunos refici, judicare senatum contra rempublicam esse.* Consules fuere in Patrum potestate: tribuni, reclamantibus consulibus, refecti. Patres quoque, ne quid cederent plebi, & ipsi L. Quinctium consulem reficiebant. Nulla toto anno vehementior actio consulis fuit. *Mirer, inquit, si vana vestra, Patres conscripti, auctoritas ad plebem est? Vos elevatis eam. quippe, quia plebs senatusconsultum in continuandis magistratibus solvit, ipsi quoque solutum vultis, ne temeritati multitudinis cedatis: tanquam id sit plus posse in civitate, plus levitatis ac licentiæ habere. levius enim vaniusque profecto est, sua decreta & consulta tollere, quam aliorum. Imitamini, Patres conscripti, turbam inconsultam: & , qui exemplo aliis esse debetis, aliorum exemplo peccetis potius, quam alii vestro recte faciant; dum ego ne imiter tribunos, nec me contra senatusconsultum consulem renuntiari patiar. Te vero, C. Claudii, adhortor, ut & ipse populum Romanum hac licentia arceas: & de me hoc tibi persuadeas, me ita accepturum, ut non honorem meum a te impeditum, sed gloriam sprete honoris auctam, invidiamque, quæ ex continuato eo impenderet, levatam putem.* Communiter inde edicunt, *Ne quis L. Quinctium consulem faceret. si quis fecisset, se id suffragium non observaturos.*

XXII. Consules creati Q. Fabius Vibulanus tertium, & L. Cornelius Maluginensis. Census actus eo anno. Iustrum, propter Capitolium captum, consulem occisum, condi religiosum fuit. Q. Fabio, L. Cornelio consulibus, principio anni statim res turbulentæ. Instigabant plebem tribuni. bellum ingens a Volscis & Æquis Latini atque Hernici nuntiabant. jam Antii Volscorum legiones esse: & ipsam coloniam ingens metus erat defecturam. ægreque impetratum a tribunis, ut bellum præverti finerent. Consules inde partiti provincias. Fabio, ut Antium legiones duceret, datum: Cornelio, ut Romæ præsidio esset, ne qua pars hostium, qui Æquis mos erat, ad populandum veniret. Hernici & Latini iussi milites dare ex fœdere: duæque partes sociorum in exercitu, tertia civium fuit. Postquam ad diem præstitutum venerunt socii, consul extra portam Capenam castra locat. inde, Iustrato exercitu, Antium profectus, haud procul oppido stativisque hostium confedit. Ubi cum Volsci, quia nondum ab Æquis venisset exercitus, dimicare non ausi, quemadmodum quieti vallo se tutarentur, pararent; postero die Fabius, non permixtam unam sociorum civiumque, sed trium populorum tres separatim acies circa vallum hostium instruxit. Ipse erat medius cum legionibus Romanis. inde signum observare iussit, ut pariter & socii rem inciperent, referrentque pedem, si receptui cecinisset. equites item suæ cuique parti post principia collocat. Ita trifariam adortus castra circumvenit; & cum undique instaret, non sustinentes impetum

Volscos vallo deturbat. Transgressus inde munitiones, pavidam turbam inclinatanque in partem unam castris expellit. Inde effuse fugientes eques, cui superare vallum haud facile fuerat, cum ad id spectator pugnae adstitisset, libero campo adeptus, parte victoriae fruitur, territos caedendo. Magna & in castris & extra munimenta caedes fugientium fuit: sed praeda major; quia vix arma secum efferre hostis potuit. deletusque exercitus foret, ni fugientes silvae texissent.

XXIII. Dum ad Antium haec geruntur, interim Aequi, robore juventutis praemisso, arcem Tusculanam improvise nocte capiunt: reliquo exercitu haud procul moenibus Tusculi confidunt, ut distenderent hostium copias. Haec celeriter Romam, ab Roma in castra Antium perlata, movent Romanos haud secus, quam si Capitolium captum nuntiaretur. adeo & recens erat Tusculanorum meritum, & similitudo ipsa periculi reposcere datum auxilium videbatur. Fabius, omissis omnibus, praedam ex castris raptam Antium convehit. Ibi modico praesidio relicto; citatum agmen Tusculum rapit. nihil praeter arma, & quod cocti ad manum fuit cibi, ferre militi licuit. Commeatum ab Roma consul Cornelius subvehit. Aliquot menses Tusculi bellatum. parte exercitus consul castra Aequorum oppugnabat: partem Tusculanis dederat ad arcem recuperandam. Vi nunquam eo subiri potuit. fames postremo inde detraxit hostem. Quo postquam ventum ad extremum est, inermes nudique omnes sub jugam ab Tusculanis missi. hos, igne,

miniosa fuga domum se recipientes, Romanus consul in Alcido consecutus, ad unum omnes occidit. Victor ad Columen (id loco nomen est) exercitu relicto castra locat. Et alter consul, postquam mœnibus jam Romanis, pulso hoste, periculum esse desierat, & ipse ab Roma profectus. Ita bifariam consules ingressi hostium fines, ingenti certamine hinc Volscos, hinc Æquos populantur. Eodem anno descisse Antiates, apud plerosque auctores invenio. L. Cornelium consulem id bellum gessisse, oppidumque cepisse, certum affirmare, quia nulla apud vetustiores scriptores ejus rei mentio est, non ausim. γ

XXIV. Hoc bello perfecto, tribunicium domi bellum Patres territat. Clamant, *fraude fieri, quod foris teneatur exercitus: frustrationem eam legis tollendæ esse. se nihilominus rem susceptam peracturos.* Obtinuit tamen P. Lucretius præfectus urbis, ut actiones tribunicæ in adventum consulum differrentur. Erat & nova exorta causa motus. A. Cornelius & Q. Servilius quæstores M. Volscio, quod falsus haud dubie testis in Cæsonem exstitisset, diem dixerant. multis enim emanabat indiciis, neque fratrem Volscii, ex quo semel fuerit æger, unquam non modo visum in publico, sed ne assurrexisse quidem ex morbo, multorumque tabe mensium mortuum: nec his temporibus, in quæ testis crimen conjecisset, Cæsonem Romæ visum: affirmantibus, qui una meruerant, secum eum tum frequentem ad signa sine ullo comœatu fuisse. ni ita esset, multi privatim ferebant Volscio iudices.

Cum ad iudicium ire non auderet, omnes eæ res, in unum congruentes, haud magis dubiam damnationem Volscii, quam Cæsonis Volscio teste fuerat, faciebant. In mora tribuni erant, qui comitia quæstores habere de reo, nisi prius habita de lege essent, passuros negabant. ita extracta utraque res in consulum adventum est. Qui ubi triumphantes victore cum exercitu urbem inierunt, quia silentium de lege erat, percussos magna pars credebant tribunos. At illi, (etenim extremum anni jam erat) quartum afflictales tribunatum, in comitorum disceptationem ab lege certamen averterant. & cum consules nihilominus adversus continuationem tribunatus, quam si lex minuendæ suæ majestatis causa promulgata ferretur, tetendissent, victoria certaminis penes tribunos fuit. Eodem anno Æquis pax est petentibus data. Census, res prioris anno inchoata, perficitur: idque lustrum ab origine urbis decimum conditum. Fuerunt censa civium capita centum septemdecim millia trecenta novemdecim. Consulum magna domi bellicque eo anno gloria fuit: quod & foris pacem peperere, & domi, etsi non concors, minus tamen, quam alias, infesta civitas fuit.

XXV. L. Minucius inde & C. Nautius consules facti duas residuas anni prioris causas exceperunt. Eodem modo consules legem, tribuni iudicium de Volscio impediabant: sed in quæstoribus novis major vis, major auctoritas erat. Cum M. Valerio, Valerii filio, Volsci nepote, quæstor erat T. Quinctius Capitolinus, qui ter consul fuerat. Is,

quoniam neque Quinctiæ familiæ Cæso, neque rei publicæ maximus juvenum restitui posset, falsum testem, qui dicendæ causæ innoxio potestatem admisset, justo ac pio bello persequebatur. Cum Virginius maxime & tribuni de lege agerent, duum mensium spatium consulibus datum est ad inspiciendam legem: ut, cum edocuiissent populum, quid fraudis occultæ ferretur, sinerent deinde suffragium inire. hoc intervalli datum res tranquillas in urbe fecit. Nec diuturnam quietem Æqui dederunt: qui, rupto fœdere, quod ictum erat prior anno cum Romanis, imperium ad Gracchum Cloelium deferunt. is tum longe princeps in Æquis erat. Graccho duce in Lavicanum agrum, inde in Tusculanum, hostili populatione veniunt, plenique prædæ in Algido castra locant. In ea castra Q. Fabius, P. Volumnius, A. Postumius, legati ab Roma, venerunt questum injurias, & ex fœdere res repetitum. eos Æquorum imperator, *quæ mandata habeant ab senatu Romano, ad quercum jubet dicere: se alia interim acturum.* quercus ingens arbor prætorio imminebat, cujus umbra opaca sedes erat. Tum ex legatis unus abiens, & hæc, inquit, *sacrata quercus, & quidquid Deorum est, audiant fœdus a vobis ruptum: nostrisque & nunc querelis adsint, & mox armis; cum Deorum hominumque simul violata jura exsequemur.* Romam ut rediere legati, senatus iussit, alterum consulem contra Gracchum in Algidum exercitum ducere: alteri populationem finium Æquorum provinciam dedit. Tribuni suo more impedire delectum. & forsitan ad ultimum im-

pedissent ; sed novus subito additus terror est :

XXVI. Vis Sabinorum ingens prope ad mœnia urbis infesta populatione venit. fœdati agri, terror injectus urbi est. Tum plebs benigne arma cepit. reclamantibus frustra tribunis, magni duo exercitus scripti. alterum Nautius contra Sabinos duxit : castrisque ad Eretum positis, per expeditiones parvas, plerumque nocturnis incurfionibus, tantam vastitatem in Sabino agro reddidit, ut, comparati ad eam, prope intacti bello fines Romani viderentur. Minucio neque fortuna nec vis animi eadem in gerendo negotio fuit. nam, cum haud procul ab hoste castra posuisset, nulla magnopere clade accepta, castris se pavidus tenebat. Quod ubi fenserant hostes, crevit ex metu alieno, ut fit, audacia : &, nocte adorti castra, postquam parum vis aperta profecerat, munitiones postero die circumdant. quæ priusquam, undique vallo objecto, clauderent exitus, quinque equites, inter stationes hostium emissi, Romam pertulere, consulem exercitumque obsideri. Nihil nec tam inopinatum, nec tam insperatum accidere potuit. Itaque tantus pavor, tanta trepidatio fuit, quanta, si urbem, non castra, hostes obsiderent. Nautium consulem arcessunt. in quo cum parum præsidii videretur, dictatoremque dici placeret, qui rem perculsam restitueret, L. Quinctius Cincinnatus consensu omnium dicitur. Operæ pretium est audire, qui omnia præ divitiis humana spernunt, neque honori magno locum, neque virtuti putant esse, nisi ubi effusè affluant opes. Spes unica imperii populi Ro-

mani L. Quinctius trans Tiberim, contra eum ipsum locum, ubi nunc navalia sunt, quatuor jugerum colebat agrum, quæ prata Quinctia vocantur. Ibi ab legatis, seu fossam fodiens palæ innixus, seu cum araret, operi certe, id quod constat, agresti intentus, salute data invicem redditaque, rogatus, *ut, quod bene verteret ipsi rei que publicæ, togatus mandata senatus audiret*, admiratus, rogitanisque, *satin' salva essent omnia?* togam prope e tugurio proferre uxorem Raciliam jubet. Qua simul, absterfo pulvere ac sudore, velatus processit, dictatorem eum legati gratulantes consalutant: in urbem vocant: qui terror sit in exercitu, exponunt. Navis Quinctio publice parata fuit, transvectumque tres obviam egressi filii excipiunt; inde alii propinqui atque amici; tum Patrum major pars. Ea frequentia stipatus, antecedentibus licitoribus, deductus est domum, & plebis concursus ingens fuit. sed ea nequaquam tam læta Quinctium vidit, & imperii nimium, & virum in ipso imperio vehementiorem rata. Et illa quidem nocte nihil præterquam vigilatum est in urbe.

XXVII. Postero die dictator, cum ante lucem in forum venisset, magistrum equitum dicit L. Tarquitium patriciæ gentis, sed qui, cum stipendia pedibus propter paupertatem fecisset, bello tamen primus longe Romanæ juventutis habitus esset. Cum magistro equitum in concionem venit, justitium edicit, claudi tabernas tota urbe jubet, vetat quenquam privatiæ quidquam rei agere. Tum, quicumque ætate militari essent, armati, cum ci-

bariis in dies quinque coctis vallisque duodenis ; ante solis occasum Martio in campo aessent : quibus ætas ad militandum gravior esset, vicino militi, dum is arma pararet, vallumque peteret, cibaria coquere iussit. Sic juvenus discurret ad vallum petendum. sumfere, unde cuique proximum fuit : prohibitus nemo est : impigreque omnes ad edictum dictatoris præsto fuere. Inde composito agmine, non itineri magis apti, quam proelio, si res ita tulisset, legiones ipse dictator, magister equitum suos equites ducit. In utroque agmine, quas tempus ipsum poscebat, adhortationes erant : *adderent gradum, maturato opus esse, ut nocte ad hostem pervenire possent. consulem exercitumque Romanum obsideri. tertium diem jam clausos esse : quid quæque nox aut dies ferat, incertum esse : puncto sæpe temporis maximarum rerum momenta verti. Accelera signifer, sequere miles, inter se quoque, gratificantes ducibus, clamabant. media nocte in Algidum perveniunt : &, ut sensere, se jam prope hostes esse, signa constituunt.*

XXVIII. Ibi dictator, quantum nocte prospici poterat, equo circumvectus, contemplatusque, quæ tractus castrorum, quæque forma esset, tribunis militum imperavit, ut sarcinas in unum conjici jubeant, militem cum armis valloque redire in ordines suos. facta, quæ imperavit. Tum, quo fuerant ordine in via, exercitum omnem longo agmine circumdat hostium castris, &, ubi signum datum sit, clamorem omnes tollere jubet : clamore sublato, ante se quemque ducere fossam, &

jacere vallum. Edito imperio, signum secutum est. iussa miles exsequitur: clamor hostes circumsonat. Superat inde castra hostium, & in castra consulis venit: alibi pavorem, alibi gaudium ingens facit. Romani, *civilem esse clamorem, atque auxilium adesse*, inter se gratulantes, ultro ex stationibus ac vigiliis territant hostem. Consul differendum negat. *Illo clamore non adventum modo significari, sed rem ab suis coeptam: mirumque esse, ni jam exteriori parte castra hostium oppugnentur. Itaque arma suos capere, & se subsequi jubet.* Nocte initum proelium est a legionibus: dictatori clamore significant, ab ea quoque parte rem in discrimine esse. Jam se ad prohibenda circumdari opera Æqui parabant, cum, ab interiore hoste proelio coepto, ne per media sua castra fieret eruptio, a munientibus ad pugnantes introrsum versi, vacuum noctem operi dedere. pugnatumque cum consule ad lucem est. Luce prima jam circumvallati ab dictatore erant, & vix adversus unum exercitum pugnam sustinebant. tum a Quinctiano exercitu, qui confestim a perfecto opere ad arma rediit, invaditur vallum. hic instabat nova pugna: illa nihil remiserat prior. Tum, ancipiti malo urgente, a proelio ad preces versi, hinc dictatorem, hinc consulem orare, ne in occisione victoriam ponerent, ut inermes se inde abire sinerent. Ab consule ad dictatorem ire iussis ignominiam infensus addidit. Gracchum Clœlium ducem principesque alios victos ad se adduci jubet, oppido Corbione decedi: *Sanguinis se Æquorum non eggere: licere abire: sed, ut exprimaturn tandem confessio,*

subactam domitamque esse gentem, sub jugum abiturus. Tribus hastis jugum fit, humi fixis duabus, superque eas transversa una deligata. sub hoc jugo dictator Æquos misit. x

XXIX. Castris hostium receptis, plenis omnium rerum, (nudos enim emiserat) prædam omnem suo tantum militi dedit: consularem exercitum ipsumque consulem increpans, *Carebis*, inquit, *prædæ parte, miles, ex eo hoste, cui prope prædæ fuisti. & tu, L. Minuci, donec consularem animum incipias habere, legatus his legionibus præeris.* Ita se Minucius abdicat consulatu, jussusque ad exercitum manet. Sed adeo tum imperio meliori animus mansuete obediens erat, ut beneficii magis, quam ignominia, hic exercitus memor, & coronam auream dictatori libram pondo decreverit, & proficiscentem eum patronum salutaverit. Romæ a Q. Fabio præfecto urbis senatus habitus triumphantem Quinctium, quo veniebat agmine, urbem ingredi jussit. ducti ante currum hostium duces: militaria signa prælata: secutus exercitus præda onustus. Epulæ instructæ dicuntur fuisse ante omnium domos: epulantesque cum carmine triumphali & sollemnibus jocis, comissantium modo, currum secuti sunt. Eo die L. Mamilius Tusculano, approbantibus cunctis, civitas data est. Confestim se dictator magistratu abdicasset, ni comitia M. Volscii falsi testis tenuissent: ea ne impedirent tribuni, dictatoris obstitit metus. Volscius damnatus Lanuvium in exilium abiit. Quinctius sexto decimo die dictatura, in sex menses accepta, se abdicavit. Per eos dies consul

Nautius ad Eretum cum Sabinis egregie pugnat. ad vastatos agros ea quoque clades accessit Sabinis. Minucio Fabius Quintus successor in Algidum missus. Extremo anno agitatum de lege ab tribunis est. sed, quia duo exercitus aberant, ne quid ferretur ad populum, Patres tenuere. plebes vicit, ut quintum eosdem tribunos crearent. Lupos vivos in Capitolio ferunt a canibus fugatos; ob id prodigium lustratum Capitolium esse. Hæc eo anno gesta.

XXX. Sequuntur consules Q. Minucius, C. Horatius Pulvillus. Cujus initio anni cum foris otium esset, domi seditiones iidem tribuni, eadem lex faciebat. ulteriusque ventum foret, (adeo exarserant animis) ni, velut dedita opera, nocturno impetu Æquorum Corbione amissum præsidium nuntiatum esset. Senatim consules vocant, jubentur subitarium scribere exercitum, atque in Algidum ducere. Inde, posito legis certamine, nova de delectu contentio orta. vincebaturque consulare imperium tribunicio auxilio, cum alius additur terror: Sabinum exercitum prædatum descendisse in agros Romanos, inde ad urbem venire. Is metus perpulit, ut scribi militem tribuni finerent; non sine pactione tamen, ut, quoniam ipsi quinquennium elusi essent, parvumque id plebi præsidium foret, decem deinde tribuni plebis crearentur. Expressit hoc necessitas Patribus. id modo excepere, ne postea eosdem tribunos juberent. Tribunicia comitia (ne id quoque post bellum, ut cetera, vanum esset) extemplo habita. Tricesimo sexto anno

a primis tribunis plebis, decem creati sunt, bini ex singulis classibus. itaque cautum est, ut postea crearentur. Delectu deinde habito, Minucius, contra Sabinos profectus, non invenit hostem. Horatius, cum jam Æqui, Corbione interfecto præsidio, Ortonam etiam cepissent, in Algido pugnat: multos mortales occidit: fugat hostem non ex Algido modo, sed a Corbione Ortonaque. Corbionem etiam diruit propter proditum præsidium.

XXXI. Deinde M. Valerius, Sp. Virginius consules facti. Domi forisque otium fuit. annona propter aquarum intemperiem laboratum est. De Aventino publicando lata lex est. Tribuni plebis iidem relecti sequente anno, T. Romilio, C. Veturio consulibus, legem omnibus concionibus suis celebrabant. *Pudere se numeri sui nequidquam aucti, si ea res æque suo biennio jaceret, ac toto superiore lustro jacuisset.* Cum maxime hæc agerent, trepidi nuntii ab Tusculo veniunt, Æquos in agro Tusculano esse. Fecit pudorem recens ejus populi meritum morandæ auxilii: ambo consules, cum exercitu missi, hostem in sua sede in Algido inveniunt. Ibi pugnatum. supra septem millia hostium cæsa: alii fugati: præda parta ingens. Eam, propter inopiam ærarii, consules vendiderunt. Invidiæ tamen res ad exercitum fuit. ea denique tribunis materiam criminandi ad plebem consules præbuit. Itaque ergo, ut magistratu abiere, Sp. Tarpejo, A. Aterio consulibus, dies dicta est Romilio ab C. Claudio Cicerone, tribuno plebis; Veturio ab L. Allieno, ædile plebis. Uterque magna Patrum indignatione

damnatus, Romilius decem millibus æris, Veturius quindecim. Nec hæc priorum calamitas consulum feigniores novos fecerat consules. & se damnari posse ajebant: & plebem, & tribunos legem ferre non posse. Tum, abjecta lege, quæ promulgata consenuerat, tribuni lenius agere cum Patribus. *Finem tandem certaminum facerent. si plebejæ leges displicerent, at illi communiter legum latores, & ex plebe, & ex Patribus, qui utrisque utilia ferrent, quæque æquandæ libertatis essent, fnerent creari.* Rem non aspernabantur Patres: *daturum leges neminem, nisi ex Patribus, ajebant.* Cum de legibus conveniret, de latore tantum discreparet; missi legati Athenas Sp. Postumius Albus, A. Manlius, P. Sulpicius Camerinus; jussique inclitas leges Solonis describere, & aliarum Græciæ civitatum instituta, mores, juraque noscere.

XXXII. Ab externis bellis quietus annus fuit: quietior insequens, P. Curiatio & Sex. Quinctilio consulibus, perpetuo silentio tribunorum: quod primo legatorum, qui Athenas ierant, legumque peregrinarum exspectatio præbuit; dein duo simul mala ingentia exorta, fames pestilentiaque, foeda homini, foeda pecori. Vastati agri sunt: urbs assiduis exhausta funeribus: multæ & claræ lugubres domus. Flamen Quirinalis Ser. Cornelius mortuus; augur C. Horatius Pulvillus: in cujus locum C. Veturium eo cupidius, quia damnatus a plebe erat, augures legere. Mortuus consul Quinctilius, quatuor tribuni plebis. Multiplici clade foedatus annus. ab hoste otium fuit. Inde consules C. Menenius, P.

Sestius Capitolinus. Neque eo anno quidquam belli externi fuit. domi motus orti. Jam redierant legati cum Atticis legibus. eo intentius instabant tribuni, ut tandem scribendarum legum initium fieret. Placet creari decemviros sine provocatio-
ne, & ne quis eo anno alius magistratus esset. Admischerentur ne plebeji, controversia aliquamdiu fuit. postremo concessum Patribus, modo ne lex Icilia de Aventino, aliæque sacratæ leges abrogarentur.

XXXIII. Anno trecentesimo altero, quam condita Roma erat, iterum mutatur forma civitatis, ab consulibus ad decemviros, quemadmodum ab regibus ante ad consules venerat, translato imperio. Minus insignis, quia non diuturna, mutatio fuit. læta enim principia magistratus ejus nimis luxuriavere. eo citius lapsa res est, repetitumque, duobus uti mandaretur consulum nomen imperiumque. Decemviri creati Ap. Claudius, T. Genucius, P. Sestius, L. Veturius, C. Julius, A. Manlius, Ser. Sulpicius, P. Curvius, T. Romilius, Sp. Postumius. Claudio & Genucio, quia designati consules in eum annum fuerant, pro honore honos redditus: & Sestio alteri consulum prioris anni, quod eam rem collega invito ad Patres retulerat. His proximi habiti legati tres, qui Athenas ierant. simul ut pro legatione tam longinqua præmio esset honos: simul peritos legum peregrinarum ad condenda nova jura usui fore credebant. Supplere ceteri numerum. Graves quoque ætate electos novissimis suffragiis ferunt, quo minus ferociter alio-

rum scitis adversarentur. Regimen totius magistratus penes Appium erat favore plebis. adeoque novum sibi ingenium induerat, ut plebicola repente omnisque auræ popularis captator evaderet, pro truci sævoque insectatore plebis. Decimo die jus populo singuli reddebant. eo die penes præfectum juris fasces duodecim erant: collegis novem singuli accensi apparebant. & in unica concordia inter ipsos (qui consensus privatis interdum inutilis esset) summa adversus alios æquitas erat. Moderationis eorum argumentum exemplo unius rei notasse, satis erit. Cum sine provocatione creati essent; defosso cadavere, domi apud P. Sestium, patriciæ gentis virum, invento, prolatoque in concionem, in re juxta manifesta atque atroci, C. Julius decemvir diem Sestio dixit, & accusator ad populum exstitit, cujus rei iudex legitimus erat: decessitque jure suo, ut dentum de vi magistratus populi libertati adjiceret.

XXXIV. Cum promptum hoc jus velut ex oraculo incorruptum pariter ab his summi infimique ferrent, tum legibus condendis opera dabatur: ingentique hominum expectatione propositis decem tabulis, populum ad concionem advocaverunt: & *Quod bonum, faustum, felixque reipublicæ, ipsis, liberisque eorum esset, ire, & legere leges propositas iussere. Se, quantum decem hominum ingeniis provideri potuerit, omnibus summis infimisque jura æquasse, plus pollere multorum ingenia consiliaque. Versarent in animis sæcum unamquamque rem; agitarent deinde sermonibus: atque in medium, quid in quaque re plus*

minusve esset, conferrent. Eas leges habiturum populum Romanum, quas consensus omnium non jussisse latis magis, quam tulisse, videri posset. Cum ad rumores hominum de unoquoque legum capite edito fatis correctæ viderentur, centuriatis comitiis decem tabularum leges perlatae sunt: qui nunc quoque, in hoc immenso aliarum super alias acervatarum legum cumulo, fons omnis publici privatique est juris. Vulgatur deinde rumor, duas deesse tabulas; quibus adjectis, absolvi posse velut corpus omnis Romani juris. Ea expectatio, cum dies comitorum appropinquaret, desiderium decemviros iterum creandi fecit. Jam plebs, præterquam quod consulum nomen, haud secus quam regum, perosa erat, ne tribunicium quidem auxilium, cedentibus invicem appellatione decemviris, quærebat.

XXXV. Postquam vero comitia decemviris creandis in trinum nundinum indicta sunt; tanta exarsit ambitio, ut primores quoque civitatis (metu credo, ne tanti possessio imperii, vacuo ab se relicto loco, haud satis dignis pateret) prensarent homines; honorem, summa ope a se impugnatum, ab ea plebe, cum qua contenderant, suppliciter petentes. Demissa jam in discrimen dignitas, ea ætate, iisque honoribus actis, stimulabat Ap. Claudium. nescires, utrum inter decemviros, an inter candidatos, numerares. Propior interdum petendo, quam gerendo, magistratui erat. criminari optimates, extollere candidatorum levissimum quemque humillimumque, ipse medius inter tribunicios

Duilios Icilioſque in foro volitare, per illos ſe plebi venditare: donec collegæ quoque, qui unice illi dediti fuerant ad id tempus, coniecere in eum oculos, mirantes quid ſibi vellet. Apparere, nihil ſinceri eſſe; *Profecto haud gratuitam in tanta ſuperbia comitatem fore. nimium in ordinem ſe ipſum cogere, & vulgari cum privatis, non tam properantis abire magiſtratu, quam viam ad continuandum magiſtratum quærentis, eſſe.* Propaiam obviam ire cupiditati parum auſi, obſecundando mollire impetum aggrediuntur. comitorum illi habendorum, quando minimus natus ſit, munus conſenſu injungunt. Ars hæc erat, ne ſemet ipſe creare poſſet; quod præter tribunos plebis (& id ipſum peſſimo exemplo,) nemo unquam feciſſet. ille enimvero, quod bene vertat, habiturum ſe comitia profeſſus, impedimentum pro occasione arripuit. dejectiſque honore per coitionem duobus Quinctiis, Capitolino & Cincinnato, & patruo ſuo C. Claudio, conſtantiſſimo viro in optimatum cauſa, & aliis ejuſdem ſaſtigii civibus, nequaquam ſplendore vitæ pares decemviros creat: ſe in primis, quod haud ſecus factum improbabant boni, quam nemo facere auſurum crediderat. Creati cum eo M. Cornelius Maluginenſis, M. Sergius, L. Minutius, Q. Fabius Vibulanus, Q. Pœtelius, T. Antonius Merenda, Cæſo Duilius, Sp. Oppius Cornicen, Man. Rabulejus.

XXXVI. Ille finis Appio alienæ perſonæ ferendæ fuit. ſuo jam inde vivere ingenio cœpit, novosque collegas jam prius, quam inirent magiſtra-

tum, in suos mores formare. Quotidie coibant remotis arbitris: inde impotentibus instructi consiliis, quæ secreto ab aliis coquebant, jam haud dissimulando superbiam, rari aditus, colloquentibus difficiles, ad Idus Majas rem perduxere. Idus tum Majæ sollemnes ineundis magistratibus erant. Initio igitur magistratus primum honoris diem denuntiatione ingentis terroris insignem fecere. nam cum ita priores decemviri servassent, ut unus fascibus haberet, & hoc insigne regium in orbem, suam cujusque vicem, per omnes iret, subito omnes cum duodenis fascibus prodire. Centum viginti lictores forum impleverant, & fascibus secures illigatas præferebant. nec attinuisse demi securim, cum sine provocatione creati essent, interpretabantur. Decem regum species erat; multiplicatusque terror non infimis solum, sed primoribus Patrum, ratis cædis causam ac principium quæri: ut, si quis memorem libertatis vocem aut in senatu aut in populo misisset, statim virgæ securesque etiam ad ceterorum metum expedirentur. Nam, præterquam quod in populo nihil erat præsidii, sublata provocatione, intercessionem quoque consensu sustulerant: cum priores decemviri appellatione collegæ corrigi reddita ab se jura tulissent; & quædam, quæ sui iudicii videri possent, ad populum rejecissent. Aliquamdiu æquatus inter omnes terror fuit: paulatim totus vertere in plebem cœpit. Abstinebatur a Patribus: in humiliores libidinosè crudeliterque consulebatur: hominum, non causarum, toti erant; ut apud quos gratia vim æqui haberet.

Judicia domi conflabant, pronuntiabant in foro. Si quis collegam appellasset, ab eo, ad quem venerat, ita discedebat, ut pœniteret, non prioris decreto stetisse. Opinio etiam sine auctore exierat, non in præsentis modo temporis eos injuriam conspirasse, sed fœdus clandestinum inter ipsos jurejurando ictum, ne comitia haberent, perpetuoque decemviratu possessum semel obtinerent imperium.

XXXVII. Circumspectare tum patriciorum vultus plebeji, & inde libertatis captare auram, unde servitutem timendo in eum statum rempublicam adduxerant. Primores Patrum odisse decemviros, odisse plebem: nec probare, quæ fierent; & credere, haud indignis accidere: avide ruendo ad libertatem in servitutem elapsos juvare nolle: cumulare quoque injurias, ut tædio præsentium consules duo tandem & status pristinus rerum in desiderium veniant. Jam & processerat pars major anni, & duæ tabulæ legum ad prioris anni decem tabulas erant adjectæ: nec quidquam jam supererat, si hæ quoque leges centuriatis comitiis perlatæ essent, cur eo magistratu reipublicæ opus esset. Exspectabant, quam mox consulibus creandis comitia edicerentur. Id modo plebes agitabat, quoniam modo tribuniciam potestatem, munimentum libertati, rem intermissam, repararent. Cum interim mentio comitorum nulla fieri, & decemviri, qui primo tribunicios homines, quia id populare habebatur, circum se ostentaverant plebei, patriciis juvenibus seferant latera. eorum catervæ tribunalia obsederant. Hi ferre, agere plebem plebif-

que res; cum fortuna, qua quidquid cupitum foret, potentioris esset. Et jam ne tergo quidem abstinebatur: virgis cædi, alii securi subjici; &, ne gratuita crudelitas esset, honorum donatio sequi domini supplicium. Hac mercede juvenus nobilis corrupta non modo non ire obviam injuriæ, sed propalam licentiam suam malle, quam omnium libertatem.

XXXVIII. Idus Majæ venere. Nullis subrogatis magistratibus, privati pro decemviris, neque animis ad imperium inhibendum imminutis, neque ad speciem honoris insignibus, prodeunt. id vero regnum haud dubie videri. Deploratur in perpetuum libertas; nec vindex quisquam existit, aut futurus videtur. nec ipsi solum desponderant animos, sed contemni cœpti erant a finitimis populis: imperiumque ibi esse, ubi non esset libertas, indignabantur. Sabini magna manu incursionem in agrum Romanum fecere. lateque populati, cum hominum atque pecudum inulti prædas egissent, recepto ad Eretum, quod passim vagatum erat, agmine, castra locant, spem in discordia Romana ponentes, eam impedimentum delectui fore. Non nuntii solum, sed per urbem agrestium fuga trepidationem injecit. Decemviri consultant, quid opus facto sit. destitutis inter Patrum & plebis odia addidit terrorem insuper alium fortuna. Æqui alia ex parte castra in Algido locant: depopulatumque inde excursionibus Tusculanum agrum legati ab Tusculo, præsidium orantes, nuntiant. Is pavor perpulit decemviros, ut senatum, simul duobus circumstantibus urbem bellis, consulerent. citari

jubent in curiam Patres, haud ignari, quanta invidiæ immineret tempestat: omnes vastati agri periculorumque imminentium causas in se congesturos: tentationemque eam fore abolendi sibi magistratus, ni consensu resisterent, imperioque inhibendo acriter in paucos præferocis animi, conatus aliorum comprimerent. Postquam audita vox in foro est præconis, Patres in curiam ad decemviros vocantis; velut nova res, quia intermiserant jamdiu morem consulendi senatus, mirabundam plebem convertit, *Quidnam incidisset, cur ex tanto intervallo rem desuetam usurparent. Hostibus belloque gratiam habendam, quod solitum quidquam liberæ civitatis fieret.* Circumspectare omnibus fori partibus senatorem, raroque usquam noscitare: curiam inde ac solitudinem circa decemviros intueri; cum & ipsi invisum consensu imperium, & plebs, quia privati jus non esset vocandi senatum, non convenire Patres interpretarentur; jam caput fieri libertatem repetentium, si se plebs comitem senatui det, & quemadmodum Patres vocati non coeant in senatum, sic plebs abnuat delectum. Hæc fremunt plebes. Patrum haud fere quisquam in foro, in urbe rari erant. indignitate rerum cesserant in agros; suarumque rerum erant, amissa publica: tantum ab injuria se abesse rati, quantum a cœtu congressuque impotentium dominorum se amovissent. Postquam citati non conveniebant, dimissi circa domos apparitores, simul ad pignora capienda, sciscitandumque, num consulto detrectarent? referunt, senatum in agris esse. Lætius id decemviris acci-

dit, quam si præsentēs detrectare imperium referent. Jubent acciri omnes, senatumque in diem posterum edicunt; qui aliquanto spe ipsorum frequentior convenit. quo factō proditam a Patribus plebs libertatem rata, quod iis, qui jam magistratu abissent, privatisque, si vis abesset, tanquam jure cogentibus, senatus paruisset. ✕

XXXIX. Sed magis obediēter ventum in curiam est, quam obnoxie dictas sententias accepimus. L. Valerium Potitum proditum memoriæ est, post relationem Ap. Claudii, priusquam ordine sententiæ rogarentur, postulando ut de republica liceret dicere, prohibentibus minaciter decemviris, proditurum se ad plebem denuntiantem, tumultum excivisse. Nec minus ferociter M. Horatium Barbatum isse in certamen, *Decem Tarquinos appellāntem, admonentemque, Valeriis & Horatiis ducibus pulsos reges. Nec nominis homines tum pertæsum esse; quippe quo Jovem appellari fas sit, quo Romulum conditorem urbis, deincepsque reges appellatos, quod sacris etiam, ut sollemne, retentum sit. Superbiam violentiamque tum perosos regis. quæ si in regem eodem, aut in filio regis, ferenda non fuerint, quem laturum in tot privatis? Viderent, ne, vetando in curia libere homines loqui, extra curiam etiam moverent vocem. neque se videre, qui sibi minus privato ad concionem populum vocare, quam illis senatum cogere, liceat. Ubi vellent, experirentur, quanto ferocior dolor libertate sua vindicanda, quam cupiditas injusta dominatione esset. De bello Sabino eos referre; tanquam majus ullum populo Romano bellum sit, quam*

cum iis, qui, legum ferendarum causa creati, nihil juris in civitate reliquerint; qui comitia, qui annuos magistratus, qui vicissitudinem imperitandi (quod unum exæquandæ sit libertatis) sustulerint; qui privati fasces & regium imperium habeant. Fuisse, regibus exactis, patricios magistratus creatos; postea, post secessionem plebis, plebejos. Cujus illi partis essent, rogitare? Populares? quid enim eos per populum egisse? Optimates? qui anno jam prope senatum non habuerint; tunc ita habeant, ut de republica loqui prohibeant? Ne nimium in metu alieno spei ponerent. graviora, quæ patiantur, videri jam hominibus, quam quæ metuant.

XL. Hæc vociferante Horatio, cum decemviri nec iræ nec ignoscendi modum reperirent, nec, quo evasura res esset, cernerent; C. Claudii, qui patruus Appii decemviri erat, oratio fuit precibus, quam jurgio, similis, orantis per sui fratris parentisque ejus manes, *Ut civilis potius societatis, in qua natus esset, quam fœderis, nefarie ic̄ti cum collegis, meminisset. multo id magis se illius causa orare, quam reipublicæ. Quippe rempublicam, si a volentibus nequeat, ab invitis jus expetituram. Sed ex magno certamine magnas excitari ferme iras; earum eventum se horrere. Cum aliud, præterquam de quo retulissent, decemviri dicere prohiberent, Claudium interpellandi verecundia fuit. Sententiam igitur per egit, nullum placere senatusconsultum fieri. Omnesque ita accipiebant, privatos eos a Claudio judicatos: multique ex consularibus verbo assensu sunt. Alia sententia, asperior in speciem, vim minorem aliquanto habuit, quæ patricios coire ad*

prodendum interregem jubebat. censendo enim; quoscunque magistratus esse, qui senatum haberent, judicabat; quos privatos fecerat auctor nullius senatusconsulti faciendi. Ita labante jam causa decemvirorum, L. Cornelius Maluginensis, M. Cornelii decemviri frater, cum ex consularibus ad ultimum dicendi locum consulto servatus esset, simulando curam belli, fratrem collegasque ejus tuebatur: *Quonam fato incidisset, mirari se dicitans, ut decemviros, qui decemviratum petissent, aut socii, aut hi maxime oppugnarent? aut quid ita, cum per tot menses vacua civitate nemo, justine magistratus summæ rerum præessent, controversiam fecerit; nunc demum, cum hostes prope ad portas sint, civiles discordias ferant: nisi quod in turbido minus perspicuum fore putent, quid agatur. Ceterum neminem, majore cura occupatis animis, verum esse, præjudicium rei tantæ afferre. Sibi placere, de eo, quod Valerius Horatiusque ante Idus Majas decemviros abisse magistratu infimulent, bellis, quæ immineant, perfectis, republica in tranquillum redacta, senatu disceptante, agi: & jam nunc ita se parare Appium Claudium, ut comitiorum, quæ decemviris creandis decemvir ipse haberit, sciat sibi rationem reddendam esse, utrum in unum annum creati sint, an donec leges, quæ deessent, perferrentur. In præsentia omnia præter bellum omitti placere: cujus si falso famam vulgatam, vanaque non nuntios solum, sed Tusculanorum etiam legatos, attulisse putent; speculatores mittendos censere, qui certius explorata referant. Sin fides & nuntiis & legatis habeatur, delectum primo quoque tempore haberi, de-*

decemviros, quo cuique eorum videatur, exercitus ducere; nec rem aliam præverti.

XLI. In hanc sententiam ut discederetur, juniores Patrum evincebant. Ferociores iterum coorti Valerius Horatiusque vociferari, *Ut de republica liceret dicere. dicturos ad populum, si in senatu per factionem non liceat. Neque enim sibi privatos, aut in curia, aut in concione, posse obstare; neque se imaginariis fascibus eorum cessuros esse.* Tum Appius, jam prope esse ratus, ut, nisi violentiæ eorum pari resisteretur audacia, victum imperium esset, *Non erit melius, inquit, nisi de quo consulimus, vocem misisse.* & ad Valerium, negantem se privato reticere, licentiam accedere jussit. Jam Quiritium fidem implorante Valerio a curiæ limine, L. Cornelius complexus Appium, non cui simulabat consulendo, diremit certamen. factaque per Cornelium Valerio dicendi gratia, quæ vellet. Cum libertas non ultra vocem excessisset, decemviri propositum tenere. Consulares quoque ac seniores ab residuo tribuniciaë potestatis odio, cujus desiderium plebi multo acrius, quam consularis imperii, rebantur esse, prope malebant, postmodo ipsos decemviros voluntate abire magistratu, quam invidia eorum exsurgere rursus plebem. silentiter ducta res sine populari strepitu ad consules redisset, aut bellis interpositis, aut moderatione consulum in imperiis exercendis, posse in oblivionem tribunorum plebem adduci. Silentio Patrum edicitur defectus. juniores, cum sine provocatione imperium esset, ad nomina respondent. legionibus scriptis, inter se

decemviri comparabant, quos ire ad bellum, quos præesse exercitibus oporteret. Principes inter decemviros erant Q. Fabius & Ap. Claudius. bellum domi majus, quam foris, apparebat. Appii violentiam aptiorem rati ad comprimendos urbanos motus: in Fabio minus in bono constans, quam navum in malitia, ingenium esse. Hunc enim virum, egregium olim domi militiaeque, decemviratus collegæque ita mutaverant, ut Appii, quam sui, similis mallet esse. huic bellum in Sabinis, Man. Rabulejo & Q. Poetelio additis collegis, mandatum. M. Cornelius in Algidum missus cum L. Minucio, & T. Antonio, & Cæsone Duilio, & M. Sergio: Sp. Oppium Ap. Claudio adiutorem ad urbem tuendam, æquo omnium decemvirorum imperio, decernunt.

XLII. Nihilo militiae, quam domi, melius republica administrata est. Illa modo in ducibus culpa, quod, ut odio essent civibus, fecerant. alia omnis penes milites noxa erat; qui, ne quid ductu atque auspicio decemvirorum prospere usquam gereretur, vinci se per suum atque illorum dedecus patiebantur. Fusi & ab Sabinis ad Eretum, & in Algido ab Æquis, exercitus erant. ab Ereto per silentium noctis profugi, propius urbem, inter Fidenas Crustumariamque, loco edito castra communierant. persecutis hostibus nusquam se æquo certamine committentes, natura loci ac vallo, non virtute aut armis, tutabantur. Majus flagitium in Algido, major etiam clades accepta: castra quoque amissa erant; exutusque omnibus utensilibus

miles, Tusculum se, fide misericordiaque victurus hospitum, (quæ tamen non fefellerunt,) contulerat. Romam tanti erant terrores allati, ut, posito jam decemvirali odio, Patres vigilias in urbe habendas censerent: omnes, qui per ætatem arma ferre possent, custodire mœnia, ac pro portis stationes agere juberent: arma Tusculum ad supplementum decernerent, decemvirosque, ab arce Tusculi degressos, in castris militem habere: castra alia a Fidenis in Sabinum agrum transferri: belloque ultro inferendo deterreri hostes a consilio urbis oppugnandæ.

XLIII. Ad clades ab hostibus acceptas duo nefanda facinora decemviri belli domique adjiciunt. L. Siccium in Sabinis, per invidiam decemviralem tribunorum creandorum secessionisque mentiones ad vulgus militum sermonibus occultis ferentem, prospeculatum ad locum castris capiendum mittunt. datur negotium militibus, quos miserant expeditionis ejus comites, ut eum opportuno adorti loco interficerent. Haud inultum interfecerunt. nam circa repugnantem aliquot insidiatores cecidere, cum ipse se prævalidus, pari viribus animo, circumventus tutaretur. Nuntiant in castra ceteri, præcipitatum in insidias esse Siccium egregie pugnantem, militesque quosdam cum eo amissos. Primo fides nuntiantibus fuit. Profecta deinde cohors ad sepeliendos, qui ceciderant, decemvirorum permisso, postquam nullum spoliatum ibi corpus, Sicciumque in medio jacentem armatumque, omnibus in eum versis corporibus, videre; hostium neque corpus ul-

lum, nec vestigia abeuntium; profecto ab suis interfectum memorantes, retulere corpus. Invidiæque plena castra erant, & Romam ferri protinus Siccium placebat, ni decemviri funus militare ei publica impensa facere maturassent. Sepultus ingenti militum mœstitia, pessima decemvirorum in vulgus fama, est.

XLIV. Sequitur aliud in urbe nefas, ab libidine ortum, haud minus foedo eventu, quam quod per stuprum cædemque Lucretiæ urbe regnoque Tarquinius expulerat: ut non finis solum idem decemviris, qui regibus, sed causa etiam eadem imperii amittendi esset. Ap. Claudium virginis plebejæ stuprandæ libido cepit. Pater virginis L. Virginius honestum ordinem in Algido ducebat, vir exempli recti domi militiaeque. Perinde uxor instituta fuerat, liberique instituebantur. Desponderat filiam L. Icilio tribunicio, viro acri, & pro causa plebis expertæ virtutis. Hanc virginem adultam, forma excellentem, Appius, amore ardens, pretio ac spe pellicere adortus, postquam omnia pudore septa animadverterat, ad crudelem superbamque vim animum convertit. M. Claudio clienti negotium dedit, ut virginem in servitutum affereret, neque cederet secundum libertatem postulantibus vindicias: quod pater puellæ abesset, locum injuriæ esse ratus. Virgini, venienti in forum, (ibi namque in tabernis literarum ludi erant) minister decemviri libidinis manum injecit; serva sua natam (servamque appellans) esse. sequique se jubebat; cunctantem vi abstracturum. Pavida puella stupente, ad clamorem

nutricis, fidem Quiritium implorantis, fit concursus. Virginii patris sponsique Iciliii populare nomen celebratur. notos gratia eorum, turbam indignitas rei virgini conciliat. Jam a vi tuta erat; cum assertor, *Nihil opus esse multitudine concitata*, ait, *se jure grassari, non vi*. Vocat puellam in jus; auctoribus, qui aderant, ut sequeretur. Ad tribunal Appii perventum est. notam judici fabulam petitor, quippe apud ipsum auctorem argumenti, peragit: *Puellam, domi suæ natam, furtoque inde in domum Virginii translata, suppositam ei esse. Id se indicio compertum afferre, probaturumque vel ipso Virginio judice, 'ad quem major pars injuriæ ejus pertineat. Interim dominum sequi ancillam, æquum esse*. Advocati puellæ, cum Virginium reipublicæ causa dixissent abesse, biduo affuturum, si nuntiatum ei sit; iniquum esse, absentem de liberis dimicare; postulant, ut rem integram in patris adventum differat; lege ab ipso lata vindicias det secundum libertatem; neu patiat, virginem adultam famæ prius, quam libertatis, periculum adire.

XLV. Appius decreto præfatus, *Quam libertati faverit, eam ipsam legem declarare, quam Virginii amici postulationi suæ prætendant. Ceterum ita in ea firmum libertati fore præsidium, si nec causis, nec personis variet. In his enim, quæ afferantur in libertatem, quia quivis lege agere possit, id juris esse: in ea, quæ in patris manu sit, neminem esse alium, cui dominus possessione cedat. Placere itaque patrem arcessi. interea juris sui jacturam assertorem non facere, quin ducat puellam, sistendamque in adventum ejus, qui pater di-*

*catur, promittat. Adversus injuriam decreti cum mul-
 ti magis fremerent, quam quisquam unus recusa-
 re auderet; P. Numitorius, puellæ avunculus, &
 sponfus Icilius interveniunt. dataque inter turbam
 via, cum multitudo Icili maxime interventu re-
 fisti posse Appio crederet, licitor *decreffe* ait: voci-
 ferantemque Icilium submovet. Placidum quoque
 ingenium tam atrox injuria accendisset. *Ferro hinc
 tibi submovendus sum, Appi,* inquit, *ut tacitum fe-
 ras, quod celari vis. Virginem ego hanc sum ducturus,
 nuptam pudicamque habiturus. Proinde omnes collega-
 rum quoque lictores convoca, expediri virgas & secures
 jube: non manebit extra domum patris sponsa Icili.*
*Non, si tribunicium auxilium & provocationem plebi
 Romanæ, duas arces libertatis tuendæ, ademistis, ideo
 in liberos quoque nostros conjugesque regnum vestræ li-
 bidini datum est. Sævite in tergum & in cervices no-
 stras, pudicitia saltem in tuto sit. Huic si vis affere-
 tur, ego præsentium Quiritium pro sponsa, Virginius
 militum pro unica filia, omnes Deorum hominumque
 implorabimus fidem: neque tu istud unquam decretum
 sine cæde nostra referes. Postulo, Appi, etiam atque
 etiam consideres, quo progrediare. Virginius viderit, de
 filia, ubi venerit, quid agat. Hoc tantum sciat, sibi,
 si hujus vindiciis cesserit, conditionem filia quærendam
 esse. me, vindicantem sponsam in libertatem, vita ci-
 tius deseret, quam fides.**

XLVI. Concitata multitudo erat, certamenque
 instare videbatur. lictores Icilium circumsteterant:
 nec ultra minas tamen processum est. Cum Appius,
Non Virginiam defendi ab Icilio, sed inquietum ho-

*minem, & tribunatum etiam nunc spirantem, locum
 seditionis quærere, diceret; non præbiturum se illi eo
 die materiam: sed ut jam sciret, non id petulantia suæ,
 sed Virginio absenti & patrio nomini & libertati, da-
 tum, jus eo die se non dicturum, neque decretum in-
 terpositurum: a M. Claudio petiturum, ut decederet
 jure suo, vindicarique puellam in posterum diem pate-
 retur. Quod nisi pater postero die affuisset, denunciare
 se Icilio similibusque Icilio, neque legi suæ latorem, ne-
 que decemviro constantiam desore: nec se utique colle-
 garum lictores convocaturum ad coercendos seditionis
 auctores: contentum se suis licitoribus fore. Cum di-
 latum tempus injuriæ esset, secessissentque advo-
 cati puellæ; placuit omnium primum, fratrem Ici-
 lio filiumque Numitorii, impigros juvenes, perge-
 re inde recta ad portam, & quantum accelerari
 posset, Virginium acciri e castris. In eo verti puel-
 læ salutem, si postero die vindex injuriæ ad tem-
 pus præsto esset. Jussi pergunt, citatisque equis nun-
 tium ad patrem perferunt. Cum instaret assertor
 puellæ, ut vindicaret, sponsoresque daret; atque
 id ipsum agi diceret Icilius, sedulo tempus terens,
 dum præciperent iter nuntii missi in castra; manus
 tollere undique multitudo, & se quisque paratum
 ad spondendum Icilio ostendere. Atque ille lacri-
 mabundus, *Gratum est, inquit, crastina die vestra
 opera utar. sponsores nunc satis est.* Ita vindicatur
 Virginia, spondentibus propinquis. Appius, pau-
 lisper moratus, ne ejus rei causa sedisse videretur,
 postquam, omissis rebus aliis præ cura unius,
 nemo adibat, domum se recepit; collegisque in*

castra scribit, *Ne Virginio commeatum dent; atque etiam in custodia habeant.* Improbum consilium ferum, ut debuit, fuit: & jam commeatu sumto profectus Virginus prima vigilia erat, cum postero die mane de retinendo eo nequidquam literæ redduntur.

XLVII. At in urbe prima luce, cum civitas in foro expectatione erecta staret, Virginus fordidatus filiam suam obsoleta veste, comitantibus aliquot matronis, cum ingenti advocacione in forum deducit. Circumire ibi & prensare homines cœpit; & non orare solum precariam opem, sed pro debita petere: *Se pro liberis eorum ac conjugibus quotidie in acie stare: nec alium virum esse, cujus strenue ac ferociter facta in bello plura memorari possent. Quid prodesse, si, incolumi urbe, quæ, capta, ultima timeantur, liberis suis sint patienda?* Hæc prope concionabundus circumibat homines. Similia his ab Icilio jactabantur. comitatus muliebris plus tacito fletu, quam ulla vox, movebat. Adversus quæ omnia obstinato animo Appius (tanta vis amentię verius, quam amoris, mentem turbaverat) in tribunal escendit: &, ultro querente pauca petitore, *quod jus sibi pridie per ambitionem dictum non esset*, priusquam aut ille postulatum perageret, aut Virginio respondendi daretur locus, Appius interfatur. Quem decreto sermonem prætenderit, forsitan aliquem verum auctores antiqui tradiderint. quia nusquam ullum in tanta scœditate decreti verisimilem invenio; id, quod constat, nudum videtur proponendum, decessisse vindicias secundum

servitutem. Primo stupor omnes admiratione rei tam atrocis defixit: silentium inde aliquamdiu tenuit. Dein cum M. Claudius, circumstantibus matronis, iret adprehendendam virginem, lamentabilisque eum mulierum comploratio excepisset; Virginus, intentans in Appium manus, *Icilio*, inquit, *Appi, non tibi, filiam despondi: & ad nuptias, non ad stuprum, educavi. Placet pecudum ferarumque ritu promiscue in concubitus ruere? Passurine hæc isti sint, nescio. non spero esse passuros illos, qui arma habent.* Cum repelleretur assertor virginis a globo mulierum circumstantiumque advocatorum, silentium factum per præconem.

XLVIII. Decemvir, alienato ad libidinem animo, negat, *Hesternum tantum convicio Iciliæ violentiaque Virginii, cujus testem populum Romanum habeat, sed certis quoque indiciis compertum se habere, nocte tota cætus in urbe jactos esse ad movendam seditionem. Itaque se, haud inscium ejus dimicationis, cum armatis descendisse; non ut quenquam quietum violaret, sed ut turbantes civitatis otium pro majestate imperii coerceret. Proinde quiescere erit melius. I, inquit, licitor, submove turbam; & da viam domino adprehendendum mancipium.* Cum hæc intonuisset plenus iræ, multitudo ipsa se sua sponte dimovit, desertaque præda injuriæ puella stabat. Tum Virginus, ubi nihil usquam auxilii vidit, *Quæso, inquit, Appi, primum ignosce patrio dolori, si quid inclementius in te sum invectus: deinde sinas hic coram virgine nutricem percontari, quid hoc rei sit; ut, si falso pater dictus sum, æquiore hinc animo discedam.* Data ve-

nia, seducit filiam ac nutricem prope Cloacinæ ad tabernas; quibus nunc Novis est nomen. atque ibi ab lanio cultro arrepto, *Hoc te uno, quo possum,* ait, *modo, filia, in libertatem vindico.* Pectus deinde puellæ transfigit; respectansque ad tribunal, *Te,* inquit, *Appi, tuumque caput sanguine hoc consecro.* Clamore ad tam atrox facinus orto excitus Appius, comprehendi Virginium jubet. ille ferro, quacunque ibat, viam facere: donec, multitudine etiam prosequentium tuente, ad portam perrexit. Icilius Numitoriusque exsanguie corpus sublatum ostentant populo: scelus Appii, puellæ infelicem formam, necessitatem patris deplorant. Sequentes clamitant matronæ, *Eamne liberorum procreandorum conditionem? ea pudicitiae præmia esse?* ceteraque, quæ in tali re muliebris dolor, quo est moestior imbecillo animo, eo miserabilia magis querentibus subjicit. Virorum & maxime Iciliæ vox tota, tribuniciæ potestatis ac provocationis ad populum ereptæ, publicarumque indignationum, erat.

XLIX. Concitatur multitudo partim atrocitate sceleris, partim spe per occasionem repetendæ libertatis. Appius nunc vocari Icilium, nunc retractantem arripi; postremo, cum locus adeundi apparitoribus non daretur, ipse, cum agmine patriciorum juvenum per turbam vadens, in vincula duci jubet. Jam circa Icilium non solum multitudo, sed duces quoque multitudinis erant L. Valerius & M. Horatius. qui, repulso lictore, si jure ageret, vindicare se a privato Icilium aiebant; si vim afferre conaretur, ibi quoque se haud impares fore. Hinc atrox rixa ori-

tur. Valerium Horatiumque liſtor decemviri invadit. franguntur a multitudine faſces. In concionem Appius aſcendit. Sequuntur Horatius Valeriuſque. eos concio audit : decemviro obſtrepitur. Jam pro imperio Valerius diſcedere a privato liſtores jubebat : cum, fractis animis, Appius, vitæ metuens, in domum ſe propinquam foro, inſciis adverſariis, capite obvoluto, recepit. Sp. Oppius, ut auxilio collegæ eſſet, in forum ex altera parte irrupit. videt imperium vi victum. Agitatus deinde conſiliis, atque ex omni parte aſſentiendo multis aucto-ribus trepidus, ſenatum poſtremo vocari juſſit. ea res, quod magnæ parti Patrum diſplicere acta decemvirorum videbantur, ſpe per ſenatum finiendæ poteſtatis ejus multitudinem ſedavit. Senatus nec plebem irritandam cenſuit ; & multo magis providendum, ne quid Virginii adventus in exercitu motus faceret.

L. Itaque miſſi juniores Patrum in caſtra, quæ tum in monte Vecilio erant, nuntiant decemviris, *ut omni ope ab ſeditione milites contineant.* ubi Virginii majorem, quam reliquerat in urbe, motum excivit. Nam, præterquam quod agmine prope quadringentorum hominum veniens, qui ab urbe indignitate rei accenſi comites ei ſe dederant, conſpectus eſt ; ſtriſtum etiam telum tenens, reſperſuſque ipſe cruore, tota in ſe caſtra convertit. & togæ multifariam in caſtris viſæ, majoris aliquanto, quam erat, ſpeciem urbanæ multitudinis fecerant. Quærentibus, *quid rei eſſet*, flens diu vocem non miſit : tandem, ut jam ex trepidatione concurrentium tur-

ha constitit, ac silentium fuit, ordine cuncta, ut
 gesta erant, exposuit. Supinas deinde tendens ma-
 nus, commilitones appellans, orabat, *Ne, quod sce-*
lus Ap. Claudii esset, sibi attribuerent: neu se, ut
parricidam liberum, averfarentur. Sibi vitam filiae sua
cariorem fuisse, si liberæ ac pudicæ vivere licitum fuif-
set. cum, velut servam, a! stuprum rapi videret, mor-
te amitti melius ratum, quam contumelia, liberos, mi-
sericordia se in speciem crudelitatis lapsum. Nec se
superstitem filiae futurum fuisse, nisi spem ulciscendæ
mortis ejus in auxilio commilitonum habuisset. Illis
quoque enim filias, sorores, conjugesque esse. nec cum
filia sua libidinem Ap. Claudii extinctam esse; sed,
quo impunitior sit, eo effrenatiorem fore. Aliena ca-
lamitate documentum datum illis cavendæ similis inju-
riæ. quod ad se attineat, uxorem sibi fato ereptam:
filiam, quia non ultra pudica victura fuerit, miseram,
sed honestam, mortem occubuisse. Non esse jam Appii
libidini locum in domo sua. ab alia violentia ejus
eodem se animo suum corpus vindicaturum, quo vin-
dicaverit filiae. Ceteri sibi ac liberis suis consulerent.
 Hæc Virginio vociferanti succlamabat multitudo,
nec illius dolori, nec suæ libertati se defuturos. Et
 immixti turbæ militum togati, cum eadem illa
 querendo, docendoque, quanto visa, quam audi-
 ta, indigniora potuerint videri, simul profligatam
 jam rem nuntiando Romæ esse; insecutique, qui
 Appium prope interentum in exilium abisse di-
 cerent; perpulerunt, ut ad arma conclamaretur,
 vellarentque signa, & Romam proficiscerentur. De-
 cemviri simul his, quæ videbant, simul his, quæ

acta Romæ audierant, perturbati, alius in aliam partem castrorum ad sedandos motus discurrunt: & leniter agentibus responsum non redditur: imperium si quis inhiheret, & viros & armatos se esse, responderetur. Eunt agmine ad urbem, & Aventinum insidunt; ut quisque occurrerat, plebem ad repetendam libertatem creandosque tribunos plebis adhortantes. alia vox nulla violenta audita est. Senatum Sp. Oppius habet: nihil placet aspere agi: quippe ab ipsis datum locum seditionis esse. Mittuntur tres legati consulares, Sp. Tarpejus, C. Julius, P. Sulpicius, qui quærent senatus verbis, *cujus jussu castra deseruissent? aut quid sibi vellent, qui armati Aventinum obsediissent? belloque averso ab hostibus patriam suam cepissent?* Non defuit, quid responderetur: deerat, qui daret responsum, nullo dum certo duce, nec fatis audentibus singulis invidiæ se offerre. id modo a multitudine conclamatum est, *ut L. Valerium & M. Horatium ad se mitterent. his se daturus responsum.*

LI. Dimissis legatis, admonet milites Virginius, *in re non maxima paulo ante trepidatum esse, quia sine capite multitudo fuerit: responsumque, quanquam non inutiliter, fortuito tamen magis consensu, quam communi consilio esse. Placere decem creari, qui summæ rei præessent, militarique honore tribunos militum appellari.* Cum ad eum ipsum primum is honos deferretur, *Melioribus meis vestrisque rebus reservate,* inquit, *ista de me judicia. Nec mihi filia inulta honorem ullum jucundum esse patitur; nec in perturbata republica eos utile est præesse vobis, qui proximi in-*

vidiæ sint. Si quis usus mei est, nihilo minor ex privato capietur. Ita decem numero tribunos militares creant. Neque in Sabinis quievit exercitus. ibi quoque, auctore Icilio Numitorioque, secessio ab decemviris facta est, non minore motu animorum Sicciæ cædis memoria revocata, quam quem nova fama de virgine adeo foede ad libidinem petita accenderat. Icilius ubi audivit, tribunos militum in Aventino creatos, ne comitorum militarium prærogativam urbana comitia iisdem tribunis plebis creandis sequerentur, peritus rerum popularium imminensque ei potestati, & ipse prius, quam iretur ad urbem, pari potestate eundem numerum ab suis creandum curat. Porta Collina urbem intravere sub signis, mediaque urbe agmine in Aventinum pergunt. ibi, conjuncti alteri exercitui, viginti tribunis militum negotium dederunt, ut ex suo numero duos crearent, qui summæ rerum præessent. M. Oppium, Sex. Manilium creant. Patres, solliciti de summa rerum, cum senatus quotidie esset, jurgiis sæpius terunt tempus, quam consiliis. Sicciæ cædes decemviris, & Appiana libido, & dedecora militiæ objiciebantur. Placebat, Valerium Horatiumque ire in Aventinum. illi negabant se aliter ituros, quam si decemviri deponerent insignia magistratus ejus, quo anno jam ante abissent. Decemviri, querentes se in ordinem cogi, non ante, quam perlatis legibus, quarum causa creati essent, deposituros imperium se aiebant.

LII. Per M. Duilium, qui tribunus plebis fuerat, certior facta plebs, contentionibus assiduis ni-

hil transigi, in Sacrum montem ex Aventino transit; affirmante Duilio, *Non prius, quam deserere urbem videant, curam in animos Patrum descensuram. admonituum Sacrum montem constantiæ plebis. scituros, quod sine restituta potestate redigi in concordiam res nequeant.* Via Nomentana, cui tum Ficulensi nomen fuit, profecti, castra in monte Sacro locavere; modestiam patrum suorum nihil violando imitati. Secuta exercitum plebs, nullo, qui per ætatem ire posset, retractante. Prosequuntur conjuges liberique, *cuinam se relinquerent in ea urbe, in qua nec puditia, nec libertas sancta esset,* miserabiliter rogantes. Cum vasta Romæ omnia infueta solitudo fecisset, in foro præter paucos seniorum nemo esset; vocatis utique in senatum Patribus, desertum apparuisset forum; plures jam, quam Horatius & Valerius, vociferabantur, *Quid exspectabitis, Patres conscripti? Si decemviri finem pertinaciæ non faciunt, ruere ac deflagrare omnia passuri estis? Quod autem istud imperium est, decemviri, quod amplexi tenetis? Tectis ac parietibus jura dicturi estis? Non pudet, licitorum vestrorum majorem prope numerum in foro conspici, quam togatorum aliorumque? Quid, si hostes ad urbem veniant, facturi estis? quid, si plebs mox, ubi parum secessione moveamur, armata veniat? Occasione urbis vultis finire imperium? Atqui aut plebs non est habenda, aut habendi sunt tribuni plebis. Nos citius caruerimus patriciis magistratibus, quam illi plebejis. Novam inexpertamque eam potestatem eripere patribus nostris, ne nunc, dulcedine semel capti, ferant desiderium. cum præsertim nec nos temperemus*

imperiiis, quo minus illi auxilii egeant. Cum hæc ex omni parte jaſtarentur, victi conſenſu decemviri, futuros ſe, quando ita videatur, in poteſtate Patrum affirmant. Id modo ſimul orant ac monent, ut iſſis ab invidia caveatur: nec ſuo ſanguine ad ſupplicia Patrum plebem aſſuefaciant.

LIII. Tum Valerius Horatiusque, miſſi ad plebem conditionibus, quibus videretur, revocandam componendaſque res, decemviris quoque ab ira & impetu multitudinis præcavere jubentur. Proſecti gaudio ingenti plebis in caſtra accipiuntur; quippe liberatores haud dubie & motus initio, & exitu rei. Ob hæc advenientibus gratiæ actæ. Icilius pro multitudine verba facit. Idem, cum de conditionibus ageretur, quærentibus legatis, quæ poſtulata plebis eſſent, composito jam ante adventum legatorum conſilio, ea poſtulavit, ut appareret, in æquitate rerum plus, quam in armis, reponi ſpei. Poteſtatem enim tribuniciam, provocationemque repetebant, quæ ante decemviros creatos auxilia plebis fuerant, & ne cui fraudi eſſet, conciſſe milites aut plebem ad repetendam per ſeceſſionem libertatem. De decemvirorum modo ſupplicio atrox poſtulatatum fuit. Dedi quippe eos æquum cenſebant, vivosque igni concrematurus minabantur. Legati ad ea: *Quæ conſilii fuerunt, adeo æqua poſtulatiſtis, ut ultro vobis deſerenda fuerint. libertati enim ea præſidia petitiſtis, non licentiæ ad impugnandos alios. Iræ veſtræ magis ignoſcendum, quam indulgendum eſt. quippe qui crudelitatis odio in crudelitatem ruitis, & prius pæne, quam ipſi liberi ſitiſtis, dominari jam in adverſarios vul-*

tis. Nunquamne quiescet civitas nostra a suppliciis, aut Patrum in plebem Romanam, aut plebis in Patres? Scuto vobis magis, quam gladio, opus est. Satis superque humilis est, qui jure æquo in civitate vivit, nec inferendo injuriam, nec patiendo. Etiam, si quando metuendos vos præbituri estis, cum, recuperatis magistratibus legibusque vestris, judicia penes vos erunt de capite nostro fortunisque; tunc, ut quæque causa erit, st. uvetis. nunc libertatem repeti satis est.

LIV. Facerent, ut vellent, permittentibus cunctis, mox redituros se legati rebus perfectis affirmant. Profecti cum mandata plebis Patribus exposuissent, alii decemviri, quandoquidem præter spem ipsorum supplicii sui nulla mentio fieret, haud quidquam abnuere. Appius, truci ingenio & invidia præcipua, odium in se aliorum suo in eos metiens odio, *Haud ignaro, inquit, imminet fortuna. Video, donec arma adversariis tradantur, differri adversus nos certamen. dandus invidiæ est sanguis. Nihil ne ego quidem moror, quo minus decemviratu abeam.* Factum senatusconsultum, *Ut decemviri se primo quoque tempore magistratu abdicarent. Q. Furius pontifex maximus tribunos plebis crearet. & ne cui fraudi esset secessio militum plebisque.* His senatusconsultis perfectis, dimisso senatu, decemviri prodeunt in concionem, abdicantque se magistratu, ingenti hominum lætitia. Nuntiantur hæc plebi. legatos, quidquid in urbe hominum supererat, prosequitur. Huic multitudini læta alia turba ex castris occurrit. congratulantur libertatem concordiamque civitati restitutam. Legati pro concione: *Quod bonum, fau-*

stum, felixque sit vobis, rei que publicæ, redite in patriam ad penates, conjuges, liberosque vestros: sed, qua hic modestia fuistis, ubi nullius ager in tot rerum usu necessario tantæ multitudinî est violatus, eam modestiam ferte in urbem. in Aventinum ite, unde profecti estis. Ibi felici loco, ubi prima initia inchoastis libertatis vestræ, tribunos plebi creabitis. præsto erit pontifex maximus, qui comitia habeat. Ingens assensus alacritasque cuncta approbantium fuit. Convelunt inde signa, profectique Romam certant cum obviis gaudio. armati per urbem silentio in Aventinum perveniunt. ibi extemplo, pontifice maximo comitia habente, tribunos plebis creaverunt, omnium primum A. Virginium, inde L. Icilium, & P. Numitorium avunculum Virginiae, auctores secessionis; tum C. Sicinium, progeniem ejus, quem primum tribunum plebis creatum in Sacro monte, proditum memoriæ est; & M. Duilium, qui tribunatum insignem ante decemviros creatos gesserat, nec in decemviralibus certaminibus plebi defuerat. Spe deinde magis, quam meritis, electi, M. Titinius M. Pomponius, C. Apronius, P. Villius, C. Oppius. Tribunatu inito, L. Icilius extemplo plebem rogavit, & plebs scivit, ne cui fraudi esset secessio ab decemviris facta. Confestim de consulibus creandis cum provocatione M. Duilius rogationem per tulit. ea omnia in pratis Flaminiis concilio plebis acta, quem nunc circum Flaminium appellant.

LV. Per interregem deinde consules creati, L. Valerius, M. Horatius, qui extemplo magistratum ceceperunt. quorum consulatus popularis sine ulla

Patrum injuria, nec sine offensione fuit. quidquid enim libertati plebis caveretur, id suis decedere opibus credebant. Omnium primum, cum veluti in controverso jure esset, tenerentur Patres plebiscitis, legem centuriatis comitiis tulere, *Ut, quod tributim plebes jussisset, populum teneret.* qua lege tribuniciis rogationibus telum acerrimum datum est. Aliam deinde consularem legem de provocatione, unicum præsidium libertatis, decemvirali potestate everfam, non restituunt modo, sed etiam in posterum muniunt, sanciendo novam legem, *Ne quis ullum magistratum sine provocatione crearet. qui creasset, eum jus fasque esset occidi: neve ea cædes capitalis noxæ haberetur.* Et cum plebem hinc provocatione, hinc tribunicio auxilio satis firmassent, ipsis quoque tribunis, ut sacrosancti viderentur, (cujus rei prope jam memoria aboleverat) relatis quibusdam ex magno intervallo cærimoniis, renovarunt; & cum religione inviolatos eos, tum lege etiam fecerunt, sanciendo, *Ut, qui tribunis plebis, ædilibus, judicibus, decemviris nocuisset, ejus caput Jovi sacrum esset: familia ad ædem Cereris, Liberi, Liberæque venum iret.* Hac lege juris interpretes negant quenquam sacrosanctum esse; sed eum, qui eorum cuiquam nocuerit, sacrum sanciri. Itaque ædilem prehendi ducique a majoribus magistratibus: quod etsi non jure fiat, (noceri enim ei, cui hac lege non liceat) tamen argumentum esse, non haberi pro sacrosancto ædilem: tribunos veteri jurejurando plebis, cum primum eam potestatem creavit, sacrosanctos esse. Fuere, qui interpretarentur,

eadem hac Horatia lege consulibus quoque & prætoribus, quia iisdem auspiciis, quibus consules, crearentur, cautum esse; iudicem enim consulem appellari. Quæ refellitur interpretatio, quod his temporibus nondum consulem iudicem, sed prætorem, appellari mos fuerit. Hæ consulares leges fuere. Institutum etiam ab iisdem consulibus, ut senatusconsulta in ædem Cereris ad ædiles plebis deferrentur; quæ antea arbitrio consulum supprimebantur vitabanturque. M. Duilius deinde tribunus plebis plebem rogavit, plebesque scivit: *Qui plebem sine tribunis reliquisset, quique magistratum sine provocatione creasset, tergo ac capite puniretur.* Hæc omnia ut invitis, ita non adversantibus, patriciis transacta; quia nondum in quenquam unum sæviebatur.

LVI. Fundata deinde & potestate tribunicia, & plebis libertate, tum tribuni aggredi singulos tutum maturumque jam rati, accusatorem primum Virginium & Appium reum deligunt. Cum diem Appio Virginio dixisset, & Appius, stipatus patriciis juvenibus, in forum descendisset; redintegrata extemplo est omnibus memoria foedissimæ potestatis, cum ipsum satellitesque ejus vidissent. Tum Virginio, *Oratio*, inquit, *rebus dubiis inventa est. Itaque neque ego accusando apud vos eum tempus teram, a cujus crudelitate vosmet ipsi armis vindicastis: nec istum ad cetera scelera impudentiam in defendendo se adjicere patiar. Omnium igitur tibi, Ap. Claudi, quæ impie nefarieque per biennium alia super alia es ausus, gratiam facio. unius tantum criminis,*

*ni judicem dices, te ab libertate in servitutem contra
 leges vindicias non dedisse, in vincula te duci jubeo.*
 Nec in tribunicio auxilio Appius, nec in judicio
 populi ullam spem habebat. attamen & tribunos
 appellavit: & nullo morante, arreptus a viatore,
Provoco, inquit. Audita vox una vindicæ libertatis,
 ex eo missa ore, quo vindiciæ nuper ab libertate
 dictæ erant, silentium fecit. Et, dum pro se quis-
 que, *Deos tandem esse, & non negligere humana*, fre-
 munt, & *superbiæ crudelitatisque, etsi seras, non leves*
tamen venire pœnas; provocare, qui provocationem su-
stulisset; & implorare præsidium populi, qui omnia ju-
ra populi obrisset; rapique in vincula egentem jure li-
bertatis, qui liberum corpus in servitutem addixisset;
 ipsius Appii, inter concionis murmur fidem popu-
 li Romani implorantis, vox audiebatur. Majorum
 merita in rempublicam domi militiæque comme-
 morabat: *suum infelix erga plebem Romanam stu-*
dium, quod æquandarum legum causa cum maxima
offensione Patrum consulatu abisset: suas leges, qui-
bus manentibus lator earum in vincula ducatur. Cete-
rum sua propria bona malaque, cum causæ dicendæ
data facultas sit, tum se experturum. In præsentia se
communi jure civitatis civem Romanum die dicta po-
stulare, ut dicere liceat, ut judicium populi Romani ex-
periri. non ita se invidiam pertimuisse, ut nihil in
æquitate & misericordia civium suorum spei habeat.
Quod si indicta causa in vincula ducatur, iterum se
tribunos plebei appellare, & monere, ne imitentur, quos
oderint. Quod si tribuni eodem fœdere obligatos se fa-
teantur tollendæ appellationis causa, in quam conspi-

rasse decemviros criminati sunt ; ait se provocare ad populum : implorare leges de provocatione , & consulares , & tribunicias , eo ipso anno latas. Quem enim provocaturum , si hoc indemnato indicta causa non liceat ? cui plebejo & humili præsidium in legibus fore , si Ap. Claudio non sit ? se documento futurum , utrum novis legibus dominatio , an libertas firmata sit : & appellatio provocatioque adversus injuriam magistratuum ostentata tantum inanibus literis , an vere data sit. ✕

LVII. Contra ea Virginius , unum Ap. Claudium & legum expertem & civilis & humani foederis esse , ajebat. Respicerent tribunal homines , castellum omnium scelerum : ubi decemvir ille perpetuus , bonis , tergo , sanguini civium infestus , virgas securesque omnibus minitans , Deorum hominumque contemtor , carnificibus , non licitoribus , stipatus , jam ab rapinis & cædibus animo ad libidinem verso , virginem ingenuam in oculis populi Romani , velut bello captam , ab complexu patris abreptam , ministro cubiculi sui clienti dono dederit. Ubi crudeli decreto nefandisque vindiciis dexteram patris in filiam armaverit : ubi , tollentes corpus semianime virginis , sponsum avunculumque in carcerem duci jusserit ; stupro interpellato magis , quam cæde , motus. & illi carcerem ædificatum esse , quod domicilium plebis Romanae vocare sit solitus. Proinde , ut ille iterum ac sæpius provocet , sic se iterum atque sæpius judicem illi ferre , ni vindicias ab libertate in servitutem dederit : si ad judicem non eat , pro damnato in vincula duci jubere. Ut haud ququam improbante , sic magno motu animorum , cum tanti viri supplicio suamet plebi jam nimia

libertas videretur, in carcerem est conjectus. tribunus ei diem prodixit. Inter hæc ab Latinis & Hernicis legati gratulatum de concordia Patrum ac plebis Romam venerunt; donumque ob eam Jovi optimo maximo coronam auream in Capitolium tulere parvi ponderis, prout res haud opulentæ erant, colebanturque religiones pie magis, quam magnifice. Iisdem auctoribus cognitum est, Æquos Volscosque summa vi bellum apparare. Itaque partiri provincias consules iussi. Horatio Sabini, Valerio Æqui Volscique evenere. Cum ad ea bella delectum edixissent, favore plebis non juniores modo, sed emeritis etiam stipendiis, pars magna voluntariorum, ad nomina danda præsto fuere. eoque non copia modo, sed genere etiam militum, veteranis admixtis, firmior exercitus fuit. Priusquam urbem egrederentur, leges decemvirales, quibus *tabulis duodecim* est nomen, in æs incisas in publico proposuerunt. Sunt, qui jussu tribunorum ædiles functos eo ministerio scribant.

LVIII. C. Claudius, (qui, perosus decemvirorum scelera, & ante omnes fratris filii superbiam infestus, Regillum, antiquam in patriam, se contulerat) is magno jam natu, cum ad pericula ejus deprecanda redisset, cujus vitia fugerat, fordidatus cum gentilibus clientibusque in foro prensabat singulos; orabatque, *Ne Claudiæ genti eam iniustam maculam vellent, ut carcere & vinculis viderentur digni: virum, honoratissimæ imaginis futurum ad posteros, legum latorem conditoremque Romani juris, jacere vincitum inter fures nocturnos ac latrones. Aver-*

terent ab ira parumper ad cognitionem cogitationemque animos: & potius unum tot Claudiiis deprecantibus condonarent, quam propter unius odium multorum preces aspernarentur. Se quoque id generi ac nomini dare; nec cum eò in gratiam redisse, cujus adversæ fortunæ velit succursum. Virtute libertatem recuperatam esse: clementia concordiam ordinum stabiliri posse. Erant, quos moveret sua magis pietate, quam ejus, pro quo agebat, causa. sed Virginius, sui potius ut misererentur, orabat, filiaque: nec gentis Claudiaë, regnum in plebem sortita, sed necessariorum Virginiaë & trium tribunorum preces audirent; qui, ad auxilium plebis creati, ipsi plebis fidem atque auxilium implorarent. Justiores hæ lacrimæ videbantur. itaque, spe incisa, priusquam predicta dies adesset, Appius sibi mortem conscivit. Subinde arreptus a P. Numitorio Sp. Oppius, proximus invidiaë, quod in urbe fuerat, cum injustæ vindiciæ a collega dicerentur. Plus tamen facta injuria Oppio, quam non prohibita, invidiaë fecit. testis productus, qui, septem & viginti enumeratis stipendiis, octies extra ordinem donatus, donaque ea gerens in conspectu populi, scissa veste tergum laceratum virgis ostendit, nihilum deprecans, quin, si quam suam noxam reus dicere posset, privatus iterum in se sæviret. Oppius quoque ductus in vincula est, & ante judicii diem finem ibi vitæ fecit. Bona Claudii Oppiique tribuni publicavere. collegæ eorum exsilio causa solum verterunt: bona publicata sunt. & M. Claudius, assertor Virginiaë, die dicta damnatus, ipso remittente Virgino ultimam pœnam, dimissus Ti-

bur exfulatum abiit : manesque Virginiae , mortuae quam vivae felicioris , per tot domos ad petendas poenas vagati , nullo relicto fonte tandem quieverunt.

LIX. Ingens metus incesserat Patres , vultusque jam iidem tribunorum erant , qui decemvirorum fuerant , cum M. Duilius tribunus plebis , inhibito salubriter modo nimiae potestatis , *Et libertatis* , inquit , *nostrae & poenarum ex inimicis satis est. itaque hoc anno nec diem dici cuiquam , nec in vincula duci quenquam sum passurus. Nam neque vetera peccata repeti jam obliterated placet , cum nova expiata sint decemvirorum suppliciis ; & nihil admissum iri , quod vim tribuniciam desideret , spondet perpetua consulum amborum in libertate vestra tuenda cura.* Ea primum moderatio tribuni metum Patribus demisit , eademque auxit consulum invidiam ; quod adeo toti plebis fuissent , ut Patrum salutis libertatisque prior plebejo magistratui , quam patricio , cura fuisset ; & ante inimicos satietas poenarum suarum cepisset , quam obviam ituros licentiae eorum consules appareret. Multique erant , qui mollius consultum dicerent , quod legum ab iis latorum Patres auctores fuissent. neque erat dubium , quin turbato reipublicae statu tempori succubuissent.

LX. Consules , rebus urbanis compositis , fundatoque plebis statu , in provincias diversi abiere. Valerius adversus conjunctos jam in Algido exercitus Aequorum Volscorumque sustinuit consilio bellum. Quod si extemplo rem fortunae commisisset , haud scio , an (qui tum animi ab decemvirorum infelicibus auspiciis Romanis hostibusque

erant) magno detrimento certamen staturum fuerit, Castris, mille passuum ab hoste positis, copias continebat. hostes medium inter bina castra spatium acie instructa complebant. provocantibusque ad proelium responsum Romanus nemo reddebat. tandem fatigati stando, ac nequidquam expectando certamen, Æqui Volscique, postquam concessum propemodum de victoria credebant, pars in Hernicos, pars in Latinos prædatum abeunt. relinquitur magis castris præsidium, quam satis virium ad certamen. quod ubi consul sensit, reddit illatum antea terrorem, instructaque acie ultro hostem lacessit. Ubi illi, conscientia quid abesset virium, detrectavere pugnam, crevit extemplo Romanis animus, & pro victis habebant paventes intra vallum. Cum per totum diem stetissent intenti ad certamen, nocti cessere: & Romani quidem pleni spei corpora curabant. Haudquaquam pari hostes animo nuntios passim trepidi ad revocandos prædatores dimittunt. recurritur ex proximis locis; ulteriores non inventi. Ubi illuxit, egreditur castris Romanus, vallum invasurus, ni copia pugnae fieret. & postquam multa jam dies erat, neque movebatur quidquam ab hoste, jubet signa inferri consul. motaque acie, indignatio Æquos & Volscos incessit, si victores exercitus vallum potius, quam virtus & arma tegerent. Igitur & ipsi efflagitatum ab ducibus signum pugnae accepere. Jamque pars egressa portis erat, deincepsque alii servabant ordinem, in suum quisque locum descendentes, cum consul Romanus prius, quam totis viribus fulta

constaret hostium acies, intulit signa: adortusque nec omnes dum eductos, nec qui erant, fatis explicatis ordinibus, prope fluctuantem turbam trepidantium huc atque illuc, circumspectantiumque se ac suos, addito turbatis mentibus clamore atque impetu, invadit. Retulere primo pedem hostes. deinde, cum animos collegissent, & undique duces, *vicțisne cessuri essent*, increparent, restituitur pugna. †

LXI. Consul ex altera parte Romanos *meminisse* jubebat, *illo die primum liberos pro libera urbe Romana pugnare. Sibimet ipsis victuros, non ut decemvirorum victores præmium essent. Non Appio duce rem geri, sed consule Valerio, a liberatoribus populi Romani orto, liberatore ipso. Ostenderent, prioribus præliis per duces, non per milites, stetisse, ne vincerent. Turpe esse, contra cives plus animi habuisse, quam contra hostes: & domi, quam foris, servitutem magis timuisse. Unam Virginiam fuisse, cujus pudicitia in pace periculum esset: unum Appium civem periculosa libidinis. at, si fortuna belli inclinet, omnium liberis ab tot millibus hostium periculum fore. Nolle ominari, quæ nec Jupiter, nec Mars pater passuri sint iis auspiciis condita urbi accidere. Aventini Sacrique montis admonebat, ut, ubi libertas parta esset paucis ante mensibus, eo imperium illibatam referrent: ostenderentque, eandem indolem militibus Romanis post exactos decemviros esse, quæ ante creatos fuerit: nec, æquatis legibus, imminutam virtutem populi Romani esse. Hæc ubi inter signa peditum dicta dedit, avolat deinde ad equites: Agite, juvenes, inquit, præstate virtute peditem, ut honore*

atque ordine præstatis. Primo concursu pedes movit hostem. pulsum vos, immixtis equis, exigite e campo. Non sustinebunt impetum. & nunc cunctantur magis, quam resistunt. Concitant equos, permittuntque in hostem, pedestri jam turbatum pugna: & perruptis ordinibus, elati ad novissimam aciem, pars libero spatio circumvecti, jam fugam undique capeffentes plerosque a castris avertunt, præterequantefque absterrent. Peditum acies, & consul ipse, visque omnis belli fertur in castra: captisque cum ingenti cæde, majore præda potitur. Hujus pugnae fama perlata non in urbem modo, sed in Sabinos ad alterum exercitum. In urbe lætitia modo celebrata est; in castris animos militum ad æmulandum decus accendit. Jam Horatius eos, excursionibus sufficiens, præliisque levibus experiundo assuefecerat sibi potius fidere, quam meminisse ignominia decemvirorum ductu acceptæ; parvaque certamina in summam totius profecerant spei. Nec cessabant Sabini, feroces ab re prioris anno bene gesta, laceffere atque instare, rogitantes, *Quid latrocinii modo procurfantes pauci recurrentesque tererent tempus, & in multa prælia parvaque carperent summam unius belli? Quin illi congregarentur acie, inclinandamque semel fortunæ rem darent?*

LXII. Ad id, quod sua sponte fati collectum animorum erat, indignitate etiam Romani accendebantur. *Jam alterum exercitum victorem in urbem rediturum; sibi ultro per contumelias hostem insultare. quando autem se, si tum non sint, pares hostibus fore?* Ubi hæc fremere militem in castris consul sensit,

concione advocata, *Quemadmodum*, inquit, *in Algido res gesta sit, arbitror vos, milites, audisse. qualem liberi populi exercitum decuit esse, talis fuit. consultu collegæ, virtute militum victoria parta est. Quod ad me attinet, id consilii animique habiturus sum, quod vos mihi effeceritis. & trahi bellum salubriter, & mature perfici potest. Si trahendum est, ego, ut in dies spes virtusque vestra crescat, eadem, qua institui, disciplina efficiam. Si jam satis animi est, decernique placeat, agitedum, clamorem, qualem in acie sublaturi estis, tollite hic, indicem voluntatis virtutisque vestræ.* Postquam ingenti alacritate clamor est sublatus, *Quod bene vertat, gesturum se illis morem, posteroque die in aciem deducturum*, affirmat. Reliquum diei apparandis armis consumtum est. Postero die simul instrui Romanam aciem Sabini videre, & ipsi, jam pridem avidi certaminis, procedunt. Prælium fuit, quale inter fidentes sibimet ambo exercitus, veteris perpetuæque alterum gloriæ, alterum nuper nova victoria elatum. Consilio etiam Sabini vires adjuvare. nam cum æquassent aciem, duo extra ordinem millia, quæ in sinistrum cornu Romanorum in ipso certamine impressionem facerent, tenere. quæ ubi, illatis ex transverso signis, degravabant prope circumventum cornu; equites duarum legionum sexcenti fere ex equis desiliunt, cedentibusque jam suis provolant in primum; simulque & hosti se opponunt, & æquato primum periculo, pudore deinde animos peditum accendunt. Verecundiæ erat, equitem suo alienoque Marte pugnare: peditem ne ad pedes quidem degresso equiti parem esse.

LXIII. Vadunt igitur in proelium ab sua parte omissum; & locum, ex quo cesserant, repetunt: momentoque non restituta modo pugna, sed inclinatur etiam Sabinis cornu. Eques inter ordines peditum tectus se ad equos recipit. transvolat inde in partem alteram, suis victoriæ nuntius: simul & in hostes jam pavidos, quippe fuso suæ partis validiore cornu, impetum facit. non aliorum eo proelio virtus magis enituit. Consul providere omnia, laudare fortes, increpare, sicubi segnior pugna esset. Castigati fortium statim virorum operam edebant: tantumque hos pudor, quantum alios laudes excitabant. Redintegrato clamore, undique omnes connisi hostem avertunt: nec deinde Romana vis sustineri potuit. Sabini, fusi passim per agros, castra hosti ad prædam relinquunt. ibi non socio- rum, sicut in Algido, res, sed suas Romanus, populationibus agrorum amissas, recipit. Gemina victoria duobus bifariam proeliis parta, maligne senatus in unum diem supplicationes consulum nomine decrevit. Populus injussu & altero die frequens iit supplicatum. & hæc vaga popularisque supplicatio studiis prope celebratior fuit. Consules ex composito eodem biduo ad urbem accessere, senatumque in Martium campum evocavere. ubi cum de rebus ab se gestis agerent, questi primores Patrum, senatum inter milites dedita opera terroris causa haberi. itaque inde consules, ne criminationi locus esset, in prata Flaminia, ubi nunc ædes Apollinis est, (jam tum Apollinarem appellabant) avocavere senatum. Ubi cum ingenti con-

fenſu Patrum negaretur triumphus, L. Icilius tribunus plebis tulit ad populum de triumpho conſulum, multis diſſuaſum prodeuntibus, maxime C. Claudio vociferante, *De Patribus, non de hoſtibus, conſules triumphare velle; gratiamque pro privato merito in tribunum, non pro virtute honorem, peti. nunquam ante de triumpho per populum actum, ſemper æſtimationem arbitriumque ejus honoris penes ſenatum fuiſſe. ne reges quidem majestatem ſummii ordinis imminuiſſe. ne ita omnia tribuni poteſtatis ſuæ imple- rent, ut nullum publicum conſilium ſinerent eſſe. Ita demum liberam civitatem fore, ita æquatas leges, ſc̄ ſua quiſque jura ordo, ſuam majestatem teneat.* In eandem ſententiam multa & a ceteris ſenioribus Patrum cum eſſent dicta, omnes tribus eam rogationem acceperunt. Tum primum, ſine auctoritate ſenatus, populi juffu triumphatum eſt.

LXIV. Hæc victoria tribunorum plebiſque prope in haud ſalubrem luxuriam vertit, conſpiratione inter tribunos facta, ut iidem tribuni reficerentur, &, quo ſua minus cupiditas emineret, conſulibus quoque continuarent magistratum. Conſenſum Patrum cauſabantur, quo per contumeliam conſulum jura plebis labefacta eſſent. *Quid futurum, nondum firmatis legibus, ſi novos tribunos per factiones ſuas conſules adorti eſſent? non enim ſemper Valerios Horatiosque conſules fore, qui libertati plebis ſuas opes poſtferrent.* Forte quadam utili ad tempus, ut comitiis præeſſet, potiſſimum M. Duilio forte evenit, viro prudenti, & ex continuatione magistratus invidiam imminentem cernenti. qui

cum ex veteribus tribunis negaret ullius se rationem habiturum, pugnarentque collegæ, ut liberis tribus in suffragium mitteret, aut concederet sortem comitorum collegis, habituris e lege potius comitia, quam ex voluntate Patrum; injecta contentione, Duilius, consules ad subsellia accitos cum interrogasset, quid de comitiis consularibus in animo haberent, respondissentque, se novos consules creaturos, auctores popularis sententiæ haud populares nactus, in concionem cum iis processit. Ubi cum consules, producti ad populum, interrogatique, si eos populus Romanus, memor libertatis per illos receptæ domi, memor militiæ rerumque gestarum, consules iterum faceret, quidnam facturi essent, nihil sententiæ suæ mutassent; collaudatis consulibus, quod perseverarent ad ultimum dissimiles decemvirorum esse, comitia habuit: &, quinque tribunis plebis creatis, cum præstudiis aperte petentium novem tribunorum alii candidati tribus non explerent, concilium dimisit; nec deinde comitorum causa habuit. Satisfactum legi ajebat, quæ, numero nusquam præfinito tribunis, modo ut relinquerentur, fanciret; & ab iis, qui creati essent, cooptari collegas juberet. Recitabatque rogationis carmen, in quo, *Si tribunos plebei decem rogabo, si qui vos minus hodie decem tribunos plebei feceritis: hi tum uti, quos sibi collegas cooptassint, ut illi legitimi eadem lege tribuni plebei sint, ut illi, quos hodie tribunos plebei feceritis.* Duilius, cum ad ultimum perseverasset, negando quindecim tribunos plebei rempublicam habere posse, victa col-

legarum cupiditate, pariter Patribus plebique acceptus, magistratu abiit. 7

LXV. Novi tribuni plebis in cooptandis collegis Patrum voluntatem foverunt. duos etiam patricios consularesque, Sp. Tarpejum, & A. Aterium, cooptavere. Consules creati, Lar Herminius, T. Virginius Coelimontanus, nihil magnopere ad Patrum aut plebis causam inclinati, otium domi ac foris habuere. L. Trebonius tribunus plebis, infestus Patribus, quod se ab iis in cooptandis tribunis fraude captum, proditum a collegis, agebat, rogationem tulit, *ut qui plebem Romanam tribunos plebi rogaret, is usque eo rogaret, dum decem tribunos plebi faceret*; infestandisque Patribus, unde Aspero etiam inditum est cognomen, tribunatum gessit. Inde M. Geganius Macerinus & C. Julius, consules facti, coitiones tribunorum adversus nobilium juventutem ortas, sine infestatione potestatis ejus, conservata majestate Patrum, sedavere. plebem, decreto ad bellum Volscorum & Æquorum delectu, sustinendo rem, ab seditionibus continuare: urbano quoque otio foris omnia tranquilla esse affirmantes, per discordias civiles externos tollere animos. Cura pacis concordiae quoque intestinae causa fuit. Sed alter semper ordo gravis alterius modestiae erat. quiescenti plebi ab junioribus Patrum injuriae fieri coeptae. ubi tribuni auxilio humilio-ribus essent, in primis parum proderat: deinde ne ipsi quidem inviolati erant, utique postremis mensibus, cum & per coitiones potentiorum injuria feret, & vis potestatis omnis aliquanto posteriore

anni parte languidior ferme esset: jamque plebs ita in tribunatu ponere aliquid spei, si similes Icilio tribunos haberet: nomina tantum se biennio habuisse. Seniores contra Patrum, ut nimis feroces suos credere juvenes esse; ita malle, si modus excedendus esset, suis, quam adversariis, superesse animos. adeo moderatio tuendæ libertatis, dum æquari velle simulando ita se quisque extollit, ut deprimat alium, in difficili est: cavendoque ne metuant homines, metuendos ultro se efficiunt: & injuriam a nobis repulsam, tanquam aut facere aut pati necesse sit, injungimus aliis.

LXVI. T. Quinctius Capitolinus quartum & Agrippa Furius, consules inde facti, nec seditionem domi, nec foris bellum, acceperunt: sed imminebat utrumque. Jam non ultra discordia civium reprimi poterat, & tribunis & plebe incitata in Patres, cum dies alicui nobilium dicta novis semper certaminibus conciones turbaret. ad quarum primum strepitum, velut signo accepto, arma cepere Æqui ac Volsci: simul quod persuaserant iis duces cupidi prædarum, biennio ante delectum indictum haberi non potuisse, abnuente jam plebe imperium. *eo adversus se non esse missos exercitus. dissolvi licentia militandi morem. nec pro communi jam patria Romam esse. quidquid irarum simultatumque cum externis fuerit, in ipsos verti. obcæcatos lupos intestina rabie opprimendi occasionem esse.* Conjunctis exercitibus Latinum primum agrum perpopulati sunt: deinde postquam ibi nemo vindex occurrebat, tum vero, exsultantibus belli auctoribus, ad moenia ipsa

Romæ populabundi regione portæ Esquilinæ accessere, vastationem agrorum per contumeliam urbi ostentantes. unde postquam inulti, prædam præ se agentes, retro ad Corlionem agmine iere, Quinctius consul ad concionem populum vocavit.

LXVII. Ibi in hanc sententiam locutum accipio : *Et si mihi nullius noxæ conscius, Quirites, sum, tamen cum pudore summo in concionem vestram processi. Hoc vos scire, hoc posteris memoriæ traditum iri, Æquos & Volscos, vix Hernicis modo pares, T. Quinctio quartum consule ad mœnia urbis Romæ impune armatos venisse. Hanc ego ignominiam, (quânquam jam diu ita vivitur, is status rerum est, ut nihil boni divinet animus) si huic potissimum imminere anno scissem, vel exilio, vel morte, si alia fuga honoris non esset, vitassem. Ergo, si viri arma illa habuissent, quæ in portis fuere nostris, capi Roma me consule potuit? satis honorum, satis superque vitæ erat: mori consulem tertium oportuit. Quem tandem ignavissimi hostium contempsere? nos consules? an vos Quirites? Si culpa in nobis est, auferte imperium indignis; & si id parum est, insuper pœnas expetite. Si in vobis, nemo Deorum nec hominum sit, qui vestra puniat peccata, Quirites; vosmet tantum eorum pœnitcat. Non illi vestram ignaviam contempsere, nec suæ virtuti confisi sunt; quippe toties fusi fugatique, castris exuti, agro multati, sub jugum missi, & se & vos noverat. Discordia ordinum est veneratorum urbis hujus, Patrum ac plebis certamina: dum nec nobis imperii, nec vobis libertatis est modus, dum tædet vos patriciorum, nos plebejorum magistratum, sustulere illi animos.*

Pro Deum fidem, quid vobis vultis? Tribunos plebis concupistis. concordiae causa concessimus. Decemviros desiderastis. creati passi sumus. Decemvirorum vos pertaesum est. coegimus abire magistratu. Manente in eosdem privatos ira vestra, mori atque exsulare nobilissimos viros honoratissimosque passi sumus. Tribunos plebis creare iterum voluistis. creastis. Consules facerestrarum partium, etsi Patribus videbamus iniquum; patricium quoque magistratum plebi donum fieri vidimus. auxilium tribunicium, provocationem ad populum, scita plebis injuncta Patribus, sub titulo æquandarum legum, nostra jura oppressa tulimus & ferimus. Qui finis erit discordiarum? Ecquando unam urbem habere, ecquando communem hanc esse patriam licebit? Victi nos æquiore animo quiescimus, quam vos victores. Satisne est, nobis vos metuendos esse? Adversus nos Aventinum capitur, adversus nos Sacer occupatur mons. Esquilias quidem ab hoste prope captas, & scandentem in aggerem Volscum hostem nemo submovit. in nos viri, in nos armati estis.

LXVIII. *Agitedum, ubi hic curiam circumfederitis, & forum infestum feceritis, & carcerem impleveritis principibus; iisdem istis ferocibus animis egredimini extra portam Esquilinam: aut, si ne hoc quidem audetis, ex muris visite agros vestros ferro ignique vastatos, prædam abigi, fumare incensa passim tecta. At enim communis res per hæc loco est pejore: ager uritur, urbs obsidetur, belli gloria penes hostes est. Quid tandem? privatae res vestrae in quo statu sunt? Jam unicuique ex agris sua damna nuntiabuntur. quid est tandem domi, unde ea expleatis? Tribuni vobis*

amissa reddent ac restituent? vocis verborumque quantum vobis, ingerent, & criminum in principes, & legum aliarum super alias, & concionum. Sed ex illis concionibus nunquam vestrum quisquam re, fortuna, domum auctior rediit. Ecquis retulit aliquid ad conjugem ac liberos, præter odia, offensiones, simultates publicas privatasque? a quibus semper non vestra virtute innocentiaque, sed auxilio alieno tuti sitis. At, Hercules, cum stipendia, nobis consulibus, non tribunis ducibus, & in castris, non in foro, faciebatis, & in acie vestrum clamorem hostes, non in concione Patres Romani horrebant; præda parta, agro ex hoste capto, pleni fortunarum gloriæque, simul publicæ, simul privatæ, triumphantes domum ad Penates redibatis. nunc oneratum vestris fortunis hostem abire sinitis. Hærete affixi concionibus, & in foro vivitis. sequitur vos necessitas militandi, quam fugitis. Grave erat in Æquos & Volscos proficisci? Ante portas est bellum. si inde non pellitur, jam intra mœnia erit, & arcem & Capitolium scandet, & in domos vestras vos persequetur. Biennio ante senatus delectum haberi, & educi exercitum in Algidum iussit. sedemus desides domi, mulierum ritu inter nos altercantes, præsentis pace lati, nec cernentes, ex otio illo brevi multiplex bellum rediturum. His ego gratiora dictu alia esse scio: sed me vera pro gratis loqui, etsi meum ingenium non moneret, necessitas cogit. Vellem equidem vobis placere, Quirites; sed multo malo vos salvos esse, qualicumque erga me animo futuri estis. Natura hoc ita comparatum est, ut, qui apud multitudinem sua causa loquitur, gratior eo sit, cujus mens nihil, præter publicum com-

modum, videt. nisi forte assentatores publicos, plebicos istos, qui vos nec in armis, nec in otio esse sinunt, vestra vos causa incitare & stimulare putatis. Concitati, aut honori, aut quæstui illis estis: & quia in concordia ordinum nullos se usquam esse vident, malæ rei se, quam nullius, turbarum ac seditionum, duces esse volunt. Quarum rerum si vos tædium tandem capere potest, & patrum vestrosque antiquos mores vultis pro his novis sumere, nulla supplicia recusato, nisi paucis diebus hos populatores agrorum nostrorum fusos fugatosque castris exuero, & a portis nostris mœnibusque ad illorum urbes hunc belli terrorem, quo nunc vos attoniti estis, transtulero.

LXIX. Raro alias tribuni popularis oratio acceptior plebi, quam tunc severissimi consulis, fuit. Juventus quoque, quæ inter tales metus detractionem militiæ telum acerrimum adversus Patres habere solita erat, arma & bellum spectabat: & agrestium fuga, spoliati que in agris & vulnerati, fœdiora iis, quæ subjiciebantur oculis, nuntiantes, totam urbem ira implevere. In senatum ubi ventum est, ibi vero in Quinctium omnes versi, ut unum vindicem majestatis Romanæ intueri; & primores Patrum dignam dicere concionem imperio consulari, dignam tot consulatibus anteaclis, dignam vita omni, plena honorum sæpe gestorum, sapius meritorum. Alios consules aut per prodicionem dignitatis Patrum plebi adulatos, aut acerbe tuendo jura ordinis asperiores domando multitudinem fecisse: T. Quinctium orationem memorem majestatis Patrum, concordiaque ordinum, & temporum inprimis habuisse. Orare eum collegam-

que, ut capefferent rempublicam: orare tribunos, ut uno animo cum consulibus bellum ab urbe ac mœnibus propulsari vellent, plebemque obedientem in rem tam trepida Patribus præberent: appellare tribunos communem patriam, auxiliumque eorum implorare, vastatis agris, urbe prope oppugnata. Consensu omnium delectus decernitur habeturque. Cum consules in concione pronuntiaissent, *Tempus non esse causas cognoscendi; omnes juniores postero die prima luce in campo Martio adessent; cognoscendis causis eorum, qui nomina non dedissent, bello perfecto se duros tempus; pro desertore futurum, cujus non probassent causam*: omnis juvenus affuit postero die. Cohortes sibi quæque centuriones legerunt: binâ fenatores singulis cohortibus præpositi. Hæc omnia adeo mature perfecta accepimus, ut signa, eo ipso die a quæstoribus ex ærario prompta delataque in campum, quarta diei hora mota ex campo sint: exercitusque novus, paucis cohortibus veterum militum voluntate sequentibus, manserit ad decimum lapidem. Insequens dies hostem in conspectum dedit, castraque ad Corbionem castris sunt juncta. Tertio die, cum ira Romanos, illos, cum toties rebellassent, conscientia culpæ ac desperatio irritaret, mora dimicandi nulla est facta. |

LXX. In exercitu Romano cum duo consules essent potestate pari; quod saluberrimum in administratione magnarum rerum est, summa imperii, concedente Agrippa, penes collegam erat: & prælatus ille facilitati submittentis se comiter respondebat, communicando consilia laudesque, & æquan-

do imparem sibi. In acie Quinctius dextrum cornu, Agrippa sinistrum tenuit: Sp. Postumio Albo legato datur media acies tuenda: legatum alterum Ser. Sulpicium equitibus præficiunt. Pedites ab dextro cornu egregie pugnare, haud segniter resistentibus Volscis. Ser. Sulpicius per mediam hostium aciem cum equitatu perrupit. unde cum eadem reverti posset ad suos, priusquam hostis turbatos ordines reficeret, terga impugnare hostium fatius visum est. momentoque temporis, in aversam incurfando aciem, ancipiti terrore dissipasset hostes, ni suo proprio eum prælio equites Volscorum & Æquorum exceptum aliquamdiu tenuissent. Ibi vero Sulpicius negare, *cunctandi tempus esse, circumventos interclusosque ab suis vociferans, ni equestre prælium connisi omni vi perficerent. Nec fugare equitem integrum satis esse: conficerent equos virosque, ne quis reveleretur inde ad prælium, aut integraret pugnam. non posse illos resistere sibi, quibus conferta peditum acies cessisset.* Haud furdus auribus dicta: impressione una totum equitatum fudere, magnam vim ex equis præcipitavere, ipsos equosque spiculis confodere. is finis pugnae equestris fuit. Tunc, adorti peditum aciem, nuntios ad consules rei gestæ mittunt, ubi jam inclinabatur hostium acies. nuntius deinde & vincentibus Romanis animos auxit, & referentes gradum perculit Æquos. In media primum acie vinci cœpti, qua permissus equitatus turbaverat ordines. Sinistrum deinde cornu ab Quinctio consule pelli cœptum; in dextro plurimum laboris fuit. Ibi Agrippa, ætate viribusque fe-

rox, cum omni parte pugnæ melius res geri, quam apud se, videret, accepta signa ab signiferis ipse inferre, quædam jacere etiam in confertos hostes cœpit. Cujus ignominia metu concitati milites, invasere hostem. ita æquata ex omni parte victoria est. Nuntius tum a Quinctio venit, victorem jam se imminere hostium castris: nolle irrumpere, antequam sciat debellatum & in sinistro cornu esse. Si jam fudisset hostes, conferret ad se signa, ut simul omnis exercitus præda potiretur. Victor Agrippa cum mutua gratulatione ad victorem collegam castraque hostium venit. ibi paucis defendentibus, momentoque fufis, sine certamine in munitiones irrumpunt: prædaque ingenti compotem exercitum, suis etiam rebus recuperatis, quæ populatione agrorum animæ erant, reducunt. Triumphum nec ipsos postulasse, nec delatum iis ab senatu, accipio: nec traditur causa spreti aut non sperati honoris. Ego quantum in tanto intervallo temporum conjicio, cum Valerio atque Horatio consulibus, qui præter Volscos & Æquos Sabini etiam belli perfecti gloriam pepererant, negatus ab senatu triumphus esset: verecundiæ fuit pro parte dimidia rerum consulibus petere triumphum: ne etiam, si impetrassent, magis hominum ratio, quam meritum, habita videretur.

LXXI. Victoriâ honestam ex hostibus partam, turpe domi de finibus sociorum iudicium populi deformavit. Aricini atque Ardeates de ambiguo agro cum sæpe bello certassent, multis invicem cladibus fessi, iudicem populum Romanum cepere. Cum

ad causam orandam venissent, concilio populi a magistratibus dato, magna contentione actum. Jamque editis testibus, cum tribus vocari, & populum inire suffragium oporteret, confurgit P. Scaptius de plebe, magno natu: & *Si licet*, inquit, *consules, de republica dicere, errare ego populum in hac causa non patiar.* Cum, ut vanum, eum negarent consules audiendum esse, vociferantemque, *prodi publicam causam*, submoveri jussissent, tribunos appellat. Tribuni, ut fere semper reguntur a multitudine magis, quam regunt, dedere cupidæ audiendi plebi, ut, quæ vellet, Scaptius diceret. Ibi inquit, *Annum se tertium & octogesimum agere, & in eo agro, de quo agitur, militasse, non juvenem, vicesima jam stipendia merentem, cum ad Coriolos sit bellatum. Eo rem se vetustate obliteratedam, ceterum suæ memoriæ infixam, afferre: agrum, de quo ambigitur, finium Coriolanorum fuisse; captisque Coriolis, jure belli publicum populi Romani factum. Mirari se, quoniam more Ardeates Aricinique, cujus agri jus nunquam usurpaverint incolumi Coriolana re, cum se a populo Romano, quem pro domino judicem fecerint, intercepturos sperent. Sibi exiguum vitæ tempus superesse: non potuisse se tamen inducere in animum, quin, quem agrum miles pro parte virili manu cepisset, eum senex quoque voce, qua una posset, vindicaret. Magnopere se suadere populo, ne inutili pudore suam ipse causam damnaret.*

LXXII. Consules cum Scaptium non silentio modo, sed cum assensu etiam, audiri animadvertissent, Deos hominesque testantes flagitium ingens

feri, Patrum primores arcessunt. cum his circumire tribunos, orare, *Ne pessimum facinus pejore exemplo admitterent iudices, in suam rem litem vertendo; cum præsertim, etiamsi fas sit, curam emolumenti sui iudici esse, nequaquam tantum agro intercipiendo acquiratur, quantum amittatur alienandis injuria sociorum animis. Num famæ quidem ac fidei damna majora esse, quam quæ æstimari possent. Hoc legatos referre domum: hoc vulgari: hoc socios audire: hoc hostes. quo cum dolore hos? quo cum gaudio illos? Scaptione hoc, concionali seni, assignaturos præterire finitimos populos? Clarum hac fore imagine Scaptium: populum Romanum quadruplatoris & interceptoris litis alienæ personam laturum. quem enim hoc privatae rei iudicem fecisse, ut sibi controversam adjudicaret rem? Scaptium ipsum id quidem, etsi præmortui jam sit pudoris, non facturum. Hæc consules, hæc Patres vociferantur. sed plus cupiditas & auctor cupiditatis Scaptius valet. Vocatae tribus judicaverunt, agrum publicum populi Romani esse. Nec abnuitur ita fuisse, si ad iudices alios itum foret: nunc haud sane quidquam bono causæ levatur dedecus iudicii. idque non Aricinis Ardeatibusque, quam Patribus Romanis, foedius atque acerbius visum. Reliquum anni quietum ab urbanis motibus & ab externis mansit.*



PA
6452
A2
1784
v.1

Livius, Titus
Historiarum libri qui
supersunt omnes

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

